










24

$\frac{1}{2}$ lbs



IACOBI PHOLII /

DE BENEFICENTIA

LIBRI TRES.


12. 278-13

24

124

AD SEBASTIANVM I. PORTVGALLIAE,
ET ALGARBIORVM REGEM AVGVSTISS.

Coll. Rom. Soc. Jesu. catal. inscrip.




R O M A E.
Apud Valerium Doricum.
M D L V I I.
B. 9.

IACOBI PHOII

DE BENEFICENTIA

LIBRI TERTII

AD SEBASTIANVM I. PORTVGALICVM
ET AGARIONVM REGVM AVGVSTISS.



Apoth. Valerian. Daticum.
M. D. C. C. L. I.

CATHERINAE AVSTRICAE
PORTVGALLIAE,
ET
ALGARBIORVM REGINAE
AVGVSTISS.

IACOBVS PHOLIVS S. P. D.



IOANNI Portugalliae, atq; Algarbiorum regi hos de Beneficentia libros pridem dicaueram; quo uno ex omnibus, qui hac aetate reges essent, cum haec scriberem, exemplo praeclarissimo ad hanc laudem usus eram. Verum, cum nuper imprimendos curarem, Romam de eius morte allatus rumor & me de optimi regis iam etura haud mediocri dolore affecit; & ut animi mei propositum mutarem, cōegit: effecitq; ut noui regis nomine ederem, quos nondum editos mortuo nuncupare non licebat. Quod quidem & eius maximis erga rem. p. Christianam meritis, & tuae praeclaræ uirtuti, dignitatique amplissima à me tribui æquum erat, & mei simul instituti ratio postulabat. Nam cur aut officium istuc propè debitum regis tam benefici pijs manibus non persoluerem? aut de regina omnium foeminarum præstantissima, & Ioanne rege coniuge dignissima aliqua ratione promereri non stude-

rem? aut ego, qui ceteros instruxi ad beneficentiam, ei Regi aliz
quid non prodesse conderer, qui recte præcipienti obtemperans
posset aliquando is effici, quem te in primis, auiq; simul fratre
uiro sanctissimo, sapientissimoq; puerum ad uirtutem, rerumq;
Lusitanarum gubernacula instituentibus futurum speramus?
Itaq; dedi operam, ut uolumen ad eum perferretur, ratus me
& illi munus quidem præstantius missurum, quàm si equos, aus
rumq; misissem; & tibi gratissimum facturum: quòd ille, cum pri
mum adoleuerit, poterit aui sui hominis clarissimi magna cum
admiratione legere, & audire, tu coniugis dulcissimi egregias
laudes iucundè tecum ipsa recordari: & quòd ille habebit exem
plar, in quod intuens se ipsum ad res magnas excitabit, semper
ampla spectabit; tu facta eius præclara tecum communia simul
agnosces: ut eadem propè tibi debeatur laus, quæ illi: qui semper
secum te habuit & omnium consiliorum suorum participem, &
in rerum administratione sociam laborum. Tu uero munus, quod
à me in regem proficiscitur, grato animo, quæso, accipias, ut &
humanitas tua, & magnitudo animi, & fortunæ postulat am
plitudo: hoc si abs te impetrabitur, mihi planè fiet illud multò &
ornatius, & maius.

EX PRIMO LIB.

- P**roximum. Pagina 9. Vers. 2
 Quibus de rebus differendum: Beneficentiae uis
 quanta sit. Pagina 9. Vers. 2
 Habitum esse, quam graeci *εὐεργεσία* uocant. P. 10. V. 25
 Quae sit effectrix causa beneficentiae, & reliqua
 quantum uirtutum. P. 12. V. 12
 Quae sit materies beneficentiae. P. 14. V. 22
 In quo differat à liberalitate beneficentia:
 Quid sit beneficentia. P. 17. V. 15
 Beneficentiae laus. P. 17. V. 16
 Hominem rerum procreatarum, quae sensibus
 percipiuntur, esse finem. P. 19. V. 7
 Quo pacto homo aliarum rerum sit finis. P. 23. V. 2
 Qui sit hominis finis Stoicorum sententia. P. 23. V. 25
 Contra Epicurum. P. 26. V. 5
 Naturam beneficentiae melius à Stoicis, quam
 à cæteris philosophis, fuisse intellectam. P. 29. V. 21
 Deo actionem tribui: Hominis actionem magis,
 quam contemplationem, propriam uideri. P. 32. V. 9
 Habitum, figuramq; corporis humani aptiorem
 ad actionem uideri: duplex hominis functio:
 quid rationis nomine designetur. P. 38. V. 10
 Cur non sit actio brutorum: quo pacto absoluta

- tur: Quod uoluntas actionem regat. P.41. V. 3
- Actionem in optimis haberi. P.42. V. 3
- Cur tantum duplex uitæ genus homini assignetur. P.43. V. 10
- Duplex animæ rationalis genus: Vnde in dijudicatione ueri boni error: Cur de summo bono uaria philosophorum opiniones extiterint: Quæ sit in actione ueritas: & ueritatis huius percipiendæ causa excutendos effemores. P.44. V. 8
- Virtutum moralium laus: has reliquis uirtutibus à Socrate præferri: contemplantis studium, quod cæteris profit, laudari. P.47. V. 27
- Quibus, quot'ue causis difficilis sit uirtutum comparatio. P.51. V. 23
- Ad actionem uirtutem moralem maximè necessariam uideri. P.58. V. 2
- Beneficentiam esse actionis ornamentum: & apologeto, qui est de discordia inter se corporis, & membrorum declarari, magis esse secundum naturam alteri prodesse, quàm non obesse. P.60. V. 4
- Perniciosissimum esse, nolle hominem, nisi, quod commodum sibi est, persequi: Humanitatis laus: loci cuiusdam Aristotelici declaratio. P.62. V. 2
- Eorum, quæ dicta sunt, epilogus quidam breuis: & quod in agendo positum est, uitæ genus

optimum Aristoteli uideri. P. 65. V. 27

Contemplationem in hac uita absolui non posse. P. 68. V. 11

A. Christa homines ad bonos mores incitari,
& nimiam inuestigandarum rerum curam
damnari. P. 69. V. 19

Qui sit uerborum intellectus, quibus Martham
Christus uidetur redarguere. P. 71. V. 16

Qui sit hominis finis, & huius animam esse
immortalem. P. 73. V. 24

EX SECVNDOLIB.

P. Ræcennium.

Beneficentiam cum iustitia communi conferre.

Utrum quid hæc inter se differant. P. 81. V. 4

Maleficiam opponi beneficentie. P. 89. V. 18

Vnde beneficentia haberi, ut sit exacta uirtus.

Utrum difficillimum sit beneficium fieri; Bene-
ficientiam pro uirium facultate existere. P. 92. V. 8

Deo beneficentiam tribui, deq; eius contra Pe-
ripateticos prouidentia. P. 96. V. 16

In distributione bonorum quo pacto differat à
iustitia beneficentia. P. 102. V. 24

Qui benefici sint, & qui non. P. 107. V. 4

Quibus rebus laus ex beneficentia quærenda sit ab
his, qui in ciuitate libera magistratus creantur. P. 116. V. 13

Quæ sint regibus seruanda, benefici ut sint: laus
Ioannis III. Lusitaniæ regis: Qua ratione
principes, secundum Platonem aut philosophos
esse, aut philosophari oporteat. P. 142. V. 10

EX TERTIO LIB.

Proœmium.

Quo pacto colenda sit beneficentia à priuatis:

Quemlibet beneficium esse posse: Quam latè
pateat uis benemerendi de altero: Beneficia
maiora quæ: Quæ seruanda sint in collatione
beneficiorum

P. 167. V. 21

In quos conferenda sint beneficia..

P. 204. V. 13

Quod genus improbitatis omnino excludatur à

beneficentia: & quod non. P. 212. V. 21

Qui sit iniustus.

P. 221. V. 10

Reprehendi Ciceronem; qui dixerit impium esse

defendendum: & quando facere hoc liceat. P. 222. V. 1

An in eos, qui inimici sint, beneficentia exercenda.

P. 224. V. 17

An in ingratos conferenda sint beneficia: horum

duo genera: qui non sint ingrati, & qui
sint.

P. 228. V. 10

De natura benefici, deq; eius laudibus.

P. 232. V. 14

IACOBI PHOLII DE BENEFICENTIA
LIBER PRIMVS.

AD SEBASTIANVM I. PORTVGALLIAE,
ET ALGARBIORVM REGEM AVGVSTISS.



V M *mecum ipse cogito, quàm multa sint hominum studia, et artes, quæ hos ornent in primis, & claros reddant, non possum magnopere non mirari, Sebastiane Portugallicæ, atq; Algarbiorum Rex Augustiss. in tanta multitudine, quæ propè infinita est, esse tam paucos; qui, quod homini soli propositum est, præmium ex industria, & uirtute sibi quærant. Neq; enim culpa naturæ ulla debilitata est uis humanæ mentis: neq; in uno, eodemq; genere laudis omnibus exercendi ingenij ratio proponitur: ut, si cui minus id placeat, nihil præterea ei reliquum sit, quò se conferre possit: & (quò minus uenia dignos putes) cernunt iter maximis præclarorum uirorum laboribus sibi ad laudem patefactum, facillè hanc ipsam affecuturi: nisi aut otium auocaret à labore, aut uoluptas impediret. Atq; ut omitтам nunc cætera, quæ nonnulli natura duce, aut consilio, & instituto quodam probant, & sequuntur, mihi sanè nihil maius esse uidetur ad gloriam, aut plus unumquemq; immortalitati consecrare posse, quàm illud profiteri, quod non ignobiles*

quondam philosophi in dijs, quos ij tum colebant, tanquam excelsus, ac præclarum esse uoluerunt. Istud uero est, beneficium omni hominum generi se uelle præstare. Neq; enim quicquam est aut ad rerum humanarum conseruationem tam necessarium, aut tam natura ipsa perfectum, quàm eum imitari uelle, qui, quem procreauit, solem patiatur ad improborum etiam communem usum orbi terrarum illucescere. Itaq; ut ego quoq; aliquid prodessem, qui alia ratione minus poteram, operæpretium esse duxi, hominem beneficium ad eius exemplar instituere; cuius erga humanum genus innumera, eaq; omnium amplissima beneficia extiterunt. Id autem cum in tribus explicaui sem libris, eos tuo nomini nuncupare uolui: ut, cum per ætatem liceret, posses discere, unde regi uera paretur laus; & eo nomine, quod tibi diuinitus inditum est, semper digna facta cogitare. Quod planè futurum spero, si uerum illud sit, fortes creari fortibus; aut si eius, qui te regnorum hæredem reliquit, Ioannis aui tui regis præstantissimi laudum quoq; hæres esse uoles. Id si firmiter olim retinebis patrimonium, tum te cum esse fingito, qui est à me hoc sermone institutus; cuiusq; in eodem auo tuo uiuam propè effigiem expressam mihi habere contigit. Huc autem ijsdem artibus te contendere oportebit, quæ in illo admirabiles fuerunt, liberalitate scilicet, iustitia, & pietate. Quis enim fuit tanto, & tam laudato rege ad iuuandum propensior, & liberalior? quis continentior, & æquior? quis ueræ pietatis amantior? Huius nimirum consilio, studio, opera, & exemplo ad sacrosanctæ religionis cultum quam plurimorum hominum traductæ mentes pridem iter ad cælum sibi muniuerunt. Qua in re non Lusitani modo, sed multæ etiam in

Africa, & in India gentes sentiunt beneficium, quas non multò antè nomini Christiano inimicas esse uidimus. Hoc insignis est opus industriæ: hoc pietatis argumentum. In id unum qui incumbit: qui studia sua, & cogitationes omnes eò confert; ut, cum pro uiribus effecerit, ne exteris quicquam desit eorum, quæ caduca, & mortalis hæc uita multis coacta necessitatibus postulat, nihil præterea non agat, quo in primis mortales omnes adipiscantur æternam, & immortalem uitam, quæ unius beneficentiæ amplissimus, & iucundissimus est fructus, hunc ego ab immortali Deo hominum saluti consulente in terras è cælo demissum esse dico. Neque enim fieri istuc potest absque ueris, atque excellentibus animi bonis, quæ uix pauci assequuntur. estque præterea, ut omnium pulcherrimum, ita etiam difficillimum, alijs æquè, ac tibi ipsi, bene esse, sic uelle, ut in his iuuandis omnia facias: labori nulli parcas. Olim, cum tenebræ essent, his beneficijs contenti fuere homines, quæ fragilis requirit natura: quorum auctores rettulerunt in deos, ueram æternitatem adumbrantes, quæ præsertim ex collatione beneficiorum in omnes mox futura erat: aut, nec opinantes ipsi, referentes, quæ fuerat antè, quàm à uera pietate desciuissent. post receptam lucem, sequuti sunt innumerabiles: quorum alij profusione sanguinis, alij uitæ continentia, & charitate erga omnes & sibi, & reliquis etiam, quibus exempla sequi placuit, aditum ad cælum aperuerunt. hos uerius deos esse dicimus, quàm, quos stulta consecrauit antiquitas: hos querimus beneficos homines, & uniuerso populo Christiano salutares. Quibus quidem (siquis uolet esse rerum æquus æstimator,) nostris demum temporibus, & animo, & uoluntate par extitit Paulus hic IIII

Pont. Max. Est enim malarum artium hostis adeo acer, bonarum cultor egregius, ut, cuius reuocandæ initio pontificatus sui fundamenta iecerat, disciplinæ ueteris esset iam in rep. Christiana pars magna restituta, nisi perfidus Satan hominis sanctissimi optima consilia disturbasset. Quanquam, si tandiu uixerit, quandiu & temporum postulat necessitas, & boni uiri optant, ac precantur, sperandum omnino est huius opera propediem fore aliquem horum malorum finem. Id cum Dei Opt. Max. clementia, & ope simul euenerit, planè affirmare licet, tum re ita præstaturū, ad quæ magno studio uidemus ipsum contendere, ut solida ex beneficentia laudem sit adepturus. De qua ut aliquid scriberem, Perusia cum essem, compulerunt me Iulius Feltrius Cardinalis, & Antonius Triuultius Tauroentij Episcopus; quem hoc anno, quo hæc edenda curauī, idem Pont. in collegiū Cardinalium magno bonorum omnium consensu cooptauit. res autem initium sic habuit.

Nam, cum Antonius solenni, ac festo die, quo die sanctè, pieq; à nobis duorum omnium colitur memoria, esset unà cum Iulio legatum in Umbria agente feriatu, eoq; tum uenissē ad Iulium, ubi me conspiciatus est, peropportunè, inquit, Iacobe huc uenis. hodie enim colloquendi inter nos tantum ocij nacti sumus, quantum in maximis muneris huiusce laboribus optare uix licuit: modo relictis horum domesticorum lusibus uenimus in hanc bibliothecam Iulij. Itaq; non uideo, quī sic desides esse, aut nihil eorum omnino agere nos deceat, ex quibus, honestum ut sit otium, efficitur. noui enim, tali, ac tessera non minus tibi displicent, quàm nobis: quī, quæ oblectent, potiora semper habes: sed eas in hemicyclo

hoc licet. Velim nobis nunc dicas (nam de hoc ego te percontari
dudum antè cogito) cum multa sint hominum studia, atq; uiuens
di rationes, quam tu unam ex omnibus optimam, & antepone-
dam cæteris esse arbitrare. alios (ut exempli causa ex his quas
dam recenseam) belli delectant artes moderandæ Reip. studium
distinet alios perdifficili labore occupatos: multis præcipua est
domesticarum rerum cura: nonnulli doctrinam probant sibi ipsis
tantum degentes. tanta nimirum uarietas studiorum, ad quam
trahit ferè uniuersumq; aut cupiditas gloriæ, aut priorum
ratio commodorum; suspensos quosdam tenet interdum, ut non
sat queant decernere, quodnam uitæ institutum sit ipsis diu, mul-
tumq; cogitantibus capiendum. Ita est, inquam, Antoni, ut dicis.
Verum, quod scire uis, id eiusmodi est, ut non facile explicari ab
eo possit, quem sic imparatum offendas. aliquod ad hæc meditati
spacium dedisses: minus enim mihi foret lubricus hic ad respon-
dendum locus. Non est, quod tergiuer seris, inquit, aut horum si-
miles parum esse memorem, quem quotidie uidemus ex ueterum
libris hæc ipsa, & multa repetentem, atq; animo assidue uersan-
tem, quibus beata continetur uita. aut, si pergas abnuere, nimis cu-
pidum laudis ducemus: qui, ut abs te exorari hoc sinas, eius præ-
conem adhiberi uelle uideare. Quoniam, inquam, uim quandam
uideris afferre, nec auctoritati tuæ parere non possum, rationem
quandam uiuendi instituo: quam præcipua alienæ utilitatis cura
(hunc enim sibi finem propositum hæc habet) à cæteris se iungere
posse uideatur. statuoq; nihil aut naturæ humanæ conuenientius,
magisq; proprium, quandiu hæc corpore prædita est: aut aptius ad
conciliandam beniuolentiam multorum; aut ad memoriam nomi-

nis propagandam præstabilius uideri, quam illud unumquemque uelle profiteri, ut charitate ea, quam natura ipsa homini indidit, omnes complectendo mortales, studeat pro uiribus collatione beneficiorum prædesse quamplurimus: actionemque, quæ maximè id præstat, contemplationi præferri oportere. Tu quid ad hæc: aut potius, quid ipse sentias, scire aueo. Egregium, inquit, & laudandum ego quoque id, quod dixti, esse fateor. Cur enim non extollam uerbis, qui, si minus assequar, at conatu tamen (Episcopum enim me uides) ex ipso uitæ instituto id ipsum pridem cæteris anteferre uidear? Sed uide, ne minus uerum id sit, quod de actione dixisti: quo sublato, uereor, ne de eo quoque, quod prius statuisti, secus nobis sit omnino sentiendum. Quid enim dices ad illos, qui actionem contendunt cum peruestigatione, ac scientia cum earum rerum, quas multis integumentis natura inuoluit, tum uero diuinarum nullo pacto esse conferendam, asserentes uno contemplandi munere Deo ipsi, naturæque principi homines esse quamsimillimos? Quare, si contrà, quàm uidemus plerosque sentire, potes eius, qui se ad agendum confert, partes defendere, nihil est. (uidetur enim beneficentia omnino actionem exigere) tua ea de re, quam scire uolumus, sententia firmitus: si illi uicerint, eam scilicet te reuocare oportebit. Aut, ut uerum sit, quod ais, nulla re magis, quàm hoc promerendi studio aut magnam acquiri gratiam, aut famam extendi, illud quidem certè fateri necesse erit, aliquid inueniri, quod magis secundum hominis naturam esse uideatur. huiusmodi enim id est, quod in uniuscuiusque natura optimum esse cernitur: ut hac una ratione prior sit contemplatio, actio posterior. Possum, inquam, Antoni, istuc ipsum experiri, modo ne futus

ra hæc sint ingrata Iulio. Neq; uero hoc dico, quòd ad uirtutem
pridem incensum non uideam, aut optinarum artium amore flaz
grantem, (est enim, siquis alius, & optimis moribus ornatissimus,
& cultor musarum) sed uereor, ne grauias, quibus solitus est
hic uacare, facile auertant leuiora contemnentem. Tum Iulius,
me quoq; otiosum, inquit, esse fingito, quum Antonium rerum gra
uiorum cura uacantem uideris. Vtriusq; enim propè conditio est
par, si laborem spectes: operæ tamen plus dat. Antonius in iuris
dicundi exercitationem, qui rei huiusce disciplinam profiteatur. te
autem nihil mihi gratius facturum scito: qui, nisi tulisset occasio,
ut nunc minus cogitans essem de hoc loquentem auditurus, ultro
ipse omnino aliàs uel nolentem compulisset. Quamobrem obsec
ro te, ut, quantum potes, enitare uel tueri, quod potissimum tibi
probari ostendis, uel potius omissa illa, quæ plerumq; homines ad
mentiendum trahit, ostentatione ingenij, ueritatem in tanta con
trouersia omnem, quam assequi potueris, aperire. Nam, si (id quod
facturum spero) actionem contemplationi præferendam esse de
monstraueris, uidelicet illud effugere non poteris, quin de illo al
tero præcepta aliqua des: quibus &, id ipsum quale sit, explicetur;
& ipse quoq; aliquid pro sis, qui uiuendi cæteris auctor esse uelis.
Ego uerò iudicium fratris mei lætabor in eo comprobari, quòd
per adolescentem ad eum me honorem euocari tulerit; in quo loci
multum esset ad agendum industriæ, quætiis ad contemplandum
parum. Quanquam intelligo homines huius ordinis amplissimi
nonnullos omiſſis cæterarum rerum curis honesto otio olim fuisse
contentos; quorum auctoritas (fuere enim magni, & excelle ntes
uiri) interdum dubium me facit, duarum uiuendi rationum, quæ

homine dignæ habeantur, utram ætas hæc mea persequatur. Atqui, si exempla, inquam, Iuli, te sequi oporteat, in quibus inest uis maxima uel ad deliberandum, uel ad agendum, ut illud rectè nonnunquam,

Quod exemplo fit, id sibi licere putant, domi habes magistros uiuendi, ac duces: in quos si intueri uelis, des liberandi rationem omnem explicatam habes. Illud scito, atq; inde tibi exemplum sumito clarissimum, Iulio II Pont. Max. (Id nomen hereditarium adhuc tu ex eo habes, reliqua fortassis tua uirtus tibi olim dabit) traductam fuisse uitam omnem uel in procurandis commodis amicorum, ac priuatorum, uel in administratione rerum publicarum: in qua præ se tulerit & scientiam gubernandi singularem, & magnam animi integritatem: refertam esse eius omni genere monumentorum Italiam: quæ pro eius salute, aut dignitate tot exhausserit labores, adhuc extitisse neminem: atq; hæc omnia perfecisse non spe præmiorum, quæ nulla tantæ uirtuti inueniri poterant, sed sola rectefactorum conscientia contentum: ex qua eam, quæ optimo cuiq; præmium est amplissimum, immortalitatem fuerit ille cōsequutus. Illi autem, quorum te dicis exemplo moueri, si quorundam periculorum metus, aut labores perterruerunt, quos aliquando maximos subire cogit amplitudo muneris: si quietis pellexit amor, minus fortasse reprehensione carent: qui officio, & dignitati suæ deesse uisi sunt, ea reformidantes, quæ pati suprema est pietatis laus. Id autem tu modo melius ex me cognosces. Quanquam difficile istuc mihi fore uideo: salutandi enim uos causâ, non disputandi, huc ueneram. Expone iam nobis, inquit Antonius, quæ habes: continenti, ac perper-

perpetua oratione utare licet; loquentem nemo unquam, aut raro interpellabit.

Rursus inquam affirmo in delectu uitæ, quam sequi uolumus, illud huius genus ab unoquoq; alteri anteponi debere, unde in alios utilitas existat maior; atq; eò rationes ferè omnes referri oportere, ut cæteris semper pròdesse uelimus. Itaq; ei, qui est à nobis hoc sermone instituendus, quæ uitæ ratio conueniat, & quibus artibus instructus esse debeat, ante docebimus: dein ea, quæ magis necessaria uidebuntur, ad beneficentiam præcepta afferemus. De qua planè uolumus ita differere, ut uim eius omnem latissimè complectamur: cum, qui ante hacce de re disputationum, eam magis intellexisse, quàm oratione explicasse uideantur: tametsi ne sat quidem omnia fortassis introspexerunt. Verum, id totum quale sit, ex his manifestum fiet, quæ dicentur. Potesť hoc quidem fieri à nobis, aut etiam debet; qui pro nostra facultate ingenij, quantulacumq; ea est, alijs emolumentum aliquid afferre uolumus. Nam et duces habemus; à quibus initium itineris nobis monstratum est, exitum ipsis aut nolentibus, aut minus fortasse animaduertentibus: & uirtutum omnium affinitas quædam, atq; inter se colligatio tanta, quanta esse potest, liberiores nos facit. Impellit præterea ipsius natura; quæ est cum per se illustris, & clara; tum uerò illud commune bonum, quo omnes inter se conueniunt, statim uel ipso nomine una complecti uidetur: bene enim facere nos uirtus omnis cogit, qua excoluntur animi mores, & ad bonam frugem perducuntur. Cumq; sint præstantissima, & maximè insignes, quæ animum ad contemplationem rerum festinantem interdum, inbiantemq; trahunt, bonos homines faciunt tantum uirtutes hæc, quæ morales dicuntur

tur. Quare iure omnium hanc poterimus dicere esse præclarissimam: quæ id honestum atq; excellens (hoc autem est bonum) quod est omnibus commune, tanquam proprium sibi uenidicari: ut ex hoc uno ipsi intelligeremus, ex omnibus aliarum uirtutum functionibus nullam ea, quæ ex hac manet, honestiorem uideri. In primis uerò locupletem ut faciamus beneficentiam, suisq; ipsam decoremus ornamentis, multò alacriores trahit, uera, sacrosanctaq; religio: quam tueri, ac uereri & omnes debent, & nos magis, qui sacris initiati sumus. Is enim, quem deum, & hominem simul colimus, & sermone, & uitæ exemplo cæteris hanc ita præfert, ut summum hominis, æternumq; bonum (quantum quidem ad eius adeptionem imbecillitas humana potest) beneficentiæ potissimum uoluerit acceptum referri: quo quidem eorum, quæ nunc asserimus, testè sic utimur, ut nulla nec auctoritas maior, nec ratio firmitior esse possit. Quare huius eam facultatem esse dicimus nos, ut, cum rerum humanarum ortus optabiles, præclaræq; initia beneficentiæ tribuamus, progressus quoq; mox ipsarum adiuari, ac demum conseruationem, incolumitatemq; eadem contineri statuamus. Id autem ut planius ostendatur, ea quid sit, explicandum: definitione enim rectè, atq; exactè instituta, omnium, quæ disputanda sunt, traditio sequetur explicatio. Verum illa prius discutere, atq; explanare est necesse, de quibus controuersia aliqua possit existere, à natura sit, nec ne: tum quæ sit eius tanquam materies quædam, circa quam uersetur, in quibus uè collocare ipsam oporteat. Neq; uero fas est in dubium reuocare, uirtus ne sit, quam Græci *ἡ εὐεργεσία* uocant: quam Philosophorum quorundam testimonio, auctoritateq; huiusmodi esse constat: &

nos copiosius, quàm illi, disputantes ostendemus. Cur enim, ut æquitas, quæ iustitiæ pars est potior, animum excolendo ita afficit, ut, quæ leges omittunt, pro arbitrio is corrigat: uidereq; nonnullos licet, qui ex professo summa cum aliorum utilitate dirimant quotidie controuersias, quas ad multorum pernitiem iudicia grauiora alunt: itemq; bonitas (si Ciceroni credimus) ex quarundam uirtutum inter se coniunctione compacta uirtus, quæ nihil, nisi quod bonum est, uelle hominès propè cogit, ex quo boni uiri dicuntur, ita etiam hæc non doceat sic eos ipsos charitate in omnes inflammatos aliorum commodis inseruire, ut nolint unquam, nisi, quod præclarum est, & gloriosum, non profiteri aut cur affectus is, qui gratia dicitur, non potest in animis sic imprimi, & firmari, ut euellere sit quàm difficillimum? Id certè uirtutis, quàm affectuum moderatricem Philosophi statuunt, minus, esse, qui neget, arbitror esse neminem. Præterea beneficentia quid, differt à uirtute: (quæ, siue uniuerſa simul accipiatur, siue distribuat in partes, proculdubio habitus est) si, ut Aristoteles aliz quando uult, uirtus sit bonorum effectrix, & conseruatrix facultas? eadem præterea erga alios magnorum, & omnis generis beneficiorum parens? quanquam de hoc alio in loco paulò diffusius à nobis disputabitur. Itaq; ea illic declarabuntur, quæ reliqua hic desunt. Neq; id quod his, maxime consentaneum est, deos suos beneficos potissimum Stoici esse uoluissent; si bonum istuc ex eorum numero esse iudicauissent, quæ, qui possident, illorum propria dici non possunt: aut, si aliquando benefici esse desinerent; in quibus, mali quicquam esse, cogitare est nefas. Atq; hæc a Philosophis. Ex alia autem multò ueriore philosophia beneficentiam uirtutem

esse possumus egregiè tueri. Nam, cum Theologorum nostros
 decreto charitas sit uirtus, quam immortalis Deus homini
 tribuat, qui largientis liberalitatem non aspernatur, hac uero qui
 præditi sint, homines constet aliorum utilitati seruire, minus sua
 procurantes, certè beneficentiam quoq; cuius parentem charitas
 tem esse dicimus, uirtutem esse fateri necesse est. Nunquam
 enim, ut inquit Diuus Paulus, iners est charitas: semper querit,
 quod alteri sit utile: quæ si beneficia prudenter locabit, eadem
 utiq; beneficentia efficietur: ut rectè omnino in hoc Stoici ipsi de
 dijs suis sensisse uideantur: quos & diligere, quibus consulere,
 & quos amarent, his accuratè, sapienterq; consulere uoluerunt.

¶ Vtrum autè, de quo fortasse quispiam ambigat propter cons-
 tentionem hominum eruditorum, studio, curaq; hanc animi ad gra-
 tificandum propensionem coniunctam cum rectè in hoc ipso agens
 di scientia nobis ipsi comparemus, an potius, cum primum in lucem
 edimur, ipsa quoq; ut reliqua, quæ una procreantur, nos conse-
 quatur comes, uidere, ac dijudicare per facile est. Nec audiendus
 Plato, aut Socrates, qui uirtutes omnes censet natura constare,
 & dum reminiscenciam tuetur, doctrinam negat. Cur, si tantum
 cum philosophis sentiendum est, non sit illud uerius, aut probabi-
 lius, quod & prius Aristoteles uir doctissimus, sicuti pleraq; uidit
 acutius, et post communi omnium propè, qui Philosophi esse uolue-
 runt, sententia comprobatum est, animos uidelicet humanos condit-
 tionem illam, uimq; esse sortitos, ut eam ortu ipso facultatem ac-
 ceperint, qua possent accedente studio, atq; exercitatione aut ex-
 coli moribus, aut doctrina expoliri, & ornari? præsertim cum
 mentis acies una apprehensione principiorum possit seipsam ex-

citare, atq; ad eorum, quæ oriuntur ex principiis, cogitationem; cognitionemq; traducere: præterea ratio cupiditati imperaret. Etenim, si eas nobis initio nostræ originis, ut cætera, quæ naturæ rationalia dicantur, natura largita esset, non autem eam, quam diximus, liberam adipiscendi facultatem, essemus planè boni omnes: nec malus, flagitiosusq; Iupiter Saturni patris tempus aureum ære unquam inquinasset, qui nulla ratione istuc moliri potuisset. Ut enim eorum, quæ naturalia sunt, haud alia conditio esse potest, atq; ea, quæ sunt à natura instituta, nec dediscere, & obliuisci possunt leuia motum sibi naturalem, ac proprium, qui sursum est, nec grauiam illum, qui deorsum, ita ad contrariam partem improbitatis homines sese nunquam deflexissent, nec ab ea, quam abijcere non poterant, excidissent probitate. Atq; hæc, quæ Peripatetici docent, probabiliora uidentur, quàm, quæ à philosophis cæteri protulerunt. Ea uerò, quam ipsi profiteamur, philosophia multò uerior, ac sanctior asserit hominum animos à deo esse procreatos, procreariq; quotidie, qui apud Platonem nullum sui refecerunt initium, & multò secus, atq; hi dicant, qui naturæ omnia tribuunt, ab eodem, qui procreauit, ortu ipso excultos fuisse, & omnium uirtutum insignitos ornamentis; uerum hæc omnia hominem amisisse uitio, culpaq; deprauatæ uoluntatis, cui tamen reliqua sit facultas recuperandi sola; labori autem huic perdifficili, & immenso præter reliquas erumnas, quæ subsequuntur sunt innumerabiles, pro contempto dei imperio additum; neq; præterea minima ex parte damna esse resarcita. Neq; etiam, ut intelligeremus eius, qui primus omnium est à Deo procreatus, quam graue fuerit peccatum, cuius non is tantum, qui deliquit, sed posteris

tas etiam omnis luit pœnas, istuc ipsum, qualecumq; est, ullo pacto possemus adipisci; nisi conatum omnem mortalium immortalis Dei benignitas maxima adiuuaret. uel ad incipiendum, uel ad exitum usq; quod quis inchoauerit, prosequendum. Quamobrem rejicienda est natura, nisi quatenus ad hæc acquirēda habiles nos effecerit: comparatio autem tum est eidem rerum omnium parenti, tum, ut est apud Hesiodum, studio, exercitationiq; tota ferme tribuenda: ut, qui eodem auctore poeta non absq; labore iter ad uirtutem confici uoluerunt, illi ipsi dij immortales facile eundem mollire, aut leuare possint. M. autem Tullius Cicero omnino improbandus, qui à nobis loui habendam gratiam esse nullam statuit, quia boni efficiamur: semper enim in rerum effectiōe, procreationeq; uis est amplior causæ principis, quàm causarum illarum, quarum natura, atq; conditio ab illa tanquam fonte manare dicitur. Nec est, quod Aristoteles ambigat, summum ne bonum deorum immortalium munere hominibus sit tributum, & concessum: habet, quos sequatur, si se ipsum audire uelit. Deo uim priamariam mouendi reliqua tribuentem, & uatem illum, cuius auctoritatem in hominis statuenda conditione ad felicitatem comparandam sese accingentis approbavit. Atq; hæc de causis uirtutis huius, reliquarumq; effectricibus satis.

Quoniam uerò unaquæq; uirtus pro diuersitate aut affectuum, à quibus plerumq; huc, atq; illuc ferimur, aut eorum, quæ agenda proponuntur, quorum omnium est ipsa moderatrix, suis tanquam locorum angustiis, circumseptisq; quibusdam continetur, atq; munus illud proprium habet, quo in agendo & is enim harum omnium est finis honeste, ac laudabiliter fungitur. Quoluptatibus

enim quibusdam corporis frenum iniecit temperantia, mortem honestam in bello oppetere fortitudo cogit. Sequitur, ut uideamus circa quæ uersetur beneficentia. Ac, si sequi quosdam uolumus, intra spacia quædam nimis angusta, aut non tam lata quasi uim afferentes, atq; inopem potius esse temere præcipientes concludamus. Non multo enim amplius, aut aliud interdum ei dabitur, atq; id, quod Aristoteli placere dicet fortasse quispiam: qui, quæ in scribendo interdum utitur, rationem minus animaduertit. Is enim uideri poterit statuisse eandem esse rationem liberalitatis, atq; beneficentiæ: qui, cum de liberalitate scriberet (nisi forte alterum pro altero usurparit) beneficium, inquit, quo nomine liberalem uult intelligi, haud facile esse, beneficium ut quis afficiat: nec, cum uirtutum seriem quandam constitueret, certumq; numerum, ac nomine ferè unamquamq; suo appellaret, huius meminisse uspiam: ut beneficium esse omnino uelle eum uideatur, qui rationis præscriptum in dando nequaquam egrediens alterum sola pecunia, aut his, inquit, quæ pecunia æstimantur, inuet. Et tamen uis detur posse aliquis promereri alterum beneficijs multo amplioribus, quàm, quæ ex arca depromuntur. Quod enim beneficium est maius, quàm illud, quo oppugnatum capite, aut, cuius læditur fama, iniuriæ præsertim, nostra tuemur industria? aut quæ, si eundem sequamur, uirtutis auctori ab eo, qui beneficium tantum acceperit, merces æqua tribui potest? Socratem fuisse ait Xenophon in omni re, & quouis modo tam utilem, ut ei, qui uellet id nosse, non multum laborandum esset. Quare, ut mea fert opinio, hæc de re rectissime hi senserunt, qui etiam ante Aristotelem uiderunt esse animi habitum quendam laudabilem, qui hanc omnem

conferendorum beneficiorum rationem contineret: quem etiam nota uocabuli signauerunt. Hos imitati latini uerbum uerbo rededentes beneficentiam appellauerunt. Quanquam non sat cognosci potest, fuerit ne græcis ipsis habitus animi ea, quam *ἡ εὐεργεσία* nuncupauerunt: sed putemus non latuisse homines doctissimos, quod nos ferè indocti, ac rudes paulo antè asseruimus. Beneficentia: igitur latissima cum sit uis, & natura, dicamus in immensum patere huic uirtuti campum, atq; omnem illam facultatem, qua alteri prodesse quis potest, ab hac una comprehendi. Verum hæc ipsa ex his, quæ sequuntur, clariora erunt, atq; explicatiores uobis: ex quibus illud etiam patebit, nihil esse, quod aliqua re prætermissa, quæ ad disputationem illam de moribus pertineret, Aristoteles possit reprehendi: qui singularum uirtutum tractatione, eius quoq; uim uideatur explicauisse, quæ omnes illas complexeretur.

Differt autem à liberalitate beneficentia; quod liberalitatis uis multò est restrictior, beneficentia: latior; altera continet; continetur altera: ad alteram pertinent beneficiorum omnia genera; ab altera tantum exigitur, quod largitione sola continetur aut pecuniæ; aut cæterarum rerum, quarum habentis propria est, ac legitima possessio. Deniq; qui beneficus est, non idem omnino & liberalis: liberalitatis tamen loco beneficentia: uocem interdum usurpare solemus: contra uerò, qui liberalis, eundem necessario beneficium esse dicas. Qua quidem in re Iouianus Pontanus uir & eloquens, & doctus redargui à nobis potest, qui ita uelit has inter se differre, ut liberalitas tantum pecunia tuet, hæc opera. Aut damnandus Aristoteles, qui, quod potissimum est in moribus, prætermiserit: aut, quod uerius est, beneficentia

centiæ liberalitas est pars quædam, tanquam totius: id quod uideo etiam placuisse Ciceroni: nam aut opera, inquit, benignè sit indigentibus, aut pecunia. Atq; haud quaquam ego negauerim, quia usus id postulet, liberalem magis dici, à quo ex arca beneficium depromitur: utruinq; tamen ad beneficentiam pertinet. Quamobrem uirtus hæc in omnium beneficiorum collatione collocabitur. Quæ quidem, ut ex his, quæ supra dixi, manifestum esse arbitror, nihil aliud est, atq; habitus quidam animi æqualis, ac moderatus, (hoc enim uirtuti omni commune est) quo de altero quouis, quacumq; ratione potest, benemereri studet: idq; ea charitate impellente, quæ unicuiq; debetur: rectè præterea, & prudenter: quod ipsum planè ad omnem actionem, quæ à uirtute profici scitur, adhiberi necesse est. Hanc uerò rei huiusce descriptionem propriam esse ratio propè ipsa nomenclaturæ nos docet: iccirco enim beneficentia dicitur, quia bene potissimum indigenti fiat.

Quod quàm latè peruagetur, ac se se diffundat; quàm sit egregium: quàm laudabile: quàm gloriosum, satis quidem indicant, & præmia pro dignitate, salutèq; patriæ capitis ipsius periculo per sepe decertantibus constituta: & aut in Senatu, aut in concione orationes habitæ de uirorum laudibus charitate, & studio erga rem. p. ciuium uniuerforum beneuolentiam sibi conciliantium. Honores item ducibus, imperatoribusq; decreti: habitæ supplicationes ad puluinaria deorum pro re bene gesta: erectæ statuæ: triumphus dati declarant nihil esse uel. uniuerfis gratius, uel ad propagandam nominis memoriam efficacius, quàm, ut quiuis studeat reliquos mortales meritis, obsequijsq; promereri. An est cuiusquam uberior laus, quàm ea, qua Cæsarem in cælum usq;

susculit uir eloquentissimus in oratione; in qua ob Marcum Mar-
 cellum à senatu per ipsum acta sunt illi gratiæ: ea tamen tota
 ferme à beneficio trahitur: quod etsi laudandum propterea, quod
 ad unum Marcellum perueniret; multò tamen cum amplius, tum
 clarius apparet; quia, priuatum cum esset, uideretur ad uniuersa
 sã rem. p. redundare. Adhortatio præterea illius ad eundem
 Cesarem ad constituendam rem. p. uidetur bellicis laudibus, ui-
 ctorysq; omnibus anteferre patrocinium & dignitatis, & salutis
 patriæ: ex quo uera ipsi existeret laus: cum reliqua admiratio-
 nis plus habitura essent, quàm gloriæ. Quam quidem gloriã
 minus fortassis habita aliarum ratione uni beneficentiæ sunt
 inus orator assignauit: siquidem, inquit, gloria est illustris, ac per-
 uagata multorum; & magnorum uel in suos ciues, uel in pa-
 triam; uel in omne genus hominum famã meritorum. Vidit hoc
 homo sapiens, & doctus: uiderunt & ante ipsum alij rerum ha-
 manarum naturam, conditionemq; contemplantes, nihil ad eas
 rum conseruationem esse æquè utile, ac necessarium; atq; hoc
 cuiusq; studium insigne, ac præclarum: quo qui flagrant, &
 premijs eos, & honoribus amplissimis decorauerunt. Idq; iure
 quidem factum est ab ipsis, & prudenter: nihil enim ex omni
 probitate, quæ mirè est ferax, & multarum opum diues; repe-
 rias, quod sit homini æque aut necessariam, aut naturale, ac pròs
 pterea tum optandum, tum enixè capeffendum: quæ quidem ita
 esse probare contendam. Itaq; id quod initio me facturum esse
 pollicitus sum, de altera uitæ ratione, quæ actione continetur,
 edisseram: ut, cum actio ferè omne genus officiorum, quæ ex hac
 sapientie deriuantur, complecti uideatur, hoc tanquam fundamento

iactō ea, quorum nobis cura est prior, nemine repugnante deinceps superstruere possimus. Prius autem dabitur aliqua uenia exultanti, ac propè triumphanti orationi in ea contemplatione rerum, quæ hominis præcellentem, ac propè diuinam indicans naturam possit uel ad altissima bebescentis aciem trahere in admirationem immortalis, præpotentisq; dei: uel ad cultum excitare languentem. *Principio illud quidem recipiendum est, quod & disquirenti, & immensam huius uniuersi molem, quæq; in ea continentur, contemplanti uerum esse cernitur, & pleriq; doctissimi homines libris editis rationibus comprobauerunt, nihil frustra, nihil otiosum, nihil inane editum esse à parente omnium rerum, ac procreatrice natura: sed finem quendam suum omnibus esse propositum, ad quem ferantur, cuiusq; causa in lucem edita esse uideantur: porro nihil hoc uerius, hõs minis causa cætera effecta esse, & condita: ad quem tanquam rerum omnium finem progressa natura tum demum quasi absolutò opere, perfectòq; ipsa conquiescit. Cælum enim, quiq; in eo imprèssi sunt, stellarum fulgentium candentes globi, nisi uertigine sua ita ferantur, ut, ubi uergente ad imas, & australes mundi plagas solis sudere cuncta frigore obriguerint, deformataq; cæli totius facies morti quam simillima fuerit, eiusdem sideris regredientis, uicesq; alternantis aspectus leni calore paulatim gelu contricta dissoluens uim in unoquoq; tum propagandi, tum augendi, tum alendi insitam non excitet, rerum omnium natura, quæ diutius ul onne, quod uim affert, perpeti nequit, corruat omnino, & intereat necesse est. eadem uis inimica ardoris penitus periret, nisi calorem ad maturitatem frugum usq; excrescens*

tem alterius quasi cœli uicissitudo mitior, & clementior excipiet: qua herbarum, pratarumque nimio & flu exarescentia reuirescunt: sua cuique elanguescens uirtus, ac uigor redit: animalia recreantur. Quis hæc intuens non uideat, cœlum irrequieto, ac sempiterno motu ita ferri, ut ratione hæc motus, & ordine aliò, atque ad se ipsum, relato (quæppe cuius natura, ut expers non sit omnino interitus, si reijcendi sint Peripatetici, certè multò ceruitur cum diuturnior, quam, quæ loca inferiora occupauerunt, tum quasi constantior, & nulla uis repugnante, quæ bellum indicat, firmitior) rerum earum, quæ oriuntur ex contrarijs, pugnantibusque naturis, compagem his temporum uicissitudinibus tandiu seruet integram, & incolumem, quandiu uiuere, & esse unicuique natura præscripto est concessum: cumque omnia, quæ ex mutua inter se elementorum coniunctione constant, morti obnoxia sint, ea in his diuersa, aliisque ratione, atque in cœlestibus naturis insit, quam omnia appetunt, ex alterius ex se procreatione, propagationeque sequatur immortalitas: ut appareat uires, & astrorum motus hæc infima spectare, quorum naturas ipsa moderentur. Atque hæc, quæ dixi, infima reperiatis omnia uni homini parentia. Nam quid de tot, uariisque herbarum, plantarumque generibus loquar? quæ terræ solo ita se exeruerunt, ut cum esset, unde & aleremur, & ad ea, quibus sæpe consiliari solemus, mala auxilium nobis exposceremus, uitæ simul, & salutis nostræ rationem natura habuisse uideatur. Multa dici possent de ea, quæ, præter utilitatem, ab his ipsis percipitur, uoluptate: quam nullam ipsæ sentientes affatim nobis suppeditant tanta & colorum uarietate, & odorum copia, & diuersitate ipsa naturarum, ut, cum uinum natum

ra maximam perspexeris; eiusdem ingenium; & quasi artem
 quandam, studiumq; simul adnoscere. Porro ex metallorum fossi-
 tione; & lapidum, gemmarumq; uaria, ac præcellente natura
 fructum uberrimum ipsi percipimus: quæ, sicuti pleraq; nec ubiq;
 nascuntur; nec eorum leui labore comparatur usus: neq; enim, ut
 Poeta inquit, *quid quod omnis fert omnia tellus*; quid de cingenti
 fuit hoc, ut est in fabulis, Saturno quondam rege: quo tempore
 homines magis contenti ijs, quæ postulat natura & necessitas, facile
 poterant illa contemnere, quorum usus cupiditatis esse uidetur,
 non necessitatis. Igitur multa auro, & argento præsertim com-
 mutata, quæ dat parit natura, aut uariæ artes, atq; hominum
 studia excolunt, ex terris remotissimis ad nos importantur, siue
 sint aliarum rerum condimenta, siue adminicula, aut alimenta
 uitæ: alteriq; mutuo communicat alter, ut plurimum communi
 quasi quadam mensura æquatis commutationibus; quam numum
 iecirco uocant, quia hominum arbitrato, & instituto tanquam le-
 ge constet. Neq; uero (ut bruta quoq; hac oratione complectar)
 bos si ipsi in aranda, subigendaq; humo desudans ingemiscit: cuius
 ius seruitutis auctoramentum in primis est humanæ uitæ alimen-
 tum: nec bellator equus, nisi equitem, humeris uectat per medias
 acies uictor. Ac, nequid deesset eorum, quibus hominum commoda
 continerentur, transgressa penè præscriptos sibi natura limites
 mulorum genus confusum, nullumq; ex diuersis animantium na-
 turis constituit: quod uel ipso teste Homero, qui mulos *ταλαεργ-
 γους* appellauit, ad cliteas ferendas, subeundaq; onera aptius
 esse uideretur: quasi prima, quæ tulerat, minus commode istuc
 præstare possent. Quid de alijs loquar? longum utiq; esset omnia

*singillatim persequi uelle : quæ miti natura unâ cum hominibus
 degunt, & aluntur. Atq; hæc sua sponte, aut non multa indu-
 stria hominis imperium ferentia eius mirum in modum augere
 commoda, fortassis minus mirum ei uideri poterat, qui se ad alte-
 ram partem deflectens in ea intueretur, quæ immiti, præferociq;
 ingenio ab humani generis conuersione, conspectuq; abhorrentia
 procul in desertis, remotisq; locis uitam solitariam degunt : quo-
 rum in multis atroc. odium inter se, æternumq; bellum natura
 esse uoluit, ut, præter utilitatem, oblectamenta quoq; non decissent
 noua semper, ac recentia quærentibus uariarum condimenta uo-
 luptatum. An est quicquam, quod aut ad exercitationem uirum
 corporis aptius sit, si adhibeatur modus, aut ad hilaritatem, re-
 missionemq; animi, ubi consilia, negotiaue, grauiora fatigatos
 pridem, oppressosq; mortales tenuerint, uenatione commodius; cu-
 ius uarietas tanta est pro numero, atq; diuersitate animalum;
 ut, cum ex ipsis nonnulla nobis conciliarit natura, unaq; sub eo-
 dem tecto & uiuere, & ali iusserit, odio, & ira in feras incen-
 derit, pernicietate pedum ad insequendum hostem munierit, denti-
 bus armarit, ex his uero, quæ nos tanquam hostes fugerent, ani-
 mis infestis inter se, quales sunt aues nonnullæ, dimicare statu-
 rit; hominis unius tum iuuandi, tum oblectandi uero desiderio
 flagrasse ipsa uideatur: quæ ex li hoc ambitu tot, tamq; uarias res
 rum pariendo naturas, tot figuras edendô toto studio, totisq; uiri-
 bus in id ipsum incubuerit. Quod sum igitur istæc paulo longius à
 me explicata nimirum, ut ostenderent rerum omnium, præter
 mentes illas, quæ ab omni contagione materię liberæ, sempiterna
 loca incolentes sempiterno æuo beati sine perfruantur, homi-*

nem esse præstantissimum, ad quem tanquam finem cætera refer-
 rantur. Finium autem duplex est natura: aliorum enim
 ea est ratio, ut expetantur tantum; & quæ rantur ab his, quæ
 suapte natura feruntur ad ipsos alij uero; quibus, quæ diuersa
 ratione loco finium sunt, ea ipsa parantur: uno, eodemq; exemplo
 utrumq; manifestum fiet. Sanitatem esse dicimus; quam corpus
 morbo aliquo oppressum, affectumq; & optat; & quærit, tan-
 quam proprium bonum: quæ tamen unius corporis causa: & à
 natura ipsa primo inducta, & post ab arte, seu facultate, ubi na-
 turæ vires minus suppetunt; eiusdem adminiculo aut præsens
 conseruetur in ipso corpore, aut lapsa, amissaq; reducatur. Ex
 hoc genere finium hominem esse dicimus: illud prius reijcimus.
 Cuius imperio, ac potestati cum omnia subiecta esse, uitam tueri,
 commodà augere, oblectamenta tum animo, tum corpori compa-
 rare uideamus; quis negare audeat illius causa hæc esse condita,
 ac perfecta? An uero, ut cætera ad hominem referuntur, ita fi-
 niem suum quoq; sibi propositum habeat; & proprium, non
 eum quidem, quem Stoici agnouerant; sed, quem tanti effector
 operis, quantum est hoc, quod cernimus oculis, ei præscripserit, di-
 cetur inferius: abhorere enim uidetur à ratione, dicere, hominis
 tanquam præstantioris naturæ causa reliqua esse, ipsum autem
 ad eam causam, quæ multò sit excellentior, nolle referri; & rei
 nobilissimæ, quæ procreata sit, nullum finem uelle statuere, suis
 terminis, et cancellis uilissima quæq; atq; abiectissima coercentes.
 Illud uero nunc consideramus, quod & ij, quos diximus, Stoici
 affirmarunt, & ratio ipsa atq; experientia nos edocet, ut, quæ in
 terris gignuntur, ad usum hominum omnia procreari, uidere est,

ita uidelicet hominum causa homines ipsos esse natos, ut commu-
tatione officiorum sibi inter se prodesse; quæ si tollatur, huma-
na societas omnino intereat, necesse est. Id uero ne accideret, sa-
pienter est à prestantiore natura prouisum, & cautum. etenim
animal nullum uidemus, quod communione, coniunctioneq; sui ge-
neris mutua deuinciatur magis, atq; colligetur. Idq; ut fieret com-
modius, & melius, homines rationis, atq; orationis participes ef-
fecit, ut altero cognoscerentur, quæ essent utilia, & necessaria,
quæ uel salutis & propriæ, & communis inimica, ac repugnantia;
altero cognita, & mente prius, consilioq; discussa proderentur;
ita altera res eget omnino alterius auxilio; nec potuit tam mul-
tarum rerum natura absq; ingenio, rationeq; perspicui, nec sine
oratione usus tradi. Atq; id unum ex omni genere animalium in-
ciuitates asciuerunt, ex qua ciuile animal appellarunt, insigni qui-
dem certe, perhonorificoq; nomene. Nihil enim est in terris ex-
tibus hominum inter se legibus, & communi iure conuenientium
aut dignitate naturæ præstantius, aut uoluptate iucundius, aut
etiam aspectu ipso pulchrius. Quid enim cum ciuitate rectè, ac
prudenter instituta conferendum putes: quæ simul omnia com-
plecti uideatur, & continere tanquam sibi famulantia; quæ na-
tura uel ad speciem miraculi protulerit, aut ars effinxerit, effe-
ceritq; ad humani ostentationem ingenij? Quæ omnia tum Stoicos
impulerunt, ut homini nullum finem alium, atq; ipsum sibi assi-
gnarent; quem sibi parere uicissim alterum alteri uidebant; cum
cetera tantum huic uni deseruirent. Quibus ut omnino ita sen-
tiendum erat, tanquam cornicibus, uitam hominum animis præ-
scribentibus, sic aliquatenus ignoscendum minus ea luce, quæ post
sequita

Sequuta est, tum ipsorum mentibus illustratis. Quanquam cum grauissimorum auctoritas uirorum, tum uerò humanæ mentis contemplatio Dei præcellentem naturam referentis poterat is patefacere ueritatem, facile, si rem aliquantò intrōspexissent, hanc ipsam assequeuturis: qui assererent deorum nutu, providentiāq; mundum regi, atq; gubernari. Sed tamen est, quod laudemus: qui bellum perpetuum delicatioribus quibusdam, turpissimisq; uoluptatum lenonibus philosophis indicentes societatem, communionemq; omnem dissipantibus, dum non modo sibi ipsis tantum degunt, sed alios quoq; ad imitationem falsi cuiusdam ostentatione boni pelliciunt, nec ocio torpescere passi sunt, nec desidia languescere: sed ad labores, honestissimaq; studia nos excitant: rem. p. capefcere; pro patria decertare; in parentes pietatem exercere; necessariorum utilitati consulere; amicorum negotia fideliter suscipere; omnibus deniq; prodesse uoluerunt: in quo prope uno, quia sit hoc ipsum consumatæ uirtutis opus, summum bonum necessariò ipsi collocarunt: cuius quidem summi boni cum homo solus ex omni genere animantium particeps sit, iure tum ad hunc unum referri omnia; tum, quia absq; mutux operæ ipsius hominis adminiculo non facile poterat id acquiri, alterum alterius ortum sibi uendicare censuerunt. Quare, si quis diligentius horum consideret de eo, quod diximus, bono sententiam, inueniet illud idem uoluisse hos asserere, quod paulò accuratius animaduersis aliorum erroribus Peripatetici explicauerunt. Quis enim non uideat in scholis disputantes Philosophos, ad præclaras actiones alios incendentes, deterrentes autem ab inhonestis; præterea dicentes hominum causa homines ipsos genitos esse, ac natos,

uelle supremum bonum non in possessione, sed in usu, uirtutisq;
 exercitatione collocare? satis quidem, ut id omitterent, quod à quo-
 uis facile intelligi poterat, fuerunt solo uirtutis contenti nomine;
 quam amotis impedimentis inertem nunquam fore iudicauerunt.
 At quanto cum absurdior, et à ueritate alienior, tum uero
 turpior, et, quem hominem appelles, non belluam potius, indignior
 cernitur Epicurus. Cui tantum abest, ut, quod impiè, scelerateq;
 uult Lucretius ineptiarum huius, deliramentorumq; stultus ad-
 mirator, ex recepta salute quicquam debeat humanum genus, ut
 etiam, qui perniciem maximam, mortemq; teterrimam inuexer-
 rit, omnino execrandus sit, supplicioq; maclandus. Tollit enim
 ueri inuestigationem, cognitionem omnem rerum, luci tenebras
 offundit, peruertit omnem rationem officiorum, uitæ consuetudi-
 nem, lumen humanae mentis uoluptatum tanquam foedissimo dis-
 luuiio turpiter extinguit ea uox huius non Philosopho modo, sed
 ne homine quidem quantumuis ignauo, molliq; digna, λέγε. Εὐφ-
 ραδῶ; hoc est, ita uixeris, ut nemo sentiat te uixisse. Quam, si i-
 circo emisit, ut se gloriæ contemptorem ostentaret, certè potuit
 in eo laudari, quod falsam, uerèq; inanem gloriam ex turpi com-
 mento uideretur aspernari, imprudens tamen stultæ sapientiæ
 dissimulator, qui, qua ratione negligit, ea ipsa, id est inscriptione
 nominis turpiter captare uideatur. Sin, ut libidinum suarum, uol-
 uptatumq; minus honestarum, quas uidelicet nos expiscari iue-
 bet, (id quod magis eum uelle suspicari libet) testem nolit adhi-
 beri ullum, quò possit liberius suo abuti bono; uerecundiusculè
 agit; qui, ut scortum quantumuis impudens obscœna semper in ore
 habens, uerbisq; iactitans tegit tamen, nec, quæ honestius auribus

putat posse committi, oculis sat decorè subiicienda censet, sic in cubiculis obtestus parietibus cupit ea facta delitescere, quæ sola bona ducit, atq; expetenda. Horum utrum malit, accipiat: planè & refellendus est, & maxime improbandus. Alterum enim bona multa ex se profert, eaq; interdum ingentia: alterum, quod si atim uidetur cum uitio intemperantiæ coniunctum, mala. Contemptus laudis, si Philosophos sequimur, non uni tantum adimit, quæ utilia sunt, aut præclara; sed toti etiam ciuitati: interdum etiam uniuerso propè terrarum orbi ad beneficia maxima aditum occcludit: quæ diuina humani uis ingenij studio plerumq; gloria excitata parit, siue ea sese applicet ad contemplationem diuinarum, humanarumq; rerum; siue multarum artium exercitationem uiliorum; siue ex honesto ocio hominem ad regendæ ciuitatis honestissimum laborem traducat. Nunquam Aristoteles, Plato, multiq; alij se in hoc pulcherrimo studio perquirendarum rerum exercuissent; tot scripta, à quibus fructus exiit uberrimus, posteritati reliquissent; nisi non ea modo, quæ uiui perfruebantur; sed alia etiam eorum uitæ limites longè excessura gloria eos ad philosophandum compulisset. Neq; Phidias tam affabre didicisset nomen suum operi intexere; nisi antè laudem ex labore concupisset. Non diutius fuisset populus Romanus; aut post nūquam esset rerum omnium potitus imperio; si primò F. Camillus, cui præter seruatam, liberatamq; consilio, manuq; forti patriam, non minor fortasse ex noua, insigniq; alterius appellatio: ne Romuli secunda accessit laus: dein imperatores alij, duce sq; clauissimi spreta omni laude latuissent ignoti: quorum egregiæ uirtutes totum fermè terrarum orbem romanæ ditioni subeger

runt. Nimirum fuit semper ad onuiem præstantem actionem stimulus ingens gloria : quæ nec omnino abiicienda est à nobis, utcumq; immortalis dei præcedit amor, qui ad honestatem inflammet inertes. Hanc qui penitus respuit, illud quoq; quod plerumq; eius cupiditas efficit, uidetur uel nolens aspernari. Voluptatis autem amor, cuius causa maximè abdita quæq; tutissimaq; loca conquirantur, & turpissimus est, & cuius maximè abhominandus: qui non tantum ijs beneficijs spoliatur, quæ laudis aufert, contemptus: sed tantorum sit malorum auctor, ut nulla hominibus pestis hac capitalior esse possit: præsertim si adhæreamus Epicuro, statuamusq; summam rationem boni hac una contineri. Quid enim mali non agent homines: quod genus scelerum oderint? à quo se flagitio abstinebunt, si ijs persuasum erit, uoluptatem, ad quam natura feruntur, quamq; tametsi malum esse fortasse norunt, quamplurimi tamen inhiantes persequuntur, paucissimi magno cum labore repellunt, esse tanquam bonorum omnium supremum expetendam: quæ uulnera excipient pro defensione pietatis, ac iustitiæ, qui dolorem, ut summum malum iudicantes, detestantur: quo pacto temperantes, casti, moderatiq; esse poterunt, qui omnifarijs delibuti, perfusiq; uoluptatibus partem nullam corporis unquam oblectatione carere uolent? Quæ liberales, qui, ut habeant, quo sibi bonum id emant, quod unum planè & purpura in primis, & auro uenale est, tantum abest, ut quicquam alteri de suo dent, ut etiam libenter accipiant ex alieno, interdum, si propria exhausserit uoluptas, alteri quod suum est, auferant? In forum ne alicuius amici causa prodire uolent aduocati? in concionem re. p. auxilium implorante uenire? qui laborem omnem rez

reca uiuendi leges illi præscripserunt, quæ inertem nunquam esse paterentur; res omnes, & publicas, & priuatas magno studio, curaq; tueri uellent; amicitia multum tribuere; ferre opem miserris; arcere à quouis iniuriam; bonos extollere, & complecti; impios probos autem odisse, atq; ab aliorum conspectu depellere; satis, opinor, & uirtutis huius natura qualis esset, quam latè patens, & diffusa; & quo beneficium quis maximè præstare se posset, quodnam institutum uitæ probarent, ipsi declararunt. Ac, licet contemplantis beneficia possint existere in reliquos homines amplissima, ea tamen, quæ confert is, qui actionem amplectitur, cum illustriora uidentur esse, tum uerò magis necessaria ad salutem, conseruationemq; rerum. Quid enim tam clarum, tamq; necessarium, quam uniuerso terrarum orbi iura præscribere; leges condere; rectè uiuendi instituta tradere; collocare homines in ciuitatibus; retinendæ, conseruandæq; societatis modum, rationemq; explicare? hoc beneficio nullum reperiās nec utilitate maius, nec honestate laudabilius, nec diuturnitate stabilius: hoc genere hominum cælum refertum; hos diuinis, immortalibusq; reliqui mortales complexi sunt honoribus; his templa, & aras consecrarunt; ex quo poeta Horatius.

Romulus, & liber pater, & cum Castore Pollux

Post ingentia facta deorum in templa recepti;

Dum terras, hominumq; colunt genus, oppida condunt.

Hinc primum, opinor, prouerbum illud uetus:

Homo homini Deus.

Quod tamen nulli & iustius, & uerius competit, quam Christo:

cuius in humanum genus tot, tantaq; beneficia extiterunt, ut neq;

animo concipi, neque oratione ulla explicari posse uideantur: in ceteris autem aut adumbratae ueritatis uestigia reperias, aut ex fauore plebis adulationem leuem. ^{ut innotet} Ac tametsi ad utrumque munus et contemplandi, et agendi homines sunt à deo instituti, ac formati, ad alterum tamen, quod in administratione rerum positum est, magis eos trahit cum naturae ipsa ratio: tum etiam necessitas: praeterea dignitas, conditioque rerum humanarum. De qua quidem ut hoc in loco paulo accuratius loquar, rei institutae ratio me impellit: multo enim plura ad beneficentiam adiumenta suppeditat actio, quam contemplatio. Prius autem cum Epicurum refellere placuit: qui, cum actionem oratione sua tolleret, beneficentiam quoque tollere uidebatur, tum stoicorum quadam tenus approbare sententiam: quae et in eo, quod in primis quaerimus, nos adiuuaret maxime, et: tanquam testis locuples nostrae, quae mox futura est, disputationi de actione faueret. Igitur illud omnes norunt, et: nos supra uisi sumus asserere, in omni natura, quae sensu comprehenditur, nihil homine neque perfectius, neque praestantius inueniri. At hoc Peripateticis minus placet, quibus uideatur nobilior esse natura stellarum. Quasi aut uera sint omnia, quae ipsi: aut falsa, quae reliqui protulerunt. Mibi uero, ut etiam careamus multo potioribus, uerioribusque, Mose in primis, reliquisque nostrae classis hominibus, quos sequamur, Mercurius Trismegistus multo Aristotele Peripateticorum principe antiquior conditio hominis qualis esset, uidetur et ipse melius cognouisse, et posteris etiam explicatam reliquisse: qui, siue id à Mose (fuit enim Aegypti rex, ubi olim extitit memorabilis, sapientiaque clarus) reliquisue, qui ante esse potuerunt docti, et

eruditi uiri, didicerit: siue acie ingenij ipse peruiderit; primus, opinor, (siue quis alius fuerit) nouo nomine hominem *μικρόκοσμος* appellauit propterea: quod mentis diuina quædam uis inclusa in angusto corpore uideretur deum ipsum imitari: qui ut hanc uniuersam molem mouet, ac regit; sic hæc, tanquam nauiculam quandam, humanum corpus: quarum quidem coniunctio naturarum cunctis præferendam efficit, præcellentemq; naturam, iisdem fungentem muneribus, quæ naturæ principi tribuuntur.

Horum alterum est contemplatio; actio alterum. Hoc nunquam à Peripateticis exprimeretur ei liquido contemplationem tantum relinquentibus, homini autem actionem etiam adiungentibus. Quasi aut nihil agat deus: qui, quæ procreauit, summa ratione, sapientiaq; gubernet: aut ab eo auferenda sit actio; quia ad functionem sui muneris non ijs utatur instrumentis, quæ homini prorsus sunt necessaria ipsa ratione naturæ. Quod si, ut & Stoici asseruerunt, & à nobis uel Peripateticis ipsis adiuuantibus in hac ipsa disputatione suo loco nonnulla in hanc sententiam disputabuntur, dei consilio, quicquid cælo continetur, concedamus moueri, uegetari, nasci, atq; interire; utiq; agit necessario: quo quiescente, nihilq; agente rerum omnium natura corruat, & subsidat oportet. Quanto uerò magis possumus nos id tueri, qui hæc nata esse dicimus, & fatemur? rerum enim procreatio secum quoq; fert studium conseruationis earum: nec unquam, quos genuit, pariter dimittit liberorum curam; ne pereant auxilio destituti; nec deserit lucri causa extructam nauem gubernator; ubi uentis eam commiserit: secus hanc præcipitem pelago undante eo ferri necesse est; ubi tanquam ludibrium inati maris scopulis illisa demergatur.

gatur. At is agere dicitur, qui consulit: qui disquirat: qui præterita ad exemplum repetit: componit præsentia: futura prospicit. hoc dicunt, qui sensu ferè solo deum metiuntur: aut qualem Epicurus, qui ei quoq; consulendi laborem omnem adimit, hominem fingunt fortasse: minusq; uident rationem hanc esse imbecillioris naturæ, quæ hæc aliquid agit. mens autem corporis huiusce tenebricoso carcere sepulta, atq; sordibus obsita materiei magno cum labore officio suo fungitur: necesseq; habet ex antecedentibus quibusdam colligendo rei alicuius, quæ antè nesciatur, scientiam comparare. idq; adeo fit, quod eget sensuum adminiculo, quibus tanquam foribus quibusdam peruijs ad ipsam omnia deferantur. Dei autem æterna mens simplex maximè, perpetuoq; libera ab omni concretionè mortali, reliquarum mentium & origo, & fons, quæ, ut etiam acutissimè uidit Aristoteles, exclusa omni tempore nec potest meminisse præterita, nec futura prouidere, admirabili quodam modo, ineffabiliq; cuncta comprehendit: quare & ita etiam consulit, ac agit: quærenturq; temere, quæ suppeditentur ei ad agendum instrumenta: quæ, cum nullum adhuc instrumentum esset, tantam molem ex nihilo procrearit. aut discant Peripatetici, qui hoc negant, cur nihil agat, quem constitunt principem, & auctorem omnis motus: quo in primis harum rerum naturam subsistere uoluerunt? immo omnia agit: qui in causa est, ut cæterarum naturarum unaquæq; suum expleat munus. Non secus, atq; gubernator: qui, cum præceperit reliquis, qui sunt in nauì, malos alij scândant, uela alij funibus trahant, atq; distendant, alij sentinam exhauriant, ipse autem in puppi sedens nauem regat, agere omnia, moderariq; dicitur, quia sit & totius

itineris dux, & omnium, quæ agantur, auctor. Porro non ea tantum natura, quæ cernitur oculis, quæq; corporata est; sed etiam, quæ caret corpore, nec potest sensu ullo comprehendi, tanquam instrumentis utitur is ad effectiorem, dispensationemq; rerum: cuius potestas sit libera agendi quæ uelit, eademq; immensa, atq; infinita cernatur: secus impius est: qui cum Peripateticis falsum autumantibus sentiens statuit aut fati quadam necessitate alligari, aut fini, terminoq; concludi. Hic nunc accipio Peripateticos ueteres illos, qui se totos Aristoteli principi addixerunt, non autem eos, qui post sequuti, nomine tantum se Peripateticos esse mentientes, sententia Platonici uideri maluerunt. Iamq; Theologi ipsi, qui futurorum prædictionem eam, quam ex inspectione siderum Astrologi instituerunt, non ita, ut eos, qui nimis temere ariolari uidentur, damnant, reiciuntq; cælum ipsum esse dixerunt instrumentum dei uoluntatis. Aëlio igitur tribuetur summo opifici, ac procreatori deo: quam sibi tum magis uidetur asciuisse naturalem, ac propriam; quum sola bonitas rei immensa sit, & ipsa quoq; immensa ad maximi, pulcherrimiq; operis effectiorem traxit, infinitis autem temporibus, cum nullum adhuc tempus esset, nec quicquam foras ab hac mente omnium tanquam receptaculo, fonteq; formarum promanasset, contemplationi, quam actioni, similiorem: quæ illic fixa quasi in seipsa resideret. Quamobrem unâ cum reliquis rebus esse hæc cæpit; estq; ab eo, qui omnia condidit, instituta. Homini uerò hoc magis uidetur naturalis esse, quam deo; quia naturam hominis institutam necessario istiusmodi & ipsa consequatur. In tanta enim diuersitate naturarum, quæ corpore omnes præditæ sunt, hominem tan-

tum deus esse uoluit, qui, ut inquit Moses, ratione naturæ factus ei propior, factis quoque parentem imitaretur: ut, quemadmodum, quæ primò mundum peperit, bonitas ad rerum regimen illum sola protraxit, nec nisi prodesse potest, à quo abest omne malum, sic hic præclariſſimo eiusdem exemplo beneficentiam in terris coleret, quam Deo in primis referret acceptam. Præterea magis fortasse propria, quam sit contemplatio, quia magis necessaria: quicquid enim est necessarium in rebus initium sui aliquod referentibus, hoc uidetur esse magis naturale, quò uero necessitatis maiore continetur: causasque rerum inquirere uolenti apparet studium naturæ fuisse in eo maius, quod esset tale; neque hanc quicquam fecisse, quod non exigeret necessitas cuiusque aut utilitatis, aut tuendæ dignitatis. Porro homini, quatenus homo est, hoc est animal particeps rationis, atque sapientiæ, quod non, ut Plato uisus est aliquando asserere, mente sola terminamus, sed ex hac, & corpore naturam quandam dicimus esse constitutam, nihil æquè necessarium ad sui conseruationem, atque actio: quare & naturæ le. Quot enim rerum adminiculo egeat imbecillitas humana & uidemus ipsi, & quotidie experimur: quæ nisi consilio, studio, industriaque provideamus, eam utique necesse est labefactari penitus, atque interire. Cæteræ quidem animantes leui labore, curaque uis tam tuentur sibi adscriptam, ac datam à naturâ: quibus uerius, quàm agricolis in excolendo agro sæpe occupatis, desudantibusque, Fundit humo facilem uictum iustissima tellus: nec uexat tot febrium cohors grauis, quæ minus aut obrigescant frigore, aut calore exarescant, aut pluuiæ austeris uires eneruantibus elanguescant. Homine uero, si omnia hæc spectes,

οὐδὲ ὁ Homeri testimonio ἀλλιώτερον ἄλλο, cui tamen tot
 crumnas stulta, turbulentaq; ipsius consilia attulerunt: quæ si res
 iecisset, nunquam à tanta decidisset dignitate, in qua initio sui
 ortus fuerat à suo conditore collocatus. Hic uerò idem tam miser
 serabilis, deslendusq; casus non eos modo, quorum Moses memi-
 nit, labores tulit: sed mala etiam multò graviora inuexit, quibus
 animi hominum grauitè conflictarentur, & plerumq; etiam
 æternæ mortis damnarentur. Ad quæ gentium omnium, urbium,
 regnorumq; conseruandorum causa salutaria adhibere remedia
 & necesse fuit, & magni in primis ingenij, perfectæq; uirtutis
 opus: quæ non contenta parietibus animum contemplantis ales-
 ret rerum solam scientiam cupientem, & quærentem: sed tan-
 quam totius orbis prodiret in theatrum, seq; in oculis omnium
 gentium, nationumq; collocaret, desidiam, quæ teste Horatio est
 improba siren, deuitans, labori sese dedens, aut etiam ultrò oc-
 currens negotijs: quæ uerius, quàm, qui stuporem dixit, eorum be-
 neficiorum esset auctor, quæ Georgius Anselmus Nepos nostri
 temporis poeta clarissimus eleganter, & grauitè cecinit.
 Pepulit ferociam plebs statim rudi ab animo hebes,
 Didicitq; quid decor postulet, & ratio sibi
 Mœnia ui tuenda summa, populo etiam, etiam
 Vetitis supplicia dedere merita sceleribus,
 Desultoria quoq; legibus coercita Venus est:
 Vasta tentata tum primum rate maria.
 An, si ad portas sit Annibal, studio cognitionis rerum erit cui-
 piam deferenda salus patriæ? aut imminentem cladem poterit,
 uelut Archimedes, sola figurarum in tabula descriptione propul-

sare: ergo, aut, quod eidem contigit Archimedi, unà cum reliquis
ciuibus interibit; nisi senatum cogat; populum ad arma uocet;
uenienti hosti ipse dux, & antesignarius occurrat: aut erit im-
pius, qui non studeat seruire, pro quibus uita sit ei profundenda.
Quæ ciuitas erit, aut hominum societas ulla, si nullius ad rem. p.
accedat industria? nemo leges instituat? nemo iura ministret? qui
uxorem, liberos, remq; omnem familiarem tuebitur? qui deniq;
se ipsum alet, incolumemq; seruabit, qui prætermissa rerum ma-
ximè necessariarum curâ, actioneq; contempta totum se contem-
plationi dedet? Cui tamen ipsi haud omnino bellum indictum
uelim, quia sit in otio ipso omnium pulcherrimum, honestissi-
mumq; negotium: non enim semper agas necesse est: nec, si uelis,
semper possis, & plerumq; incidunt tempora, quibus agendi fa-
cultate sublata quiescere, & à laboribus cessare cogimur: quum id
accidit, aut alio quouis modo ab hisce muneribus datur aliqua uac-
catio, tunc neq; laudabilius, neq; iucundius otio perfruimur:
prorsusq; aliter euenit, atq; ille poeta sentiat: bene enim hoc pas-
seto bonæ horæ collocantur. Licebit fortassis non minus, quàm in
altero, Marcum Tullium Ciceronem imitari: quem neq; commo-
da, & salus amicorum, quos semper opera sua subleuauit, neq;
totius orbis terrarum administratio in ipso consulatu impediuit,
quominus ea ipsa consilia, & rationes, quas in regendo imperio
retinuit, & seruauit, in sex eius de re. p. libris grauissimè, elo-
quentissimèq; explicarit, commendaritq; immortalitati: quorum
nomen tantum ad nos peruenit, reliqua utinam haberemus. Sed
& illud alterum, quod in agendo positum est, affirmo magis ne-
cessarium uideri, quòd ab hoc seorsum ui sua possit præclarè con-

sistere, nec eius, quod contemplanti suppeditat, ullo egeat admini-
 culo: & , quoniam inde maior homini constat utilitatis ratio, be-
 neficentiam, quæ maximè id præstat, potius eo ipso contineri: ex
 quo planè sequi necesse est, nihil hominibus magis esse secundum
 naturam, quàm alterum iuuare. Atq; actionem quidem & oris-
 gine, & necessitate ostendimus in homine maximè naturalem uis-
 deri: restat modo, ut hoc ipsum alia ratione comprobemus: ea au-
 tem tota ducetur ex ipsa animantis naturæ conditione, quam sas-
 pientissimus artifex ita instituit, ut ad id munus obeundum quam-
 aptissima esse uideretur. Illud autem manifestum cuiq; esse arbi-
 tror, nihil horum, quæ aut natura parit, aut naturæ ars imita-
 trix effingit, superuacaneum uideri, nihil, aut perpauca inueni-
 ri, quorum ratio illa, quam finem uocant, inuestiganti, rerumq;
 latentes causas indaganti perspecta non sit, & cognita. Itaq;
 quod est de toto animantis corpore, idem de partibus eiusdem
 censendum: ut enim anumantium nullam inertem natura pro-
 creauit, ita membra earundem, partesq; ex quibus corpus inté-
 grum conflat, munere funguntur proprio, eidem corpori des-
 seruientes, ipsiusq; tum uitam, salutemq; procurantes, tum uerò
 in explenda functione adiuuantes. Huius rei scientiam consequi
 non potest, nisi, qui aut philosophorum, aut medicorum exactam,
 ac propè absolutam de ui, consilioq; in omnibus naturæ rationem
 continentes libros diligenter euoluerit. In manibus est liber Læ-
 tantiij Firmiani docti, atq; eloquentis uiri de opificio dei, in quo
 multarum partium humani corporis rationem grauissimè, accu-
 ratissimèq; persequitur: quod & si in omnibus animalibus uidere
 possumus, nec ullum in ipsis membrum reperitur, quod officio

proprio uacet, de homine tamen solo disputationem instituit, quia id omnium animalium sit perfectissimum; quamobrem de opificio dei liber inscribitur: nihil enim eorum, quæ à deo condita sunt, potest inueniri, quod uideatur aut eo nomine dignius, quo signatur angustus, brevisq; mundus, aut opifici ipsi similis. Quod si horum, quæ cum belluis homini sunt communia, nihil ratione uacat; facultatemq; suam ad totius corporis perfectionem formam; statumq; cuncta conferunt, & exercent, (secus enim si fiat, imperfectum illud, & præter naturæ ipsius decretum, ac præscriptum mutilum esse necesse est) quando fuit & æquius, & procreatoris tum prouidentia, tum maiestate dignius, cum animal ex diuersis pugnantibusq; inter se naturis, ut reliqua quoq; compactum uellet alijs multo præcellere, hominem ipsum tanquam feriatum, inertem, nihil agentem, prorsusq; inutilem in tanta rerum uarietate, & copia, ex quibus ferè omnibus fructus aliquis percipitur, noluisse progignere & imperantem ceteris, & cuncta se inferiora ditioni suæ ea, quæ sibi propria est, facultate subijcientem. Itaq; munus ipsius proprium reliquorum officijs tantò est præclarius, quantò magis illa dignitate exuperat, & antecellit. id autem non aliud esse uidemus, atq; illud, quod est cum ratione coniunctum. Rationis uerò eiusdem duplex functio est, agendi altera, altera contemplandi: nisi malimus uocem hanc, quæ græcè λόγος dicitur, alteri parti mentis assignare, in qua capiendi consilij uis omnis inest: ut ratio mentis sit illa functio, quæ ad agendum hominem instruit: magis enim ratione uti cum solemus dicere, qui iustitiam, temperantiamq; colat; qui prudenter aliquid agat; quiq; & sibi, & alteri consulere, & cauere norit,

quàm, qui animo cœli magnitudinem metiatur: sed statuamus
 mentis nomine rationem quoq; designari: nihil enim, aut parum
 refert, quo nomine res quævis appelletur, modo ne uocabuli nota
 obscurando obturbet cognitionem ueri. Planè uidentur homines
 ad actionem hòc magis à deo esse instituti, quò tum pluribus huic
 muneri deseruiantibus, tum etiam fermè accommodatioribus,
 quàm contemplationi, mentem is obsepiuit, circumclusitq; mem-
 bris: quibus ad ea perficiunda, quæ iuberet ratio, tanquam instrum-
 entis uterentur: contemplatio enim ocio, solitudineq; gaudens
 sensum etiam propè ipsum uidetur auferre quiescenti: nedum pes-
 dibus, manibusq; egeat ad cursum. Mens autem, quæ contem-
 platur, hòc melius officium suum facit, quò se plus abstrahit à corpo-
 re: cuius tantum beneficio utitur ad ea excipienda, quorum scientiam
 pòst ipsa sibi efficit: secus uerò, ubi plus sese occuparit sensus,
 ibi minus relinquitur ad contemplationem loci: ast altera non
 animum tantum, sed partes etiam propè corporis omnes exercet
 ad laborem, nec sine his uidetur se posse tueri. An miles esse po-
 terit, cui nerui podagræ ui, artusq; ita obtorpuerint, ut ne pedem
 quidem, aut manum lecto dimoueat? an sat idoneus imperator, qui
 obequitando locum non possit ad castra locanda opportunum ex-
 plorare? aciem instruere? ipse, si prælum paulò atrocius cogat,
 cum hoste depugnare? An orator, cui omnino impedita sit ad e-
 mittendam uocem lingua, aut blèsa; ut, uelut infans, moueat con-
 scioni risum? quantus esset membri huius, sine quo oratio nulla es-
 se potest, oratori usus, declarauit Demostenis labor naturæ cul-
 pam studio indefesso emendantis. Deniq; si totam formam, ha-
 bitum, statumq; corporis humani contemblemur, si rationem
 quæras

quæramus; si spectemus usum, reperiemus homini esse hæc tributa ad necessitatem magis agendi, quàm ad otium contemplandi.

Est igitur actio unius hominis propria, non brutorum. Quæ quanquam uidemus & sibi, & his, quæ genuerint, prouidere; ad uictum necessaria quærere, inimica deuitare; ea moliri; quæ in quibusdam ipsorum humani propè ingenij speciem quandam præse ferant, nemo tamen dicet agendi facultatem esse illis datam: sed potius naturali quodam instinctu genus suum unumquodq; tueri, salutemq; sibi procurare. Nulla enim actio est, quæ finem aliquem tanquam scopum itineris sibi non antè proponat; quò qui uult perducì, uias eum indagare oportet, quæ illuc properantem ducant: facere autem hoc nequit, cum sint plerumq; multiplices illæ, & uariæ; nisi rationem ad eas ducem sequatur: ex quo consilium in primis institui est necesse. Porro consulentis animus ea disquirìt, quæ dubia sunt, & incerta; præterea, quæ in ipso consulente sita: disquisitio autem ea ui animi efficitur, in qua ratio certè inest: hæc ubi nobis cognita fuerint, statim ea ipsa persequimur, perficereq; conamur; quæ prius discussa nos ad id, quod initio nobis ipsi proposueramus, habendum perducunt: hoc modo constat, absoluiturq; actio ea, qua de nunc loquimur. In qua quidem uelle inest propterea, quòd ad finem præstitutum referatur; cuius finis proprium est uelle: ut ea tantum dicantur agi, quibus uolentis animus, quæ aut sunt solida, ueraq; bona, aut speciem, atq; imaginem bonorum præbent, sibi possit ea comparare: etenim uelle ipsum non est nisi cum ratione coniunctum: nec temere ad ea expetenda rapitur, ad quæ sese ipsi obijcientia collimet: hoc bruta faciunt, quæ sensus tantum pellicit, ut ea con-

cupiscant; quæ sua ipsorum conseruandorum causa ut quærent, non ratio, aut consilium edocuit, sed admonuit natura.

Itaq; nihil homini æquè naturale, necessariumq; est, atq; actio: præterea ad colendam beneficentiam tam aptum, tamq; bonorum scrax: hac enim priuata augemus; moderamur publica; aliena fouemus: hac liberos instituimus; parentes complectimur: à qua sanè uitium, atq; improbitas omnis abest. Nec, cum de actione hîc loquimur, illa uolumus complecti, quibus improbè delinquimus, & à recta ratione, consilioq; aberramus: tametsi in fabulis illa dicuntur agi, quæ turpia, & nefanda esse nemo non uidet, qui adsit rerum fictarum ociosus spectator. Eius autem, de qua præsens est disputatio, moderatrix est prudentia: à qua salus omnis, atq; ea, quam possumus assequi, post deum, felicitas profiscitur. Contrà uerò uitio coniuncta temeritas omnia labefascit, & conuellit; estq; maximè contra naturam: quæ cum eius ordinis, quem rebus adiecit perpetuum, & constantem, apprimè est conseruatrice, tum inimica uitio; quod id tollat, atq; interimat opus, cuius sit ipsa aliquo modo parens, & effectrix; quodq; & esse, & uiuere concupiscat: rectum enim, & sapiens iudicium rerum agendarum corrumpit improbitas: hoc fixissimum detrimentum statim sequitur interitus eius actionis, quæ est maximè secundum naturam, quamq; in optimis haberi necesse est. Quæ uerò huic contraria est, ueluti neq; id, quod perniciosè, pestiferèq; sciscitur in populis, legis nomen attingit, minus fortasse actio dici potest; quia, ut uitium etiam, à quo hæc oritur, morti similior esse uideatur; quæ, quod est, nihil ut sit, efficit. Præterea, cum natura nihil statuatur mali, bonum autem id sit omne, cuius ipsa sit

auctor, actionem utiq; quam maximè naturalem esse ostendimus, non nisi cum honestate coniunctam esse necesse est. Istuc ipsum etiam ratio ea comprobatur, qua dicimus finem spectari ab actione suum; hunc autem esse aut solidum, aut apparens bonum: id cum natura illud antecedit; quod post malitia inuoluit fallaci integumentum boni, illam etiam, cuius finis alterum anteceffit, & re, & uoce prius extitisse oportet; ut actionis solo nomine, nisi addamus improbam, semper eam, quæ sit ad conseruationem rerum necessaria, quæ laudabilis, quæ naturæ consentanea, intelligamus.

Quod autem præter hanc uitæ rationem, itemq; alteram, quam in contemplatione positam esse diximus, non sit tertium quoddam genus, aut plura, quæ homini assignata esse uideantur, duæ possunt afferri causæ. Harum altera est diuersitas ipsa rerum; altera, eaq; posterior, conditio animantis huius, & natura. Rerum namq; aliæ principiorum suorum naturam consequuntur, ut, qua illa, eadem hæ quoq; necessitate contineantur, eundem semper cursum, institutumq; tenentes: qualia sunt potissimum, quæ natura constant; aliarum uerò pro conditione itidem eorum, à quibus deriuantur, initiorum, mira est uarietas, & inconstantia: huiusmodi est humanarum rerum status. Natura constantium, eorumq; omnium, quæ eadem semper necessario manent, contemplatio est: actio humanarum. Cum autem uoluisset deus animantem quandam terras intueri, quæ, quod conditori cognatum est maximè, cognosceret, saperet, & intelligeret, particulam quandam diuini luminis terrestri corpori affixit; quæ, qua uis est ipsa procreata, cum utrumq; in eodem homine præstaret, & contemplaretur rerum sempiternarum uim, ac naturam: & flux

xarum, nec eundem tenorem perpetuò seruantium conditiones,
 ortus, progressus, conuersionesq; disquirendo consilia explicaret.
 Hinc, quantum attinet ad eas uitæ rationes, quas sequi unum
 quemq; decet, duo genera hominum extiterunt: quorum alij stus
 dium suum ad scientiam contulerunt: alios negotia aut priuata,
 aut publica detinuerunt: nisi uelimus uitam quoq; pecudum hos des
 gere, ad sensum tantum, quo uno sunt præditæ, quicquid molunt
 tur, referentium. *Locus hic fortasse postulare uides*
tur, ut, cum utriusq; uitæ initia percursa sint, & causæ, de ui,
facultateq; animi nonnulla differamus, ea tantum attingentes, ex
quibus eorum, quæ diximus, possit haberi cognitio clarior, atq; ex
plicatior. Ita q; (ut Philosophi nunc sumus) dicendum est, præter
uires illas, quibus homo alitur, uiuit, ac sentit, quarum altera
cum plantis: cum brutis, reliquisq; animalibus ei altera est com
munis, mentem esse in ipso collocatam; quæ tanquam sol animi
tenebras luce collustraret, præessetq; dux iter in barum rerum
incipiti, atq; inextricabili labyrintho facienti, nequa post impru
dens erroris pœna plecteretur. Nec tantum uiæ demonstrator
accitus aliunde, ex altissimo uidelicet cœli ipsius domicilio, Sed uis
altera huic moli corporeæ est affixa, quæ rectè admonenti, præ
cipienti q; obtemperaret: cuius in facultate sentiente impressa
sunt uestigia, non quatenus sentimus, sed quatenus sensu ipso im
pellente, stimulanteq; aliquid appetimus. Ex quo manifestum esse
arbitror, uim illam animi, in qua ratio inest, duplicem inueniri;
alteram quidem natura ipsa huiusmodi æideri: quæ planè nihil
aliud est, atq; ratio, simplexq; forma, quæ habet, ut & sit, &
semper uigeat, ab omnium auctore formarum: ab alterius uerò

natura prorsus id est alienum : hanc enim obducunt tenebræ ; densa caligo , ac profunda tegit : tantum quidem cupiditas trahit præcipitem ; & ij , qui in his , quibus inhxrent , corporibus exæstuant , rapiunt affectus in diuersa ; ut propter imbecillitatem ne uno quidem in uestigio consistere posse uideatur : ni præsto sit , quæ cadentem fulciat , & firmet . Atq; istuc , quod laudes in ea reperias , ut bonum quo ipsa caret , ab altera parte sese ostentans possit ad se trahere , atq; aduentitio , aliundeq; accersito , tanquam naturali , ac proprio , frui : ita , quod natura abnegatum est , sluzdio , industriaq; comparat , & proprium efficit . Hoc quim fit ; cœnit , ut quod luminis est expers , luce istuc tum colluceat aliena ; sitq; hæc quoq; facultas animæ , & rationalis dici possit communione rationis ; quam sibi non abnuenti impertiat , & largiatur altera fons , & totius origo luminis . Cuius functio sola est , eaq; propria , quæ agenda sint , alteri minus perspicienti aperire ; rectè uiuendi rationem monstrare ; corrigere delinquentem : quæ , si aut imperantis iussa , aut docentis monentisq; præcepta contemnens cupiditate sua protrahatur , tam multis , tamq; uarijs morbis conflctatur , ut aut sanitati nihil prorsus relinquatur loci ; aut optatam , & quæsitam , magnis laboribus longo post intervallo uix demum repurgata recipiat , aut aduenam , hospitemq; egregium aduentantem quidem , aditumq; pertentantem ; ab ingressu ut ne prohibeat , totius tamen domus imperium nequasquam sibi uendicare permittat : quem neq; liberum esse sinat sluzdentem omnes delere maculas ; & in sordibus patiatur aliquando uolutari . Itaq; ijs ille obiectus indumentis , & inuolutus suam intus diuinitatem celat ; quale de dijs legitur in fabulis alieno habis-

tu conditionem suæ sortis emementibus . Atq; plerumq; is esse creditur, quem inuolucra, integumentaq; referunt, pernicioſa illa quidem, & mortifera non minus, quàm uestis illa Nessæi cruore tincta Hercules lateri lethaliter inhæſit . Nam , ut omittam illud, quòd uitia sunt quædam uirtuti tam proxima, & similia , ut quamplurimos minus sentientes fallant , & sibi leuiter de falsa gloria blandientes; cum exempli causa aut prudentiam calliditatis nomine metiuntur, aut prodigalitatē loco liberalitatem reposnunt, sæpe dolosa, fallaciq; rerum imagine ita deludimur; imprudentes ita decipimur specie quadam recti : ficta pro ueris habemus; ut, quæ bona sunt, mala plerumq; ; quæ autem mala , bona utiq; nobis esse uideantur. Honeſti autem, & boni ueram rationem certa cognitione assequi . planè difficillimum est: quam si assequare, utilissimum, & optimum: sin minus , perniciosum , & turpe. Tantam uero difficultatem ueritatis huiusce percipiendæ, laboremq; secum ferunt impedimenta illa , quæ diximus , sese, tanquam nebulæ quædam, nobis obijciant, ne in claram lucem possimus intueri. Hinc tam multæ de summo bono, tamq; uariæ, atq; inter se dissidentes opinioniones extiterunt hominum plus sæpe penumero largientium ei, quo erga seipsos afficiuntur, amoris, quàm eam, quam ignorant, & plerumq; etiam oderunt , ueritatem ipsam sequentium ducem. Hæc autem in actione colligi nunc quam, aut haberi potest, nisi pars hominis altera , qua de nunc loquimur, antè facta potior didicerit nihil, nisi, quod rectum sit, cupere, & amare, finemq; eum, qui sit expetendus maximè , cognouerit; quippe quæ sit utriusq; partis quasi consensus quidam: qui tum existit, cum, quæ appetit, nolit illud non sequi , quod ratio

prius expetendum esse demonstrarit. Quamobrem ei, qui beneficus esse decreuerit, mores sunt in primis excolendi: hoc enim studio ueritatem eam assequi poterit, quæ cum ad bene, beatèq; uiuendum in tota uita necessaria est; tum uerò ad hanc collationem officiorum adhibenda; in qua lapsus paulò grauior & perniciosus est, & magnorum malorum causa. Istac autem calamitas tum maxime euenit, quum à diuersis, qui nobiscum unà nati nunquam penitus, ut melius Peripatetici, quàm Stoici, fortasse sentiunt, ex animis euelli possunt, affectibus trahimur, & lacramur. Nunquam enim tam aufertur à nobis huius, quod in agendo positum est, cognitio ueri, quàm, ubi imperium occupat libido. Rationis autem iudicium tandiu integrum manet, & incorruptum, quandiu in id, quod sibi iure subiacet, ac seruit, ipsa potestatem retinet; neq; tum uelle non possumus, quæ sunt laudabilia, & præclara. Vbi uerò aut amore, aut odio, aut ira, aut uoluptate ferimur; aut metu concutimur, tunc labefactata mens amittit imperium; nec potest amplius loco expulsa frenare præcipites, quin ea concupiscamus; &, si occasio non desit, sæpe etiam persequamur; quæ nec utilia, salubriaq; nec sat honesta discas; aliquando etiam impia, ingentiaq; scelera anhelamus.

Quæ cum ita se habeant; danda ei, quem instituiamus, est opera, ut reginam, ac dominam de sede sua excutiat; impellat, cogatq; in aliena demigrare; illic uestigia firmiter imprimere, ubi potissimum splendor uirtutis elucet. Morum autem, qui rectè instituti sunt, laus est maxima; qui peruersè, reprehensio haud mediocris; atq; ut ea tantum dicuntur esse uitia, quæ bonis, castisq; moribus repugnant, solaq; improbitas homini detestanda, & fugiens

da, contrà autem capeffenda proponitur, amplectendaq; probitas, ita etiam propter alterum reprehendi mur; laudamur uerò magis, atq; extollimur ob alterum. Neq; hîc perinde fit, atq; in rerum contemplatione, ac scientia: quam sequi, & parare laudabile est, & gloriosum: relinquere autem, præsertim si uitæ alterius potior ratio uocet, aut nunquam attingere, non turpe: turpitudine quidem est in solis moribus: quam qui execratur, is hoc est ampliore laude dignus; quò despectior, & probrosior eius est fama, & nomen, qui se illa inquinari patiatur. Nunquam Socrates habitus esset sapientissimus, si aut ex sola rerum inquisitione sequeretur sapientiæ laus, quam ipse contempsit; aut hoc pacto minus esse philosophum homini aliquam ignominia notam inureret: à qua tantum ille absuit, ut & uitæ integritate, & pulcherrimis, honestissimisq; colloctionibus ab omni culpa, uitioq; alios deterrere conatus uel ipsius Apollinis, qui aliquando nolens uerum proferebat, testimonio præclarum, insigneq; uirtutis exemplum, quod sequerentur, posteris reliquerit. Extant libri Xenophontis uiri eloquentis, & docti; in quibus quamplurima ad bene, beateq; uiuendum præcepta, institutaq; Socratis est complexus; idq; ad repellendam inuidiam, qua is per summum illorum iudicium scelus flagrans iniusta damnatione interijt. Hos qui legerit, uidebit rationem ferè omnem, doctrinamq; de moribus eleganter, copioseq; explicatam, haud multa deinceps desideraturus, quæ ad hanc disputationem pertineant: cognoscetq; in uita recte instituenda, & conformanda studium eius fuisse præcipuum; ea tantum bona iudicauisse, quæ & parare sibi propria, & partis frui soli homini licet, quæq; nec lenibus auris aspirantis fortune

proues

prouehuntur, nec in præceps feruntur impetu secuiante reflantis; cumq; horum duplex sit ratio, ea & oratione, & exemplo uitæ prætulisse cæteris, quæ officiorum ratione continerentur; reliqua autem aut neglexisse, aut admodum leuiter attigisse; ac nunc quam se supra infimi orbis globum extollentem Philosophiam è cælo deuocatam in urbibus, quæ commodis, salutiq; hominum prouideret, collocauisse. Neq; iniuria: non enim uideo, cur tanto pere nobis sit in eo laborandum; ut, quæ à sensibus sunt remotissima, atq; quàmmaximo locorum interuallo distantia, qualia sunt, quæ astræ uocantur, eorum uelimus cum magnitudines, tum naturas, uiresq; inquirere: ea enim aggredimur, quæ, cum se supra conditionem humanæ sortis extollant, à spe assequendi deiciuntur: rerumq; difficillimarum desperatione fracti in ipso conatu concidimus, non secus; atq; è cælo præcipitatum Phaëtontem luisse debitas temeritatis pœnas pœtæ ferunt. Quæ uerò constant ex hac materie, quæ rerum orientibus, occidentibusq; figuris substernitur, tanta obscuritate inuoluit horum latentes causas natura, ut uideatur arcana hæc, tanquam sacra Cereris, tegendo propè de industria in uulgus efferri noluisse. Horum tamen indagatio cum est facilior, atq; utilior, tum etiam propinquitate ipsa explicatio: nisi dicamus nescire turpe esse; quod scire aut nullo pacto possumus, aut quàm difficillimè; quodq; pro arbitrio adipisci cuius non licet. Recte igitur & sapienter rerum minus necessariorum cura prætermissa ad ea se conuertit Socrates, quæ, quòd magis in quærentis potestate sita erant, & optare, & quærere decuit; quem quidem imitari eum oportebit, qui beneficus omnino esse uolet. In reliquis autem ita ipsi elaborandum est, ut

ne aut impediunt, aut, quod alteri sit utile, officium ullum tollant. Quod, si efficere poterit, ut hæc studia in suas quoque partes trāferat, existeret ex beneficentia laus multò uberior. Sentiebat Marcus Tullius Cicero, se suis ciuibus fuisse rem gratam factum, si Platonis libros translulisset, quos & iucundos, & utiles legentibus fore arbitrabatur. Quid? nonne ex multis uoluminibus, quæ tum in otio, tum etiam in maximis quandoque occupationibus confecit, id est consequutus, ut laboris, atque industriæ tanti uiri eorum, qui post sequuti sunt, neminem unquam pœnituerit? ad hæc si quis doloribus animi conflictatus confugerit, leuamen illud sentiet, quod pollicetur Horatius, quum sic inquit,

Feruet auaritia, miserâque cupidine pectus:

Sunt uerba, & uoces, quibus hunc lenire dolorem

Possis, & magnam morbi deponere partem.

Laudis amore tumes: sunt certa piacula, quæ te

Ter purè lecto poterunt recreare libello.

Quo uerò beneficio maiore potuit populum romanum promereri, quam exteris nationibus adempta hac gloria in ea urbe eloquentiam gignere, quæ totum ferè terrarum orbem imperio armis subegerat: uidit hoc quale, quantumque esset C. Cæsar, qui parens tem talis copię ipsum nominans beneficium, ut par erat, insigni laude extulit. Aristoteles autem (ut prætereantur alij propè innumerabiles, qui tentarunt, quid in hoc genere assequi possent) omnium, quorum scripta extent, doctissimus ea in summo otio perfecit, quæ officiorum magnitudine nulli unquam cessura esse uideantur. Itaque propter tanta erga humanum genus beneficia talium uirorum uiget adhuc gloria: quam ex omni hominum me-

moria nulla unquam delebit obliuio. Horum igitur studiorum ratio si ita instituta fuerit, ut fructus aliquis redundet ad alios, præsertim ad rem. p., nihil planè huic laudabilius esse poterit: qui ad omnium utilitatem ratione beneficij ea copularit, quæ finium diuersitas à mutua coniunctione uidetur excludere. Quòd, si tantum animi oblectamenta quæruntur, quales sunt poetarum lusus, permittatur id quidem, & qua præsertim postulanti: cui etiam tesserarum ludum fortasse aliquando concedas: est enim iniusli propè hominis, & alieno bono inuidenti iucunda, quæ noceant nemini; prohibere: meminerit tamen in his sibi non diutius esse commorandum: remigrandum ad magis propria; atq; illa in primis esse repetenda, ex quibus maiora ad cultum beneficentiæ parari possint adiamenta. Pericula contemnat fortis, atq; intrepidus: uoluptates moderetur: libidinem coërceat intemperantem: ne sit ad iram incitator: iustitiam, & pietatem colat: sit uerax: assequabilis: comis, & urbanus: deniq; optimis moribus instruat se, & ornet: facile enim tum rationi cedit cupiditas, cum imperium alterius ferre assueuerit. In hoc si omni cura incumbat, has ingentes opes si comparet, si probitatem sequatur, nolle non poterit, nisi, quæ ijs ipsis cognata sint, à quibus tum laudabiles proficiuntur actiones, tum uoluntas ad id, quod sibi obijcitur, expetendum procliuor efficitur, atq; liberior, affectibus tanquam uepribus cultura recisis.

Verum hæc, ut reliqua etiam animi bona, haud facile acquiri possunt: ut rectè dictum sit ab Hesiodo, à dijs immortalibus planè decretum esse, ut uirtus multo sudore pararetur. Cuius rei tres potissimum reperiò esse causas, uoluptatem corporis, loci difficultatem, in quo tanquam in regno suo uidemus

ne aut impedianz, aut, quod alteri sit utile, officium ullum tollant. Quodd, si efficere poterit, ut hæc studia in suas quoq; partes trāsferrat, exisset ex beneficentia laus multò uberior. Sentiebat Marcus Tullius Cicero, se suis ciuibz fuisse rem gratam facturum, si Platonis libros translulisset, quos & iucundos, & utiles legentibus fore arbitrabatur. Quid? nonne ex multis uoluminibus, quæ tum in otio, tum etiam in maximis quandoq; occupationibus confecit, id est consequutus, ut laboris, atq; industriæ tanti uiri eorum, qui post sequuti sunt, neminem unquam pœnituerit? ad hæc si quis doloribus animi conflētatus confugerit, leuamen illud sentiet, quod pollicetur Horatius, quum sic inquit, Feruet auaritia, miseraq; cupidine pectus: Sunt uerba, & uoces, quibus hunc lenire dolorem Possis, & magnam morbi deponere partem. Laudis amore tumes: sunt certa piacula, quæ te Ter purè lecto poterunt recreare libello. Quo uerò beneficio maiore potuit populum romanum promereri, quàm exteris nationibus adempta hac gloria in ea urbe eloquentiam gignere, quæ totum ferè terrarum orbem imperio armis subegerat: uidit hoc quale, quantumq; esset C. Cæsar, qui parens tem talis copiæ ipsum nominans beneficium, ut par erat, insigni laude extulit. Aristoteles autem (ut prætereantur alij propè innumerabiles, qui tentarunt, quid in hoc genere assequi possent) omnium, quorum scripta extent, doctissimus ea in summo otio perfecit, quæ officiorum magnitudine nulli unquam cessura esse uideantur. Itaq; propter tanta erga humanum genus beneficia talium uirorum uiget adhuc gloria: quæ ex omni hominum me-

moria nulla unquam delebit obliuio. Horum igitur studiorum ratio si ita instituta fuerit, ut fructus aliquis redundet ad alios, præsertim ad rem. p., nihil planè huic laudabilius esse poterit: quæ ad omnium utilitatem ratione beneficij ea copularit, quæ finium diuersitas à mutua coniunctione uidetur excludere. Quod, si tantum animi oblectamenta quæruntur, quales sunt poetarum lusus, permittatur id quidem, & quæ præsertim postulanti: cui etiam teserarum ludum fortasse aliquando concedas: est enim iniusti prope hominis, & alieno bono inuidenti iucunda, quæ noceant nemini, prohibere: meminerit tamen in his sibi non diutius esse commorandum: remigrandum ad magis propria; atq; illa in primis esse repetenda, ex quibus maiora ad cultum beneficentiæ parari possint adiamenta. Pericula contemnat fortis, atq; intrepidus: uoluptates moderetur: libidinem coerceat intemperantem: ne sit ad iram incitator: iustitiam, & pietatem colat: sit uerax: affabilis: comis, & urbanus: deniq; optimis moribus instruat se, & ornet: facile enim tum rationi cedit cupiditas, cum imperium alterius ferre assueuerit. In hoc si omni cura incumbat, has ingentes opes si comparet, si probitatem sequatur, nolle non poterit, nisi, quæ ijs ipsis cognata sint, à quibus tum laudabiles proficiuntur actiones: tum uoluntas ad id, quod sibi obijcitur, expetendum procluior efficitur, atq; liberior, affectibus tanquam uepribus cultura recisis. Verum hæc, ut reliqua etiam animi bona, haud faciliè acquiri possunt: ut rectè dictum sit ab Hesiodo, à dijs immortalibus planè decretum esse, ut uirtus multo sudore pararetur. Cuius rei tres potissimum reperio esse causas, uoluptatem corporis, loci difficultatem, in quo tanquam in regno suo uidemus

has esse collocatas; postremo itineris magnitudinem, longosq; quasi uiarum anfractus perducentium ad metam properantes. Nihil enim æquè inimicum, repugnansq; rationi, atq; ea, quæ sensum titillat, uoluptas: nihil magis uirtuti contrarium: nulla capitalior pestis data est hominibus à natura: quæ, si paulò diuturnior sit, lumen omne ingenij prorsus uidetur extinguere. Hanc moderari, frenareq; haud facile est; ni pressio sit ratio: furtim enim in sensus illapsa tanquam blanda meretrix suis illecebris sæpe ad se totum hominem rapit, fallaciq; boni imagine mentis oculos ita perstringit; ut hæc uerum, rectumq; iudicium rerum omne amittat: iureq; à Platone esca malorum dicitur, quod sicut bamo pisces, sic homines ipsa capiantur. Penitus autem euellere omnium difficillimum est: unà enim nobiscum nascitur; neq; auctorem sui ipsius alium, atq; naturam ipsam uidetur agnoscere: progressuq; temporis (uoluptatis enim exercitatio eius tanquam affinem cupiditatem auget) tantas uires sumit, ut rerum omnium potiatur imperio. Huius igitur maxima hominum pars captiua delinimentis, spretis sinceris animi, uerisq; uoluptatibus uitam degit more belluarum, haud æstimans quantam conditioni suæ faciat iniuriam; quæ turpiter malit abiectam sequi, quam præstantem retinere. Ad quæ delinimenta hoc facibus delabimur, quò leuior trahit ad capiendum fructum labor: secus si esset, non illa utiq; tantopere peterentur: est enim labor parum amicus naturæ: qui si longior sit, ferri non potest: solemus præterea illa fugere, & aspernari, in quibus, dum parantur, nulla inest uoluptas, aut perexigua: ut hæc omnino sit tanquam condimentum quoddam actionum humanarum: atq; hoc magis unum

quodq; abhorremus, quò est aut. ad tractandum asperius, aut difficilius ad consequendum. Porro ad uirtutem tentanti aditum cum sensus omnis ad rationem reuocandus; tum subeundi sunt labores quàmmaximi. Nam & uirtus omnis uersatur circa id, quod in unoquoq; difficillimum est: & illa, quam potissimum in homine benefico esse uolumus, mores expolientem, & ornantem, cum locum, ac sedem sibi delegit imperio; ut eousq; uolenti, atq; adnitenti penetrare labor sit omnium maximus, aut unius Herculis par uiribus à Ioue patre facilè opem exorantis; aut per paucorum, idem

Quos æquus amauit

Iuppiter.

Nec in hoc, ut in plerisq; mentiuntur poetæ: qui montem quen-
dam altissimum fugientes præruptis undiq; cinctum rupibus
aiunt in summo huius uertice uirtutem habitare; ubi æquata undiq;
planities & mira colorum uarietate distincta, & proceris,
atq; ad aspectum decentiorem directis in quincuncem arboribus
consita, & limpidissimorum fontium aquis irrigata refrigerantibus
longo, ac perdifficili itinere fatigatos excipiens recreet, ac
soletur. Nulla in re, quàm in hac, illud uerius, ueritatis partum
esse mendacium. Nam, ut eo labore, qui ad parandam uirtutem
impenditur, nihil fortasse est durius; ita nec, quæ à parta percipitur,
uoluptate quicquam potest iucundius inueniri. Omnes quidem
actiones nostras ita metiri possumus, ut in unoquoq; quod fit,
seruetur quidam in agendo modus; aut ad nonnulla extrema
feratur actio; quorum alterum nimis est alieni appetens; ab altero
aufertur, quod suum est. Vtrumq; peccatum est turpe, taz

metſi alterum eſt altero grauius ; idq; pro conditione ipſarum rerum, in quibus delinquitur . Virtus autem , quæ his omnino grauis eſt aduerſaria conſtituta, utrumq; à ſe repellens hoſtiliter in medio ſpacio conſiſtit : qui locus circumuallatus hoſtibus undiq; bellum aſſidue gerentibus aditus habet difficillimos, ipſe in anguſtum ſpaciũ, atq; admodum breue coartatus: ut, ubi eò peruenieris, hæerere, & firmare ueſtigia uix , & multo cum labore poſſis. Ita q; mediocritatis ratio una eſt, & ſimplex maximè, nec eam ullo pacto adipiſcare, niſi in uno conſiſtas loco. Vitium uerò latiſſimè ſerpit, monſtrum hydra lernæa feracius : patetq; imenſus ad peccandum campus, qui inter medium, & utrumq; extremum intercipitur. Plerumq; etiam in his , quæ inter ſe pugnant, multis peccatur modis ; à quibus omnibus uia ad uirtutis pulcherrimum , anguſtiſſimumq; domicilium intercluditur . Hæc ipſa præterea longis adeo in immenſum protenditur interuallis, ut, qui totam confecerint , in tanto hominum numero paucos admodum reperiās; pleroſq; , qui magnam fortassis partem itineris emenſi tædio demum , & labore fatigati ſubſtiterunt : reliqui uerò,

Quæ maxima turba eſt,
ne attigerunt quidem: ut non tam implicatione ipſa , quàm imenſitate ſpaciõrum ſoleat quemlibet uel animatum ſatis , atq; alacrem deterrere. Hoc autem, quale ſit, uideamus. Planè, ſi Peripatetici eſſe uolumus, qui tamen, quod uerum eſſet, minus interdum peruiderunt, nec ſatis poſſumus læudare naturam, quæ illam tanti boni nobis non fecerit copiam, quam oculis cernendi , audiendi auribus præbuit , nec penitus accuſare ; quòd , ſicut cæteris

animalibus, eius aliquando perfruendi facultatem omnino denegarit: ueriusq; hacce in re fuit nouerca, quàm parens. Quæ enim erant hominum propria, horum bonorum sibi ipsis auctores eos esse uoluit: tot præterea molestias, impedimentaq; obiecit quærentibus, ut illa propè nobis inuidisse uideatur: quæ studium comparandi tantoperè impediendo retardarit. Sensit hoc (neq; enim à ratione alienum, à poeta sensum hūc exigere) Homerus, cuius ingenium nemo unquam satis admiratus est, quum homine modo nihil esse miserius cecinit; modo nil fortunatius: assequendi uidelicet facultas felicem efficit: difficultas infelicem. Hæc igitur natura in animis hominum uim quandam indidit, qua in his ipsis, tanquam in cera imago annuli, posset quoduis imprimi, ac reponi: *ἀναγιγ* græci uocant. In hac autem rerum diuersarum tum inspectione, tum tractatione mentis eius, quæ tanquam sol tenebricosam domum suo fulgore collustrat, agitatio uirtutes ipsas imprimit, à quibus id omne, quod rude est, & informe, expolitur: & materies, cuius naturam in animo refert facultas ea, quam diximus, suapte natura circumscribi, accertis lineamentis designari cupit; siquidem horum ipsorum beneficio dignitatem eam consequitur, ut sit uidelicet, quod non erat. Itaq; uirtus omnis illud excolit, & absoluit, quod quasi inchoatum à natura imperfectum, & incultum remanserat: non secus, atq; in ære ars imprimit figuram; quod erat ea conditione à natura concretum, ut in ipso posset illam artifex exculpere. Verum ad has imprimendas in hac animi facultate formas summo studio est opus, & haud mediocri contentione: nec rei præcellentis amplitudo temporis breuitate contenta est. Non enim, si, cum eorum nihil omnino

scias, quæ scientia aliqua comprehenduntur, discendi percupidum te ad docentem conferas, si semel, aut bis cuncta ab illo excipias, statim doctus, & peritus fias: sed illa centies, aut eò etiam amplius inculkanda sunt auribus; atq; ita, ut

Occidat miferos Crambe repetita magistros:

insudandum: libri semper præ manibus habendi: exacuenda est assidua agitatione acies ingenij: repetenda sunt quotidie memoria, quæ aut dictata ab altero didiceris; aut ipse proprio labore compararis: hoc pacto scientia demum acquiritur: quæ post nunquam, aut perrarò euelli, abradiq; ex animo potest. Idem cernere est in moribus. Non enim si qua in re bis, aut ter æquum te præbeas, continuò iustus sis: aut temperans, si te hodie, & cras contineas, libidinem reprimas impellentem. Verum quotidie exercenda est æquitas: resecanda libido: atq; tandiu istuc faciendum, quoad bonis artibus ita animus assucuerit, ut ex honestis actionibus aut uoluptas sequatur, aut saltem nullus perturbet dolor: libenterq; tandem id fiat, quod initio propè inuitus quis agit; dum sæpe nescit, quid faciat, aut casu quodam; aut alio præcipiente id persequitur, quod rectum est, & laudandum. Miror, inquit Iulius, te tandiu silere Antoni, ut instituti tui quasi oblitus esse uideare. Nam, qui quæstionem alteri proponit, solet, ut crebrò non urgeat, tamen interdum aliquid à respondente quærere, aut hunc rei alicuius admonere; qui fortassis unus non possit cuncta explorare cogitando: scis enim trito uulgi sermone prouerbio binis oculis plus, quàm uno, cerni: aut saltent diceres, de his quid tu sentias, quæ te modo animaduerti attentis auribus hausisse. Nihil, inquit Antonius, Iuli fuit, quod loquentem interpellarem: ita enim

enim omnia, quæ pro actionis patrocinio à Philosophia peti possunt, exactè persecutus est, ut ad ambigendum, aut monendum loci nihil relictum esse uideatur. Aut ego minus ista intelligo; qui Philosophiam leuiter attingens ad ius ciuile omne meum studium contuli. Præterea eam legem, si recordaris, nobis initio ipsi præscripsimus, ut admodum rarò loqueremur; præsertim si eiusmodi nodus in re nullus incideret, quem explicari necesse foret. Quæ uero (nam, scire id, uideo te cupere) hucusq; ex hoc unà tecum audiui, gratissima mihi planè acciderunt. Nam simul & multa disci possunt ex his cum ad uitam colendam, tum ad eum, quem quærimus, instituendum necessaria; & ex eo haud mediocrem uoluptatem cepi, quòd acutè, & eleganter quædam nobis exposuit, quæ, ut de actione sermo esset grauior, & iucundior, nequaquam pertermittenda esse uidebantur. Quæ in re orationem uideo ita temperauisse, ut nec breuitas nimia obscuritatem ullam attulerit; nec fastidium pepererit copia; præterea istius ætatis tuæ rationem sic habuisse, ut ignaram quarundam rerum edocere uoluerit; quarum cognitio & utilis est non recusanti disciplinam, & in studium doctrinæ incumbenti iucunda iuuentuti: ut illis, qui benefici esse uolent, uirtutis eius, quæ moralis dicitur, fuerit omnino & aperienda natura, & explicanda laus. Itaq; cerno multò maiora hæc fore, quàm cogitarem: ampliora enim, cumulationaq; beneficia possunt ab ea, qua de nuper is differuit, uirtute existeret, cum se totam ad alios conuerterit, quàm à fortuna, quæ sæpe obest, nunquam prodest, nisi uirtutem ducem, ac dominam tantquam famula sequatur, & colat. Sed audiamus, siquid reliquum est, quod ad disputationem pertineat, quæ de illo genere uitæ, quod

beneficentiam supra ostendimus exigere, dudum est à Iacobo instituta.

Satis, inquam, opinor ex his, quæ sunt à nobis oratione paulò longiore disputata, quantum rei necessitas ipsa postulabat, explicatam, patefactamq; eius actionis esse naturam, quæ cunctis & capeffentibus rem.p., & domesticarum rerum curam gerentibus, benefici ut esse uelint, est amplectenda, simulq; ad hanc ipsam homines natos esse, atq; à deo ipso institutos; neq; ciuitatem ullam, aut domum, neq; quempiam diutius ex se ipso esse posse; si aut studia doctrinæ tantum persequatur, aut dominante, crassanteq; libidine rerum agendarum honestiora, prudentioraq; consilia ab hoc excludantur; quæ ut homines & nossent, & cuperent, eam animorum conditionem esse consequutos, ut ipsis inesset, quo utrumq; possent, & cognoscere scilicet mentis acie, recta quæ essent, & cognita, perspectaq; simul appetentes & uelle, & sequi: ut autem peterentur, exegisse tot, tantasq; necessitates, quibus humanam uitam obstrinxit natura, aut, quod est uerius, malitia inuoluit, ut, cum hominum conditio, si hoc spectetur, multò uideatur esse miserior, quàm belluarum, quibus concessum est & paucis esse contentas, & multò paucioribus, leuioribusq; torqueri malis, necesse fuerit remedia quærere, quæ miseræ, calamitosæq; sorti subuenirent. Quorum è numero, ne imbecillitas nostrà auxilio destituta uideretur, immensa dei prouidentia cuicumq; generi necessaria cuncta suppeditantis uirtutem esse nemo non uidet, cum omnem, tum uerò eam maxime; à qua impellimur, ut non pigeat pro patriâ, communiq; bono sanguinem profundere; iustitiam seruare, uoluptates immoderatas, libidinemq; coercere; ex opibus proprijs largiri, quod aut usus

exigat, aut æquitas ipsa patiatur. Hæc nimirum constantes efficit, docetq; casus omnes humanos sapienter, fortiterq; esse perferendos; perturbationes omnes, motusq; animorum æquè temperat, ac lenit, eiusdem actionis dux, atq; arbitra, qua rerum omnium administratio, regimenq; cōtinetur. Quæ si, ut par erat et diligi, & coli, à nobis coleretur, & honestatis splendor, quam aut unà cum actione coniunxit natura, aut eius moderatricem statuit, multò pulchrior, clariorq; inter homines emitesceret: &, quos acerbi, miserrabilesq; in dies urgent, premuntq; casus, felicitate tanta frueremur; quanta certè homini, si se ipsum cognorit, est tributa. Ergo neq; mirandum est, si uitam nunc ducimus acerbam, & infelicem: eius enim, unde beati efficimur, contemptum necessario graues, atq; intolerabiles sequuntur erumnæ. Quotus autem quisq; est, cuius præclaras actiones possis extollere, & laudare? qui artibus his, à quibus illæ proficiuntur, imbutus ad rem. p. se conferat; studeatq; hanc ipsam tueri, & augere? Nos stris quidem temporibus, præter multarum magnarumq; urbium euersiones, regna igni, ferroq; uastata, assidua bella, quibus dissidentibus principum animis ob effrenatam imperandi cupidinem tota fermè Europa conflagrauit, ex tanto hominum numero, quibus moderandarum rerum cura est tradita, paucos admodum reperias; quos publica utilitas magis, quàm priuata ad se pertrahat: ut omnis recta, sapiensq; agendi ratio sublata esse uideatur: doleamq; interdum uagienti in cunis mihi uiuendi cursum non esse præcisum; ne prouectus ætate fortunam eius sæculi tam miseram, calamitosamq; cernerem; in quo pro constantia summa dominatur leuitas; pro æquitate iniuria; pro temperantia libido.

nec, qui uirtute freti querant imperia, multos reperias: nec, nisi opulenti hominibus, aut fauore adnitentibus mandantur honores: probitas tantum, ut ait. Satyricus poeta, laudatur, & alget. In re. p. romana, qua nulla unquam talium uirorum extitit feracior, multa cumulatæ uirtutis exempla memorantur. His igitur & magna pietas in patriam, & in re. p. administranda singularis industria, & in priuatorum, amicorumq; tuendis commodis studium haud mediocrè, miraq; integritas tantam laudem ex actione pepererunt; ut turpe sit non imitari, quos laudamus: scelus aduersari: hac enim ita usi uidetur, ut omnia propè studia sua, laboresq; ad unam beneficentiam rettulerint. Quæ quidem est uitæ eius potissimum, quæ in agendo posita est, quasi decus quoddam, atq; ornamentum: hoc enim illud prior est actio, quò magis illa uidetur ad aliorum utilitatem redundare, & quidem uox ipsa utrumq; indicat; quæ græcis primum, post latinis ita coniuncta est, ut hominem ad præclara facta excitare uelit, desidiam, otiumq; detestata. Atq; præclara quidem illa sunt, temperantem esse; constantem in perferendis doloribus; æquitatem animi in aduersis rebus retinere æquè, atq; in secundis, iram effervescentem cohibere: sed quæ tamen possidentis magis propria, & unde fructus plerumq; solet alteri extare tenuior: at benefico, qui plus aliorum, quàm sua ipsius causa uelit, quid clarius esse potest? Quanquam enim prodesse fortasse uel exemplo, uel non nocendo alteri uidetur, qui eas animorum perturbationes comprimat, ac sedet; quarum effrenis, liberiorq; is non ei tantum, quem tam noxiæ cruciant, & affligunt pessis: sed per sepe cæteris etiam perniciosa esse solet: aut fingat

mus, & malo solum torqueri ægrotantem, & ubi sanitas ei fuerit uirtutis, tanquam medici, opera restituta, æquè præter ipsum, bono frui neminem; est enim non mediocris eius uirtutis laus, quæ hominem rationi parere cogit, à brutorum natura abhorrescere; multò tamen illa præclarior, à qua non magis habenti extet, quàm carenti, fructus. Nocere nemini, præsertim cum possis lædere, laudabile est: odium enim iniuriæ, magnum est probitatis indicium: prodesse quàmplurimis, non est nisi perfectæ uirtutis opus; etiam, qui nihil nocet, potius uidetur nihil agere: qui nihil agit, homo uerè nihil est: quid si etiam interdum, quum iuuare potest, noceat haud parum? Hoc nimirum apologo illo declaratur, qui est de totius corporis interitu ob membrorum in id odium atrox, atq; execrandum; quæ nihil agendo seque, & illud, quod insensè oderant, miserè, turpiterq; perdididerunt. Poterat ne exemplo, licet id fictum sit, aptiore actionis, beneficentiæq; simul necessitas ostendi: quo & desidia damnatur, quæ turpis sit, & perniciofa; & simul arguitur magis esse secundum naturam, ut quiuis profit, quàm ut ne obsit: cum, si iuualet, officiumq; unum; quodq; suum facere studeret, uita, ab ea etiam ui, quam manus præsertim corpori afferre poterant, ut abstineret; si tantum nihil ageret, mors ipsa sequeretur. Itaq; quæ lex amicitiae, necessitudoq; membrorum cum corpore ut esset, natura sanxit, eadem lege, ac fœdere uoluit uniuersos homines teneri: ut, quemadmodum neq; corpus salutem suam tueri potest, nisi membra ei sufficiant, & ministrent, quò alatur; neq; hæc ipsa diutius uiuere est necesse, nisi illuc id possit remittat partem aliquam, unde prius acceperit, alimenti, sic homines inter se mutua beniuolentia de-

vinceret, atq; alter alteri, si se saluos esse uellent, quo egeret, auxilium præstaret. Amor autem ille, quo plus, quàm par sit, protractis multis una utilitatis propriæ ratio curæ est, & reprehendi maximè, & turpis haberi solet. Huius uis latissimè quidem patet: qui tum maximè lethalis est, quum alteri detrimentum affert. Liquet enim ex his præcipuè, quæ modò asseruimus, esse contra naturæ ipsius leges: cuius maxima liberalitas cernitur ex tanta rerum uarietate, & copia; quam genuit uel ad hominum conseruationem necessariam, uel ad dignitatis speciem usq; spectantem. tollitq; uinculum humanæ societatis omne, à quo charitatis ne scintillam quidem in alios deriuari uideas; quiq; tantum sibi bene esse cupiens aliorum commoda omnino negligit. In primis uerò præcipuum is euertit Christianæ pietatis fundamentum, qui charitatem illam reijcit, & odit: cui Christum ipsum auctorem sequutus Paulus tantum tribuit, ut rei cuius, præcellentiq; uirtuti, quam deus homini largiatur, eam non prætulerit modo, sed affirmarit etiam, ut reliquorum quoduis adsit, & ornet, fore, si desit hæc comes, ut nomen Christiani philosophi nemo ulla ratione tueri queat. Nec amicitia per hunc potest esse ulla. quoniam enim alium æquè, ac seipsum diligit, in quo uno inest amicitiae uis omnis, qui omnia ad sese pertrahens, nihil relinquens alteri uniuersos propemodum hostili animo oderit: amicitiam autem qui tollit, uidetur, ut inquit Cicero, solem è mundo tollere: quæ & secundas res ornet, & dulce, atq; optatum afferat lenimen aduersis. Quantò autem præclarior, dignaq; maximo, sapientissimòq; philosopho est uox illa Platonis; ortus nostri partem patriam, ac parentes, partem amicos sibi uendicare stant

tuentis. Quamobrem amoris huius ignominiam repellit à se beneficentia. nec beneficus ullo pacto dici potest, qui uno suarum rerum desiderio, illecebrisq; detinetur. Prodest enim mirandum in modum uir beneficus: at contra obest, qui sibi soli bene esse uult. Quo in amore liberos quoq; complecti uolo; aut, qui habetur loco liberorum; quibus parentes, siue ij, qui funguntur parentum munere, æquè, ac sibi ipsis, aut etià plus interdum, consultum uolunt: est enim filius uiua imago patris. Hoc dum fit, tantum abest, ut utilitatis aliorum aliqua ineatur ratio, ut his ipsis etià perscepe damna inferantur; nec ab istis à grauiissimis abstineatur iniurijs, modo cupiditatem expleant suam: quam uehemens quidam habendi amor ita indies auget; ut nec, quanta fieri possit, accessio fortunarum, nec ingrauescente ætate uiatici usus breuior, nec ulla unquam sanctioris doctrinæ præcepta moderentur; sed magis illud euenit, ut

Crescat amor numi, quantum ipsa pecunia crescit.

Nec ulla perniciēs infestior, & propè ad interuersionem usq; humani generis grauior esse potest: præsertim si contagio hæc principes, aut, qui reges sunt, infecerit: leuior quidem in priuatis hominibus, quos obstrictos legibus deterret à sceleribus plerumq; pœnarum metus. At ij, ad quos regna, atq; imperia sunt delata, cum non ad suorum ciuium æquum, rectumq; regimen, sed ad suam libidinem potentiam, opesq; conuerterint, dictu difficile est, quam ingens, & intolerabilis sequatur malorum congeries: quàm acerbæ calamitates, quàm graues casus opprimant innocentes, & nihil mali admittentes ciues. Hinc bellorum incendia; uastationes agrorum; urbium euerisiones; hinc oppressiones legum; tyrannos;

rum conatus nefarij; direptiones fortunarum; cruentæ, atq; abominabiles miserorum cædes. Quò enim quisq; uiribus, opibusq; instructior est, & ad aliquod facinus, quod paulò plus exigat operæ, obeundum paratior, si idem sit plus æquo suarum rerum amator, contemptor uerò alienarum, ut libidinem exaturet immoderatam, effrenis hic iura omnia uiolare audet; finisq; malorum huic est cupiditatis modus. Huius utinam uetera tantum aut extarent monimenta, aut possent exempla proferri. tulit hæc ætas toto ferè orbe terrarum principes adeò incensos libidine dominandi, non desiderio regendi imperij, ut uel bellorum magnitudine, uel numero præliorum, uel casuum uarietate, uel acerbitate infortuniorum cum omnibus anteaclis sæculis facillè conferri possit: tantusq; in Germania præsertim fuit in plerisq; aut habendi, aut imperandi ardor; ut non contenti imperijs, quæ ante hoc bellum, quo in ea à Carolo Cæsare pacatum est imperium, finitimis ui ademerant, simulatione pietatis fana omnia exposciant, & profanarint ex his ipsis complura; eaq; in peruertenda religione patrarint facinora; ut nulla unquã barbaries talia aut uiderit, aut audierit. Prorsus execranda hæc fames rabida; tollenda libido est; malum id, quod dij, & homines non satis oderrunt, detestandum, ei contrarium, inimicumq; actioni, quam & hominis propriam esse ostendi, & ad conseruationem rerum à natura illi datam, ad bonorum cognitionem duce ratione ignarum quasi manu deducente. At dicet is, qui ueniam aliquam fortasse peccato quærit, natura comparatum est, ut se quisq; amet; sibi consulat; se tueatur: fateor hoc quidem, atq; etiam sapienter institutum fuisse contendo. etenim, nisi amoris hæc uis erga se ipsum

ipsum sui in unoquoque insita sit pro suæ conditione naturæ, rerum omnium interitus sequatur oportet. Eadem autem uis in homine præsertim id ualet, ut aliena ope sæpe indigentem cogitatione trahat ad iuuandum, quem isdem casibus obnoxium uideantur: ex quo dicta est humanitas: quæ & magnopere laudatur, & nos in primis aliorum calamitatibus misereri cogit. Quare amoris huius usum dedit natura, abusum negauit. Amet se quilibet, quod iure facere potest, & etiam debet, sed ita, ut humanitati sit locus: quam qui abiicit, à natura hominis uult is omnino degener uideri. Planè uitium, quod est humanitati contrarium, ut aliæ possint esse causæ, certè secum fert nonnunquam diligens nimis propriorum ratio commodorum. Quæ præter reliqua, quæ hinc peccata propagantur, auaritiæ etiam animos labe inquinauit: amor enim pecuniæ, uita est auari: cui parcere, tametsi suum semper defraudat genium, optimum omnium, maximèq; necessarium sui ipsius alimentum putat. Itaq; pecuniæ cupidissimum hunc uideas, quia eo se nimis amore prosequitur, quem ad usum tantum natura dedit. Atq; hoc illud est, quod Aristoteles inquit magis homini natura insitum esse accipere, quàm dare: uidelicet sui conseruandi sola necessitas hoc probat: secus, si accipere lucri tantum cupiditatem præ se ferat, contra naturam est. Nihil autem tam naturale, quam dare, præsertim si id sit cum ratione coniunctum: quod alterum sit uitium, alterum uirtus, quæ maximè est secundum naturam: hæc enim cuiq; quod commodum est, & satis, tãquam benigna parens larga manu suppeditat: nec accipit unquam, quæ nulla re indigens & ad uitium necessaria, & uoluptatum nobis condimenta largitur.

Quamobrem

hanc, aut, cuius ipsa est opus, auctorem imitemur, non plus, quam eadem uelit ratio, quæ unâ nobiscum orta est, nosmetipsos amantes; animumq; ita inducamus, nihil laudabilius esse, quam, quo nos prosequimur, eodem cæteros quoq; amore completti. Nam, præter cætera, quibus ornatum esse uolumus, quî nunc instruitur, ab hoc charitatem tanquam reliquarum rerum fundamentum illam exigimus, quam Christus & oratione docuit, & mirandum in modum uitæ ratione est sequutus: hoc, si persuasum nobis erit, ut uelimus, nimirum id colendam beneficentiam erunt planiora, quæ sequuntur. Ad quam quidem potissimum sua consilia, uitæq; rationes multis uerbis ab homine referri oportere contendî: id enim initio huiusce disputationis receperam uestra Iulii, & Antoni auctoritate coactus, me, quantum uires ingenij mei paterentur, probaturum, nihil esse homini in uita deligendum æquè, capeffendumq; , atq; ut is pro uirium facultate niti uelit, reliquos homines beneficijs promerendo sibi deuincire: quod cum potissimum in actione positum esse constaret, aliquantò diffusius, uti feci, de ipsa mihi differendum existimaui: simul, ut ostenderem, eorum, qui se ad agendum conferrent, quiq; uitam ita instituerent, ut desidem esse, & omni prorsus, quæ alterum iuuat, uacantem industria ne paterentur, quàm illorum, quos contemplandi studium à cæterorum consuetudine plerumq; distrabit, rationem esse potiore, atq; iccirco alteri esse præferendam, præsertim si labor hic nullum afferret fructum, præter contemplanti uoluptatem. Rerum autem inuestigationem præstantissimam, pulcherrimamq; esse, & amorem, studiumq; scientiæ ab eadem natura homini inditum fateri omnino est necesse, quia id mente

fiat, quæ hominis pars omnium nobilissima est; & omnes hæc ap-
 petitione trahantur. Atq; illud quidem si consideretur, quàm
 contemplandi facultate ad dei ipsius naturam propius accedamus,
 cuius hæc fortasse magis uidetur esse uita, nihil utiq; præstantius
 hoc ipso, digniusq; uideri poterit. Verum, si contra reputes, quàm
 multæ & laudabiles, & præcellentes soleant eorum esse actio-
 nes; qui prudentes; qui iusti; beneficiq; eundem sequuti deum, qui
 edocuit, omnium ipse auctor, & fons bonorum, ysdem artibus,
 sapientibusq; consilijs, quibus est initio constitutus, eundem rerum
 statum, qui est optimus, regunt, & tuentur, compertissimum om-
 nibus id erit, nihil scilicet esse aut toti ciuitati, aut singillatim
 cuius melius, quàm ut ad alterum uitæ declinet institutum; quod
 sit non ei tantum, qui negotium suscipit, sed alijs etiam, qui uel
 sedentes indigeant, fructuosum. Profectò nihil esse hoc uerius, de
 quo multa sunt à nobis disputata, & natura nos admonet; &
 communis uitæ consuetudo manifestè docet: unumquodq; enim, si
 spectetur usus, præferendum est, quò maiore id necessitate natu-
 ræ continetur; quæ cum hominum saluti in primis prospexerit,
 utiq; ea uidentur magis necessaria, quæ id ipsum efficiunt, quod
 hæc decreuit. Quòd autem illud, quod ad actionem pertinet, tan-
 quam potius ad omnium conseruationem requiratur, non est,
 quod amplius contendam. Nemo enim absq; hoc contemplationi
 dedere se potest: aut ne altero quidem fortasse indigemus ad sa-
 lutem; aut, si hoc, certè parum. Id Aristoteles affirmauit: qui, cum
 de utroq; genere uitæ sciliberet. Sed neq; inquit, necesse est
 actionem non sequi ciuitates, quæ in solitudine positæ ita sibi de-
 gendum esse decreuerunt: est enim ciuitatis partibus actio neces-

" *saxia, quæ multarum rerum inter se communione uincuntur.*
 " *Atq; etiam idipsum singulis hominibus inter se euenit: deus au-*
 " *tem, atq; hoc uniuersum probè abundat ocio; quorum nulla sunt,*
 " *præter sua ipsorum propria, aliena negotia. Quare uitam hanc,*
 " *quam & tota ciuitas, & priuatus quisq; sequatur, optimam esse*
liquet. parum ne uidetur his paucis uersibus, quid de utroq; sentiret,
ostendisse: quanta sit actionis tum necessitas, tum & in pri-
uatis, & in publicis rebus usus? Quinetiam Ciceroni placet ap-
tiora esse naturæ ea officia, quæ ex communitate, quàm ea, quæ
ex cognitione ducantur; nihilq; homini aliorum utilitate anti-
quius esse debere contendit. Quid si alterum pro
 dignitate rei præclarissimæ nullo pacto cumulatè præstare pos-
 sumus? quid si minimam partem eorum assequimur, quæ mentis
 possunt à nobis acie comprehendere? Maxima, inquit Themisti-
 us, illarum rerum pars quas scimus, minima est earum, quas igno-
 ramus: nonnulla etiam uidentur omnino cogitationem humanam
 superare, neq; ulla ratione, qualia sint, sciri unquam posse. Aut
 dicant, quæ sit natura cæli; cuius uera, certaq; cognitio magis af-
 firmando quæ sit, quàm, quæ non sit, semper negando, constet.
 Multò minus licet sperare nos cognituros, quæ nullum in sensum
 illabuntur: & tamen hæc quoq; sicuti reliqua, aut etiam maiore
 desiderio pernosceri detinemur: quod nec frustra homini affixat
 natura, & propterea aliquando expleatur oportet. Neq; etiam
 eius ipsius, qualecumq; est, quod certè minimum esse apparet, non
 difficillima est comparatio, tum propter rerum uarietatem, &
 copiam, tum quòd absq; sensuum adminiculo cognitio nulla esse
 potest; quorum propter imbecillitatem ipsorum debilitatæ uires

in medio conatu per sepe franguntur: ibi tum labor omnis incassum effusus: aut: si quis aliquando se ad metam usque sustentet, diuturniore uitæ eget spacio: id tamen circumscriptum est hominibus & breue, & incertum; ut uel iusta propè fuerit eius accusatio; quæ, quo tempore scientiæ initium extiterit, uitam sibi tum præripi sit de natura conquestus: secus autem est in altero; quod illa, à quibus ipsa, de qua loquuti sumus, oritur actio rerum conseruatrice; parare magis situm in nobis esse uoluerunt. Præterea leuiore cum labore, quum uolumus, ea, quæ sese adnitentibus obijciunt, rejicimus impedimenta. Mala quidem ualetudo studium doctrinæ omnino aufert: & interdum morbus grauior, quæ quispiam didicerit, delet è memoria: iussitiam uerò, aut alias huius generis nunquam, licet earum usum aliquando impediatur: nec uis ulla potest aliunde tanta existere, quæ inuitis aditum ad laudabiles, honestosque mores intercludat. Itaque illud tanquam optimum omnium tibi luli censeo esse deligendum, sine quo nec priuata domus ulla, nec ciuitas stare potest: cuius, si cum altero conferas, habendi facultas maior, parti usus planior.

Quod si rationes hæc, quæ hucusque sunt allatæ, minus urgeant, (mibi quidem certè ualde probantur; præsertim cum habeant multos memorabiles, ac doctos uiros, qui uelint huius defendendæ sententiæ partes suscipere) quædam uerò exigantur, quibus magis nitatur oratio; quod argumentum euidentius, quæ ratio firmitior afferri poterit, quàm Christi auctoritas? cui iure tantum tribuitur à nobis, ut nec uerius quicquam, nec clarius, manifestius uel quod sit, habeamus: est enim ueritatis eius, quæ in cunctis esse cernitur, origo, & fons bonorum omnium opifex deus: cuius

quot uoces sunt, pronuntiata totidem certè censenda. Is igitur, cui fuit totius humani generis salus uita ipsa charior, qui nulla boni ignoratione deceptus, nec poterat ipse falli, nec alios fallere, quã diu in hoc orbis terrarum domicillo humanis oculis hominem se obiecit, id unum egit, id studuit, in hoc elaborauit, ut omnes ad conformandos, recteq; instituendos mores, ad honestarum actio- num cultum adhortaretur. uel oratione, uel ipsa, quam est profes- sus, ratione uiuendi. Totum hoc studium indagandi, quod pleriq; extollunt, & admirantur, contempsit, ac reiecit: qui solo respon- so, quo doctor Nicomedes imprudens ille quidem, minus uè, quid sciscitaretur, cogitans ab eo est reprehensus, menti humanæ, quandiu includitur hoc ergastulo corporis, ad eorum cognitio- nem, ad quæ post migrationem ex hac uita fruendum editi su- mus, ailitum omnino præclusum assueuerat. Quæ autem de deo aut nostra referret nosse, aut supra ingenium, captumq; nô- strum haudquaquam esse uiderentur, ea ipse sic edocuit, ut non tam impium sit, quæ exploratissima, uerissimaq; sint, obscura, falsaq; dicere, quàm stultum aut plura, aut, quæ sciri non possint, maiora cogitare. Placet istuc mihi, inquit Antonius, ut etiam pro Iulio loquar, quod auxilium sæpe ab eo petis, à quo firmissimum illud multò, quàm à Philosophis, accipiendi, parandiq; spes sit ex- ploratior: planèq; intelligo ab eo ipso & actionem præferri, & curiosa nimis quorundam ingenia damnari ad ea penetrare ten- tantium; quæ, ut olim deæ Cereris mysteria, quærere propè sit nefas, ridiculum uelle scrutari: quos quidem homines doctè admo- dum refellit Gregorius Nazanzenus in eo libro, qui ab ipso de Theologia inscribitur: hunc tu mutato nomine de incomprehen-

filii dei natura latimim fecisti. Sed quid hoc est, quod audio à multis obijci studium illud Marthæ, in accipiendo hospite tantos pereflagrans, cuius quasi quandam reprehensionem statim sequitur mira sororis collaudatio; quæ neglecta cæterarum rerum cura, spretaq; voce opem implorantis nunquam ab unius hospitis conspectu digreditur? Neminem, inquam, deterere debet, aut auocare à patrocinitio publicarum, domesticarumq; rerum Christi hæc oratio. Nam, si quis, quid is uelit à Martha, perpenderit, cognoscet Magdalenæ hunc actionem illam probauisse; quæ, si conferatur cum altero sororis studio, ad contemplationem propius accedere, si animi, quæ nihil prosint, oblectamenta querantur, actioni similior esse uideatur. Contemplatorem enim, qui aut sibi tantum uiueret, cum alijs etiam posset uiuere, aut stultam uerèq; inanem sapientiam profiteretur, semper ille damnauit; qui eundem sequutus, ducem agendo aliquid alterum iuuaret, cum nunquam non probauit. Itaq; actionem, quæ obesset, reiecit; contemplationem, quæ prodesset, laudauit; neq; hoc loco (ut ego quidem sentio) contemplari aliud est, atq; Christum ipsum imitari, qui semper sic uixit, ut cæteri se uiuere latarentur. Atq; eorum quidem, qui ex occupationibus ad hoc otium, ut sic dicam, agendi potius, quàm contemplandi quasi tranquillitatem quandam commigrant, sanctum esse, & laudandum institutum duco; si eo pacto id agant; primum ut, dum sibi nimis interdum cautum uolunt, deferendo, quos tueri debent, alicui ne noceant; dein, ut uel hac ipsa ratione cæteris magis, quàm sibi prosint. Id efficient, si aut Magdalenam utiliter contemplantem sequuti Christo in laudandis pedibus obsequantur, hoc est, inopes, & egenos pro uiribus

suis alent ; aut precibus peccatis ueniam ijs ab irato Deo exorabunt ; aut morum integritate, & cohortationibus alios erudiant, impellentq; ad immortalis dei cultum, ac præcepta seruanda. Est enim laus omnium maxima, atq; ex ea actione homini præmium amplissimum, quæ pio stimulante amore animos ad cælum usq; traducit : neq; labores ulli æquè deo grati ; si hoc est contemplari, idq; ita uelint, quibus displicent negotia, fateor nihil hoc esse præstantius : quod & Danielis diuina uox approbat cæli tanquam astra hosce futuros esse prædicentis. Nihilominus, quum homines, quos contemplatores esse uolunt, ad angulos quosdam adigunt, ut secum tantum loquantur, sibi ipsis uiuant, uidentur eos omni prorsus, quæ redundet ad alios, actione priuare. Id autem multò magis euenit, cum ad id otium rerum earum, quas diximus, inquisitionem adiunxerint : hæc enim oblectat adeò, atq; tanquam esca quædam totum hominem ad se trahit ; ut aliquando cogat ea negligere, quorum cura studio cuius præferri debeat. In alteram partem rursus ita peccatur à multis, ut non iam aut genus illud actionis, quod & deo gratissimum, & ut eius utamur uerbis, suaue fore ipse proclamauit, aut honestum, iucundumq; otium ament, sed ea faciant, quæ minus deceant, aut etiam iniquissima sint, omnino è memoria Christum, eiusq; mandata delentes. Quem si imitari uolent, eam instituent uiuendi rationem ; quam cum Magdalena uellet persequi, in eum, quem sibi ante oculos proposuerat, intuens, nulliusq; boni falsa imagine decepta à recta agendi ratione deflecti potuit, aut ad uitium delabi. Quamobrem iure sororis ex delectu uitæ minor debet uideri laus, quæ, dum plus æquo alijs intenta est negotijs, ab eorum studio diuelli se patitur,

titur, quorum amore trahitur altera, exemplum uitæ optimum posteris futura. In altera rerum, quibus aut bene, aut malè uti possumus, ea, qua pietatis officia aut prætermitti, aut contemni facile solent, cupiditas accusatur; in altera laudatur modus: alteram mordet eorum cura, quæ tanquam spinas esse ille testatus est; alteram is magis mouet, qui bonorum omnium & parens, & auctor, ea ut hominibus bona sint, causa est potissima; quæ mala plerumq; ut sint, ipsi efficiunt; illa non tam egregiè facit, quæ nimis humana cogitans sociam poscit ad laborem minus necessarium; hæc contemplatrix prudenter, & rectè: quæ ad eum confugit; ab eo, qui possit dare, auxilium petit, quo & mores componat suos; & nihil non agat, quod iustum sit, & pium. Hoc autem ille idem, quo nemo est peritior, nemo sapientior, nec quicquam duxit in uita homini conuenientius, nec melius, quod daret, habuit uel ad bene, beateq; uiuendum, uel ad eam felicitatem comparandam, quam post mortem in sola diuinitatis contemplatione posuerunt. Nam, quod hic contemplari est, totum fortasse ad instituendam uitam referri debet, ut Christi, qui, quæ nos de deo contemplari uellet, edocuit, præter æternitatem, immensamq; potestatem, bonitatem, iustitiam, pietatem, clementiam, sapientiamq; contemplantes tales ipsi efficiamur, quales esse nos uoluit, reliqua post apertius cognituros; quorum aspectum adimunt animis hæc in tegumenta corporea cogitationem omnem exuperantium præcellentis conditione naturæ.

Hanc uerò (ut ad illa se transferat oratio, quæ cum altiora sunt, quàm, quæ Philosophorum peruiderunt ingenia, tum uerò etiam ueriora) finem hominis esse, & multis rationibus doctissimi uiri affirmauerunt;

& Christus deus, quo qui non contentus quærat ulterius, fallaz
 cem hunc prorsus, & ueritatis omnis hostem iudico, uel oratio-
 ne, uel ui miraculorum nobis ipse declarauit. Nec uox unquam
 humano generi æquè salutaris exsistere ulla potuit, atq; illa, qua
 contentiones omnes, inanesq; de finibus bonorum, & malorum
 controuersie sedate; errores, quibus inuoluti homines teneban-
 tur, sublatis; immortalitatis eius, quam tantopere expetentes non
 tam manifestam antè habebamus, ratio omnis ita patefacta; ut
 iam post alteram uitam Christo redditam nihil sit notius, no-
 bisq; certius. Profectò nunquam mihi persuaderi potuit hisce æui
 spacijs, quibus animæ, & corporis uinculum hoc amicitie inui-
 latum seruiatur, & incorruptum, uitam hominis terminari, nec
 partem eius omnem, ut bruta, esse perituram; id quod et nonnul-
 li, yq; magni, & præstantes philosophi multò ante dei filij è cælo
 demissam uocem senserunt; & consensus etiam gentium omnium
 „ iam inde ab initio usq; repetitus approbauit: non omnino, inquit
 „ Aristoteles, falsa est fama illa, quæ ex ore multarum nationum
 „ est celebris. Mentem uerò hominis quæ mortalem esse dicere pos-
 sumus, quæ (id enim sonat uox hæc ἀμύνη) seiuncta sit ab omni
 concretionē materiæ? quæq; ut facultas ea, in qua uis sentiendi
 inest, non ita egeat ad functionem sui muneris corpore tanquam
 instrumento? secus sensus nihil eorum, quæ ipsum feriunt, non
 feret; aut etiam, quò ui maiore erunt, hòc libentius excipiet; quòd
 suam ipsius uideantur hæc magis explere facultatem. Atqui
 idem tam debilis est; ut, si uis ingruat heuementior, aut hebesce-
 re, aut interire sit necesse: quod planè uidemus in oculis caligan-
 tibus ad fulgorem solis. Mens uerò tantò acutior fit, quantò ma-

iora, altioraq; scrutatur. Naturæ autem diuersitatem sequuntur, ea quoq; diuersa, quæ eidem tanquam propria tribuuntur: si propterea caduca, & morti obnoxia hæc sunt, quia admixta, & concreta, quæ pura, quæ intaminata, incorrupta, & æterna sint oportet. Animorum hanc esse naturam, nemo opinor est, qui nescit; si uelit diuersitatem functionum considerare, quæ diuersis, ac repugnantibus naturis attribuitur. à mente autem, (si Peripatetici esse uolumus) quæ nullam facultatem secum unquam gerit, potissimum animal id, quod hominem nuncupamus, habet, ut sit, quod est; quæ tanquam ratione ipsius propria à cæteris rebus distinguitur; magisq; si quem ex his, qui Aristotelis sensa nobis explicarunt, sequi mihi libeat, hacce in re Themistio assentior, quàm his, qui secus dicunt; qui fortasse nec ingenio, nec studio, nec doctrina Alexandro Aphrodisæo inferior post illum potuit aut rem subtilius indagare, aut errata corrigere, aut minus ab eo animaduersa cogitare. Neq; illud, quod in controuersia est, quo pacto Aristoteli mens interitus expers esse uideatur, negotium in præsentia nobis debet ullum facessere; inconcreta certè illi est, atq; æterna. Quod, si quidam minus his contenti erunt, (quam satis, ut ego iudico, uidentur urgere) illud addamus licet, si neminem quidem certè suum homini præscribi, statuiq; oportere; cuius causa hominis cælum hoc, quodq; cælo tegitur, conditum omne constat. Hunc uerò (quando nihil aliud restat amplius) quemnam possumus alium asserere, atq; deum ipsum; qui id unum animal procreasse uideatur, in quo inesset diuina uis ingenij, maximèq; auctori cognata suo? Atq; ex animantibus quidem nonnullæ eo sensu, quo sunt natura præditæ, ad cælum usq; uidentur extolli;

cuius quasi faciem quandam præ se ferunt agnoscere. Homo autem solus cogitatione præteruectus, atq; animo ad altiora penes trans sistit in deo: huc ubi peruentum est, labor, studiumq; eius ulterius inquirendi omne cessat: id supremum est omnium: is terminus ultimus: cuius est iucundissimus in sola tanti luminis contemplatione fructus. Potest enim mente fungi hoc munere, uis tamq; degere felicissimam, ac talem, qualis est illius, cuius ipse est imago, uidelicet æternam, & immortalem: hoc autem, quandiu his carceribus detinetur animus, cum effici nequeat, nec quicquam, quod naturale sit, qualis scientiæ in nobis est amor, seu peruacaneum esse uideatur, planè aliquando id perfici necesse est, quod faciendum olim natura sanxit. Quare id tum demum quamoptimè præstabimus, quum hic uiuendi terminus, qui mors dicitur, solutos his uinculis ad eum remiserit; nos cum eo coniunxerit; cuius copiosissima luce irradiatis hæ tenebræ expellentur; quæ nunc scire cupientibus adimunt maxima ex parte cognitionem ueri. Tantam tamen felicitatem, quanta certè animo concipi non potest, noluit, ut absq; innocentia, qui uerus est dei cultus, & ui meritorum consequeremur. Quamobrem iussit in primis, & iustitiam homines colere, & beneficentiam exercere ea charitate inflammatos, quæ tantopere ab eodem collaudata illos ad aliorum utilitatem procurandam possit uel inuitos cogere, uel excitare torpentes: ut post liceret in æternam domum ingredi, quam recte factorum nobis pollicitus est præmium fore amplissimum. Quò utinam, eo ipso ferente auxilium, qui est auctor, perueniamus: ut, cuius modo spes tantum in hoc diuersorio commorantibus ostentata est, tum demum assequuti tanto bono cumulatè

perfruamur. Quæ cum perorata essent, nihil, inquit Antonius, Iuli esse debet, quod, quam insistas uiam, dudum quærentem morretur: si modo, ut puto fecisse, ea tu memoriæ tradidisti, quæ Iacobus noster (dicam enim uerè, quod sentio) doctè non minus, quam copiosè differuit: mihi quidem istæc eius oratio ita placuit, ut instituto meo ualde delecter; quod sanè post hac multò magis & sequar, & tenebo. Tum Iulius, comitem, inquit, habebis Antoni, ita tamen, ut, quod idem uult, otio liceat mihi aliquando honestè frui: gratiamq; habeo huic maximam; qui, cum multò plura, quàm postularam, dederit, & me, & siqui sunt, qui minus norint, quid sequantur, edocuit. Illud tamen unum ab ipso reliquum adhuc expecto, atq; etiam rogo; ut, cum unam beneficentiam coli à nobis uelit, præcipiat quo pacto benefici esse possimus: ueniam autem nunc demus aliquam longa disputatione fatigato: cras, si lubet, docentem feriatî audiemus.

IACOBI PHOLII DE BENEFICENTIA

LIBER SECVNDVS.



DOCTRINA sed uim promouet infirmam. In quo Iulius nunquam poetam malè locutum fuisse arguet: qui, qua est indole præditus & honesta, & præclara, interpositam moram uix eius, quæ sequuta est, noctis ferens, ubi illuxit, properè mittit, qui nos ad

prandium iuuuaret: cui ne mora ulla à nobis fieret, obsecrabat, uereri se inquires, ne, si qua fortè longior disputatio institueretur, multa post temporis angustijs excludi necesse foret. Paruimus adolescenti & flagranti laudabili studio præclara discendi, & ei in primis, cui iure eius, quod obtineret, imperij, nihil, si iusta foret petitio, denegandum esse uideretur. Itaq; duabus ferè horis antè, quam pridè, in bibliothecam secessimus. Hic, ubi & illi consedissent, & ego ad hemicyclum reuertissem, quam comòdè, inquit Antonius, Iuli accidit, ut hic dies, quo parentatur pijs omnium manibus, nos ab negotiorum publicorum cura liberarit: etenim, si aliquantisper hesterna quiete recreatos occupationes tam citò absorbuissent, periculum erat, ne, quod efficit beneficis, nobis beneficium omnium maximum minus licuisset ab eo accipere, qui te postulante id se hodie daturum recepit. Multa posthac poterant nobis hoc ipsum præripere: restèq; se illud habet, quod est uersiculo quodam græco eleganter expressum. Multa inter os, & offam. Id ne accideret, abs te, maturè nos uocando, sapienter est prouisum. Quamobrem Iacobe, nisi quid aliud moretur, aut si uidetur Iulio, loquere iam, & nos, si potes, claras effice, ac beatos: utrumq; enim, ut abs te heri didicimus, beneficentia cumulatè præstat. Nihil impedio, inquit Iulius; nec mihi gratius quicquam esse potest, quàm ut omnis ad dicendum præcidatur mora: tali enim auxilio mea eget ætas, cui plura, quàm perceperim hucusq; , perdiscenda restant: quæ non minus, quàm hic, fortassis ipse nosti: age dum dicat modo, atq; ita, ut, quibus possim ad ueram aspirare gloriam, hodiè planè ab eo instituar: id quod facturum confido; qui paulò plus spacij, quàm hesterna disputatione,

ad cogitandum habuerit. Vtinam, inquam ego, Iuli, & Antoni
 is essem; quem amoris forte esse plus, quàm ueritati, largientes esse
 uos fingitis; non minus enim libenter id munus susciperem, quàm
 uideo, à uobis enixè postulari. Nam, quod quæritis, id eiusmodi
 est; ut nihil sit; ex quo aut dicentis cum æquitatis animi, tum
 etiam pietatis clarius indicium existere; aut audientibus præscrip-
 ptisq; obtemperare uolentibus ad ueram immortalitatem maiora
 possint adiumenta comparari. Qui siderum magnitudines, cur-
 susq; stellarum animo ad altiora penetrantes docuerunt; qui de
 rebus, quarum est parens, & auctor natura, deq; ipsarum causis
 sunt subtiliter, ac perdocte commentati; itemq; qui de deo, eccles-
 iisq; mentibus indagantes ita locuti uidentur, ut ea quæ ses-
 rint, quæ propter nimiam rerum obscuritatem forte ipsi com-
 prehendere, & cognoscere minus licuit, gratiam opinor non par-
 uam ab his inierunt, quos ad huiusmodi arcana introspectenda
 uehementior interdum, quàm par sit, cura scientiæ trahit abres-
 ptos. At neq; (tametsi fructu non caret hic labor) tantam utilis-
 tatem, tot commoda, quibus uitæ mortalium omnino est opus, suo
 ipsi studio pepererunt; quot; quantaq; latè promanarunt ex his;
 qui partem illam, quæ de moribus est, complexi, omnem & ser-
 monibus, & uitæ honestate expoliuerunt. In qua cum singularum
 uirtutum tractatio frugifera est, & necessaria; tum uerò nulla
 uel ad utilitatis comparisonem aptior, uel uarietate, & rerum
 copia ad exornandum ea locupletior, quæ præcipit, ac docet, quæ
 sint unicuiq; in beneficiorum collatione agenda, & seruanda; aut
 ad promerendum inflammat, & impellit. Sed, quò rei pulchritus
 do incerti (ut uerè dicam) stimulum maiorem addit ad laborem,

hòc plus imbecillitatem uirium mearum eius susceptæ graue deterreret onus. Experiar tamen non tam spe perficiundi, quæ uolo, quam desiderio uobis obsequendi: nec tam ut ipse quoq; aliquid prodesse coner, (quod & probaui semper, & optaui) quàm, aut, qui melius istuc præstare possunt, incitare; aut certè (nam hæc ipsa literis quoq; mandare cogito) quid de optima uitæ ratione sentirem, testatum apud eos relinquere; quorum ætas adhuc mollior nec satis, quæ deligenda sunt, uidet, protracta; cupidine fertur in deteriorem partem procliuior; nec, quod egenti poscendum est ab altero, consilij opẽ ullam ex se petens meliora quærit. Vos autem, quæ dicam, queso ita accipite, ut uelitis.

Ad uitia conuiuere; amare natiuos,

Natura quos humana cauerit parum;

aut corrigere, quæ uidebuntur. At qui, inquit Antonius, non uideo facere qui prius istuc possis, quàm exolucris, quæ debes. Meminisse oportet, heri cum de duabus uiuendi rationibus loquerer, nonnulla te in aliud tempus distulisse, quæ aut institutarum rerum natura, aut angustys locorum exclusa uidebantur. Rectè, inquam, admones Antoni; ferè enim illa exciderant; quæ si omissem, sanè is, qui est informandus, aliquantò latuisset ignotus. Quanquam enim latè iam, ut audiui stis, beneficentia sese diffundit, tamen quò pacto, quæ ue ratione sit tam potens, tam opulenta, tam diues, hætenus non sat uobis intelligo constare; nec plus scire, quàm, quibus nosse cupientibus, quæ remedia uulneribus adhibere salutaria sit necesse, ea dicat aliquis, quæ medica ars iubeat; minus autem edoceat, quæ, qualia ue sint; item quando, quò ue pacto oporteat his ipsis uti. Itaq; rationem hanc omnem in primis

expli-

explicabo: quam si ipsi probabitis, meam uobis in ueri huius indagatone industriam, qualiscunq; ea sit, non omnino ingratam uideri lætabor: sin libebit refellere, culpam omnem ingenij stultum uobis morem gerendi meum excusabit. Primò igitur dicant hi, (nobis enim licentiam dat rei aut nihil, aut minus ab alijs introspectæ facultas) qui ad temperantiam, fortitudinem, iustitiam, prudentiam tanquam ad capita quædam reliquas uirtutes redigi uolunt, ad quam ex his quatuor decernant beneficentiam reuocare: si ad iustitiam, cuius uim sola aut præmiorum distributione, aut commerciorum correctione metiuntur; cuiusq; munus uolunt seclusum esse à cæteris dando unicuiq; quod suum est, quum aut de re. p. benemerentibus pro dignitate præmia tribuit, aut impios ob scelera pænis excruciatos interimit; bonos, quos ijs pollicetur, afficit honoribus, malis mala denunciat; notamq; inurit ad ignominiam sempiternam, damna tollit, uindicat iniurias; deniq; tanquam arbitra & restituit, quod alteri ui, aut dolo est ablatum; & æquitatem seruare cogens: effreni cupiditate luxuriantem compefcit; uideant obsecro, alia ne beneficia esse possint, atq; illa, quæ aut pecunia, aut honorum adeptione æstimantur. Ego uerò dari alia multò cum potiora, tum præstantiora & cenfeo, & hesterno sermone demonstraui. Deinde quid ad illos dicent, qui temperantiam malunt? aiunt enim; cum uirtus omnis aut animi affectum leniat, aut actionem regat, ut uoluptatum illam, ita omnis hanc opulentiæ esse moderatricem cupiditatis; similitudineq; affectionum quidam, quæ maior utiq; est, quam si cum actione, circa quam iustitiam uersari uolunt, affectio conferratur, quasi affinitate coniungi. Quanquam, (de hoc ut profez

ram, quod sentio) si beneficentiam liberalitatis loco reponere interdum uelim, uisi sunt ad ueritatem propius accedere, qui iustitiam asciuerunt: cuius magis proprium est alteri sese dedere, atque inseruire, quam affectum temperare. Quod si (quanquam planius id modo fiet) ea, quæ de liberalitatis, & beneficentiæ inter se differentia heri statuimus, uera sunt omnino, ad eam, quam necesse est illos asserere, tanquam ad fontem, iustitiam, nequaquam hanc referri oportebit. Minus uero è quatuor, quæ supersunt, tres, siue harum aliquam hæc comutabitur; si reijcitur iustitia, cui uidetur esse natura propinquior, & coniunctior. Atque hoc dico, ab hisque dissensio; si de ea ita, ut sit, statuatur; ut, cum sentiant has omnes à se inuicem distare, neque alteram sub altera contineri, nolint ad illam reliquas tanquam ad caput suum, principiumque referri; nihilque excipiant, quum de ea sic loquuntur. Secus enim fieri potest, ut sit iustitia multò locupletior, quam eorum distributio esse patiatur: id quod & Aristoteles tradidit, & ratio nos fateri cogit. Nam, cum omnis uirtus hoc unum uelit, studeat, & procuraret, ut agendo, quæ præcipit, nos beatos efficiat, nobis aditum ad summum bonum patefaciat, si qua sit, quæ nota uocabuli propria seiuncta quidem ab alijs tam capax, & ampla omnium in se cohibeat uim, rationemque comprehendat, huic ita defertur imperium; hæc ita erit princeps; si tot, tantisque bonis, quibus est cumulatè referta, cum secum haudquaquam, qui habeat, solum frui sinat, ad alios eum sese conuertere; in id unum incumbere coegerit, ut eiectis sceleribus, omniisque procul abacta malitia ciues omnes ad honestissimas, pulcherrimasque inflammet actiones; impellat ad cultum ueræ religionis rectè, integrèque seruandum; ad integritatem ui-

tæ, pietatemq; uocet; deniq; enitatur, ut ijs nihil desit, quod ad ea,
 à quibus summa oritur felicitas, necessarium esse uideatur. Huiusmodi autem esse non illam quidem, cuius paulò antè à nobis
 mentio facta est, suis eam limitibus, spacijsq; coercentibus; sed,
 quæ omnem facultatem ciuilem complectitur, & continet, iustitiam,
 qui ambigat, aut ignoret, arbitror esse neminem. Porro
 facultatem hanc lex gignit: quæ nihil aliud est, atq; ratio quæ
 dam insita in natura, quæ quasi loquens in aures sese insinuat
 humanas. Hæc sapienter omnia instituit; honesta, & salubria
 docet, ac præcipit: ab hac ciuitati bona cuncta expetuntur, otium,
 pax, tranquillitas, & salus: hanc uirtutes omnes aliquo pacto par-
 rentem, suiq; procreatricem agnoscunt. Iubent enim leges turpi-
 uitæ honestam mortem esse præferendam, pro patria, communiq;
 omnium salute excipienda uulnera, & fortiter occumbendum;
 libidinem uerò coercentes intemperantem, & molli lætitia effluz-
 entem, lasciuientemq; animum cohibentes ad meliorem frugem
 reuerti cogunt: legibus uirtutis, atq; industriæ habetur ratio;
 præmium datur labori: legum est in nefarios homines animæ-
 uersio; doli extirpatio; expulsio malorum. Ac, ne singillatim omnia
 enumerem, quòd & longum mihi esset recensere, & for-
 tassìs uobis molestum audire, nihil, ex quo uirtus quælibet profici-
 scatur, & manet, prætermissum est; de quo non sit ad optimi
 rerum status constitutionem à sacrosanctis legibus prudenter, &
 prouisum, & cautum. Legis igitur uox iustitiam parit ipsam:
 quæ non est uirtutis totius pars aliqua, ut membrum corporis;
 sed, ut ex compage membrorum corpus conficitur, sic hæc ex om-
 nium colligatione uirtutum tanquam ex coniunctione partium tota.

tum quoddam conflatur, longè & troiano equo feracior, & Lucifero, ut poeta quidam è græcis inquit, splendidior: cuius fulgor magis, quàm sideris, sit toti terrarum orbi salutaris. Hæc enim ex animis tenebras, quas obduxit improbitas, expulit, eamq; reuexit lucem, qua beneficentia antè hos ipsos illustrarat: bonum enim, cuius natura est auctor, antecessit malum, quod ipsa utiq; abhorret: planèq; naturalis in homine probitas prior extitit; secuta post improbitas culpa deprauata uoluntatis. Ex quo sanè colligi potest, parem utriusq; uideri facultatem; altera autem fortasse nihil amabilius, quæ uolens in uolentem beneficium confert: nam iustitiam uel inuitum seruare orta uitio necessitas ipsa propè cogit. Si, qui aut pœna, aut præmio homines fortes, & temperatos facit, qui timidi antè, & incontinentes erant, magnorum ijs auctor est beneficiorum, quid is faciet, qui, ut ne periculosa mortis adeunda sit alea, ardens amore in patriam mala procul à ciuibus suis antè propulsat, locumq; nullum timori relinquit, & ignauiae: aut luxu, delitijsq; pessum ne quis eat, imtemperantes homines esse non sinit; dum omnes intemperantiæ præcidendo causas fomenta nulla ministrat libidini? nec in ciuitate locum incontinentiæ ullum esse fert; ubi rationem frugalitatis prius instituit? si, qui iubet contentum suis ab aliorum fortunis abstinere, & delinquenti nunquam esse ignoscendum, societatem maximè conseruat humanam, quid faciet, qui sua dat? & interdum eiusdem tuendæ societatis causa uel in alios, uel in se delicta remittit? Probè quidem, & cum ad utilitatem multorum prudenter, tum ad celebritatem nominis præclarè facit; qui, qua est ipse animi integritate, æquitatèq; alios quoq; cum esse uelit, allata damna

multa compensat; iniuriam nullam inultam esse patitur: at non minus sapienter, & egregiè; qui aut multò antè, si possit, nequis detrimenta ulla patiatur, consilio, & ratione prouidet. Quod illa fortassis minus facit: peccantem enim pœna sequitur, legisq; cautionem fraus antecedit: aut etiam, quo nihil habet charius, uolens, libensq; uel nolentem iuuat. Iustus uim suam foras omnem promit; non denegat auxilium petentibus; sua paruipendens, alijs tantum ut consultum sit, curat: benefici hominis opera nulla est uel fama clarior, uel gloria conspectior: ultrò præstò est omnibus egentibus; nec quemquam inuenias, qui seipsum minus respiciens, cæterorum magis, quacumq; ratione potest, commodam augere concupiscat. Hæc beneficia iustitia latior si peperit, aut re, & homine beneficentia utiq; ipsa erit; atq; è uertice Iouis tantquam Mineruam procreatam dices: quæ cum una, eademq; sit, diuersa tamen ratione eadem efficiat. Aut, quod & rationi, & his ipsis, quæ principio differui, magis consentaneum est, primum omnium in terris cum ex re, quam unà cum homine procreatam credere par est, id nomen uirtutis esse cepisset, progressu autem temporis tulisset necessitas ad mala, & uitia quotidie pullulantia noua, & uaria pro diuersitate morborum excogitare remedia, quæ planè à uirtutibus peterentur: ab hac unà, quæ in primis hominibus consultum uellet, reliquas emanasse putandum est, suis nominibus tanquam characteribus post pro officiorum uarietate consignatas. Cum uerò ex omni uirtutis functione nulla uideretur esse ad hominum, quorum est ad malum natura procliuis, utilitatem communem, & salutem potior, magisq; necessaria, quàm ea, qua unicuiq; tribuitur, quod suum est, & ex ratione of-

ficij sibi nomen adsciuit (hoc enim *Δικαιοσύνη* significat, quia inter disceptantes res adæquet iudex) & est aliarum domina constituta: quæ socias in partem regendi imperij aduocans, sibiq; coniungens, facta multò locupletior & munus regium retinuit, & nomen. Neq; enim Saturni temporibus, quibus

In medium quærebant, ipsaq; tellus

Omnia liberius nullo poscente ferebat,

prius didicere homines ab alienis abstinerere, quàm propria largiri: laus nimirum natura ipsa docente (ut post daretur locus fabulæ) ab his prior ex beneficentia quæsitæ est; qui, in altero quid uirtus aut præciperet, aut prohiberet, nullis adhuc inquinati uitij minus fortasse norant. Quòd, si qua inter has constituenda sit diuersitas, hanc ex quibusdam euentis trahi oportebit, postulantis ita temporibus; quæ ab eodem poeta describuntur, quum de Ioue sic loquitur.

Ille malum uirus serpentibus addidit atris

Prædariq; lupos iussit, pontumq; moueri:

ut iustitia uel in forum, & rostra deducat; uel ad gubernacula gentium populorumq; suscipienda etiam nolentes compellat; cogat præscriptis recusantes obtemperare, quietis, & otij hostes è ciuitate eijciat, proculq; ablegat: beneficentia uerò ad hæc omnia uolentes inflammet; præcípites impellat; errantes fludeat, si fieri possit, in uiam reducere; in officio beneficio potius, quàm pœna retinere contumaces: quod ui, ac metu illa extorqueat, id hæc alligando blanditer assequatur: seuerior illa, & grauior; hæc remissior, & lenior; quæ charitatem illam, à qua ipsa in primis orta est, præ se semper ferat. Quid si etiam uirtutis ipsius, & be-

neficientiæ eandem propè naturam esse demonstramus? Virtus, inquit Aristoteles, est bonorum effectrix, & conseruatric facultas, eademq; omnis generis beneficiorum parens: quo quid firmitus, si auctori fides sit adhibenda, ad id, quod dicimus, comprobandum afferri potest? quorum enim eadem est ratio, eadem quoq; illa esse necesse est; ut ferè una, eademq; res esse uideatur, diuersis tantum nominibus consignata, & distincta. Hinc opinor effectum est; ut in libris ad Nicomachum de moribus in uirtutum enumeratione nomen beneficentiæ prætermiserit; cuius uim omnem alia uoce genus uniuersum referente latissimè comprehenderat. à quo cum uirtus definitur esse animi habitum quendam ex proposito, qui mediocritatem seruet, recta ratione moderante, ea rei forma tum explicatur, à qua utiq; hæc habet, ut sit, quod antè, quàm excultus sit animus, nusquam est: cum uerò bonorum & beneficiorum procreatrix constituitur, rei natæ, & quasi iam in lucem editæ munus quoddam proprium designatur: nescit enim iners, & otiosus esse hominis animus rectè, & sapienter institutus: aliquid semper, quod se ipso dignum sit, agit: hoc tum præstat maximè, cum, quæ bona habet præcipua, ea alteri studet imperari, hoc est, cum sapientiam omnem foras euocat; &, ut artem suam in scena ad uoluptatem histrio, sic is in oculis omnium ad utilitatem figit. Valde, inquit Iulius, mihi hæc probantur: quid enim tam uerum esse potest, quàm hominem ea lege initio à Deo fuisse procreatum, ut, cum hunc unum in terris mente sibi similem esse uellet, auctorem quoq; factis imitaretur? nec beneficentia quicquam duceret antiquius, quam primam omnium in opifice cognouisset? Atq; hoc illud est, quod, ut heri ex te discere potui, Stoi:

cos impulit, ut beneficentia præstantius nihil esse statuerent; uis
 delictet id illi tanquam optimum, & omnium maximum iudica-
 runt, quod in dijs immortalibus, quos humano generi prospicere
 sentiebant, esse cognouerunt. Huiusmodi, inquam, rationes mul-
 tum me mouent, ut tibi libenter assentiar, atque uirtutis huius eam
 facultatem esse fatear, quam tu modo uisus es asserere: sed Cice-
 roni respondeas oportet, qui in his libris, qui de officijs sunt,
 eandem uim esse liberalitatis, atque beneficentiæ uelle uideatur: sic
 enim inquit. Et huic coniuncta est beneficentia, quam eandem uel
 benignitatem, uel liberalitatem appellari licet: aut igitur res ean-
 dem est diuersis consignata nominibus; aut Ciceronem, si non
 possis defendere, errasse demonstrandum. Non tantum, inquit
 Antonius, ea Iulius probè meminit, quæ cum hesterno die inchoa-
 asses, & breuitate quadam inuoluisses, nunc multo & clarius, &
 uberius explicasti; Sed eam etiam aciem ingenij præ se fert, &
 doctrinam, ut & de quibus disputas, hæc optimè percipiat; &
 siquid uideatur in oratione repugnare, norit. Itaque, nisi ad illa,
 quæ is obijcit, responderis, haudquaquam uera hæc esse pote-
 runt, de quibus nunc satis acutè disputas: illi autem, quos uideo te
 refellisse in distributione uirtutum, ex quibus duces quatuor esse
 uoluerunt, rectè fecisse uidebuntur. Rectè inquam (ut simul utri-
 que respondeam) hi fecerunt, si liberalitatis, & beneficentiæ eadem
 omnino sit uis, & natura: sin, ut uisi sumus astruere, diuersam,
 & multo ampliorem beneficentiam statuamus, aberrasse dicen-
 dum est; qui hanc aut ad eam, quam diximus, iustitiam, aut ad
 temperantiam referentes, ueluti quoddam totum, intra partium
 unam incluserunt. Ciceronis uerò auctoritatem qui ueri uolet,

huic

huic neceſſe erit dicere, aut, cum hæc inter ſe affines eſſe uideantur, (nam & benignitatem, & beneficentiam, & magnificentiam, & munificentiam Ciceroni liberalitatem eſſe uideo, idq; eo in loco, ubi de hac præcepta dat) alteram pro altera facile ab eo uſurpatam fuiſſe: aut, ut è communi iuſtitia uirtute n quanzdam ſeligere licuerit, quæ iuſtitia diceretur, ſic ex tota beneficentia partem illam, quæ uulgi opinione potior haberetur pecuniæ pretio maximè beneficia ponderantis, extractam, eamq; iccirco nomine generis appellatam. Secus uerò ſi ſentiat, atq; nos dicimus, idem Hercules, quem in numero beneficorum reponit, arguet auctorem ipſum mendaciz: non enim liberalitas, aut quia in cauſa repetundarum eſſet patronus amico datus, (quanquam hæc, quum beneficum ſtatuimus, ei non defuerunt) ſed ampliffima erga omne humanum genus beneficia ab ea uirtute, quæ cumulaſtiſſima eſſet, prodeuntia hominem in concilio coeleſtium collocauerunt. Atq; hæc, quæ de ui uirtutis huius diximus hæcenus, uobis ſatis uideri poterant, niſi eadem uera eſſe confirmaret etiam naturæ conditio repugnantis.

Quoniam enim uisum uirtuti contrarium eſt; habetq; illud unaquæq; , cui opponitur, talem ſanè repugnantiz rationem in beneficentia conſtitui oportebit, qualem uidemus in utraq; iuſtitia: in qua non perinde ſit, atq; in alijs . Accidit igitur, ut, cum uitum illud, quod eſt uni cuiq; earum contrarium, propter eam, qua ſe inſtar Protei in uarios uultus, & ora transformat, multiplicem, ſecumq; pugnantem naturam hinc, & inde in aduerſas partes diſtrahatur, uirtutem utraq; pars à ſe certatim utrinq; repellens, atq; protruſens ad alteram, mediam regionem tanquam uacuam, deſerz

tā, & incultam occupare cogat; ex quo mediocritas est appellata. Atq; hoc quidem pacto uirtus omnis, qua cupiditas rationi subijcitur, præter iustitiam, & beneficentiam, inter duo uitia posita est media; quorum alterum sibi plus arrogat, quàm ea patiatur; retro fugit alterum, ac tanquam iners ueretur aspectum meliora consulentis; in his autem duabus secus esse uidetur: nam, ut iustitiæ iniustitia tantum est contraria, ita beneficentiæ maleficientia; atq; utraq; uox seorsum fungitur utriusq; munere, quod uirtuti aduersatur. Nec mihi Iouianum Pontanum in hoc sequi libet, qui uirtutem hanc, ut reliquas, inter duo extrema collocans ab altero nullum prorsus uult genus officij posse expectari, ab altero malum quoduis imminere; utrumq; nominibus appellat nouis, hoc in officiositatem, illud maleficientiam: quo nos quoq; libenter utimur. uitium enim commodius hac uoce signatur, quàm maleficij; quod magis est habitus deprauati partus; licet idipsum Cicero aliquando pro uitio usurparit. Id autem quod de maleficientia nunc asserimus, uerum esse facillè ostendit illa ratio, qua dicimus eum, qui malo aliquo afficit alterum, contraq; faciat, quàm, qui beneficium dat, iniustum uideri, quia is, qui damnum patitur, minus; qui fert, plus lucrifacere uideatur: &, qui iniuste alijs, quod suum est, adimat, maleficum hunc omnino esse, quia magni sit auctor mali; ut, cum maleficum hominem, qui benefico rectè opponitur, iniustum esse statuimus, qua ratione iustitiæ inimica est iniustitia, eadem quoq; maleficientiam cum beneficentia pugnare necesse sit. At peccatum leuius committit, qui beneficium, sese ab huius collatione retrahendo, aufert. Quasi uero, ut tam iniustus habetur, qui, quum potest, iniuriam non propulset ab altero, quàm,

qui eam inferat: sic non male is, turpiterq; agat, qui, quod dare potest, beneficium egenti neget: aut non tam bonus debeat esse, quàm uideri non malus. Mihi quidem uidetur non magis spoliare beneficio, qui non habenti illud negat, quàm, qui possidenti adimit: siquidem eiusdem iacturæ, damniue uterq; est causa: deterior autem nonnunquam; qui nihil benefaciendo maleficus esse maz uult; quia beneficium clam tollat, quod facilius ab eo, qui apertum malum denunciat, interdum extorqueri posse uideatur. Præterea, si boni loco est, mali, cum possis, nihil facere, cur malum utiq; non esse dicamus, à quo, si facultas promerendi non desit, nihil boni? cumq; contra naturam sit obeffe alteri, secundum uero eandem iuuare, si uterq; beneficio priuet, par etiam delictum esse debet: uterq; naturam deformat iniustus, qui non persoluit, quod debet: igitur & maleficus. Porro eam legem homini natura dedit, ut esset bonus, ut prodesset: id si non faciat, habeatur improbißimus; qui ius naturæ uiolare, aut potius immortalì deo repugnare uideatur. Qui, cum inutilem, & infructuosam arborem execratus suis etiam exuit folijs, eos, qui, cum possent, boni nihil, quod ad alterum redundaret, agerent, tanquam magno scelere sese astringentes diuino iudicio condemnatum iri declarauit. Huc pertinet eiusdem illa de talentis oratio: ad quæstum enim ea exercenti præmium proponitur maximum: negligenti pœna. Haud tamen negarim usu receptum esse, ut potius dicatur maleficus, qui uim, malumue alteri ipse affert, quàm, qui negat beneficium, quod dare potest: præsertim cum legis in eum, qui, exempli causa, homicida sit, animaduersio sit grauis; in alterum non prohibentem cædem nulla. Verum lex, quæ hominum arbitratu

posita est, ne temere, & interdum etiam contra æquitatem quicquam fiat, improbitatem hominis ex facto iudicat; quod palam est. Quod autem intus in negante auxilium latens est, uitium hæc nescit. Secus, uti diximus, postulat altera lex, eaq; longe potior, & firmitior, quæ hominem bonum magis esse, quam uideri cogit. Pugnat igitur maleficientia tantum cum beneficentia, nec ab iniustitia secerni potest: sicut nec eodem auctore Pontano à iustitia beneficentia.

Quàm planè æquum est omnem continere probitatem, si in uitio nulla non insit improbitas. An maleficium non esse dices aut metu periculorum patriam, amicitiam uel deferere, atq; prodere? aut in scelere uelle mortis uideri contemptorem? an peccatum eius leue, qui protractus libidine pudicitie aut uim affert, aut fucum facit? parum ne tum ira, si uehementior hæc efferbuerit, tum mala ambitio alteri obesse potest? beneficium ne esse statuamus, licet hunc sæpe uideas plerisque multa de suo dantem, neq; multis in rebus auxilium denegantem? Hæc uitia, consimilisq; generis si hominem non nisi maleficum esse cogunt, beneficus utiq; esse non potest, nisi sit tum pietate, tum ijs instructus uirtutibus, quæ alijs tantum, si uelis, profunt, quantum uitia solent esse detrimento. Quod ipsum potest Aristotele etiam auctore comprobari; nam, si honor uirtutis sit præmiū, idemq; definiatur, signum esse opinionis eius, quam quis habet de alterius beneficentia, omnino statuendum uidetur, uirtutem omnem, cui debetur honos, in ipsa beneficentia contineri. Quo quidem in loco obiter quendam hallucinatum esse contendo; in uerbo enim ἐν ἐγγερεῖν, quo in hac ratione explicanda Aristoteles utitur, semper alterius spectatur utilitas; nec is uidit, qui

putauit idem signare ἐβεγγετέϊν, quod καλῶς ποιεῖν, cum tantus Philosophus rethor esse tum mallet, honoris definitionem illam protulisse, quæ uulgo faciliè prolaretur & in cæteris sibi querenti præsidia, & eos ferè solos, qui iuuent, admiranti, & colentibus: quanquam nihil prohibet dicere, ex ipsa philosophia esse petitam; si uirtus uim suam ad alterius utilitatem promat, efficiaturq; beneficentia. Qua planè nihil est aut rerum copia uberior, aut fructu iucundius, aut etiam natura ipsa perfectius: quæ omni laude cumulata uirtutis hominem ex interiore animo foras omnem euocantem sapientiam, atq; in oculis omnium esse cogentem ad fructum sui tenuissimum uel emolumentum, uel gloriæ sese conuertere ad omnium commoda augenda uelit. Quibus ex rebus accidit quidem, ut beneficium euadere difficillimum sit: quod enim præclarum est, qualia sunt animi bona, haud faciliè est, ut quis paret, nisi aliunde, à Deo scilicet in primis auxilium adsit, & ipsi ad parandum impedimenta tollantur. Atq; adeò ex omnium sæculorum memoria paucos enumerare possumus, qui sint eam, quæ tum apud homines ueritatis ignaros esse poterat, gloriam ex collatione beneficiorum consequuti. Vbi autem deum hominem uidere mortales, mox sequuta est inter hos ipsos ex beneficentia cum mulata laus: non enim ea tantum beneficia, quæ uita hæc caduca requirit, nostri attulerunt, quibus facere hoc licuit, sed etiam omni ratione elaborauerunt, ut non ipsi modo, sed cæteri quoq; his bonis aliquando frui possent, quæ filij Dei profusione sanguinis tanquam iure hæreditario homini parta obuenerunt. Aut etiam, ut sit omni uirtute ornatissimus, quam ad omnium utilitatem exercere possit, si careat opibus, & ijs bonis, in quæ antè, quàm

sit possessor, nullum ipse habet imperium, beneficus'ne is, quem
 modo quærimus, esse poterit? Hoc si desit, iacebit aliquando propè
 sepulta beneficentia: quæ si nihil iuuare possit, ut uelit, nomen ta-
 men uidetur amittere: idq; planè ex eo accidit, quia non sibi, ut di-
 ctum est, sed alteri inferuiat: quod quum non fit, neq; etiam be-
 neficus ullus & haberi, & dici solet: neq; hinc uoluntas à plerisq;
 attenditur; sed, quæ à uoluntate proficiscitur, actio: nec animo be-
 neficentia iudicatur, sed rerum pondere. Quin ex sumptibus, qui
 aut amicorum, aut egenorum, aut propinquorum causa fiunt; ex
 largitionibus præterea, operibusq; magnificis potissimum uidetur
 benefici & laus, & nomen trahi. Vulgus enim in dijudicatione
 bonorum, & beneficiorum tam est corruptus iudex; ut, sicut
 ægrotantis palato febris æstus uehementior, quæ dulcia sunt, in-
 terdum amara refert, cogitq; salubria reicere, inimica uerò, illiq;
 arrientia quæritare, sic hæc bellua bonorum falsa imagine de-
 cepta beneficia ferè sola metitur pecunia, ijsq; rebus inhiat, quas
 rum abusus, qui semper penes multos esse cernitur, in præceps
 deturbat incautam. Sæpe etiam lues hæc in principes defluit; quo
 nihil potest accidere perniciosius: auget enim exemplum pu-
 blicum ciuium insaniam, furorisq; priuati blanda est conciliatrix
 cupiditas magnorum, & illustrium uirorum, qui demum & se, &
 cæteros beatos fore putant, si omnibus huiusmodi affluentes copijs
 habeant, quibus possint inani pompa diuitiarum, & largitioni-
 bus falsam gloriam, felicitatemq; suam uiuersis ostentare. Quæ
 si ei, qui cupit esse beneficus, non dentur, aut adimantur, qui sum-
 me illud præstare poterit, quod uult ipse profiteri; cum haud con-
 temnenda pars eorum desit, quæ ad uirtutis huius cultum, tan-

quam ligna, aut instrumenta fabris, uidentur esse necessaria? Hæc iccirco dicuntur, ut appareat, si hoc omnino aut uulgi opinione metiamur, aut eorum fortasse philosophorum, qui in summi boni ratione aliquando ad opes declinauerunt, quàm sit magnum, & arduum uelle nauem eò impellere, quò illa neq; absq; uentorum aspirantium secundo flatu prouehi potest, neq; absq; maxima artis peritia appellì. An (si tamen ulla sit) potius excludenda fortuna? nihilq; eius in uirtutis regno permittendum est imperio? atq; ita decernendum, pro facultate beneficentiam existeret, & ab unoquoq; non quo, quanto uel beneficio alterum promereatur, sed quo animo, & quibus uiribus, esse postulandum: quæ autem adest difficultas, hinc omnem oriri; quòd id esse non possit absq; ea charitate, quam Christus ab unoquoq; exigit, & moribus, quorum cultus homini baul paruo labore constat. Illudq; insuper addamus, si lubet; tametsi uolenti cuiquam liberalitatis exercendæ, aut nauandæ operæ, aut faciendi aliquid, quod cæteris proffit, nulla potestas datur, aut planè ab eo aufertur, qui habet, non tamen iccirco pro benefico non habendum. Diuo Francisco, cum profectus esset in Syriam, ut Christianum dogma prædicatione propagando gentes illas tanto beneficio cumulareret, à Sultano dicendi sublata est facultas: dare uoluit ille beneficium, quod potuit; ast alij accipere noluerunt. fuit igitur is & beneficus maximè: & quiuis erit, (licet minus hoc admittat uulgus) in quo constantem uoluntatem sequetur perfectà cognitio promerendi: laude populari hic caret; uirum homines non norunt; at rectæ conscientiæ fructu, quo contentus esse debet, non caret: at huius in sensa sese insinuans omnia optimè percipit, qui maximè

sit possessor, nullum ipse habet imperium, beneficus'ne is, quem
 modo quærimus, esse poterit? Hoc si desit, iacebit aliquando propè
 sepulta beneficentia: quæ si nihil iuuare possit, ut uelit, nomen ta-
 men uidetur amittere; idq; planè ex eo accidit, quia non sibi, ut di-
 ctum est, sed alteri inseruiat: quod quum non sit, neq; etiam be-
 neficus ullus & haberi, & dici solet; neq; hîc uoluntas à plerisq;
 attenditur; sed, quæ à uoluntate proficiscitur, actio: nec animo be-
 neficentia iudicatur, sed rerum pondere. Quin ex sumptibus, qui
 aut amicorum, aut egenorum, aut propinquorum causa fiunt; ex
 largitionibus præterea, operibusq; magnificis potissimum uidetur
 benefici & laus, & nomen trahi. Vulgus enim in dijudicatione
 bonorum, & beneficiorum tam est corruptus iudex; ut, sicut
 ægrotantis palato febris æstus uehementior, quæ dulcia sunt, in-
 terdum amara refert, cogitq; salubria reijcere, inimica uerò, illiq;
 arridentia quæritare, sic hæc bellua bonorum falsa imagine de-
 cepta beneficia ferè sola metitur pecunia, ijsq; rebus inhiat, quas
 rum abusus, qui semper penes multos esse cernitur, in præceps
 deturbat incautam. Sæpe etiam lues hæc in principes defluit; quo
 nihil potest accidere perniciosius: auget enim exemplum pu-
 blicum ciuium insaniam; furorisq; priuati blanda est conciliatrix
 cupiditas magnorum, & illustrium uirorum, qui demum & se, &
 cæteros beatos fore putant, si omnibus huiusmodi affluentes copijs
 habeant, quibus possint inani pompa diuitiarum, & largitioni-
 bus falsam gloriam, felicitateniq; suam uiuersis ostentare. Quæ
 si ei, qui cupit esse beneficus, non dentur, aut adimantur, quâ sum-
 me illud præstare poterit, quod uult ipse profiteri; cum haud con-
 temnenda pars eorum desit, quæ ad uirtutis huius cultum, tan-

quam ligna, aut instrumenta fabris, uidentur esse necessaria?
 Hæc iccirco dicuntur, ut appareat, si hoc omnino aut uulgi opi-
 nione metiamur, aut eorum fortasse philosophorum, qui in sum-
 mi boni ratione aliquando ad opes declinauerunt, quàm sit ma-
 gnum, & arduum uelle nauem eò impellere, quò illa neq; absq;
 uentorum aspirantium secundo flatu prouehi potest, neq; absq;
 maxima artis peritia appellari. An (si tamen ulla sit) potius exclu-
 denda fortuna? nihilq; eius in uirtutis regno permittendum est
 imperio? atq; ita decernendum, pro facultate beneficentiam exis-
 tere, & ab unoquoq; non quo, quanto uel beneficio alterum pro-
 mereatur, sed, quo animo, & quibus uiribus, esse postulandum:
 quæ autem adest difficultas, hinc omnem oriri; quòd id esse non
 possit absq; ea charitate, quam Christus ab unoquoq; exigit, &
 moribus; quorum cultus homini baud paruo labore constat. Illudq;
 insuper addamus, si lubet; tametsi uolenti cuiquam liberalitatis
 exercendæ, aut nauandæ operæ, aut faciendi aliquid, quod cæte-
 ris profit, nulla potestas datur, aut planè ab eo aufertur, qui ha-
 beat, non tamen iccirco pro benefico non habendum. Diuò
 Francisco, cum profectus esset in Syriam, ut Christianum dog-
 ma prædicatione propagando gentes illas tanto beneficio cumula-
 ret, à Sultano dicendi sublata est facultas: dare uoluit ille benefi-
 cium, quod potuit; ast alij accipere noluerunt. fuit igitur is & be-
 neficus maximè; & quiuis erit, (licet minus hoc admittat uulgus)
 in quo constantem uoluntatem sequetur perfectà cognitio prome-
 rendi; laude populari hic caret; uirum homines non norunt: at
 rectæ conscientiæ fructu, quo contentus esse debet, non caret: at
 huius in sensa sese insinuans omnia optimè percipit, qui maximè

abdita quæq; perscrutatur, deus; à quo utriq; merces magna tribuitur. Hoc non uiderunt pleriq; pilosophi; fateor: nec tamen falsum, quia ignorauerunt. Nos doctorem sequimur, quo nec peritior quisquam, nec uerior, Christum uidelicet: cui nihil æquè gratum est, atq; cum innocentia, tum uerò erga omnes uoluntas iuuandi propensa: quæ una illi est loco ingentis beneficii; utcumq; nulla uolentis culpa eius conferendi facultas est erepta. Qui & opulentos homines, & florentes honoribus quo pacto futuri essent beneficii, multò doctius, & sapientius, quàm ceteri fecerint, edocuit; & inopes, obscurosq; hac laude, si libenter, quod possent, darent, ornatum iri clarissimo sui testimonio demonstrauit, ipse & inops maximè, prorsusq; egens; & qui alieno habitu Deum ipsum oculis humanis referret. à quo enim post conditam huius uniuersi molem tanta ad humanum genus bonorum effluxit copia? unde densissima caligine obducto tam copiosa lux affulsit? unde prostrato atq; exanimato salus?

Quamobrem refellendi sunt, ac prorsus reijciendi, qui nec beneficentiam, nec huius comites in natura diuina collocauerunt. Quonam aut affectu, aut cupiditate, aiunt, moueri illam, & trahi, ad quæ sedanda, & moderanda necesse sit uirtutum adhibere remedia? quam omni perturbatione uacantem nulla, nec Aeuì longinqua ualet mutare uetustas; nec ira, quibus caret, membra inflammare; nec uoluptas blanda meretrix titillare; nec metus pallore inficere, nec rubore pudor? quæ interitus omnis expers, nullus opis indiga, nullum sibi cupiditati locum relinquens in altissimo otio degit; seq; ipsam contemplan tantam felicitate fruitur, quantam nec animo concipere est,

nec uerbis proloqui? Quasi omnino sit necesse nulla ratione inesse, quia alia, atq; in homine, in ea insint: aut uerum illud non sit, quicquid deo tribuitur, id esse deum; homini uero, non hominem esse, sed naturæ hominis consentaneum quiddam, & proprium. Aut quidem bona esse hæc negabunt, aut auctorem deum: alterum non licet ipsis non confiteri ex tripartita illa bonorum diuisione, quæ maximè apud eos est celebris, & peruulgata; alterum, præter notam insignem mendaciæ, etiam nefas. Nam, si deum motus omnis principem statuunt, eiq; uim tribuant mouendi reliqua, quæ auctoritatem illa perficiendi ab eo auferent, quæ, si desit motus, et corruere omnino est necesse, & nusquam esse possunt? Si enim consistat hoc cælum, nec oriri, nec interire possunt ea; quæ rebus propria dicuntur accidere: res enim nullæ sunt, quibus illa contingant. Quare si homines non sint, multò minus reperietur, quod his tanquam aduentitium aliunde uolunt accersiri. Bonorum autem causa præcipua homini est Deus; à quo nihil mali potest existere, quia sit opt. max. malorum ipse sibi homo, & hostis Satan: nequis mali etiam auctorem impiè cogitet; quia sit improbus, quem procreauit: bonum quidem à prima origine effecit optimus, & liberum; malum legis diuinæ contemptus: quo crimine libertas quoq; magna ex parte ei adempta est. Præterea curam rerum omnium, quæ mundo continentur, & regimen ei adimunt, qui sic loquuntur. Atqui uideant ipsi, & cogitent, qui hoc dicunt, quo pacto istuc tueri possint: neq; enim mihi perspectum est adhuc, & exploratum. Vt autem taceatur, quod de motu modo explicatum est; naturam quum dicunt è numero esse causarum illarum, quæ finem quandam in perficiundo opere considerant, & sequuntur

tur, aut finem hunc dicendum est naturæ ipsi esse cognitum: secundus enim neque finis aget causa; aut, si ei ignotus is sit, ut certè est; quippe quæ tanquam instrumentum ex ea natura, quæ prima mouet, habet, ut causa sit omnibus præcipua, quorum est effectrix & mouendi, & quiescendi, ab alio tanquam duce, qui, quò pergendum sit, nouerit, manu, ut aiunt, illucusque perducetur, quò est ei in effectiōe operis perueniendum: ita altera meliore natura est opus, & præstantiore, quæ inferiorem, ac deteriore regat, & moderetur. Cuius functio muneris nihil planè aliud est, atque ea, quàm Græci *πρόνοια* nominant, melius fortasse, quàm nos, qui prouidentiam dicimus, quia sit æternæ mentis concepta antè, & iam inde ab initio prouisa rerum dispensatio. Quæ intuentibus nobis t. m. manifesta est, & comperta ex ipsa tum causarum, tum naturarum ui, ordine, ortu, progressu, quæ contemplantes admiramur; ut impudentis sit magis, & stulti in re tam explorata uelle quærere, quæ sensu ipso percipiuntur, quàm dubia, & obscura nescientis; ne dicam impij, & scelerati hominis: qui de deo & male sentiens, & peruersè loquens eius tum potentiam, tum bonitatem aut imbecillitatem suam, aut deprauatam, falsamque opinionem metiatur. Iamque ipsi damnant impietatis eos, qui deos prorsus nullos esse putauerunt. Hos autem cum asserant, si (quod tamen nusquam affirmant) desideres esse, & ociosos uelint, propè istuc perinde est, ac si usquam esse negent: nihil enim eorum, quæ sunt, de ipsorum sententia frustra est. Nimirum hoc negabunt; neque deum inertem esse patientur; dicent enim mouendi initium omnino esse ab illo; quem, præstare ut id queat, & excimunt ab omni contagione materiæ, & immobilem penitus

statuunt, nullis circumseptum locorum spacijs concludentes: præ-
 terea ad hanc mentem puram maxime, & simplicem referri
 omnia, atq; unūquodq; eniti pro sua conditione, ut, quamproximò
 fieri possit, accedat communioni naturæ. Hæc quum de deo disput-
 tant, uidentur quasi imprudentes, nec satis, quid dicant, conside-
 rantes uelle illum constituere omnium moderatorem, ac regem,
 uidentem omnia, sentientem, omnia procurantem; idq; adeò præ-
 fertim; quòd, cum eorum quidam affirmant, omnium notitiam hæ-
 bere ideo, quòd in seipsum intuens ea uideat, & sentiat, nun-
 quam labore defatigari, nunquam quiescere, nunquam cessare uo-
 lunt. Itaq; siue rerum formas omnium singillatim percurrentem
 mentis agitatione foras promanante comprehendere, siue (quod
 uerius est) secum de seipso meditantem, neq; unquam cogitatione
 egredientem harum ipsarum similitudines in se tanquam in spe-
 culo recognoscere dicant, illud assequuntur, ut his necesse sit con-
 cedere, quod aut nolunt, aut uolentes quidem, ambigendo semper,
 atq; interrogatiunculis quibusdam urgendo uidentur abnegare.
 Nam, qui principia, & causas rerum nouerit, ei reliqua, quæ ex
 his oriuntur, explorata maxime, & cognita esse oportet; deus est
 princeps omnium causa; seipsum cognoscit, qui, qualis uel sit, percipi-
 titur & ea, quorum est ipsa causa. Quare non est, quod tan-
 toperè in deo reformident nomen hoc prouidentia; qui rem ma-
 nifestò uideantur astruere, & probare: nec, cum animi bonis
 quicquam reperiatur aut melius, aut deo ipsi similius, quo nihil est
 perfectius, negent aut ad eum, qui sit rerum terminus ultimus, ac
 supremus (id quod uideo magis ipsis placere) hæc ipsa referri;
 aut ab eodem tanquam effectrice causa proficisci: utrumlibet ue-

lint, constat quidem errare illos, si contendant uirtutes Deo haudquaquam esse tribuendas: qui, dum ordinem rationem quandam esse statuentes eius causam naturam esse uolunt, uidentur illam iustam, fortem, liberalem, temperatamq; constituere. Atq; hæc ex Peripateticis ipsis tueri fortè possunus; etiam si mundi initium nullum esse statuamus. Quantò uero magis, si, quod stoici uoluerunt, orta concedamus: qui rerum materie, ex qua, & in qua omnia ipsorum sententia sint, fictricem, & moderatricem diuinam providentiam asseruerunt. Apud Ciceronem Balbus haud omnino falsus mentem inquit, à suis dys ad homines peruenisse; ob eamq; causam maiorum institutis mentem, fidem, uirtutem, concordiam consecratas, ac publicè fuisse dedicatas: quæ non conueniret penes deos esse negare, cum eorum augusta, & sancta simulacra homines uenerarentur. Itaq; à Deo tanquam à fonte copiosissimo bona huiusmodi in nos omnino deriuantur: quæ, sicut alia, propter impedimenta, quæ permulta sunt, non absq; magno accipientium labore hominibus impertiuit; ut, cum animorum morbos, qui ex contagione corporis contrahuntur, sanauissent, possent auctori suo quamsimillimi illuc reuerti, unde eorum profecta est origo. Vt cum uidemus globum lunæ natura quidem opacum & tenebricosum luce aliunde accersita illuminari; solem uerò non aliena, sed propria splendescentem radiorum effusione, & iactū illam ita accendere, ut alieno tamen habitu, cum proprio non possit, referat sese, atq; aspectibus obijciat humanis; sic & ipsius, reliquorumq; siderum effector, & omnium procreator deus in hanc corpoream molem, qua humani animi conteguntur, lucis suæ radios ex altissimo cœli domicilio demit-

tens cœcam prorsus inflamat; expulsisq; procul tenebris animi, quæ uitia ipsa sunt, ni uelimus aduentanti luci fores occludere, uirtutum fulgore collustrat. Atq; isthæc obiter hoc modo à nobis breuiter percursa fuerunt. Quanquam quis inuentis frugibus glande uesci uelit? Quid homines adimus; quid ignaros consulimus; quid auxilium petimus ab infirmis, qui deum habemus? qui ueritatem ipsam (ut ita loquar) manibus tenemus? qui ab eo, quo nemo nec firmior, & potentior, nec ad præstandum benignior, & promptior, certam opem expectare possumus? Cur nonnulli magis impij, quàm ueritatis cupidi malunt philosophis credere; qui, quæ proferrent, plerumq; adeò ignorauerunt, ut pugnantia dixerint? An post receptam lucem tenebræ sunt nobis affectandæ? Quis Christo, quem deum, & hominem quotidie audimus docentem, iustior; qui totius terrarum orbis iudex est à deo patre constitutus? Quis continentior, & temperatior, qui uel sola alienæ uxoris cupiditate adulterium iudicauit? Quis æquè imperia contempsit, & opes, qui ne locum quidem sibi relictum dixit, ubi languentia, & defatigata membra reclinaret? cum tamen niduli affixi, & pendentes auibus ipsis essent ad quietem dati. Quis minus rixarum appetens pacem, & otium tantopere aluit, & fouit; qui alteri haud parum cuius de suo concedendum iusserit? Quis in aduersis constantior; quis fortior; quem non erecta cruce in alto, ac prominenti loco, non tormenta, non mors, quam ultro pro communi salute humani generis oppetijt, detertere potuerunt? Iam uero, qui ijs bonis excelleret maximè, quibus beneficus esse posset, beneficentiam tantum extulit, maximorum ipse beneficiorum auctor, ut uel hostes cum amandos, tum uerò officijs ipsis

& iuuandos; & sibi, si fieri possit, ab unoquoque deuinciendos esse
 se praeceperit: ut, qui hæc animaduernerit, nihil ei sit neque de
 prouidentia dei, neque de beneficentia, alysq; consimilibus, ipsi ne
 insint, quærendum amplius, quod sit aut ratione firmitus, aut
 auctoritate maius. his, reiectis hominum multa magis inquiren-
 tium, quàm pauca certa cognitione assequeuntium contentionibus,
 contentus esse debet. Quis, inquit Antonius, Iuli istæc non liben-
 ter audiat, aut etiam non laudet; quæ à Philosophis nec satis
 animaduersa, nec, nisi à paucis, isto modo explicata? Nam plerique
 eorum fari nesciunt, ut, quum quid enunciant, cogitata uix intel-
 ligas: quidam uero ita se mendacijs addixerunt; ut ferè pudeat
 ipsos Christianos se philosophos esse profiteri: ignari tamen, &
 cum leues, tum etiam impii; qui & alienatione à ueritate falsam
 ex doctrina gloriam aucupari studeant, & minus pietatem ue-
 reantur. Vera, inquit Iulius, dicis: nec est, quod studium meum uos
 huc accersendi præproperum accusetis: ex quo planè fructum iam
 illum cepistis; ut quàm sint ampla, & egregia, ad quæ omnes uo-
 cantur, cognosceretis. Pergat modo: cupio enim hoc pacto fieri be-
 neficus: ut, non sicut Herculem in cælum fama sustulit: sed, cui
 solida ex beneficentia tribui potest laus, cum Christo unà im-
 mortalitate fruar. Rectè, inquit Antonius, Iuli sentis: atque hoc
 quidem est sapere: neque alia ratione, quæ sit potior, munus istuc
 amplissimum traduces: hunc uero institutum suum persequi si-
 namus.

Illud igitur, inquam, manifestum est ho-
 rum animi bonorum eam esse facultatem, quum hominibus tri-
 buuntur; ut aut affectus omnes, quibus hi torquentur, leniant,
 temperent, mediocritatemque quandam seruare cogant; aut habent

di, imperan. lĩq; libidinem coerceant; doceant, quod honestum sit, persequi: suis, & ciuibus, & omnibus, ut possint, prodesse uelint; non ut omnino tollant, atq; ex animis euellant, quæ natura ipsa homini indit, cum primum pars eius purior iussu imperatoris dei corpori coniungitur, fieri q; non potest, quin sordibus assidue uolutata aliqua ex parte maculetur,

Ignæus, inquit Maro, est ollis uigor, & cælestis origo

Seminibus, quantum non noxia corpora tardant,

Terreni q; hebetant artus, moribunda q; membra.

Hinc cupiunt, metuunt q; dolent, gaudent q;.

Beneficentia igitur ita hominem afficit; ut, cum cæteris incommoda, detrimenta q; afferre peius, quàm dolorem, grauius, quàm mortem, iudicet, maleficos homines hostili animo oderit, primò quidem nihil hoc ducat esse dignius, nihil laudabilius, quàm pro defensione, propagatione q; ueræ pietatis; pro salute; pro honore, pro q; utilitate patriæ, amicorum, ac necessariorum suorum, omnium deniq; laborare, omnia, quæ fieri possint, tentare; nihil prætermittere. Dein, quo pacto istuc faciendum sit, docet: præcepta dat; terminos quosdam præscribit; quos qui præterit, benefici & naturam, & nomen amittit; præcipit habendam esse rationem personarum, temporum, locorum: beneficia quæ dentur, omnia esse ponderanda: quid possit quisq; cogitandum. Et, quoniam alterum aut opibus iuuare, muneribus afficere, commodis augere, aut honoribus ornare, amplificare dignitate, imperio extollere, & beneficia sunt, si recta hæc ratione fiant; & plerisq; beneficiorum id genus præcipuum; benefico utiq; seruanda est distribuendi ratio, quæ est iustitiæ; præsertim si acciderit, ut ad

hoc uitæ institutum accedat publicum administrandi munus : etenim quantum meretur cuiusq; dignitas, ei est dandum. Differt autem à iusto beneficium, quod alteri sola æquitas curæ est : non amore ducitur; non obruitur odio; non propinquitatis ratio flectere; non amicitie iura allicere; non priuata iniuria inflammare possunt hominem & eam, quam personam gerit, decorantem, & communi saluti sola animi integritate consulentem. Alter uidetur aliquid amori posse largiri; præsertim si priuatus fuerit: tunc enim uenia aliqua fortassis ei danda, si amici, aut necessarij causa aliquanto plus uelit, aut agat: ut amicitie, & affinitati concedendum aliquid omnino esse uideatur. Id enim natura ipsa exigit: ut, si plures sint, qui dignitate pares, & æquè indigentes subleuandi sint pecunia, aut ad honores prouehendi; si, cum omnes boni sint, alij amici, alij non inimici, amicis sit aut solis, aut plus utiq; tribuendum; aut etiam, nisi sit insignis personarum inæqualitas, necessarius paulo inferior apud hunc locum principem obtinebit. In quo illud cauendum est; ne amicitia hæc, propinquitas uel rei. p. obsit, aut pluribus. Est autem damnum leue, ac ferendum, si is tantum, qui posthabetur, aut pauci sentiant; aut si beneficium cum multorum iactura amico tribuitur, turpiter fit: a quo quidem amicitia ipsa, quæ cum honestate semper coniuncta est, maximè uidetur abhorrere. Atq; hoc, quod diximus, ita accipiendum est, ut amici leuius improbi sint: nam, qui maximè, cum his amicitia huic nulla esse potest: est enim is, de quo loquimur, improbitatis hostis maximus; neq; illic potest esse uitium, ubi uirtus domicilium sibi consecrauit. At, si magistratus sit, aut quouis modo cæteris imperet, ne tantillum quidem ab orbita dilabatur:

tunc

enim non beneficia tantum ab eo, sed uirtuti, & meritis etiam præmia expetuntur; nec de suo impertit quicquam, sed de alieno; quippe qui non tum planè illud profiteatur, quod suum ipsius magis est proprium; sed iustus potius uelit & esse, & haberi. Quamquam nihil prohibet ad iustitiam in publico munere beneficentiam adiungere: charitas enim erga patriam, & omne humanum genus uidetur cum multis uirtutes, tum iustitiam in primis peperisse: nec, ut soepe dictum est, beneficium est maius, quàm, quo humana societas conseruatur. Ad quod munus obeundum qui propensius studium suum affert; idq; non coactus, nec cupiditate aut bonoris, aut pecuniæ, ut in plerisq; cernimus, impulsus, sed ultrò, ac libens aut oblatum suscipit, aut etiam, ut possit, bonis artibus quærit, uirtutem cum uirtute coniungit; quarum affinitas magna est; nec, sicut uitium & secum pugnat, & seipsum interimit, alterius necessario sequitur interitus, si alteram perimias omnino, ac tollas. Quare efficitur, ut, qui opes suas ad aliorum utilitatem confert; ei prouidendum sit, & laborandum, qui, quales uel sint, quos iuuare uult, optimè ut norit; ne forte ex beneficio (id quod interdum euenit) oriatur maleficium. Horum enim bonorum ea est conditio, & natura, ut bona sint, si quis bene utatur; contrà autem mala, si malè: licet enim det, quæ sua sunt, nec sit necesse, ut de repetundis; sic de expensis causam apud iudices dicere, ratio tamen, quæ una est in omnibus, eandem rectè uiuendi, & agendi regulam in priuatis hominibus exigit, quam in excelsis, & illustri loco constitutis: quam si omnes ducem sequerentur, nec ad tribumalia, quæ nulla essent; nec ad iudicia ulla confugere esset opus: sua enim contentus quisq; aliena quæ-

rere nefas arbitraretur. Error autem, aut peccatum in rem. p.
 administrantibus grauius iccirco uideri solet, quia unius aut insi-
 pientia, aut scelere multi plectuntur. Huic tamen, ut dixi, detur
 facultas in dando paulo liberior; nec ad calculos reuocanda sit be-
 neficentia: propinquis, necessarijs, & amicis prius consultum ue-
 lit: faueat; opem ne denegat, egentibus præsertim, & haudqua-
 quam, quibus succurratur, indignis: quorum in numero præstan-
 tiores minus uirtute conspicuis; deterioribus meliores semper
 sunt præferendi. Hoc ubi prudenter egerit, & se suis beneficium
 ostentari, alios quasi dato, ac sublato signo è specula properè ad
 se uocet: patrocinium his polliceatur suum: tueatur, quos ui op-
 pressos à potentioribus uiderit: alat suis opibus; quibus ad uitam
 sustentandam alimenta defunt: ad honorum gradus prouehat, in
 quibus & uirtuti sua deberi præmia cognouerit; & ex ipsorum
 cum sapientia, tum æquitate ciuitas magni alicuius futuri boni
 spem certam potest animo concipere: idem enim tum beneficium
 & priuatum efficitur, & publicum; quum ad hominem probum,
 & sapientem gubernacula deferuntur. Ac fortassis quidem, si
 acciderit, ut is, quem nunc dicimus, & inops, & ope destitutus
 nulla ratione possit emergere, ni aliquo adminiculo nitatur, pro-
 pinquitas tunc omnis, & amicitia excludi, ac posthaberi debet: ni-
 hil est enim homini ei, quem formamus, aut uirtute charius, aut
 patria, communiq; bono antiquius. Hoc, qui ignorat, discat is à
 Christo; nec, si philosophis minus fidem habeat, quorum multos
 cernat, & accuset errores, deum (quod nefas est) falli posse pu-
 tet. Qui, cum nunciatum ei fuisset, matrem, ac fratres (hoc enim
 nomine solitus est doctor ipse appellare discipulos) qui unà comi-

tes accefferant, intus docentem, ac iudæorum peruicaciam redarguentem dudum foris opperiri, Mihi uel soli sint, ait, aut matris, aut fratrum loco, qui fecerint, quæ deum patrem uelle cognorint; ægre nimirum ferens aut cura suarum rerum grauiore cuiquam pietatis officia præpediri, aut uirtuti affinitatem omnino anteferri. Hæc, consimiliaq; huius generis, quæ suis locis melius explicabuntur in dandis beneficijs, quæ diximus, sunt considerata, & seruanda. Verum meminerit non continuò esse beneficium, qui & hæc ipsa, & alia omnia faciat, quæ sint alijs utilia; nisi cum prudentia coniungatur perpetua, & constans semper alterum promerendi uoluntas. Etenim in omni uirtute quatuor omnino requiruntur, cognitio; uoluntas libera, quæ deliberationem sequitur; firmitas, atq; animi inconcussum rectè agendi propositum: præterea, ut actio omnis, cuius est procreatrix uirtus, non aliam sui causam agnoscat, & uelit, atq; honestum ipsum, hoc est deum; à quo utiq; ipsam est necesse prodire. Censent enim philosophorum maximi, cum reliqua bona, quæ à nonnullis ipsorum appellantur indifferentia, referantur ad aliud, sola hæc, quæ animi sunt, gratuita esse oportere; neq; hic perinde esse, atq; in his, quæ arte constant, in quibus & sola eius quæritur cognitio, & operis ipsius est laus omnis: nec, fortis ut sit is, qui pingit, necesse est; nec ad laudem statuæ artificis temperantia adiungitur; nec, quàm bene, quàm uel malè affectus sit ædes excædificantis animus, quæri solet: cui, (si qua tamen est uirtute excorandus,) iustitia erit magis necessaria, quæ lucri auiditatem comprimat, quod sibi pollicetur ex opere. At in uirtutibus non tam refert nosse quid, quàm uel ratione, quàm qua natura animi as-

fectus agas, hoc est, quàm non inuitus; qua pietate, quàm præclaris actionibus assuetus, quàm constanter. Hæc sunt præcipua: uirtus ferè sola hæc à quouis poscit; in his posita est honesti uis omnis: scire enim, quod unum ars exigit, hic, ut inquit Aristoteles; aut momenti nihil habet, aut parum: ut honestæ actiones potissimum hæc sint, quæ à uirtute prodeunt, & ab homine, qui, cum pridem se ad eas exercuerit, non possit; nisi, quæ recta sunt, ac pulchra, & uelle, & optare. Nam, qui facit, quod iustum est; itemq; à quo uoluptas aliquando uicta repellitur, non omnino necesse est, ut sit is aut iustus, aut temperans: potest enim accidere, aut etiam plerumq; sit, ut aut rectè nolens agat, aut uolentem ne sequatur assuetudo, quæ si desit, ad contrariam partem, quæ uitij est, facile delabi potest. Non igitur quotiescumq; beneficia alicuius existunt aut in ciuitatem, aut in priuatos, beneficum esse hominem hunc existimare debemus: hoc enim dignus est nomine, qui beneficentiam tantum colit; quæ semper, ni interueniat calamitas, prodest, cum tamen beneficium haud statim necessario ipsa consequatur. An, qui libidine regnandi ad largitiones impelluntur, aut coguntur labores ingentes specie tantum utilitatis uniuersorum suscipere, terra, mariq; bella gerere, caput toties maximis obiectare periculis, hac gloria decorabuntur? non auidi potius erunt imperij? non calamitosi, & perniciosi ciues? non hostes patriæ? Atq; hi quidem tantum abest beneficiorum magnitudine tanta, quanta esse possit, erga uniuersam rem. p. benefici ut sint; ut nihil sit ipsis imperium affectantibus uel scelere atrocius, uel, ut aliquando accidit, parto dominatu detrimento calamitosius. An timidi non erunt, & meticulosi homunculi, qui iniuriarum metu, & periculis

lorum, aliquando audacibus hominibus, & flammam, ferrumq; minitanti-
bus multa largiuntur? Non aut quasi molles quidam,
aut inanes popularis auræ captatores, qui, ut ne malè audiant,
interdum etiam, ut falsa, cum uera careant, ornentur gloria, eos,
qui dicaces sunt, & leues scurræ, magnis plerumq; afficiunt
muneribus? Nonnulli quidem ignobiles, & obscuro homines, indo-
cti præterea, & rudes (ut illos præteream, qui uel hoc uno, ut ex
alio flagitio nulla accedat infamia, honorem illum, qui uitæ gra-
uitatem maximè postulat, dedecorant) uiri & procaces, & ex
professo audaciores ad perstringendum, se & priuatis, & res-
gibus adeò commendarunt; ut hoc illis & nouum, & maximum
fuerit aucupium. Quorum dicacitas, & effrenis loquendi licentia
& paruifacienda est ab ijs, qui sunt excelsò animo, & magno;
& morum integritate, rectaq; uiuendi ratione magis compescen-
da, quàm illecebris turpem quandam amorem conciliantibus laus-
dum præcones leuissimi comparandi. Acutè quidem, & ad leuiter
nimis assentantis ignominiam cuidam, respondit Carolus huius
nominis quintus imperator augustus: qui cum eo audiente proclaz-
mitaret, se ad Cirtham oppidum in Africa munitissimum, quam
expeditionem suscepit ille apparatu maiore, quàm fortuna, claz-
myde aurea Cæsarem induisse, hoc uidelicet elogio significans,
magno apparatu eloquentiæ, & pompa uerborum à se laudibus
ornatum, utinam, inquit Cæsar, falsum ne sit istuc aurum, quo
me contexisti. Idem, cum esset ad eum in Hispaniam usq; perla-
tus liber eo, quem uernaculum uocant, sermone conscriptus, in
quo auctor uictoriam de Francisco Gallorum rege ad Ticinum,
capto illi gratulabatur, cum non uirtuti militum, ac ducum suos

rum, sed hostium ignauie, aut proditori uideretur id ascribere, fortunamq; regis uehementer accusaret, haud parum hic, inquit, est deceptus, qui librum ad me miserit, quem ad regem destinarat: rex uero scilicet, qui meus erat, habuit: atq; ita homines huiusmodi ab hoc principe contemni solent, ut etiam oderit. Qui, si ab optimo quoq; repellendi, & quum fieri id potest, amouendi, & ablegandi, quid assentatoribus facias; qui diuersa ratione illud idem tamen assequuntur, quod graues, & importuni scurræ: atq; hoc quidem turpiore, quò talis eorum simulatio procacitate est peior: & quò maiore cum periculo blanda est conciliatrix, & amica uitiorum assentatio, quàm scurrilitas sit atrox ipsorum hostis. Quo igitur loco reponendi sunt, quò ue digni nomine, qui hoc sono, uoce ue, quàm sirenum cantus, suauiori, pleriq; facile, aut etiam magna cum uoluptate capiuntur? non cæci ac turpes sui ipsorum amatores? non, ut Aesopi apologo uidere est, quamplurimi tanquam graculi pauonis ornatus affectatores ridiculi? non, alieno tamen ore, arrogantes? quod unum arrogantiae genus sanè pestiferum est, & tetrum. Nam, qui proprio ore suas res inaniter extollit, & iactat, risu plerumq; audientium delusus solus damnum sentit; nec de peccato nisi auctor plectitur: at eius arrogantia, qui clam ipse sui prius admirator, alium patlam præconem constituit, aut falsum patitur, admodum est maiorum ferax: id quod maximè efficit natura uiti huius, quæ tæta, & latens facile incautos, & minus sentientes fallit. Nam, præter risum, qui aliquando adulatori (ut alius prætereatur quæstus, quem aucupatur) ex mendacio fructus est haud iniucundus, quod ipsum est excitanti cum turpe, tum etiam probrosum,

hoc sibi alloquantem ea aqua ad potum sibi comparata miser ipse ingurgitat, unde post sitiens aliquando redit: clauditurque interdum & affinitati, & amicitiae, saepe etiam uirtuti benignitas, quae solis assentatoribus reseratur: ut interea sileatur, quanto spoliatur bono: hoc autem est uirtus, quam aures obstructae ueritati cogunt inde decedere, ubi mendacio est locus. Latè autem serpit hoc malum, & quocumque ferè peruagatur; quia id unum ex omnibus uitijs magis uideatur & natura ipsa prouehente, atque adiuuante ueniam promereri, & honesti cuiusdam specie ad se unumquemque pertrahere: nemo enim est, qui sibi sit inimicus: non multi, qui, in se amando quousque æquum sit progredi, dignoscant; pauciores multò, qui huic amori eum, quem iubet ratio, terminum præscribi uelint; tametsi, quid agendum sit, norunt. Præterea ei se obstructum unumquisque putat, à quo beneficium accipit: si, qui, aiunt, malè loquitur, est aliquo tamen officio, cum aliter non possis, eius concilianda beniuolentia; quid facias illi, qui benè? Quid est? ne eius modica laus, qui domino diuiti, ac præpotenti norit in cunctis obsequi, nutus eius omnes obseruare? haud multos inuenias, qui egregiè, & ex animi nostri sententia hoc præstent. Quum hæc dicunt, non intelligunt pro uirtute ipsis haberi uitium, pro ueritate mendacium, pro bono malum, falsumque; & turpe beneficium maiore pretio comparari, quàm honestum, & uerum. A quo quidem omnes cauere debent: præcipuè uerò ij, qui reliquis & opibus, & ingenio uidentur antecellere: quò enim quisque ui maiore instructus est ad iuuandum, hoc plus, ubi istuc sit, & alia, quæ turpia sunt, & sibi, & alijs, obesse solet; liberalemque ac beneficium iure hunc nullus appellabit. Multò uerò minus

id sibi uendicabunt, quos non utilitatis aliorum ratio, non charitatis uis; sed auiditas sola gloriæ; aut de simulata uirtute uoluntatis multorum conciliatio; aut deletio alicuius, quæ pridem inhæserit; maculæ; aut inanis opum ostentatio; aut auaritiæ suspicionis depulsio ad hoc impellit, ut prodesse inuiti, & nolentes uelint. Tumidi, & inflati sunt, quos non uirtus sua pulchritudine alliciendo ad se trahit; sed populi studium, & uox emissa in præconia grata demulcet. Fallaces illi, & fraudulentæ, qui uitia ingentia cum alicuius uirtutis, tum, id quod in multis accidit, honesta quadam gratificandi specie tegunt. Simulatio autem omnis, cum mala est, (mendacium enim omne uituperabile est) tum pessima uitiorum; uirtutum dissimulatio, quæ græcè εἰσωνεία dicitur, ex quo εἰσων Socrates appellatus, parum solet reprehendi; præsertim si, quæ dissimulantur, fuerint magna, & præclara; sed, ut dixi, nihil fermè reperire est aut ad culpam deterius, aut turpius ad infamiam, aut ad hominum perniciem grauius, quàm uirtute uitium uelle tegere; bono malum; honesto id, quod turpe est, obuelare. Nimirum hoc est fraudulenter naturam uelle peruertere; quod tametsi uitium omne ex se molitur, facilius tamen, & citius uidetur posse hoc efficere; quum uirtutis imago quædam ad laborem adiungitur. An non sum præcipue, tanquam mulier intemperans ex illita facie amatori, fucum naturæ is facit; qui cupiditatis loco rationem prætendit? ueritatem mendacio? dolo fidem? qui crudelitati obtendit pietatem quandam & uultu, & oculis, & oratione depictam? liberalitatem auaritiæ expressam ob inuito aut alicuius metu mali, aut auiditate lauidis libidini continentiam & seueritatem in alios, & corporis habi-

tu sordidato, Antoniosq; interdum, atq; Hilariones mentientes cui genus omne nequitia, & impietatis inuolutum frontis integumentis obtegitur, & celatur: hoc homine nihil tetrius; nihil abhominabilius; nihil etiam iure despectius, & abiectius; qui sit pudenter improbus, & meticolosè malus. Ac reliqua quidem mala, quæ manifesta sunt, & aperta, fortasse leuiora iccirco; quia, ut intus latentes morbi, si retegantur, sæpe & sanantur facilius, & minore sunt cum illorum periculo, qui premuntur, sic hæc & ab eo, in quo insunt, pelli aliquando possunt cura, quæ tum leuius admittitur, adhibita; & à cæteris prouisa deuitari; nec, uelut ea, quæ securos, & minus metuentes insidijs adoriuntur, imprudentes fallunt. At pestis hæc intestina tam est aut ad expellendum difficilis, aut apta ad decipiendum; ut etiam & quotidie magis ipsa augeatur, dum sibi nimis de salute pollicetur; & pauci admodum sint, quos ad se simulata quædam ualetudo pellectos miseros non deperdat, & prosternat. Vsq; adeo homines hi execrandi, & pestiferi sunt; ut, cum à Christo genera omnia peccatorum, ac scelerum quàm plurimis, seucrissimisq; increpationibus excludantur, & è mentibus euellantur, malum nullum reperiatis, quod sit ab eodem tam grauius, seucriusq; notatum: qui ab his præsertim cauendum proclamarit, in quorum animis luporum uoracitatem intus celant ouinæ pelles. Parum ne hac similitudine declaratum, possit ne horum beneficentia esse ulla, in quibus efferata habendi cupido posita tantum abest ut aut suis contentos uiuere sinat, aut cæteris usui esse, ut etiam alienas sitiennes fortunas tantum malorum afferant, quantum fallaci iustitiæ indumento sulta in iustitia: Quòd, si igni comburuntur, qui pecus

niam adulterant; quid his facias, qui, quod est maximum bonorum omnium, uirtutem? nullum planè supplicium sceleri par uideri potest. In contrariam uerò partem à multis leuiore fortasse aliorum detrimento delinquitur; qui palàm uitia omnibus facientes sua uidentur uirtuti æternum indixisse bellum. Non curæ existimatio nominis; non honor; non dignitas: conspectum bonorum oderunt; spernunt monita amicorum; necessariorum preces reijciunt; quo genere uitij peccant, in eo ita impudenter, & temere sunt præcipites, ut nihil prorsus pensi habeant. Deterior autem superiorum conditio, quàm horum: quoniam aut irrogatione pœnarum, quas legum decretis subire coguntur, aut calamitatum ictibus sua ipsorum culpa profligati ipsi aliquando, si non omnino, aliqua tamen ex parte respiciunt: &, cum uulgò improbi sint, cognita, detectaq; improbitate facilè ab eo, qui uelit, malum uitari, ac repelli potest. Secus perdita malitia nihil deterius: nec est iniuslior, & turpior, quàm, qui sordibus peccatorum cum uoluptate se ipsum uoluitans impudenter in scelere gloriatur. Atq; hi tamen quàm poterunt esse benefici; si nec uitium nocere non potest; nec nisi prodesse uirtus? etenim aut malis sæpe, quales ipsi sunt, fauent, & opitulantur; aut perrarò bonis: ad id autem quum propriæ non suppetunt opes, alteri per uim, aut scelus adiungunt; ut habeant, quo se liberalitatis nomine commendare possint, quibus bene esse uolunt. Hoc qui facit, uitium cum uitio coniungit, hoc est, prodigalitatem cum iniustitia. istuc autem quàm è beneficentia depromi potest: quæ neminem unquam lædens, semper prodest? Quòd, si à quibus aliquando fructus capitur aliquis, licet pessimi homines esse uideantur, excluduntur hi à numero

eorum, quos uolumus, quo pacto eos admitti licebit, qui parci sunt? qui auari? qui nihil de suo unquam cuiquam impartientes ut plurimum aliena quærit? An cæteris quicquam ab his dabitur, quibus ex his, quæ ipsi habent, multa admit plura possidendi immensa ingluuius? quorum curtæ nescio quid semper abest rei? uerèq; illud his conuenit, quod de Tantalos poetæ ferunt. Aut, si qui tamen inueniuntur, qui nonnunquam largiantur cuiquam aliquid, aut efficiant, quod sit commodum, spem sanè hi tum maiorem tenui emunt pretio; & ut est in prouerbio, libenter, ut gallinæ lucrum fiat, ouum sibi patiuntur auferri. Sunt autem quamplurimi, qui aut hoc ueluti hamo patrimonialia, & opes expiscantur, aut tanquam reticulo aucupantur honores. Hoc quidem est beneficium fœnerari, non dare; & signum potius latentis auaritiæ, quam beneficentiæ argumentum. Virtus autem fœrius tantum probat, quod alteri sit utile, sibi non indecorum. Quare nec hi; nec, si qui ob eas, quas supra commemorauimus, causas, (aut si quæ huiusmodi aliæ sunt) beneficia ulla in aliquem conferent, in cœtu, ac numero beneficorum collocabuntur. Qui uerò digni habentur hoc nomine, hi sunt, quos, ut diximus, honestatis uis sola compellit; ut, quem potissimum egentem uiderint, dignum præterea, qui ne reatur auxilium, cui faueant, (quanquam de hoc latius suo dicemus loco) eum pro suarum uirium facultate libenter iuuent; idq; quum faciunt, ne sint alteri detrimento. Hoc sapienter, ut reliqua, Christus instituit: quum in subleuanda alicuius inopia censuit illud esse prouidendum, ne, quid manus moliretur dextera, resciret læua: unius enim ostentationis accusatione reliqua, quæ rationem honesti excluderent, est complexus. Ac, nequid præter

mitteret in ea re aperienda, ac declaranda, quæ ad salutem homini maximè necessaria esse uidebatur, honestum hoc quale esset alibi edocuit; idq; melius quidem certè, quam factum sit à Philozophis; qui, quod uerum esset, magis quæsiuerunt, quam sint eius scientiam exploratam consequuti. Quum igitur, inquit, agitis aliquid, illud ita palàm facite, ut omnes, qui uiderint, dei præpositis, & excelsi extollant gloriam, & decus; perinde, ac si diceret: ne uos, ut boni, & benefici & uideri, & esse uelitis, aliud moueat, atq; deus ipse honesti omnis & auctor & fons. Igitur, ut tales y sint, quales esse debent, & nos uolumus, ad deum ita omnia referent; ut eius tantum causa, & quia ita faciendum præceperit, uniuersis ferre opem adnitantur.

In hoc autem studium cum est cuiq; collocandum; tum uerò y præcipuè, qui præsidentes cæteris, & imperantes & officij iure coguntur ciuium utilitati consulere, & facilius id possunt ea, qua præcellunt, auctoritate præstare. Quorum tametsi non est una ratio, omnibus tamen eadem fermè seruanda est regula promerendi. Illud autem unum omnibus, qui benefici in primis esse student, curandum, & consilio omni, studio, operaq; enitendum est, ut commodis, & saluti omnium prospectum uelint; idq; faciant potissimum erga omnes charitate accensi, & impulsus, quam uirtus hæc ab unoquoq; exigit. muneris autem præscriptio, & æquitatis retinendæ, conseruandæq; procuratio uidetur iustos constituere, non beneficos. Id autem præstantissimum est, ac pulcherrimum: sed illud multò præstantius & pulchrius, atq; cum magis secundum naturam, tum uerò immortalis deo gratius, quolonitate conditori propiores efficimur. Quod planè ipsi præsta-

bunt; si ad eam, quam diximus, beniuolentiam in omnes iustitiam conitem acciuerint; atque cum altera sic alteram coniunxerint; ut, ad id, quod, amor ut faciant, eos impulerit, & inflammarit, statim adhibeant in consilium iustitiam; quæ illud doceat, qua sit ratione tractandum: quæ tanquam gubernator naui assidens curæ sus lubricos, & incertos regat, quando fides seruanda sit, ostendat; quo pacto suum unicuique tribuere oporteat, & alieni minus appetentes fortunis suis contentos degere: quæ quidem omnia sunt unius iustitiæ. Virtus autem altera non tantum ab his requirit, ut ne & aliena petant ipsi, & alios facere idem cogant; sed ad cumulatorem laudem beneficii cæteris multa de suo impertiri, pauca sibi relinquere, & ad omnia erga eos officia paratior esse iubet. In quo ipsis sanè magis elaborandum est, quàm priuatis, & aliorum iussa ferentibus: quia & exemplo his laudis cupiditas incitatur; &, ut paulò antè dixi, gratificandi facultatem maiorem rem. p. administrantibus affert imperium; à quibus potius, quàm à priuatis beneficia in omnes, & in necessitudine coniunctos tanquam debita repossuntur. Verum in his ciuitatibus, & locis, in quibus æquo iure omnium, aut optimatum degitur, quibus res. p. committetur, tametsi possunt à plerisque inire gratiam officiis, ij tamen erunt in promerendi ratione cautiore, quàm, ad quorum nutum omnia geruntur: ne paulò liberior in dando beneficio licentia suspensionem afferat aut petendi regij dominatus; aut ea potestate abutendi ad quæsum, quam res. p. ad dignitatem permiserit. Alterum & impium est, quoniam uidelicet uis affertur patriæ; & sæpe periculosum, honestam mortem turpi seruituti fortibus, ac liberis hominibus anteferentibus: quod

& in Grachis perspectum est summis, atq; egregijs uiris; quorum
 nefarios conatus libera ciuitas libertatem impugnantium cæde
 repressit; & in Caio Cæsare; quem non summum rerum om-
 nium imperium, non arma, non florentes copiae, non familia-
 rum necessitudines, non stipationes amicorum, non merita, eaq;
 ingentia in multos ab interitu acerbo, ac miserabili uindicare po-
 tuerunt; altero nec turpius quicquam, nec indignius, nec multo-
 rum utilitati repugnantius: ut is rectè omnino, qui capeissentibus
 rem. p. nihil minus, quàm philosophis, aut etiam magis despicien-
 tiam rerum humanarum adhibendam esse præceperit. Priuatæ
 quidem sordes ferri magis possunt; quia minus alteri noceant;
 & si cognitæ sint, eum, qui fugiat, minus inficiunt: at, cum
 ædium priuatarum limen egressæ in publicum prodierint, dici
 uix potest, quàm multos aut malo exemplo contaminent, aut dam-
 no afficiant, rem. p. quæ stui habentes; difficilè enim admodum est
 & uitare malum, quod fert magistratus; quia id tolerabile ui-
 deatur efficere auctoritas; & non eius approbare sententiam; si
 aut spes alicuius inuitet boni, aut deterreat damni metus. Quam-
 obrem, ut & uitæ periculum ne sit adeundum, & fraudis, atq;
 auaritiæ uitetur infamia, ijs adhibenda est magna diligentia in
 collatione beneficiorum. Hanc autem totam ex utilitate rei. p.
 ducere oportebit, aut ex dignitate: nihil enim excepto ueræ, ac sa-
 cro sanctæ religionis patrocínio patria cuiquam charius esse de-
 bet; pro qua, si postulet necessitas, non est recusanda mors.
 Quantò autem magis in eius & dignitatis, & salutis studium
 his incumbendum est, quorum se fidei, ac tutele commisit? quos
 propugnatores, non hostes; parentes, non dominos; custodes, non

tyrannos constituit? Ad hanc, ueluti sagittarijs ad scopum, cunctis
ducibus actiones omnes, & labores ita referendi; ut non modo
ciues egregios agnoscere; sed de ueris etiam uirtutis cultoribus
gloriarī possit: quibus aut nullum pro re bene gesta aliud expetitur
præmium, atq; fructus ipse pietatis; aut pœna non reformis
datur ob peccatum. Quanquam æquum esse uidetur, ut metus alis
cuius ex scelere in rem. p. mali solet multos homines detertere, sic
ex re bene gerenda aliquid præmij à suis ciuibz sperare his lice-
re: ut enim, præter ignominiam, delictis ad terrorem pœna statuitur,
sic rectæ factis, præter laudem, quæ uirtutis propria est,
ad incitanda studia debetur, quod sit aut utile, aut honorificum laboranti.
Vtrumq; autem in ciuitatibus fieri solet, quarum libertas
legibus optimis, & institutis nixa est, & firmata. Qualem
uidemus Venetiarum Urbem florentissimam totius Italiæ,
eiusq; hac tempestate unicum, ac firmum contra impetus, atq; incursiones
effertatarum gentium propugnaculum; quæ non loci
natura magis, quàm consilio, & prudentia usq; in mille annos,
aut etiam amplius libertatem propagauit. Etenim totius ciuitatis
disciplina adeò prudens, adeò moderata, & casta est, ut, qui
dignitate superior, uitæ continentia par infimis esse uideatur;
nec aut ullo pacto regni affectandi suspitioni possit illic esse locus,
aut difficulter in administratione imperij auaritiæ, ubi &
tantopere consensu omnium extollitur & frugalitatis, atq; continentie
ratio, & amor libertatis; & aut præclaris factis certa
merces, ac ampla tribuitur; aut delinquentem plerumq; pœna sequitur;
macula uerò semper inhærens infamie nullo unquam
tempore potest aboleri: ut non tam eleganter, quàm uerè Ioan-

nes Casa uir nostri temporis clarus horatianis laudibus, quum
hanc rem. p. extollit, sic canat

Illo se nusquam propendens contulit æquum

Bonæ comes concordia,

Fraudibus Hesperia ut pulsum est, timuitq; rapacis

Vncas licentiæ manus.

Ac, si talium uirorum exempla ulla, aut uerius adumbrata uesti-
gia alicubi sint quærenda, locus hic horum copiam certè aliquam
suppeditare poterit. Quos tamen sola cupido laudum ad rem. p.
iuuandam non debet inflammare; sed amor, sed studium, ut, cui
plurimum debeant, ei gratificari uelint, quantum queant. His
igitur cogitatio omnis, industria, curaq; primum in eo defigenda,
& locanda est, ut & in ciuitate retineantur ea, quæ ad cultum
dei instituta tradidere maiores; &, quæ optima sint, humana
iura sanciantur; nouæ condantur leges: ueteres, si necesse sit, pro
natura temporum aut corrigantur; aut antiquentur, & abro-
gentur. Vt enim ordine quodam, & moderatione naturæ cer-
nimus hanc rerum uniuersitatem adstringi, atq; ita regi, ut, si
fiat ulla aut commutatio, aut peruersio, omnia corruiere necesse
sit, atq; interire, sic ad imitationem naturæ, & dei, qui hæc ordi-
nauit, composuit, & sanxit, hominibus lege ciuitates omnes, &
regna continentur, hoc est ratione ipsa; quæ nihil aliud est, atq;
animi recta, & constans moderatio: quæ nisi adhibeatur, nec so-
cietatis humanæ inutium ullum potest existere, nec inchoata, in-
stitutaq; conseruari: ut nihil omnino appareat esse ad salutem
hominum æquè necessarium, atq; legem, eamq; & bonam, & sa-
lutarem; cuius qui auctores sunt, ijs non parua de accepto benefi-

cio habenda est gratia. Id uerò multò erit & cumulatius, & maius, si quas leges tulerint, & sciuerint, eis utiq; legibus ipsi se prius addicentes, & mancipientes reliquos pro auctoritate iusserint, & coegerint uel inuitos aut præmiorum spe, aut terrore poenarum obtemperare: beneficij enim maximi gratiam extinguit, qui alterum negligit; ac, si nulla, aut paulò remissius ineat ratio eius seruandi, quod latum est, & sancitum, perinde erit, ac si posita nulla lex esset: eadem sequetur rerum confusio, idem dissoluetur nodus. Non, quia, inquit Aristoteles, sapienter latae sint leges, propterea recta est legum constitutio; nisi etiam ipsæ pareatur. Quare legum una est & recta, & prudens sanctio; si, quæ sunt institutæ, seruentur. Est igitur omnium maximum, & in primis ad rem. p. accedentibus prouidendum, ut iura omnia decretaq; ciuitatis inuiolata sint, quæ ei utilia & salutaria esse cognouerint; retineatur inter omnes æquitas; impune cuiquam ne liceat legum præcepta contemnere, & transgredi; aut eliminare, proculq; ablegent parere recusantes. Istuc autem consequi erit ipsis facillimum, si secum recognouerint, quam personam sustineant; nec legum dominos à re. p., sed aut quasi parentes quosdam, aut defensores esse constitutos: præterea si antè frenum suis cupiditatibus iniecerint: est enim parui negotij alios continere, qui se ipsum continere norit. Sequitur autem iuris ciuilis descripti cognitio, atq; interpretatio; cuius scientiæ his temporibus splendor est maximus: in hoc munere præclare faciunt, qui plus aliorum utilitati consulunt, quàm suæ. Id autem ea præsertim ratione assequuntur; si eiusdem iuris difficultatem, & obscuritatem, quam fert rerum uarietas, & commutatio, stu-

deant tollere: etenim haud contemnendo beneficio obstringunt hi & rem. p. & priuatos; quorum sedatio controuersiarum, quæ existunt quotidie, haud mediocrem toti ciuitati & tranquillitatem affert, & utilitatem auget. Verum cum omnibus cauendum est, tum uerò ijs præsertim, ad quos de controuersijs diiudicare pertinet, ne, dum aut, quæ dubia sunt, & testâ declarare, ac partefacere, aut inuoluta, & implicata dissoluere, atq; explicare contendunt, in isto interpretandi studio nimis uelint esse diligentes, & curiosi: abutuntur enim potius, qui sic agunt, quàm utuntur munere faciuntq; propè nã intelligendo, ut nihil intelligant. Leuior quidem iactura, quæ sit ex huiusmodi potius contentione, quàm inquisitione ueritatis, in his artibus, quarum ignoratio, cuius desidia causa non sit, nec turpis est cuius signaro, nec cæteris semper damnoſa; in legum autem, & iuris, quo ciuium continetur incolumitas, studio grauissima. Ac uereor interdum, ne non magis cognitionis amor, aut ueri inueniendi cura, quàm, quæ minus honestæ causæ uideantur, hominum adeò excitet ingenia; ut habeant sæpe aut falsa pro ueris, aut pro certis incerta: tantam interpretum inter se de re uel minima dimicationem nimirum ubiq; locorum quamplurimi sentiunt & grauem, & sibi per moleſtam; & cum periculo fortunarum suarum experiuntur: ut illam hominum potius uitio, quam studio scientiæ fieri appareat. Alios enim necessitudinis, & propinquitatis ratio, alios amicitia; plerosq; auaritia, & rei augendæ cupiditas digladiari adeò, & ut aiunt, nodum in scirpo quærere compellit; ut, dum lis in longum protrahitur emergentibus in dies caullationibus, dum æterno propè bello confligitur, dum modus nullus statuitur aua-

ritiæ, uerius diffidiorum, ac diffensionum, quàm auctores concordie; cupidiores belli, quàm pacis; hirudines priuati cuiusq; ætarij, quàm clientum patroni esse uideantur: nec ferè quisquam inueniatur, quem inde proueniens non affligat calamitas: nonnulli sibi aditum hinc ad amplissimos honores aperuerunt: quos sequuti quàmplurimi, eandemq; insistentes uiam & multis mala afferunt ingentia, & alios ipsi exemplo pessimo post se trahunt. Hæc autem callida nimis, & malitiosa iuris interpretatio ut è ciuitate omnino, si fieri possit, tollatur, principibus omnia sunt adhibenda remedia; labor omnis impendendus: danda opera, ut, quemadmodum sepia effuso atramento aquam enitescens obæsturbat, & fusco colore inficit, ne piscator elabi conantem possit deprehendere, sic interpretibus ne liceat legibus, quæ ad salutem, non ad perniciem hominum sunt inuentæ, & dilucidius, quàm fieri potuerit, conscriptæ, tenebras offundere, sensa peruerrere, extorquere, ad libidinem suam potius conuerrere, quàm ad ueritatem explicare. Præcipuè autem ij, quibus iudicia permittuntur, deligendi ex omni iurisperitorum numero, quorum præcellenti doctrinæ par sit uitæ integritas, ac morum. Ac, quoniam facilius omnes ad uitium delabimur in potestate præsertim, & peccandi licentia, ijs sunt legibus astringendi, ac deuinciendi; ut tanquam freno coercita libidine nihil, nisi, quod iustum, æquumq; sit, uelle ipsi possint; id quod, & aliquando fieri solere uideo, & sapienter institutum probo. Sed nihil est ad cultum iustitiæ firmitus, quàm, si ipsi non sint, alios iudices constituere, quorum sit probata, speciosaq; uirtus, & ueræ pietatis amor. Quæ quum desunt, haud facile contineas illos, quibus impune, ut peccare medicis in uitam

hominis, alienas aliqua adumbrata ueritatis imagine liceat surriperere fortunas. Est autem illud, quod Plato præcipit, maxime his seruandum; ne rei. p. partem curent; totam negligant; sed ita gubernacula teneant; ut non magis ad dexteram, quàm ad leuam flectant. Secus si fiat, necesse est, ut nauiganti inter Scyllam, & Carybdim deorsum nauem ferri præcipitem, sic ciuitatum moderatoribus parti ciuium fauentibus, reliquos autem negligentibus, aut etiam, ut aliquando accidit, impugnantibus, discordias in re. p. seditionesq; perniciosissimas excitari. Etenim ciuibus in libertate degentibus si, qui regunt, uolunt nimis esse populares, odia incurrunt optimatum grauiissima; si iura optimatum sic tuentur, ut populi deserant, plebem sibi aduersantem habent; ex quo oriuntur in ciuitate discordiæ graues; interdum etiam ciuilia bella concitantur. Exemplum est recens, ac lugubre anno superiore Sena in Ethruria uetustissima, nobilissimaq; urbs; cui ob ciuiles discordias, quibus diu agitata est, hoc longo, ac pestifero bello magnæ acceptæ clades libertatem omnem ademerunt. Quæ quidem omnia fugient hi, qui se beneficos præstare uolent; æquè enim simul uniuersam rem. p. tuebuntur; nec sic alteri parti adhærebunt, ut alteram negligent, aut etiam lædant. Nec potentiam, opes uel consecrabuntur: alterum enim est iniusti hominis, & æquitatis hostis; alterum libertati reliquorum insidiantis. Est autem iustitia propugnaculum societatis humanæ; quàm ut defendant, cum omnes, tum hi præcipuè, qui sunt rerum domini, ultro debent ipsi inimicitias suscipere, laceffere improbos, mortem deniq; citius oppetere, quàm ab honesto discedere. Illud autem potissimum caueant, ne in animaduersione, atq; ali-

cuius castigatione delicti in alios duriores sint, mitiores uerò in alios; aut hos plestant, illos impunè dimittant; delinquentibus enim parcere maleficium potius est, quàm beneficium: hoc qui faciunt, aut æqualitatem uidentur negligere, cuius in libera præsertim ciuitate habenda est ratio; aut, in quo pleriq; labuntur, turpè lucrum sequi. Nec in castigando ira ulla moueat, qui legum similes esse debent: parit enim ira contumeliam, quæ in magistratu admodum est turpis. Atq; hæc, aut si qua huius generis sunt, quæ ciuibus uniuerfis prosint, ab his, ad quos pertinet in primis, omnino procuranda sunt. Et, quoniam beneficentiæ natura exigit, ut non, sicut in pictura, & alys artibus, eos pictores esse dicimus, quorum aliqua extent artis suæ opera, licet alia nolint ipsi conficere, sic i; benefici sint, qui beneficia aliqua apud quempiam ponunt, cum tamen plura dare queant; sed occasionem nullam, aut facultatem iuuandi, quotiescumq; illa sese offert, prætermittendam censet; nec unquam otiosos esse patitur, aut rectè factis modum præscribit, ubi legibus rem. p. fundauerint; has seruari, & coli coegerint; litium coercuerint calumniam, h'c tanquam confecto spacio, aut expleto munere uidendum utiq; est, ne sistant; ne uentent, cum detur facultas alia tribuendi, à se satis esse hisce laboribus aut patriæ, aut suo honori factum; cogitent, expendant quid pietas, quid uirtus postulet; nec unquam à promerendi labore conquescant. Honores dantur à re. p., deferuntur imperia, magistratus creantur; si perpetui; studio maiori, & cura in delectu est opus; diuturna enim potestas, & auctoritas in ciues aut regnum constituit; aut, si retinetur libertas, difficile admodum est hominem, qui non sit consumatæ uirtutis, non & ea ad arbi-

trium aliquando uti, quam quasi testamento sibi legatam obtinet, & calamitatem uniuersis importare: si annui, aut his alia quædam temporum spacia præscripta sunt, minus fortasse ab his metuendum est, quos aut ad præclara facta incendit aliorum æmulatio, qui omnium, aut bonorum testimonio commendati sequentibus non parua adhibent ad laudem calcaria; aut metus dedecoris, alicuius uel mali retrahit à delicto; aut breuitas temporis non finit ea moliri, ad quæ fortassis saniora consilia reiiciens trahit præcipites male suada cupido. Exempla nulla proferam; tantum dicam honorum perpetuitatem, & diuturnitatem temporis in imperio tantam cladem his temporibus uniuerso terrarum orbi attulisse, quantam omnes uidimus, & consternati res propè desperditas lugemus, & insequens nimirum lugebit ætas. Vtrumque (ut interim, qui priuati adhuc sunt, id his præceptum detur) ciuium utilitatis ratio moderabitur; neque cum eorum periculo antè quæretur honos; neque recusabitur, qui sit his omnino profuturus. Quare, si quorum in fidem se ipsos illi perpetuò tradiderint, aut si tempus honori definitum fuerit, illud ijs maximè cogitandum est, quo pacto possint onus suslinere, quod eorum humeris res. p. imposuit; quodque minus antè reformulantes ipsi susceperunt. Non esse facile, inquires, ut se ipsum quis morit; multo minus, ut ignauum ducat; uix uero, aut nunquam, ut contemnat, & negligat; concedo; nec id tantum; sed etiam illud addo, magis uideri è natura esse, ut sibi quiuis blandiens plus, quàm par sit, tribuat; ut se strenuum putet; ut plurimi faciat; allicit præterea, aut etiam ferè unumquemque pertrahit dignitas imperij, quàm solam uirtutis præmium plerique falsò existimant; putantque omnium esse

amplissimum cunctis antecellere. Sed tamen fieri potest, si dux aduocetur, atq; adhibeatur in consilium ratio, si non bonorum falsa imagine deludi se patiantur, si ne, ut reliquum vulgus, ducat consuetudo deprauata, ut quasi subducta suimet ratione, quantum possint, quales sint, quàm prudentes, quàm fortes, quàm iusti, quàm his instructi artibus, quæ principe laudem ex beneficentia quærente dignæ uideantur, secum omnino recognoscant: quarum cum expertes sint, si se impares retinendis gubernaculis intellexerint, haudquaquam eis aut uerenda est fama ulla ignauia, aut, ne sui contemptores dicantur, metuendum, qui laudem maximam ex eo, quod est potissimum rationis opus, consequuturi sint. Igitur, si uiribus suis maiorem se prouinciam suscepisse uiderint, ultro eam deponant: & patiantur, aut, si benefici esse uolunt, ipsi studeant ad eos regimen transferri, qui tum scientia rerum gerendarum, tum ratione, & consilio, tum etiam, quibus omnino ad perferendos labores est opus, uiribus, bonâq; uoletudine corporis, & interdum opibus delatum sibi munus quantumuis amplum, & arduum tueri possunt: ne sint, cui prodesse uelint, ciuitati detrimento; ne uerò, qui benefici esse debent, aliqua ipsorum culpa minus utiles, & infructuosi duces inueniantur. Exempla his non deerunt ad eam rem, ex qua & charitas in omnes, & animi magnitudo declaratur: est enim multò difficilius, & præclarius honorem susceptum deponere, quàm oblatum recusare. Quintus Minutius contra Annibalem Romani exercitus dux cum reuersus esset ad Q. Fabij Maximi dictatoris graue, moderatumq; imperium ex confessione erroris, apud omnes laudem haud mediocrem promeruit. Celestino. V. Pontifici Maximo facile per-

suaderi potuit, ut se pontificatu abdicaret; quod posterioris uitæ dissimilis ratio prioris (in solitudine enim semper ille uixerat) uix poterat omnium expectationi respondere in tot, tantarumq; rerum administratione, cuius rationem illam, quam instituerat, minus probari sentiebat. Quare dedit ille beneficium, quod ex alterius delectu à se tribui plerisq; arbitrabatur; qui semper potiora quidem probant, sequi uero deteriora solent. Quinetiam si honori par sit alicuius & ingenium, & industria; floreat item opibus, quibus egere interdum uidetur auctoritas imperij, aut muneris, aliquando autem acciderit, ut hoc quasi regno apud multos ita flagret inuidia, ut malum aliquod magnum præsertim ciuitati futurum prospexerit, huic tum cedendum est inuidiæ, atq; ad priuatam fortunam remigrandum; ne, si paulò pertinacior sit in retentione muneris, in susceptione beneficium magis priuatum, quàm ciuitatis sequutus esse uideatur. Si propter me, inquit

Gregorius Nazanzenus, orta est tempestas, tollite me, & pro ijs

cite in mare, ut uos iactari desinatis: iam enim tanti uiri uirtuti à quibusdam Constantinopoli seditionem molientibus coeptum erat inuideri. Improbandi autem sunt illi, quos aut alicuius offensionis timor, aut laborum graues, (tolerabiles tamen) sarcinæ aliquando à muneribus rei. p., quæ iam obire coeperint, reuocant: alterum enim est cuiusdam hominis aut meticulosi, aut præ se ferentis inertiam, nihilq; quod sit insigne, ac præclarum cogitantis; alterum molliis, ac delicati, & amantis otij, atq; uoluptatum, aut suarum rerum cupidi magis, quàm patriam, aut commune bonum respicientis: ut deferere, quos semel in tutelam receperis, ob eas, quas dixi, causas, cum turpissimum sit, tum etiam iniquissimum:

sumum: quæ qui non metuit, indignus est maximè, quem hominem appellemus. Populi quidem romani cito corruissent opes, nisi Fabius idem fuisset ea magnitudine, gravitateq; animi, atq; patientia, quæ & inuidiam, & labores omnes superare potuit. Quæ quidem uirtutes sunt his, quos nunc ad beneficentiam in re. p. moderanda instituiamus, in primis necessaria; non enim leuiter irascitur, qui grauis, & patiens esse didicerit; sed cum facilitate, atq; clementia gravitatem sic coniungit, ut nec iracundum, aut insolentem oderint, qui alloquantur; nec, si moderator sit; contemnant seuerum; sine quo munus suum egregiè tueri non potest. Quare, ut ad illud reuertamur, in quo ducem habemus Fabium, non debent hi cæteris gubernacula relinquere metu suorum incommodorum, aut molestiarum mole; si plus ipsi sua industria se ciuitati profuturos senserint, quàm studia reliquorum, qui sint illa suscepturi. Quòd uerò negotijs publicis se se, ut nonnulli olim faciliatarunt, abdicanti omnino sit ad æternam felicitatem cursus tutior, si quis cogitet, tantum abest, rectè ut is sentiat, ut uel erret maximè; cum, quos aliqua ratione à se iuuari posse intellexerit, eos deferere uelle uideatur: nihil enim deo æquè gratum est, atq; multis, aut etiam, si fieri potest, omnibus præstare se beneficium, & salutarem. Id faciliè duces aliorum assequi possunt, quibus multis modis iuuandi cæteros facultas adest amplissima: hac, dum licet, piè, sanctèq; utantur; si ad exercendum impedimenta obstant, quæ nequeant ipsi reijcere, ad alteram rationem tum confugiant; ita fiet, ut, quod probant, otium illud cum honestum, tum ad id consequendum, quod quiuis debet & optare, & sequi, aptissimum, atq; utilissimum esse queat. In horum autem ratione

honorum, qui ad tempus à re. p. deferuntur, ita se gerent, ut, cum ei officia omnia præstiterint, cum, quæ debentur, persoluerint, cum ijs perfuncti fuerint, reliquis ad eos aditum patefactum uelint; æquo animo patiantur ijs parere, quos antè sibi obtemperantes habuerunt. Nec ulla, quæ priuata sit, quantumuis insignis iniuria, aut odium debet homines ita commouere, ut recusent, etiam si facere secus possint, æquo iure uiuere cum cæteris; & malint priuatas inimicitias persequi, quàm suam rei. p. dignitatem conseruare: hoc enim est nolle sibi eam imperare, à qua ipse ea conditione accepit imperium, ut redderet, & obstinati animi in patriam potius argumentum, quàm lenis, & æquitatem adamantis. Qua in re quis non grauissimè accuset C. Cæsarem? qui, si repetentibus, quæ dederant, ciuibus obtemperasset, nec aut libido imperandi, aut quorundam in se odia acerbissima plus ualuisissent, quàm salus patriæ, & liberi populi iura postulabant, non essent in re. p. romana ea conflata incendia, quibus & tantum imperium deflagrauit, & ex omnium, quæ unquam fuerint, florentissima ciuitate libertas omnis est sublata. Planè ciuitati omnes condonandæ sunt iniuriæ, ubi de eius agitur commodis. Itaque non tantum summa uoluntate cedent, sed & eis, quibuscum aut similtates gerunt, aut palàm ita oderunt; ut etiam sint inimici, ipsi adnitentur, ut dentur imperia; si horum uirtuti sua debere præmia cognouerint, & optimis consilijs publicæ utilitati profuturos: summum enim, ut dici solet, beneficium clauo trabali figit, qui homini benefico summam comparat benemerendi facultatem. Quantò autem magis sunt ad omnes honorum gradus prouehendi, quibus præter uirtutem, iure etiam aut amicitia, aut

propinquitatis sunt haud mediocriter obligati. In quo tamen illud est cauendum, ne plus interdum ualeat eorum, quæ diximus, ratio, quàm res. p.; ne uel, dum uideri suis benefici uolunt, reprobationem incurrant alicuius malefici: à quibus iure pœnæ omnes malorum, quæ aliorum aliquando patrarit improbitas, tanquam auctoribus ipsis reposcuntur: in hoc enim si paulo plus de orbita declinarint, dici uix potest, quam foedi, miserabilesq; casus rem. p. præcipitent, atq; prosteruant. In alterum quinquennium Cæsari prorogatum imperium non annuente modo, sed etiam aduente Pompeio eius adeò auxit uires, ut tela demum in eum populum conuerterit, qui contra hostes romani nominis imperatorem armauerat: regem uidelicet in urbe potuit efficere utriusq; amicitia per affinitatem illam constituta; quam, qui tum multa prospiciebant, hi timere se dixerunt. Honestæ autem tunc est ratio, quum propinqui, & amici extolluntur, quorum uirtus, & industria rei. p. sit aliquod emolumentum allatura. Quinetiam, si possint retinere, curandum est, ne sibi prorogetur potestas, si alios in ciuitate uiderint, in quorum patrocínio summum ei præsidium fore iudicarint; ne diuturnioris ad honorem temporis cupiditas suspicionem afferat animi, quàm ciues liberos deceat, maiora concupiscentis: nisi forte prorogationem istam imperij tanquam parentibus, ac præclaris eorum gestis uelit esse præmium ipsa res. p.; aut exigat temporum necessitas, ac natura tanquam aliquod salubre, opportunumq; remedium. Quòd, si etiam aliquando acciderit, ut ea ita affecta sit, ut reiiciat, quæ salutaria sunt, in id unum incumbunt, ut (quod, si fiat, nefas est) ne deserant; utq; uel si ipsa nolit, aut periclitantem iuuent, aut erigant iacentem

tem, ac prostratam; nec laudem ex pietate relaturi, reprehensionem ullam ex ambitione uerebuntur: nulla quidem uis afferenda est patriæ; eniti tamen hi debent aut honestè ambiendo, aut deprecando, ut à se illa retineatur auctoritas, qua sint ei omnino profuturi: causa autem siqua alia subsit, minus utiq; illa honesta est, & ijs indigna maximè: qui ad magnam facultatem promerendi studium quoq; animi attulerunt. Neq; discrimine ullo uitæ, famæ uè, in quod uocentur, ita moueri debent, ut eam afflicta aut deserant, aut negligent, siue de periculis hæc taceat: siue duces admoneat, qui aliquando honori suo tantum consultum uolunt. Quanquam rei. p. dignitatem, commodaq; suis utilitatibus, aut existimationi anteferre omnium est amplissimum ad gloriam; nec potest periculum ullum honoris facere, cui publica laus, dignitasq; propria existimatione fuerit charior. Planèq; Cicero: nem in hoc refellere possumus: qui Callicratidis, & Cleombroti ducum Lacædemoniorum exemplo iubet nos promptiores esse ad nostra pericula, quàm ad communia: etenim & oratione, & factis salutis suæ communem toties se prætulisse gloriatur; & eo ipso in loco, ubi hæc loquitur, tum anteponit Q. Fabium græcis imperatoribus; quem nec illa, qua tum apud omnes flagrabat, inuidia, nec adæquati imperij cum collega offensio à recto consilio de salute publica dimouerit; tum, qui, quod optimum sit, non ausent dicere inuidiæ metu, ad extremum reprehendit. Neq; uero in his tantum, quæ diximus, magnorum auctores beneficiorum aut uniuerfis, aut seorsum quibusdam esse poterunt, sed in reliquorum etiam dispensatione bonorum, quæ, qui sunt animo paulò excelsiore, non æquè æstimant, atq; hi, qui cogitationes omnes,

curasq; suas penitus humi defixerunt: ea autem sunt diuitiae, patrimonialia, bona. Si igitur ad publicum munus secum priuatas opes tulerint, hoc est, si fuerint opulenti, ac diuites, ijsq; bonis ita efflorescant, ut horum auxilio non sibi tantum, sed alijs etiam praesidio esse possint, his elaborandum est, si unquam alijs, at tum maxime horum explende scat usus: quod exemplo publico excitantur studia priuatorum; ut ea ipsi approbent, quae principes sequi cognouerunt. Itaq; his primum illud praecipuum sit, ut, si rem. p. suis se opibus sustentare non posse intellexerint; quae sit aut ciuilibus discordijs, seditionibusq; exagitata, aut hostili concussa, & uexata bello, suas ipsi potissimum conferant eius ad salutem, cuius patrocinium antè susceperunt: nec, quod pleriq; faciunt, ignari omnino officij pulcherrimi, putent, si consilio & opera tantum iuauerint (quae tamen per sepe maximi sunt ponderis) se id, quod ei debuerant, cumulatè persoluisse: hoc nunquam assequantur, nisi, quae ferè omnes habent chariora, illi tribuant, à qua uel sanguinis ipsius, uitæq; profusio exigitur: ut intelligamus multò minus cætera aestimari oportere; ne dicam ab his aut quicquam mutuandum, aut beneficium esse foenerandum. Quod si ut Cato præclare solitus est dicere, nihil aliud est, atq; hominem occidere, quid huic facias, à quo quaestu turpissimo redimi salus cogitur à patria: nisi forte res. p. ita sit instituta, ut eius inter sit, hoc fenore ciues locupletari: id tum honestum aut minus turpe facit communis utilitatis ratio. Quod Venetijs fit maxime, ubi hoc genere quaestus & res cuiusq; priuata exiguo tamen fenore augetur, cuius studium, & amor uix tolli potest, & publica, quum postulat necessitas, defenditur, aut etiam occasione sese

ostentante sit ornatioꝛ, & amplioꝛ. Neq; publicum æs ullum apud alios, atq; ciues ipsos, esse potest: neq; aliunde, quum hoc sit, neceſſe est maiore cum periculo, & iactura pecuniam quaerere, quæ in priuato cuiusq; ærario perinde, atq; in publico conseruata ciuitati tum propè redditur à suis, unde prius illa est coacta: secus uero qui beneficus esse potest, quem non pietas, sed auaritia ad beneficij collationem trudit. Multò tamen est cum laudabilius, tum uerò eo ciue dignius, qui, quo esse debet, animo erga rem. p. sit affectus, beneficium collocare non ad quæstum, sed ad salutem; non ad priuatam utilitatem, sed ad communem; non proprium æs dare, ut accipias alienum, sed istac imminuere, ut publicum tuearis, aut, si fieri possit, etiam augeas; præsertim ubi maiorem iure delati imperij ciuitas gratiam ab his exegerit, quos maximè in uniuersos oportet esse liberales; ne, si lucrum pariat beneficium, eam quæstui habere uideantur. Q. Fabius (ut eodem sæpe utamur exemplo) cum in bello esset aduersus Pænos, filium Romam misit, qui priuatum agrum utilitatis publicæ causa uenderet; simul ut se apud suos ciues ab eius amicitia, quam hostis cum duce simulabat, suspitione liberaret: hac pecunia, è romanis qui captiui essent, redemit; quo in bello horum opera uti posset; suisq; opibus, quod potuit, auxilium populo romano tulit. Atq; & in re. p. & in priuatis magis adiuuandis ea adhibenda est moderatio, ut nequis suspicari possit, aliud hos uelle, aliud cupere, atq; solum ex beneficentia, & pietate fructum: quod proculdubio assequantur, si tantum aut ad necessitatem opes contulerint, aut ad ornatum. Rei autem utriusq; tempora prudentibus, peritisq; gubernatoribus re nosse, ac dijudicare facilius est, quàm

uerbis præcipientibus nobis explicare. Quod si, quum urget necessitas, sibi ciuitas quasi mancipatas, & consecratas habet priuatas cuiusq; fortunas, quibus tum parcere turpe est; quanto his turpius erit, quibus prouentuum cura, & procuratio committetur, pecuniam publicam, & bona ciuitatis in proprios usus conuertere, & transferre: coniungent enim, qui se hoc obstringent scelere, cum impietate auaritiæ: nec eo quicquam est iniuslius, qui & potestate abutatur ad furtum; & libidine ad commune damnum: palam autem dilapidare, & consumere extrema impietatis est, atq; impudentiæ; ita dispensare, ut fructus perexiguus redundet hinc ad rem. p., imprudentis, ac ignari magistratus. Quare omnem auaritiæ, ac fraudem tollere hos oportebit, meminisseq; se non esse rerum priuatarum dominos, sed patros nos publicarum; non possessores ærarij, sed custodes; bona hæc non sibi à prætore addicta, atq; mancipata, sed à re. p. eorum fidei tradita, & commendata. Ex quibus dabunt omnino operam, ut, quammaxima trahi possunt, comparent & subsidia belli, & pacis ornamenta: nec sinent aut externis opibus indigere, quæ se suis interdum, si moderatores uelint, tueri potest, aut nullis ad famam, propagationemq; nominis decorari monumentis. In primis uerò, si nec periculum imminet, nec retro auertet accepta calamitas, curandum est, ut, quæ ad immortalis dei religionem pertinent, sint ampla, sint magna, sint sumptuosa. Sacra splendide peragantur: celebrentur insigni, ac magnifico apparatu solennes, ac festi dies: templa, atq; ædes non ad usum tantum, ac breue tempus, sed ad magnificentiam, & multorum sæculorum memoriam construantur: nec quicquam prætermittatur uel in ces-

rimonijs instituendis, uel in dedicandis basilicis, quo & pietatis
studium in cunctis incitari possit, & rerum diuinarum amor ad-
augeri: omnium enim illud maximum est beneficium, à quo tan-
quam fonte reliqua dimanare cernuntur. Nec ullo uinculo fir-
mius res uinciuntur humanæ, nec nodo astringuntur, nec aura le-
niore prouehuntur, quàm uero unius dei cultu, saluatorisq;
Christi: ut, etiam si religio hæc nullam spem afferat, quæ multò
sunt his, quibus in terris fruimur, potiora, consequendi, nec bea-
tissimam, & immortalem uitam polliceatur, huius quidem certè,
quam hic degimus, uitæ optima, pulcherrimaq; ratione, quam
Plato nimirum, cum de legibus scriberet, est auguratus, nihil à
moderatore deo potuerit homini dari uel fructu melius, uel di-
gnitate maius. Quamobrem gubernatores omnes, & in re. p.
principes, qui statuerint & sibi, & cæteris integrè, sancteq;
hanc esse seruandam, & colendam, ita hoc officio, & studio ob-
stringent uniuerfos, ut unico beneficio omnia, quæ tribui possunt,
potiora illis contulisse uideantur. Sunt autem exædificationes æ-
dium, & sacrorum rituum institutiones magna illa quidem be-
neficia, & grata; sed nescio, an sint alia maiora, & gratiora,
& ad religionem non minus pertinentia: qualia uidentur esse,
alimenta, quibus hæc desunt, procurare, oppressos ære alieno li-
berare, præsertim si quos cæcer detineat inclusos; egentibus mu-
lierculis, nec, unde dos ipsis detur, habentibus largiri, quo possint
nubere, pudicitiamq; inuiolatam seruare, exercere hospitalitatem
non eas quidem ob causas, quæ plerosq; mouent, ut sint hospita-
les; cum aut se non esse opulentos existiment, nisi cæteri istam
eorum admirentur opulentiam, aut amicorum studeant propu-
gnaculis

gnaculis muniri, aut ad quæstum aliquem hospitum utantur auxilio: sed quia Christus ita faciendum præceperit: qui, præter cætera, quo pacto nos deceat hospitales esse, demonstrauit; quum eos tantum ad prandium inuitari iussit, à quibus similis huiusce compensatio muneris nulla expectari posset, gratiam nimirum humanam aspernatus, qui diuinam omnino præferebat. Profecto cum est laudabilior, tum uerò deo ipsi multò gravior illa hospitalitatis ratio, quæ propius ad misericordiam delabitur, nec patitur esse crudelitati, & inhumanitati locum: quum, quæ ad uisum sunt necessaria, præbentur egenis; ægrotantes humaniter excipiuntur, & ad medicinam cura insuper adhibetur. Hanc planè & sequi oportebit, & seruare; ærisq; publici partem illam, quæ ipsis uidebitur, in ea, quæ græcè *ἐπίδοσιον* dicuntur, decernere: quæ quidem, si non sint in urbibus, & municipijs, quantum facultas patitur, constituenda sunt: nec committendum, ut & exuatur humanitas, & pietas deferatur: quæ in rectè instituta ciuitate prima, & præcipua esse oportet. Diuus Gregorius, is, qui primus hoc nomine pontificatum gessit, uir cum uitæ sanctitate, tum singulari doctrina præcellens, horum in primis collatione beneficiorum posteris, quod sequerentur, reliquit exemplum clarissimum: nam & paternam domum ita consecrauit, ut esset perfugium egenorum, quos mancipatis religioni bonis in urbe alebat: & ubi pontifex creatus est, tanto studio, tantaq; pietate delatum obiuit munus, ut præstantissimis actionibus sibi à Christo commendatum gregem declararit; quem uigilantissimum pastorem, & eum, quem quærimus, beneficum, atq; uniuerso populo Christiano salutare in ætas illa se agnouisse lætata est. Ergo nu-

merum ille diuorum auxit ; tulitq; fructum , qui ex beneficentia optimo cuiq; debetur. E' pontificibus autem nostri temporis nonnulli in maximi sacerdotij administratione ab ea ratione , quam sequutus est Gregorius, ita se alienauerunt , ut priuata utilitas fuerit his multò charior, quàm publica: tantumq; abest , fortunis suis egentes ut iuuerint, ut etiam, dum opes quammaximas propinquis fludent relinquere, non contenti redditibus amplissimis bona publica dilapidarint ; quæ maiore's optimis artibus, maximisq; laboribus, ut essent firma, compararant. Quos, quæso Iuli, ne sequare; siquando (id quod fere auguror) te uirtus tua istuc euexerit; illos potius imitare; illorum similis esse tum uelis , qui se dignos olim tanto honore præstiterunt. Leonem, inquit Iulius , X. Pont. Max. puto te cogitare; qui Parmæ , & Placentiæ urbium pactione cum Francisco Gallorum rege fœdus iniit, ut falsa prætentata causa (nam propinquitatis ornandæ, atq; extollendæ cupiditas illum inpulit) patrem meum Urbino spoliaret, eum; qui Iulianum Medicem profugum , atq; extorrem patria aliquando perbenignè receperat. Hunc ipsum, inquam , in primis uolo dicere; qui, quæ Iulus II. Pont. Max. paulò antè magna uirtute, fortunaq; recuperauerat , duo pontificiæ maiestatis firmissima propugnacula, atq; ornamenta regi concessit, mox ob non seruatas pactiones armis ab eodem illa ipsa repetiturus ; ut Familiæ Medicæ causa (fuit enim tum hominum hæc suspitio) aliquando antimum ad maiora alijceret, præsertim fortuna priore deiectus. De his , inquit Antonius, omitte loqui tam audacter Iacobe , ne forte paulò grauius offendas, siqui sunt, quibus minus grata futura sit istæ oratio; potius ad rem institutam reuertere ; præ-

sertim qui noris, obsequium amicos, ueritatem odium parere: quod tu à Terentiano Sosia pridem discere potuisti. Cupio, inquam, illi (ut Antonio rectè admonenti obtemperem) in primis tu, qui potes, eo pacto hospitalis ut sis, quo maximè hominem Christianum esse decet: haud propterea tamen uelim curam istius splendoris, quem à maioribus tuis hæreditarium habes, te abijcere, ut nolis habere hospites eos, qui clari sunt, & insignes: nam ipsam rem. p. patere illustribus hospitibus, ut Venetijs fieri solet, uideatur ratio dignitatis postulare: præsertim ubi nulla ex hac liberalitate expetitur gratia: sed hoc ita temperandum est, ut alteri ne sit impedimento; quod quidem sic præferri debet, ut superuacaneis, & minus utilibus, quæ necessaria sunt, ac salutaria. Huic autem illud est affine, ac proximum, ut, siqui à prædonibus capti in seruitutem eorum uenerint; quos Maumethis nefarij hominis figmenta leuissima, & scelera à uera religione auerterunt, eos à ciuitate redimendos curent: idem enim tempus, eadem impensa duplex beneficium parit; quum & libertas ei, qui amiserat, redimitur, & id quod multo est cumulatius, liberior potestas restituitur colendæ Christianæ pietatis, quæ tum cōsuetudine impiorum, tum acerbissimo seruitutis iugo profligata tota sæpe deperit. In horum, & reliquorum huiusmodi collocatione beneficiorum, quæ sunt cum humanitate coniunctiora, citius exhauriendum est ærarium, quàm in eorum, quæ urbem interdum magis exornent, quàm ei prosint; aut, si utilia sint, non à què, atq; illa accuratissimè, & sapientissimè à Christo prouisa, quibus omnium continetur salus. Itaq; si illæ effusiones pecuniarum, quæ ad multitudinem delinendam sunt, reprehensæ sunt ab his, qui

bus diuina lux nondum ita, ut nobis, affulserat; quanto magis à nobis huiusmodi omnes reijciendæ sunt; qui à Deo ipso loquente admoniti sumus non factorum tantum, sed uerborum etiam inanium, leuitatemq; quandam præ se ferentium rationem à nobis repetitum iri? Quare ludorum magnificentissimi illi apparatus, & pompa; largitiones præterea omnes; nisi; quæ necessarie sunt, & utiles, fugiendæ; ne, in quo Athenienses peccantes recidarguit Demosthenes, istæ nimia quasi mollieties, & ludicrarum rerum amor & turpis sit ciuitati, & de salute quandoq; periclitari cogat. Nihil est enim ad hominum perniciem deterius, quàm luxus, & uoluptas; nihil melius, quàm frugalitas, & labor: & tamen, quoniam & animos interdum relaxari necesse est, & oblectamenta quæriuntur, adhibendus est tum ad sumptum modus, tum ratio ad uoluptatem, qua & totius ciuitatis possit laudari parsimonia, & continentia extolli. Illæ autem impensæ uidentur esse meliores, ex quibus haud mediocris utilitas percipitur: quales sunt muri, aquæductus, portus, repurgationes, munitionesq; uiarum; quæ & in præsens, si citò extrema manus accefferit, sunt iucundissima, & in posterum gratissima, & ad temporum diuturnitatem firmissima; neq; enim nosmetipsos tantum debemus diligere, aut aliorum commodis inuidere, ut nihil in mentem ueniat de posteris etiam quandoq; cogitare; præsertim cum ijs beneficijs, quæ à maioribus nostris ipsi accepimus, nobis uti gratum sit, & iucundum. Atq; ex publicis, & ex priuatis opibus, ac bonis in rem. p. beneficentiæ fructus per suos duces hoc pacto constabit. Quò se quidem penitus conferent laudem haud mediocrem ex studio omnium pulcherrimo, honestissimoq; relaturi; præsertim

si, cum tempus postulauerit, ea possibabuérint; quæ sequi, uidetur magis esse naturæ; uirtutis, aspernari. Licebit tamen suis alis quando aut amicis, aut propinquis, & necessarijs opitulari; nec, si prudenter, & consideratè id fiat, ulla ab auctoritatis usu metuenda his est aut inuidia, aut nota ad ignominiam. Vtrumq; à se repellent, qui nullo publicarum rerum incommodo alterius commodum augere studebunt; exigat hoc humanitas; æquitas patitur; fert etiam, aut potius hortatur ciuitas, cuius maximè interest ciuium suorum priuatas non tueri tantum, sed etiam amplificare, & augere fortunas. Itaq; nulla sui iactura libenter eos beneficijs completetur, quorum opibus, ut tales sint, quales in eam esse debent, suas, si fortuna ipsius ita ferat, aliquando sustentatum iri arbitretur. Si uerò beneficium ita collocabitur, ut ex priuata publica quoq; existat utilitas, laus tum pietatis adiungetur ad amorem; factumq; probabitur, quod antè solum reprehensione carebat; ut si quod munus aut affini, aut delegetur amico, cuius consilium, & recta sapiensq; gubernandi ratio sit ciuitati profutura: aut si cui maiore ipsius fœnore pecuniam publicam res. p. mutuetur ad rem familiarem uel seruandam, uel maiorem etiam faciendam. In quo illud præcipiendum est, ne, ut diximus, temere istuc fiat; ne uè nisi iudicio adhibito alicui ad beneficium ab his præstetur auxilium, etiam si nihil inde detrimenti sit rei. p. prouenturum. Virtus enim illud cauet potissimum, ut habeatur ratio personarum; qua de re paulò diffusius in his, quæ sunt reliqua, à nobis differetur. Nunc id tantum statuatur, in quemuis eorum, qui iure aut affinitatis, aut amicitiae diligantur, beneficij genus quoduis, præsertim si hoc à re. p. deriuetur, non esse con-

ferendum; idq; tum quòd uirtus ex se ita requirit; tum quòd nihil est, quod uniuerfis æquè conducat, atq; sua unicuiq; pro ratione dignitatis beneficia, quasi præmia, impertiri: ut, præterquam quòd uidetur æquitas seruari, is hominum proborum, & industriorum in officiorum collatione delectus ciues omnes exemplo ad earum rerum studia, quæ laudabiles sunt, incendat, & trahat. Hæc, consimiliaq; huius generis, siquando libera ciuitas rerum omnium his gubernacula detulerit, persequentur, quibus propositum est uitam sic instituere, ut officio, quod alteri præstetur, eam nunquam uacare uelint.

Regibus autem, ijsq; quorum non sunt annua imperia, muneraq; eadem propè omnia, quæ suprà summatim perstrinximus, benefici ut esse se optent, & uelint, obeunda sunt, & seruanda. Nam & religionis studium illis præcipuum esse debet; & optimarum legum uallo omnia munienda, quod per licentiam nec ipsi transgrediantur, nec alios transilire omnino sinant; & cum in honorum, qui ad nutum eorum conferuntur, distributione, cum in erogatione pecuniarum sic se adhibeant oportet, ut appareat huc omnia ipsos referre, ut sint, quibus præsumt, quambeatissimi; nec ijs in mentem ueniat, aut interdum cogantur ad alios transferre imperium, quorum singulari uirtute, amore erga omnes, spectataq; in agendis rebus industria sperent se fortunatiores, & beatiores fore. Verum colendæ beneficentiæ ijs hoc maior incumbit cura, quòd est ipsorum cum liberior, tum amplior facultas promerendi; & quòd leuior de peccato plectendi est metus, hoc grauius periculum famæ ipsis subeundum est. Aut, qui rationem ab his exigat administrati imperij, & apud iudices cogat alicuius criminis

causam perorare, ut habeant neminem; nec pudore prostrato
semel exultationem nominis ullam curent, etiam ne tam uicior-
des sunt, et impij, ut in Dei optimi maximi esse nolint imperio?
Nimirum hoc est gigantum more uelle bellare, qui, ut est in
fabulis,

Ter sunt conati imponere Pelio ossam,

Scilicet atq; ossæ frondosum inuoluere olympum;

Ter pater extructos deiecit fulmine montes:

præsertim cum et se ipse regem regum esse proclamarit, et pij
homines admonuerint, eum metuendum, qui uerius, quam, quod
fortunæ tribuit Horatius, stantem columnam proruens, et uni
adimens, alteri diadema defert. In hunc si intuebuntur, si, qua
idem uniuersum genus humanum complectitur, eos quoq; qui fidei
sue commendati sunt, beniuolentia prosequuntur, si regna à Deo
cogitabant sibi tradita non ad libidinem, et quæstum, sed ad re-
ctam, sapientemq; eorum moderationem; nec Cyri senioris sa-
pientia, quam in cælum usq; Xenophon uir clarissimus extulit,
stimulum ad laudem ullum poterit his adhibere; qui sint uirtutum
omnium præstantissimum, absolutissimumq; præ oculis exemplar
habaturi deum: nec odio ullo mouebuntur; qui diuino erga uni-
uersos amore flagrabunt: nec auaritia, aut alicuius rei minus
laudabili cupiditate ad inferendum damnum, aut ad iniuriam
impellentur, quos beneficiorum magnitudo tanta, quanta per ip-
sos potest existere, manifestè arguet ueros esse beneficentiæ cul-
tores. Quamobrem frustra his quicquam præcipitur, ubi hæc,
quæ diximus, et cogitanda sibi, et facienda esse decreuerint.
Sedati enim prius, et immortalis dei ope uacantis perturbatio-

nibus animi prudens, & rectè institutum consilium sequitur facilis, atq; expedita rerum gubernatio. Quis est enim rerum adeò ignarus, qui nesciat, quibus rebus contineatur felicitas, & salus illorum, quos imperio regendi sibi facultas est permissa liberior? quibus artibus commoda tueatur? quæ rationes sint pro rerum, temporumq; natura ad communis utilitatis omnium procuracionem afferendæ? Quo è genere illa sunt, summam si adhibuerit diligentiam, ne aut ciuitates simul uniuersæ, aut priuati homines ob causam ulla, quæ publica sit, (nisi tamen cogat necessitas) æs alienum contrahant, minus autem ob priuatam: uetere, eoq; præsertim magno, & graui liberentur: oppida, loca uere, quæ aut alicuius culpa minus utilitati eorum consulenti, aut hostili manu diruta sunt, ac deserta, recreentur: seditiones comprimantur: tollantur omnibus è locis discordiæ: reprimantur cædes, quæ ferè ubiq; fieri in magna licentia solent: itinerum, & agrorum, oppidorum etiam maiora interdum furta, & latrocinia depellantur: est enim iustitia comes, & adiutrix beneficentiæ cum in omnibus, tum potissimum in regibus; sine qua planè beneficus nemo esse potest. Huiusmodi facinora, ut exempla his ne desint, raro admodum patrantur in Hispania; ubi nec sceleribus his sce uenia ulla datur, sed seuerissimè in reos animaduertitur, uixq; maleficis sùculas ulla euadendi; quorum salus alteri uel ipsius capitis periculo accidit; & omnibus etiam tum urbibus, tum uicis, tum domibus propemodum singulis istæc hominum improborum facta studio saltem ad hanc rem adhibito sunt præstanda. Contrà uerò, id quod omnium turpissimum est, in Italia ferè tota ferro, & igni etiam aliquando à plerisq; sœuitur in eos, quos habent

habent pro hostibus; aut unde prœdæ alicuius inbianibus crassæ
toribus se se offert occasio; ubi; quoniam aut aliquantò loci plus
est gratiæ, quæ rei maxime salutaris curam aufert, aut impe-
rantium, qui per multi sunt, discordiæ agitantur graues; & hos-
tili in modum inimicitia exercentur; facile per fugium sceleri
est, atq; audaciæ; aut etiam augetur improbitas, quæ nullo pœna-
rum metu repressa, præmijs insuper, & multorum favore allici-
tur, & fouetur: aut, si nonnulli scelera palam oderunt; clam
uidentur hæc alere, dum aut anicitia, aut amore lucri in casti-
gando remissiores sunt: alijs enim impune licet esse sceleratos;
alijs pœna leuiore plectuntur. A quibus quidam cum omnes debent
abhorrene, quorum in rerum capitalium ratione, & animad-
uersione criminum exercetur studium, atq; industria, tum uero
reges, ad quos suprema esse solet in propulsatione iniuriarum
appellatio: nihil enim est uel ad dissoluendam hominum inter se
coniunctionem perniciosius, uel ocio, tranquillitatiq; omnium infe-
stius, uel ad rerum deformationem, euersionemq; grauius, quàm
peccandi licentia, quàm scelerum impunitas, quàm salus improbo-
rum, præsertim si, unde probis iuris illorum expectatur interit-
us, ea illinc petita esse uideatur. Iniqua autem, & grauiua uecti-
galia æquiore feruntur animo; nec tantum popularium incen-
dunt omnia in principes, quantum aut iniuriarum depulsio nulla,
aut eas propulsandi cura paulò remissior. Et tamen benefici qui
esse possunt, qui minus ijs, quos tueri debent, utiles pròpè uì adiz-
munt ea, ex quibus & sua illis commoda, & ornamenta compa-
rantur? Quare nec tributa exigenda sunt, nisi causæ urgeant
necessariæ; & minucnda potius, quàm augenda uectigalia: quod

illud sit liberalitatis, hoc auaritiæ. Nec uitium ferè ullum turpius est in regibus, aut grauius ad ignominiam, quàm auaritia; quia rerum multarum magna; & affluens copia iure ab his augendæ pecuniæ cupiditatem posse uideatur excludere. Quo magis his implendi, quod nulli profit, ærarij fugiendus amor; à quibus maior beneficentiæ cultus iccirco exigitur; quia sit eorum amplissima illius exercendæ facultas: quam quidem si, ut maximè postulat dignitatis ratio, hi coluerint, felicitatem sibi hinc uniuersi poterunt certam, atq; exploratam polliceri. Neq; uero auaritiæ suspicionis depellendæ causa, ut ex his nonnulli faciunt, cum non habeant, quod dent, hac ratione pecuniam, & reliquas huius generis opes parare sibi licere putent; hoc enim qui facit, non uidet se iniustum potius, quàm liberalem esse: què enim iustus esse potest, qui alteri, quod suum est, adimat? què liberalis, qui multis noceat, ut & sibi in primis, & ijs, quibus studet se præbere liberalem, profit? Neq; uero uelim illud mihi obijci hacce in re, quod nonnulli uidentur affirmare, regum cupiditatibus magis obsequentes, & leuiter, aut etiam iniuste ab his aucupantes gratiam, quàm ueritati, & æquitati consulentes, iustam uidelicet quamlibet tributorum, aut uectigalium pensionem uideri propterea; quod nihil ijs priuatum esse decernant: quibus ratione imperij in homines ius etiam tribuunt ad fortunas priuatorum: hoc & natura uidetur reijcere, & optima imperij institutio recusare; quæ nos docent esse hos à Deo potius institutos, ac datos hominibus, ut essent, qui eum imitati in terris beneficentiam in primis coleant, & iustitiam; quibus uirtutibus & suam unicuique rem à uiuerentur, & iniuria; & non habentibus potius aliquid, aut

etiam multum, quum possent, largirentur, quàm habentibus auferrent, aut egentibus nihil darent. Quamobrem ijs, qui eo munere, quod regum proprium est optimorum, fungi uolunt laudabiliter, ac præclarè, fugienda est hæc ratio cumulandæ pecuniæ, & augendarum rerum, minus illa quidem honesta, & probanda, si alia ineatur, atq; salutis, & dignitatis defendendæ, causa. Quod si aliter fieri non possit, auxilium à priuatis petere tum licebit. Mihi autem in his, reliquisq; rem. p. administrantibus illa conficiendæ pecuniæ ratio ualde probatur, ut salutem sibi pretio redimant, quibus aut uitam iure adimit delicti natura, aut corpori dolorem affert: nisi tamen fuerit tam atrox scelus, ut nefas sit hominem leuiore pœna mulctari; aut alteri fiat iniuria, qui detrimentum, aut iniuriam ab aliquo acceperit, quem irrogato lege supplicio affici, quàm liberum, & incolumem esse, malit. Hæc si caueantur, fieri poterit tanquam uestigal honestum bonorum mulctatio; ne quamuis leues causæ tributa semper exigant; nam & maximo bonorum beneficio delicta puniuntur; in quo ipso iustitiæ ius elucet; & alterius beneficio pecuniam lucratur, qui quærit. Quare nemini parcatur, qui deliquerit; adhibeatur lenitas in castigando, quam commendet necessitas: ne tamen auaritiæ causa quotidie nouarum legum, aut edictorum promulgationibus peccata quæri uideantur. Nunc uerò, sicuti plerisq; alijs in rebus, ita in hac tota ratione pecuniæ peccato est locus. pauci admodum reperiuntur; quorum sit in alios potestas paulò liberior, qui non malint libidinem suam iactura multorum turpiter explere, quàm utilitati priuatorum seruire quàm honestissimè, & uitam, quam ipsi minus sanæ mentis homines, deprauatiqui

iudicij beatam ducunt, & expetendam, aliorum miserijs, calamitatibusq; sibi comparare, aut per summum dedecus citius abuti præcellenti, ac diuino munere, quam & gloriam, quæ unius est beneficentiæ, & eam, quam hæc præstat, immortalitatem sequi. Alys quidem auri fulgor mentis aciem ita præstringit, ut ingens eius aceruius in arca congestus felicitas his una esse uideatur, qui libentius,

O ciues ciues quærenda pecunia primum, ni minus idem. Virtus post nûmos, utroq; ablati ouit, utroq; obtrahitur, & patiuntur sibi ad aures per sonare, quàm illud alterum eiusdem poetæ carmen:

Vilius argentum est auro: uirtutibus aurum. inquit. Hoc & Mida Rex, & M. Crassus declararunt, quorum inexplēbilis auri cupiditas monumentis consignata est ad ignominiam eorum sempiternam. Alios uerò ad se trahit multorum de se ex ostentatione magnarum diuitiarum prædicatio, leuissima illa quidem, & non à regibus tantum, sed à quouis etiam contemnenda, quæ & ex stultissima ualgi opinione colligatur; & cum ingenti multorum damno; aut etiam, si paulo plus ferueat hoc amore, miseraq; cupidine pectus, calamitate, pretio haud paruo concilietur. Quidam dominandi libidine flagrantes ita effrenes sunt, & magnorum imperiorum cuidi, ut suis quantumuis & opulentis, & amplis non contenti aliena regna concupiscant: idq; unum animo excelso, & magno dignum ipsis uidetur, illud, quod idem Horatius præclare cecinit parum approbantibus:

Latius regnēs quidam domando auriq; uacillu nūq; uolq; totū Spiritum, quàm si Lybiam remotis.

Gadibus iungas, & uterq; plenus. *ut iungat in mare iugum*
ut iugum Seruiat uni. *obsequi in*
 Minus fortasse esset dolendum, si hoc furore tantum raperentur,
 Maumethani reges, quos superstitionis nefariæ auctoris doli
 minus de peccato cogitantes fefellerunt; nisi etiam, quos de cælo
 tot antè demissæ voces, ac demum Christi ipsius, in cuius leges
 dedere nomen, præcepta sanctissima erudire homines possent; ac
 non tantum seruare iustitiam uellent, quæ alieni minus appetens
 tes esse doceat, sed, ut ne odia ulla, discordiæ ue oriantur, de sua
 iurè quandoq; aliquid alteri concedere, hos haud interdum leuior,
 quàm illorum, stimulare amor imperij, atq; ita incenderet, ut
 eius, quod temerè nimis ipsi concupiuerunt, potiundi causa iura
 omnia humana, diuinâq; uiolarent; cuius rei Germania potissim
 um exempla extulit perniciosissima; nec tantis, quæ subsequen
 ta sunt, malis, nostra, ut ego auguror, finem, ætas est allatura.
 Quæ omnia regum, principumq; execrabiles rerum, quas dixi
 mus, cupiditates pepererunt. Quando autem cum est laudabilior,
 tum uerò propius ad usum beneficentiæ accedit ratio illa, & aus
 gendi imperij, & parandæ pecuniæ, & reddituum, qui de regnò
 percipiuntur, distribuendorum, quam Ioannes III. hoc nomine
 rex Lusitaniæ sequutus non paruum ex re bellica gloriam asse
 quitur, nec unquam exhaurit ærarium; & ex liberalitate om
 nium sibi beniuolentiam, amoremq; conciliat Lusitanorum. Cir
 ca oram, tractumq; illum Africæ longissimum, qui oceano mari
 alluitur, bellum est illi perpetuum cum gentibus Maumethanis,
 efferisq; nationibus, quarum nonnullas ad fretum gaditanum
 cum à maioribus suis ui debellatas accepisset, ipse post contra im

Ioannes III
 Lusitaniæ
 Rex.

petus impiorum sic retinuit, ut depulsis potentiſſimis hoſtibus uir-
 Etoriam ſemper magna nominis ſui laude reportarit. Claffis
 præterea huius auſpicijs ad ulteriora eiſdem maris, & interna
 delata maximas inſulas, regnaq; opulentiſſima adorta bello, ad
 quæ nullius unquam noſtrum nomen, fama; penetrarat, longè,
 lateq; Luſitani dititionem regni, gloriãq; propagauit. Atq; id
 quod eſt & ad pietatem clarius, & firmitus ad memoriam bene-
 ficij ſempiterni, eius opera, & ſtudio potiſſimum illorum incolæ
 rum pleriq; Chriſti iugo colla ſubdiderunt, qui ſubuertente Sas-
 tana, atq; eorum mentes tenebris obuolunte antè maxima ex
 impietate pœna tenebantur: ut appareat eius uirtute, fortunaq;
 & reliquorum Hiſpanorum induſtria, nomen illud eò perue-
 niſſe, quod Iſaias magno cum deſiderio earum nationum ad inſu-
 las remotiſſimas perlatum iri tantò antè prædixerat. Iam uero
 Indis ipſis ea, quam hominum nefariorum impietas ab India ex-
 pulerat, cum ſuperiorum Luſitaniæ regum, tum uerò huius in-
 primis cura longo poſt interuallo lux demum reſtituta eſt: qui
 non armorum uir magis, quàm pietate in rem omnium maximam
 incumbat. Nam, ut taceam quàm ingentes Turcarum copias olim
 diſſecerit, quantam Cambagis regis uim fregerit, quanta hoſti-
 um clade Dium, & Bazanium oppida in India obſidione libe-
 rauit, regis huius pecunijs, & impenſis non in Luſitania tan-
 tum; ſed in Africa etiam, & in India complures ſacræ conſtru-
 ctæ ædes: erectæ aræ: & ſociorum conuentibus, qui nuper ab
 Ignatio homine Hiſpano inſtituti ſunt, alimenta perpetuò con-
 ſtituta, ut nullo tempore deeſſent, qui in ultimas orbis terrarum
 oras quoquouerſus proficiſcentes Chriſtianum dogma prædicant.

do latè propagarent. Eadem autem ratio, & industria regiam
 auget pecuniam, quæ belli gloriam: rerum enim, quæ illinc ex-
 portantur, cum uarietate, & copia, tum auro, argentoq; onustæ
 naues longo, ac perdifficili itinere ex altero orbe uix demum huc
 peruectæ partem Europæ maximam & aromatibus referse-
 runt, & præter nobilissima omnium metalla lapidibus etiam
 pretiosissimis decorantes locupletauerunt. His igitur opibus rex
 auctus, & non ad tuendam solum regij nominis fortunam, sed
 ornandam etiam instructus nec, quæ grauias sint, Lusitanis ue-
 stigalia imponit; nec nisi necessario (quod accidit perraro) tribus-
 ta ulla ab his exigit; & quod ab omnibus regibus seruari oport-
 teret, quia id sit ipsis cum regia fortuna dignissimum, tum ad se-
 curitatem quasi tutus contra impetus popularium tempestatum
 portus, & utile priuatis, æris publici, quod ex redditibus annuis
 is conficit, partem maximam ijs omnibus, qui è Lusitanis nobiles
 sunt, ita diuidit, & opes impertit suas, ut planè paterfamilias,
 non dominus; fortunarum publicarum custos, non priuatarum
 compiler; & quales optimos reges Homerus fingit, pastor, non
 imperator esse uideatur; quia, in quos potestatem habet, hos pru-
 dentibus consilijs regat, & rebus suis alat, nec ad libidinem su-
 am abutens imperio, nec aut ui, aut prætentis alicuius honesti
 specie surripiens de fortunis. Præterea gratum adeò de se in re
 paulò maiore benemerentibus uideas, ut horum merita redun-
 dent in liberos, aut affines; qui, quæ uiuentium dabantur indu-
 striæ, ac labori, præmijs ipsi etiam post eorum mortem perfrui-
 antur. Talem uerò, tamq; probatam gubernandi disciplinam
 suis maioribus optimis, amplissimisq; regibus sibi quasi per maz-

nus traditam non modo retinuit, ubi hereditario iure in paternas successit opes, sed consilijs etiam sapientissimis ipse adeo auxit, ut cæteris hinc exemplum non desit clarissimum uel ad beneficentiam exercendam, uel ad laudem ex re bellica comparandam; quæq; in Cyro ad iusti effigiem imperij efficta sunt, in hoc ad historiam, & ueritatem expressa dicas. In hunc si alij intuebuntur, præter cæteras laudes, quibus se uniuersis commendabunt, minus urbes suas, loca uel sumptibus exhaurient: sed contra aliqua etiam his de suo iure concedent, multosq; habita horum ratione dignitatis honoribus, & opibus honestabunt; nihilq; magis esse è dignitate sua iudicabunt, quàm omni cura eniti, ut nihil his ad felicitatem desit, quorum fortunas, famam, salutemq; in fidem receperunt. Id autem facillimum erit ipsis consequi, si præter liberalitatem, reliquas quoq; uirtutes, quibus regem eum, qui beneficus esse uult, omnino præditum esse oportet, cum imperio coniunxerint. Nimirum hoc illud est, quod Plato eloquentiæ facile princeps uisus est asserere, beatas tum demum res. p. futuras, si, qui regerent, aut Philosophi essent, aut philosopharentur; coniunctionemq; hanc potestatis, atq; sapientiæ uniuersis ics circo saluti fore iudicauit, quia facultas summa rerum seiuncta à moderatione, & prudentia, tantum abest ut sit utilis alicui, ut uel maxime perniciosa uideatur, & ingentium malorum ferax; uirtus uero non multum alteri proffit, si, quibus instrumentis utitur ad functionem sui muneris, ea omnino huic desint: ut eos tantum philosophos, aut philosophantes accipiamus hoc loco potissimum ex Platone, qui studium suum in excolendis moribus sibi collocandum esse statuerunt, unde beatitudo possit ad alios emanare:

nare: qua contemplantes soli perfruuntur. Itaq; horum, quæ planè diuersa sunt, istæc quasi conspiratio, & colligatio sola bonorum ad rationem beneficentiæ maximè requiritur; cuius uim planè philosophus is, quum hæc scriberet, expressit. Neq; aliud æquè optandum est, atq; ad opulentiam sapientiæ adiunctio, quæ & res tueatur, ornetq; secundas, & in regibus præsertim per fugium plerisq; sit in aduersis. Nam studium illud doctrinæ, quæ le in plerisq; uidere est nomen inane tantum præ se ferentibus, nec philosophum constituit; qualem intellexit Plato; qui nunquam uoluit illum uiuere, ut uulgus, ut sapientem, loqui; nisi cognitio- nem rerum continuò sequatur par dignitas actionum: nec sat al- terum iuuare potest, quod aut nihil, aut parum laboranti ipsi ad multa, quæ sunt ad uitam necessaria, prodest. Hac si ratione ad philosophiam se reges contulerint, ut malint sapientes esse, quàm uideri, nihil planè esse poterit uel melius ad utilitatem uniuers- orum, uel ad commune otium optabilius, uel præstabilius ipsis ad gloriam: nec tantum damna, aut iniuriæ, quæ alicui inferantur, horum offendunt animos, quantum in omnes beneficiorum colla- tio obletabit; eoq; citius prodesse uolent, quàm non obesse, quò lau- dari satius est, quàm non reprehendi. Quanquam reprehensio- ne is non caret, qui, cum possit, quod uirtus ab unoquoq; exigit, præstare, atq; aliorum commodis inseruire, ferat per desidiam se (ut non sit ulla potior compensatio) rei præstantissimæ, qualis est gloria, fructu iucundissimo spoliari. Quin hæc ipsa causa ho- mini utium affingit: propè enim tam est iniustus, si, quod est bez- neficij loco, quum hæc ratione prodest, ab altero non arceat in- iuriam, quàm si ipse afferat: nec minus turpe est habere, de fa-

cultate rectè agendi culpa ipsius aliqua sibi ablata quod quis tum doleat, quum, quod peccatum est, sera nimis pœnitentia corrigere haudquaquam potest. Quamobrem ijs, quos præ cæteris Plato ad aliorum utilitatem à Philosophia uoluit auxilium petere, non modo quicquam prætermittendum est, quod non efficiant, & fluideant in summa rerum potestate, istuc præstare quum possunt, ut sint, quos moderantur, quàm beatiissimi; sed etiam illud prouidendum est, ne aut per ignauiam, & animi minus, quod aliquando futurum est, prospicientis socordiam, aut, quod deterius est, per aliquam libidinem rem eò deduci patiantur, ut uiribus longè præponderatura sit rei aliquando bene gerendæ uoluntas; ne, post, quod in prouerbio est, de ipsis dicatur, serò sapiunt Phryges: quod ys maximè turpe est, quos uel ipso iure naturæ cæteris consilio, & sapientia antecellere oporteat. Atq; ut & melius, & expeditius suum expleant munus, quod totum iccirco à beneficentia trahitur, quia sit hæc communis boni procreatrix, non facta tantum sua ipsorum debebunt ipsi præstare, sed aliorum etiam; ac, si fieri possit, omnium. Quod quia admodum difficile est in infinita hominum multitudine, & tam corruptis huiusce præsertim temporis moribus, saltem in delectu eorum, quos muneribus præficient, & quasi socios in partem laborum sibi adiungent, diligentem rationem adhibebunt. Idq; cum omnibus istuc præceptum sit, quibus rerum publicarum gubernacula tenentibus necesse est propter magnitudinem oneris in administratione rerum aliorum uti adminiculo, atq; opera; præcipuè his uero, qui priuati nunquam futuri sunt, ita est curandum, ut nihil hoc sibi futurum putent uel opportunius ad leuationem oneris, uel ad

conciliationem gratiæ efficacius, uel tutius, firmissq; ad salutem, conseruationemq; rerum. Frustra enim laudatur regis continentia, & uirtus, quæ plerumq; non prodest magnopere, nisi conterceatur libido partes imperij administrantium; à quibus interdum cum priuatis hominibus, tum ciuitatibus simul uniuersis tantum affertur malorum, quantum & uidemus quotidie, & periculo nostro experimur. Planè locus hic, ut uideo, omnium maximè est lubricus; in quo uelle hæerere periculosum est; præterlabi autem nihil eorum explorantem, ac sililo perstringentem, quibus nihil uideri possit indignius, eum fortasse minus decet, qui & nonnulla præcipere, quæ salutaria sunt, & ad communis utilitatis curam alios incitare studeat: malorum enim exemplorum, siue ea præterita sint, siue præsentia, & iusta, & seuera, grauiusq; reprehensio solet nonnullos aliquando (nisi fuerit insignis improbitas) à peccato deterrere: ut, quos honesti uis minus moueat, hos ignominia reuocet ex turpi metus. Ex eorum enim numero, qui nunc rem. p. christianam regunt, paucos admodum repperias, qui propinquitatis amore protracti non malint ignaui cuius, & quamlibet rudi, ac imperito homini prouinciam quantumuis arduam, ac difficilem delegare, quàm strenuo, & prudenti, qui paulò sit ab amicitia, & familiaritate remotior: præsertim si ea quæstiuosa sit, & lucrum cum honore coniunctum: hoc enim pernicioso, & turpi exemplo, quod iam, ubi maximè ad rerum moderationem maiorem sapientiam adhiberi oporteret, prauitate multorum diuturni temporis spacio inueterasse uidetur, sibi nonnulli ea licere putauerunt, quibus nec ad calamitatem multorum extitit grauius, nec scelere deterius, nec turpius ad infamiam.

Parumq; his ipsis placuit illud optimum, sanctissimumq; institutum, quo quondam Honorius III. Pontifex Max. est usus. Is enim Ioannem Boccamatium, quem credere par est illa ætate fuisse hominem & pium, & doctum, Cardinalem creauit: alium præterea neminem; qui diceret doctrina, & moribus insignes esse oportere, qui tanto oneri pares esse uellent; usque adeo in hoc se uerus, & grauis, ut (quod minus hodiè cernere est) suorum neminem (fuit enim è Sabellorum familia, quæ Romæ perillustis est) in collegium cardinalium cooptauerit. Virum huius similem ad tollendam in re minus honesta ambitionem multorum utinam nostra tempora aliquando tandem ferant: quibus quæ fiunt, libet silentio præterire, ne offensionem eorum incurram, quibus placet ita uiuere, ut præteritorum conscientia nulla delictorum uocet, & alliciat ad futura. Tantum eos admonitos uelim, quos non modo iuuat culpa uacare, sed etiam rectorum inuitat laus, ut sint ipsi continentes, & cum moderati, tum etiam sapientes, si leuiore cum labore benefici esse uolent, honores ut mandent hominibus, & publicis negotijs præficient, qui pari sint, & uitæ continentia, & uirtute: quoq; liberior est ipsis facultas ad deligendum, hòc cautior, & prudentior de re tam necessaria, & utili debet esse deliberatio: quo ue munus ab his facti exigitur ratio, & apud iudices necesse habent causam dicere; hòc magis fugienda est aut stulta, aut cum scelere coniuncta temeritas, præsertim ubi de salute omnium agitur. Vt enim iudicium nullum subeant hominum sepe, quæ uera sunt, mentientium, nec irrogatas legibus, in quas ipsi uolunt habere imperium, pœnas luzant peccatorum, in iudicium tamen grauissimum est omnino ue-

niendum, quod nec pecunia tentari, nec, quæ plurimum pollent, gratia corrumpi, nec uitio ullo, turpitudine uel contuminari potest. In hoc nostra planè longior est oratio, quòd hæc latissima uis, & auctoritas imperij ferè uniuscuiusq; ni caueat, sensum animi, rationemq; ita peruertit, ut & hoc, & pleraq; minus laudanda habeat pro rectis, & honestis. Nec tantum beneficentiæ fores occludit; quum honorem, qui est haud mediocre beneficium, inmerenti, & sæpe uitij inquinato deferentem non sinit esse beneficium; sed, ut dixi, aditum etiam ad scelera patranda, & malorum congeriem patefacit, qui improbitatem, aut stultitiam uult & honoribus, & opibus præcellentem efflorere. Ut interea sileatur quanta omnium ferè indignatione, & odio pleriq; extollantur, quos æquius erat deprimere; & quot disidia, quot seditiones, quot commotiones animorum tum oriuntur, & incendia, quum boni negliguntur, beneficia in eos, qui indigni sunt, conferuntur; alteri propè, quod suum est, aufertur. Quid hoc iniquius, quàm, quæ omnium ferè consensu (ut ne stoici nunc sinis) maxima, quandiu sumus in hoc uitæ curriculo, putantur, sua uirtuti præmia denegare? Hinc rerum mutationes crebræ; hinc casuum uarietates; hinc euerfiones regnorum; placetq; plerisq; uersus ille horatianus.

Virtus repulsæ nescia sordidæ

Intaminatis fulget honoribus;

qui uel capitis ipsius periculo sæpe repetuntur. Nostra memoria Odetto Lautreco homini Gallo præfecto Mediolani cum habita ludibrio; irrisa; nobilitas, & uirtus multorum, & illustrium uirorum, tum per insolentiam compluribus laceffita iniurijs tanto

exarsit odio in gallicum nomen, quantum id fuisse credere par est, quo Franciscus I. hoc nomine rex Gallorum & optimus, & clarissimus multis, magnisq; acceptis claudibus demum Italia est expulsus: tantum malorum inuexit unius uiri stulta, aut improba temeritas, eos, quorum honori, & famæ consulere oportebat, fastu intolerabili despicientis, interdum etiam contumeliosè dilacerantis. Martino Lutero nihil uel notius ad impietatis exemplum, uel ad nouitatem rei maius; qui, ut ferunt, ob denegatum à Leone X. Pont. Max. sibi apud suos sacerdotium, cuius pro tanti facinoris magnitudine tenues admodum reditus erant, suis nefarijs conatibus totam rem. p. Christianam perturbare ausus est, ea molitus, quæ ne cæteris molientibus propulsaret, nulla debebant quantumuis ingentia tormenta detertere, præsertim qui religionem eorum professus esset, quos quondam insituisse is, qui cum disputationibus, tum libris editis hereticorum omnis generis hostis acerrimus extitisset. Viri certe fuit insignis improbitas, nec tanti sceleris causa ulla esse debuit: docuit tamen ea res diu rem. p. nullam aut flare, aut seditionibus uacare posse, in qua præmiorum æqua distributio non seruatur. Quamobrem reiecta omni cupiditate, quæ rationi inimica beneficentiam excludit, consilio graui, & moderato in deferendis honoribus est opus. Qua in re duplex ex beneficio existit laus, quum & uirtuti honos datur, & huius ad hominem probum, & industrium delegatio multa in reliquos beneficia ex se parit. Idq; cum semper faciendum est, tum uerò maximè, si ad imperium nulla rerum agendarum cognitio, nulla disciplina gubernandi accesserit: quarum rerum utinam ne tam multi essent ignari; nec i, quibus harum deest scien-

tia, potestate regia, & nomine uidentur omnino digni. Et tamen quoniam id et sæpe accidit, et, ut eueniat omnino, datur à multis opera, à rebus grauib, & præclaris, uoluptatum, quas in magna rerum omnium copia ipsis redimere parfacile est, multis illecebris eorum cogitationem, curamq; auertentibus, cum ratio imperij uix, aut raro patiatur eo se abdicantes ad priuatam fortunam declinare, hoc idem ferè assequi uidebuntur, si, quod proximum est, ignari ipsi cum sint, consilia prudentum approbabunt: prima enim sequentem honestum est in secundis consistere: nam, quæ hîc tertia uidentur, auctore Hesiodo fugienda sunt: nunquam, qui post primum, & secundum tertius fuerit, poterit esse nisi & maleficus, & omni scelere, uitioq; detestandus. Is uerò, cui secundus locus tribuitur, illud habet, quod est in omni uirtute præcipuum; uult utiq; esse beneficus, qui tamen multa ignoret in hoc genere, quæ sequatur. At, cum uelle difficillimum sit, & ab eo in primis, cuius in omnes petentes liberalitas est mira, exorandum, facillimum est, quæ agenda sint, perdiscere, si, quæ sapientes præcipiant, audiuerint, si monitis paruerint, si horum se consilijs subiecerint, qui reliquorum domini esse uolent. Sed cum uirtutes omnes præcipuè in regibus laudabiles sint, necessariæq; ad beneficentiam, profecto illa, qua flagitiosi compescuntur amores, libidinesq; temperantur, mirum in modum extolli solet, & esse omnibus quàmgratissima; siue quòd ab infamiæ metu quàmplurimos liberet de uxoribus, liberorumq; pudicitia sollicitos, quam à regia libidine haudquaquam tantam fore suspicantur; siue quòd rei minus honestæ moderatio specimen præbeat sapientis, & probati regis: in summa etiam

potestate peccandi in eo, ad quod omnes natura procliuiores sumus, uirtutis usus uidetur esse iucundior. Qua in re potissimum est ab uxoribus alienis abstinentum, nec aut blanditijs amor harum pelliciendus, aut ui castitas est uiolanda: cuius patrocinium fideliter susceptum à potentioribus beneficium plerisq; est maximum, neglectum, & spretum iniuria. Huius rei exemplum propè recens & insigne, & clarum habemus Andreae Lampognani ciuis Mediolanensis; qui Galeatium Vicecomitem Mediolani principem ob uxorem ab eo turpiter, & flagitiosè conflagratam intrepide ad aram quandam armatum interfecit, nec astantem populum ueritus, nec deliberata morte ipse præferox apparitorum arma. Ita q; seuerè ab his animaduertendum in eos, qui cum alterius famæ periculo nequiores esse cupiunt, exemplo prius honestissimo, & uitæ castitate reliquos ipsis post se pertrahentibus. Hanc legem nuper nonnulli neglexerunt, flagitiorumq; turpi macula regiam dignitatem dedecorarunt summa cum approbatione eius decreti; cuius in libris de re. p. auctor Plato nunquam potuit aut Athenis suam hacce de re probare sententiam, aut, quo ille putauit se ingenti beneficio homines obstricturum, id ut acciperent, ea, qua plurimum excelluit, dicendi copia ab his impetrare. Quæ cum ita se habeant, uidere perfacile est, quantum ab unoquoq; colenda sit temperantia, cuius in conseruatione rerum tam latè pateat uis, recti, incorruptiq; iudicij conseruatricis: quantumq; in publica persona uitæ hanc continentiam soleant omnes & amare, & gratam habere; quæ uel in hostes ipsos in Cyro seniore primum, & Alexandro Macedone optimis, amplissimisq; regibus, post in superiore Africano imperatore, ac duce populi Romani

Romani clarissimo sempiternis laudibus sit immortalitati consecrata. Illud etiam est cum rege, eoq; quem uolumus, principe dignissimum, tum ad beneficentiam maximum, providere, ne in toto imperio sint, qui rerum ad uictum necessariarum egeni quousquersus uagantes magno cum dolore bonorum hostiatim sibi alimenta quærant, interdum etiam frigore, fameq; miserè deperant omni prorsus ope destituti: inhumanum enim est, ac ferarum simile, nolle, cum possis, in extremo periculo ad salutem illa cæteris impertiri, quæ ad tuendam uitam, omnibus communia ut essent, natura procreauit: cui planè uim quandam affert, qui homines per summum scelus fame necatos uult, dum his eius libertatem claudit. Atq; ut si quis copiarum dux pecuniam accipiat, quam det in stipendium militibus, hanc uero ad bellum profecturus in quæstu domi relinquat, rem. p. turpissimè uidetur prodesse, quia ob ducis auaritiam militibus pugnam detrectantibus uictor plerumq; euadit hostis, imperioq; potitur, sic is, cui multò plura, quàm postulet necessitas, ab immortali deo tributa sunt ad copiam, impiè facit, qui præter decretum principis, & moderatores dei illa sibi soli mancipare studet, quæ ea conditione accepit, ut egentibus communicet: nè hi, quos, ut reliquos, uult esse incolumes, quandoq; in uitæ discrimen uocentur. Vt taceam, quàm ingratus sit, qui tantum abest ut gratiam ullam de se benemerenti referat, ut etiam eius beneficium in reliquos ui propè auferre uideatur: quasi tam multiplices, tamq; diuersos ipse è terra educat fructus; illud autem non intelligat, uires suas tam imbecilles esse, ut ne cubito quidem se maiorem facere possit, quàm sit ei naturæ lege præscriptum. Quamobrem nihil est immortali deo gratius,

quàm si quis non patiatur alterum concidere, & mori nihil præter aquam, & aerem, commune habentem, cuius seruandi facultas non desit. Hæc autem in regibus amplissima est: non enim opulentia tantum, qua reliquos hi longè superant, sed auctoritas etiam, & imperium (modo uelint) inopiam facile subleuat: nam & suis opibus ipsi hanc alere, & alios, ut idem faciant, possunt auctoritate cogere. Quanquam exemplum magis allicit, ut libenter plerique agant, quæ principes facere cognouerunt. Quod autem una ciuitas olim præstitit, idem in reliquis fieri posse quiuis affirmauerit. Memini ego, Parmæ cum essem apud meos, quo anino Odettus Lautrecus Gallici dux exercitus ad liberandam urbem Romam est profectus, ob ingentem annonæ penuriam egenorum numerum adeo magnum eò confluxisse, ut uix urbis refectæ his essent, & ubi porticus erant, pernoctarent, quos hospitales ædes capere non poterant: ex his complures per aliquot dies summo mane à prætereuntibus non sine lacrimis conspici mortuos, deinceps tantam hominum calamitatem miseratos, inter se partitos onera omnes hospitio suscepisse, quæque necessaria ad uictum forent suppeditauisse, ita sublato è conspectu omnium, luctuoso spectaculo quàm plurimos fuisse seruatos. Docuit tum inuenta ratio in difficillimis etiam temporibus urbis huius, quam rebus ferè omnibus hiberna militum exhauferant, leuiore negotio ubique multorum necessitati posse ab his consuli, qui rem. p. tenent, si ad eam rem aut. aliquid uelint impendere, quam Christus tantum extulit, ut inquinati uitæ animi maculas hac ratione in primis elui posse, asseuerauerit. Eadem ciuitas biennio antè multò præclarius ex diuturnitate beneficij huiusce pietatis exemplum re-

nouauit: quæ, cum primum longa obsidione liberata est, nihil habuit antiquius, quam statuere, apud se ne essent in posterum, qui ob inopiam uictus incertis sedibus passim uagarentur: tribus ædibus recepti omnes: è ciuium numero delecti honestissimi homines, qui simul ex tota ciuitate his alimenta conquirant. Itaq; unà cum his, quas supra commemorauimus, uirtutibus charitas hæc erga inopes, ut ars his trionibus inscenari, sic his maxime afferenda est ad imperium, quos non sibi uiuere, sed alijs dijs, hominesq; statuerunt. Ex quo intuenti perspicuum est, & clarum, eum, de quo nunc loquimur, uirtute omni, ut non semel explicatum est, præditum esse oportere. Qui autem aliqua in re alterum lædit leuiusculè, cum in cæteris profit, statuamus hunc perfectæ quidem cære laude beneficentiæ, beneficum tamen posse appellari, qui se ab insignibus abstiniens iniurijs multo plura, eaq; ingentia in uniuersos beneficia contulerit. Et quamuis iure ipso naturæ legi huic, qua aliena attenditur utilitas, unusquisq; addictus esse uideatur, magis tamen ad reges pertinere dicimus, ipsos cæteris quammaximè esse utiles, ac salutares, louiq; ipsi præstare se quamssimilimos conditione naturæ: à quo uno haud temerè poetæ ueteres eos potissimum alii uoluerunt: non enim præpotentem solum fingunt, ac imperantem cæteris, sed opt. max. etiam appellant, quod mortales saluos, incolumes, opulentos, copiososq; efficiat. Nec huius filium Herculem in cælum sustulit præclarorum in omnes homines nisi fama meritorum: quem qui sequentur, aut uerius, qui spreta gloria, quam ab hominibus fortasse aucupari studeat, facta imitabuntur, hoc erunt nostri duces conditione potiore, quod magis est ea, quam se sequentibus Christus pollicetur,

adumbrata illa immortalitate uera æternitas & optanda, & quærenda. Audiſti, inquit Antonius, Iuli, quæ ciuitatum, populorumq; moderatoribus, benefici ut eſſe uelint, tribui oportere laſcobus ſtatuerit: iuſtos enim, & pietatis cultores primum; dein continentes ſic hos eſſe uult, ut non in ſe ipsis tantum, ſed in alijs etiam uitæ continentiam hanc ament. Hæc tibi in primis præcepta eſſe putato: nam pridem ad aliorum tenenda gubernacula te non tantum maiores tui ampliſſimi, clariſſimiq; duces iure hæreditario uocant, ſed iſta etiam dignitas, qua uideo te auctum, par regiæ maiestati compellit, ut cogitationes tuas, ſtudia, curas omnes huc tibi conferendas eſſe putes: munus enim, quod religio ipſa conſecrauit, debet augere maximè pietatis ſtudium, & uirtutis. Quanquam, ſi exempla magis placent, patrem habuiſti, quo iuſtior, continentiorq; ducem nullum, aut æquè paucos Urbinates habuerunt. Me uero, inquit Iulius, magnopere hæc delectant, tum quod noua quædam, atq; hætenus, quod legerim, aut audierim, de beneficentia à nullo tradita noſtris auribus intulerit, tum quod in explicandis præceptis hunc eam uideo ingreſſum eſſe rationem, ut multis prætermiſſis quæſtionibus, quæ poſſunt hinc exiſtere, riuulos ne conſectaretur, ſed fontes ipſos aperiret. Etenim quibus regibus, aut rerum publicarum gubernatoribus perſuaſum fuerit, uirtutes omnes aliorum utilitatis cauſa ſibi eſſe colendas, pietatemq; ſeruandam, nullo docente ipſi, quæ ſint ad cumulataſ laudem beneficentiæ agenda, cognoscant. Pergat modo reliquæ: niſi forte uerendum ſit, ne ſat temporis ſuppetat ad ea oratione explicanda, quæ animo eſt ipſe complexus. Rectè è, inquam, Iul, me admones: nam, ſi hæc, quæ tu dicis, ad exitum uſq;

persequi uoluero, dies me deficiet. Quamobrem satius esse duco in aliud tempus, cum, qui reliquus est, differre sermonem. Ego me interim quieti dabo, mox ad te reuersurus, ubi ad audiendum tantum ocy naclus eris, quantum utriq; dies hodiernus tulit.

IACOBI PHOLII DE BENEFICENTIA

LIBER TERTIVS.



VM expectarem, quoniam die reuersurus essem ad institutum de beneficentia sermonem, ad iij. Id Nouembris, ecce mihi summo mane à Iulio nuntius, qui refert Iulium, & Antonium cupere, disputationem, quam aliquot ante dies imperfectam reliqueram, uti absoluerem; proin ad prandium inuitare: à meridie enim ad uesperam usq; ocio abundaturos. Libenter, inquam, in utroq; Iulio morem geram; nam & nihil est, quod ego malim, quàm cumulado beneficio promereri, quem beneficum maximè esse decet; & hilaritatem postulat hic dies Diuo Martino consecratus; non queretur me hodie conuiuas morari. Fit prandium; idq; satis lautè, & hilariter. Multi autem tum aderant conuiuæ: qui ubi omnes post uarios sermones, qui epulas sequi solent, abire se uelle dixissent, ad bis

bliothecam, inquit Iulius, hora nos quoque admonet, Antoni, ut reuertamur. Tum Antonius, eamus, inquit, Iacobe: uideo enim te hemicyclum spectare, qui, cum cæteri dudum inter se colloquerentur, tecum solus nescio quid meditari uiderere. Itaque ubi bibliotheca nos excepit, uobis, inquam, exoluam nunc, quæ animo antè cogitata, si recordamini, ad exitum ne perducerem, temporis angustiae effecerunt. Satis, inquit Iulius, ea memini, quibus, qui præ sunt cæteris, ad beneficentiam abs te altero sermone instructi sunt: neque enim tam multa sunt, ut facile memoria retineri non possint. Rei autem huiusce summam paucis ferè uerbis complexus statuisti, rege nem, aut magistratum, qui beneficus esse, & haberi uelit, iustum, & pium in primis; dein continentem esse oportere: neque enim, quæ sua sunt, adimet alicui, qui, pro dignitate omnibus consultum ut sit, uolet: nec, si poterit, quenquam patietur egere; quem pietas liberalitatem amare coget: nec cuiusquam pudicitiam uiolabit, qui & uitæ exemplo, & iure officij alios à turpitudine auocabit. Illud autem, ut uideo, reliquum est, edoceas, quo pacto in angustas priuatæ fortunæ ædes beneficentia deduci possit, quam hætenus in amplis regum, principumque theatris egregiè ornatam collocaſti: tum quæ in collatione beneficiorum seruari oporteat: etiam, si qua in controuersiam possint uocari, nobis explices: neque tamen omnia, quæ de his rebus disputari solent, aut possunt, ea te nunc amplecti uolo: satis ero his contentus, quæ cum magis necessaria esse, tum reliqua, quæ seorsum traduntur, in se ipsis continere uideantur. Factam, inquam, Iuli, ut iubes: neque in ijs, qui priuati sunt, erudiendis ab his, quæ hucusque tradita sunt, tam diuersa afferam, ut publicis hominibus

horum pleraque non possint esse communia. Itaque si qua illic fortasse desunt, ea hinc petenda erunt. Illa autem sunt magis propria priuatorum præcepta, quæ ad honorum petitionem adhibere necesse est; quæ qualia sint, modo ex me cognoscetis. Quanquam nihil horum latet Antonium; qui non modo tantum meminerit, quantum legerit, ac didicerit; sed ingenio etiam ipse suo excogitare multa possit. Vellem, inquit Antonius, ita esse, ut dicis: tantum enim abest, ad ea, quæ paulò reconditiora sunt, aditum ipse tentare ut audeam, ut etiam munus id, quod profiteor, sentiam me uix tueri posse: quod quidem ipsum quale sit uides: usus enim plus requirit, cogitationis uero minus. Me tamen non mediocriter delectat, si quid aliquando eiusmodi audio ab alijs, quod animum interius alere, ac detinere possit; quanquam hæc ipsa, quæ tu nunc disputas, non nimis abhorrent ab hoc nostro genere forensis: nam, quæ de moribus philosophi præcepta dedere intra parietes, hæc doctores nostri in forum ad communem usum uitæ traduxerunt. Sed iam tempus est, ut, quæ sunt reliqua, pertexas: in quo, ut radio texenti fila, ubi nihil currentem remoratur, sic tibi dicenti oratione longius licebit excurras: nos te nihil impediemus: nisi si quid eiusmodi inciderit, quod ambigentes ad quærendū trahat.

Neque uero, inquam, illustri quadam, & excelsa loco positi homines soli, tanquam boni athletæ, uocantur ad palmam; aut his tantum in regno beneficentiæ collocatis licuit summa cum laude, admirationeque omnium coronari; priuato etiam cuique, & quem uirtutis insignia nulla decorarunt, aditus patet ad gloriam: cuius perfruendæ spem huic exploratam afferre poterit cum facultate uiuandi adiuncta ad præclarum studium animi alacritas: hæc

enim una non patitur otio, ac desidia torpere languentem, sed uel ipsas uires auget ad gratificandum, uel stimulum addit ad laborem. Ac, licet ex collato beneficio laus in publica persona sit clarior, quàm in priuata; nihilominus aut par. præmium utriq; ab æquissimo iudice deo tribuitur; aut in referenda gratia fortassis hoc est potior conditio priuatorum; quò leuius ob nullam ex publico munere impellentem causam, quæ uel inuitos trahit, his promerendi onus imponi solet. Sed tamen, quoniam eadem lege naturæ tenemur omnes, & unius imperio dei subijci mur, eius, cuius participes effecit, rationis opus ab unoquoq; exigentis, debent y statuere, sibi non minus, quàm illis, eam uiuendi rationem esse amplectendam, quæ nascentibus omnibus, atq; eam, quæ cum corpore coniuncta est, uitam degentibus communis esse uideatur; tantumq; persolvere, quantum permittit uirium facultas: ut omnis no sat à se actum cuius putet, si det, aut agat, quantum possit: atq; etiam, ut possit, enitendum est. In primis autem priuatus quisq; animum debet inducere, nihil ut habeat antiquius, nihil charius, nihil sanctius, quàm patriam ipsam, quàm salutem omnium, quàm commune bonum: præcipua cura huc referenda: nec est prætermittendum quicquam, quo ciuitatis contineatur utilitas, ac decus, quod non agatur sedulo. Ac, quoniam, quæ habentur amplissima, ea uix pauci assequuntur, qualia sunt rem. p. legibus, & institutis fundare, ac stabilire, florentem augere, affluctam recreare (hæc enim non fiunt absq; ingenio, consilioq; magno, & opibus) fructu beneficentiæ haudquaquam is carebit, qui, quæ reliqua sunt, ei diligenter, studio seq; præsterit officia: quæ nec contenmenda, & maiora fortasse sunt, quàm ut quis illa esse putet,

tet,

tet, tenuem quandam, & quasi obscuram, nisi rem perpendas, præ se speciem beneficiorum ferentia: ea autem sunt, quæ à iustitia in primis, virtutibusq; quibusdam, à quibus beneficentiam nunquam secernimus, proficiscuntur. An parum is ciuitati prodesse uidetur, qui amore in patriam, non pernarum metu, suis contentus, aliena quæ sunt, minus ipse concupiscit? aut, si acciderit, ut imprudenter plus æquo habeat, petenti, quod suum est, haud est opus aduocato, nec ui protrahere in iudicium renitentem? qui furtum, rapinam, cædem putat esse morte grauiora? adulteria odit? iram, quæ alteri noceat, compefcit? statuitq; sibi esse ab omnibus iniurijs, contumelijsq; abstinentium? præterea, si sors ita tulerit, mortem pro patria ultro fortiter oppetendam? qui deniq; iura omnia ciuitatis seruat inuiolata? leges uult reiecta libidine dominari? magistratum colit? regem obseruat, & ueretur? Hæc ego tanti facienda duco, ut haud facilè his maiora à priuato ciue in rem. p. beneficia desideres: his enim officijs uidetur omnium salus ipsa contineri. In quo quidem caueat illud, ne perniciosas leges, & aut in libera ciuitate libertatem impugnantes, aut publicam labefactantes utilitatem, dignitatem'ue earum auctores ipse suo fauore prosequatur; aut quauis ratione scelus aliquod in patriam, & rem. p. molientes iuuat: horum (siqui unquam existent impij) nefarijs conatibus obstabit: secus si aget, hoc est, si aut in scelere socium se dabit, aut metus alicuius mali coget communem causam deferere, maximè utiq; maleficus is erit. Atq; cum, ut dixi rei. p. hostes execrandi, & pellendi; tum uero dei unius, & Christi saluatoris nostri præcepta, ac decreta resellentium, atq; impugnantium, præterea, quæ ad religionem pertinentia om-

nium Christianorum consensu pridem sunt recepta, conuellentium ita detestanda est impietas, ac furor, ut tormenta quantumvis ingentia pro defensione Christiani nominis, eorumque, quæ ad bene, beateque uiuendum à deo edocti sancti patres seruanda docuerunt, refugere sit nefas. Id quod ab innumeris hominibus olim factitatum legimus, læto animo supplicia ipsa adeuntibus, & gloriam uel maximam ex morte, quæ ab impijs turpissima habebatur, querentibus tum; quum sociuentium populorum, & regum præceps insania, & furor inusitatis poenarum generibus, quibus delere nitebatur, rem christianam auget, & nomen; & in unius capitis iugulum dimissus ensis, instar lernæi monstri, quàm plurimas quotidie Christo deo uictimas immolaret. Hoc si quis agat, idemque nolit, quod iniustum est; imperanti obtemperare, tantum adest, beneficus ut non sit, & iustus, ut, qui alterum, atque huic repugnans malit, maleficij omnium maximi, & criminis reus esse uideatur. Neque enim his, qui se pro pietate morti olim deuouerunt, aræ essent à posteris erectæ; neque dii ex hominibus facti uerius, quàm, quos stulta consecrauit antiquitas, nisi præclarissimi facti exemplo reliquos traherent ad ea imitanda, quæ amplissima omnium in uniuersum humanum genus beneficia haberentur; de quibus poeta quidam ita cecinit,

Martyres hinc, atque inde Senes, & magnus Adonis
 Astabunt læti, quondam qui sanguine fuso
 Tutum iter æternæ nobis strauere salutis
 neque de homine probo, & sapienti tanto cum assensu audientium
 carmen illud diceretur,
 Peiusque læto flagitium timet,

si, quod turpe est in homine imbecilliore, uiri præpotentis excusaret auctoritas. Atq; de hoc genere beneficiorum hæc satis. Quæ sicut minus huiusmodi uidebuntur, quia uel honesti uis tantum quam maxime debita ipsa reposcat, uel, non sicut ex arca, fructus in alios uideatur extare tenuior, cogitet is ad ea, quæ modo explicauimus: non enim beneficia sola æstimantur pecunia: sunt alia multò ampliora. Quibus autem priuatus quiuus nullo auri pondere, aut pretio comparatis, sed aut sola animi uoluntate, quæ, si quis erga alterum propensam habet, beneficiorum thesaurus est maximus, aut officio, quum hoc est opus, rem. p. iuuare possit, ea sunt in primis, quæ exposui, ex quibus quidem tanquam initijs, ea, quæ beneficiorum secum ferunt expressiorem effigiem, oriuntur. Quem enim amor uirtutis impellit, ut noccat nemini: æquum se omnibus præbeat, incolumem rem. p. optans legum, & iusta imperantium iussa persequatur, non tantum minus honesta is oderit (quod ipsum tamen est laudandum, Virtus enim uitium est fugere, & sapientia prima Stultitia caruisse) sed improbitatis odium continuò subsequetur is amor probitatis, qui nullo pacto ignauum, desidemq; esse patietur. Alterum enim non seiungitur omnino ab altero, aut potius, si rem paulò diligentius consideremus, fieri non potest, ut odium deformitatis non incutiat pulchritudinis desiderium, quiq; uitium fugerit, uirtutem propè necessario non sequatur, si eorum, quæ pugnantia sunt, sublato altero remanere alterum omnino est. necesse. Sed hæc poetarum more separauit Horatius: nisi dicas hunc sic fecisse, ut ex odio uitij, naturam repugnantis inchoari, & statui uoluerit,

atq; hoc ipsum tanquam initium alterius nomine uirtutis appellauisse; secus uirtutis magis est, quæ sunt honesta, agere, quam uitare turpia; ut detur distrahi hæc aliquando posse; id, tamen, fieri quæ possit, non uideo, si ad rectè agendi uoluntatem facultas comes accesserit. Verum, quoniam ea, quæ in multis cernitur, uitæ ratio à malo inferendo remotior, quàm procliuis ad iuuandum, uidetur harum rerum diuersitatem quandam constituere, dicamus, utrumq; quidem rectum esse, & toti ciuitati salutare, atq; utile; sed alterum cum natura ipsa, rationeq; uirtutis honestius, tum fama illustrius, quo tota mente, & animo, amota omni, ablegatq; procul ignauia in alterius auxilium insistitur; præterea quò laudabilius, hoc ætliore uinculo nostrum quemlibet ad id ipsum teneri, & astringi. Quare haudquaquam contenti nos priore, licet, ut ostendi rei. p. intersit habere moderatos, & continentes ciues, ad alterum dijs, hominibusq; approbantibus pergamus omnes; &, quandiu nobis in hoc obscuro corporis domicilio commorandum est, studeamus tales nosmetipsos præstare, quales ut essemus, & natura effecit, & prius auctor, atq; opifex naturæ sanxit. Itaq; in primis eniti debemus, ut publicæ saluti, & honori consulatur; opibus hæc magis aut protegendo, aut augendo, quàm nullum inferendo incommodum. Qua quidem in re, quæ necessaria sunt, & utilia, ijs, quæ ornatus tantum causâ sunt, semper anteponuntur: ut, quum bellum urget atrox, & calamitosum, si se suis opibus, uectigalibusq; aut libera ciuitas, aut rex tueri nequeat, tum, qui priuati sunt, suis fortunis auxilium, ut etiam nullus cogat, periclitantibus ferre ne grauentur; præsertim si iustum id fuerit, & magis aut libertatis, aut defendendi im-

perij causa, quàm ob cupiditatem propagandi, susceptum. Planè non uideo, cur non sit facturus turpissimè, & grauissimè reprehendendus, si quem rerum leuiorum iactura moueat in eius periculo, pro cuius salute iure & naturæ, & gentium omnium uita est ei profundenda. Præclare P. Cornelius Scipio, is, qui deuictò Annibale, debellatâq; Carthagine triumphum omnium egit clarissimum: nam post cannensem pugnam cum ciues quosdam romanos adum omnino de romano imperio metuentes sensisset de fuga cogitare, stricto super eos ense in uerba quædam iurare cogens nunquam, inquit, ego rem. p. deseram, neq; alium ciuem romanum deferere patiar: Labentibus igitur rebus publicis primum, ac præcipuè succurrendum est adminiculo rerum priuatarum, quas nec rectius usquam, nec laudabilius expensas dices. Laus autem ex beneficio, quod commune sit, huic proxima sequitur, quum multorum subleuatur inopia opem à re. p. ipsa implorantium, quam uniuersis pro necessitate, & ordine consulere oportet, si ea sit optimè instituta, hoc est, si eas leges seruet, quæ à Christo salutares, & optimæ sunt datæ. Ex hoc genere sunt illa, aut, si cui multa supersint, patere ciuitati horrea ipsa, unde depromi possint, egentibus quæ dentur, alimenta; aut, si largiri nolis, quod benefici magis est hominis, pecuniam, si habeas, non habenti absq; fœnore mutuari, unde illa comparentur. In quo à plerisq; delinqui solet, contrà, quàm fieri oporteat, annonam in summa eius penuria supprimendo, benignitati fores occludentibus, nec pecunia iuuantibus egentes, quos præ nimia eius cupiditate miseros fame excruciatos uolunt: hoo scelere non multa atrociora inuenias: uerèq; in hostium humani generis numero ha-

bendi, qui sibi ipsis tantum ea addicant, quæ natura & prouida,
& liberalis, ut essent, undè uitam duceremus, communia omni-
bus esse uoluit. Tantam igitur impietatem execrentur ij, à quibus
huiusmodi affluentibus copijs ea beneficia exiguntur, quæ prima
omniũ, & maximè necessaria natura attulerit. Atq; hæc, &
huius generis reliqua gratiora proculdubio uidentur, & maiore-
ra, si non præsentis tantum, sed etiam, qui post futuri sunt,
fructum aliquem ex hac liberalitate perceptorum sint. Cuius rei
prisca sæcula exempla non multa protulerunt: ut non deessent,
qui uel misericordia rerum humanarum moti, uel protracti amor-
re gloriæ præsentis beneficij collatione sola latarentur; idq;
propterea, quòd nimis stultè, & falsò de his, quæ post animorum
migrationem è corporibus contingerent, ueteres ipsi iudicabant.
At, ubi diuina uox de cælo in terras demissa est, seq; animis in-
sinuauit humanis, tum demum ueritate cognita, detectisq; erroris
bus spes suas longius homines protendentes, non contenti præ-
sentibus, futura cogitarunt; quibus ad omnium parentem deum
iter sibi expeditius muniendum arbitrarentur. Hanc ob causam
& Christo, & his, qui eius sectati uestigia iter sibi in cælum
aperuerunt, templa quamplurima extructa: dicatæ aræ, & in-
star oppidorum lata, ingentesq; constructæ ædes, hospitia, per-
fugiaq; egenorum; nec in alios, atq; in hos laudatissimos usus pæ-
trimonia à plerisq; erogata. Id autem tum ubiq; in Italia, tum uerò
Senæ, quæ urbs est Ethruriæ nobilissima, & factum alias, &
nunc etiam fieri solitum est, ubi tanta fit diminutio de fortunis
priuatorum, quæ iure hæreditario Xenodochio illi celeberrimo
mancipantur, ut, ne penitus exhaustantur, decreto ciuitatis bona

quotannis eiusdem aliquot uenalia esse sit necesse: hoc nunc factum ita pridem fuisset, careret urbs illa ciuibus, quæ rem familiarem propè omnem in hospitalitatem exercendam collocaisset. Dici uix potest, quantum sit hoc beneficium, quo inopia laborantibus, & miseris salus retinetur, iuuatur posteritas, Christiana religio alitur, quæ quidem & uero dei cultu, & charitate erga cæteros homines expletur. Nam urbem murorum uallo priuatis pecunijs præmunire, aut reficere corruentes, & ædificia ad communem usum substruere, portus, naualia exædificare, atq; huius generis similia conficere, quibus liberalitatis huiusce posteris prodatur memoria, nec necessitate cum his, quæ diximus conferenda sunt, nec tam pietate clara. Quæ tamen & ipsa permagna sunt, & ampla; atq; cum ad superiora, quæ uidebuntur, impenderis, si perficiundi facultas suppeditabit, haudquaquam omittenda: tunc enim liberalitas uidetur cum magnificentia coniungi, quum ex priuata munificentia publica existit utilitas, quæ impensa ampliore consistet. Quanquam, si hoc spectetur, amplo, & sumptuoso Xenodochio nihil uel ad pietatem optabilius, uel ad magnificentiam clariùs esse potest. Largitiones autem, quæ fiunt ut plurimum ad ostentationem diuitiarum, omnino fugere oportet, præsertim in ciuitatibus in quibus eadem est ciuium omnium libertas, & lex: ne his, quæ plures semper, & boni magnopere expetunt, & student retinere, huiusmodi largitionibus tanquam cuniculis quibusdam priuati ciues insidias moliri uelle uideantur. Quòd, si quis recuset esse leuissimus inanis gloriæ captator, sed honesti tantum causa, & quia Christus ita faciundum præceperit, eo modo liberalis esse uelit, quo cæteris ad exemplum maxime expedire arbi-

tretur, ad euitandam in urbe libera suspicionem occupandi imperij, tutior ea est ratio collocandi beneficij, cuius paulò ante à nobis mentio facta est, si, cuius maximè interest saluti, & commo-
dis omnium prouidere, rem. p. locupletet ipse priuatis opibus, quibus illa pòst egentibus subuenire possit. Quanquam nihil prohibet multa largientem quotidie inuidia nulla conflagrare, & cæteros exemplo allicere, quibus hac ratione beneficos esse libet, si reliquis in rebus seruata huic pridem fuerit ea uitæ integritas, aut potius, cum id fieri uix possit, ipsius se amatorem ostenderit, cuius in sacra historia ad auctoris exemplar nobis est imago depicta. Quæ cum ita se habeant, atq; harum impenfarum, quæ, qualiscumq; causa homines ad largiendum impellat, multis prodesse uidentur, cautior ineunda sit ratio, ne contrà, quàm fieri deceat, odium aduersus auctorem nascatur ex beneficio, de apparatibus ludorum, de theatralibus pompis, de curriculis equorum, reliquisq; huiusmodi dici quid poterit? tantum quidem abest, ut, qui de re familiari ob studia leuissimarum rerum quicquam immisnuit, profit alicui, ut uel multis obfit; dum uoluptatibus irretiuntur, qui maximè sunt ab his tanquam meretricibus fucata facie miseròs, incautosq; fallentibus amouendi; sitq; præterea in re leui opulentia leuissimus ostentator. Quare liberalitatis huiusce, in qua inest leuitas quædam, genus omne reijciendum est, præsertim à nobis, quibus uera dei sapientia instructis non facta tantum, sed dicta etiam sunt ubiq; præstanda. Ac, si aliquando animi causa exercenda sit, uoluptatem moderatam aliqua sequatur utilitas. Verum perrarò id fiat propterea, quòd rei ludicra paulò maior cupiditas nimia leuitatis iusta obiurgatione non caret.

Ludi sunt illi probandi, qui & honesti sint, & ciuitati utiles; cuius rei causa potissimum sumptus huiusmodi facere cum oportebit, qui in hoc quoq; beneficium se præstare uolet. Atq; hac ratione priuatis cuiusq; bonis rei. p. licebit uel ad utilitatem, uel ad suum ipsius ornamentum frui. Beneficentiæ autem fructus, quem ex altera parte horum bonorum (ea autem sunt honores, magistratus, imperia) percipit hæc à priuato ciue, potest esse uberri-
mus. In quo præcipiatur, primum ut uideat, examinet, & perpendat, dignum ne aliquo honore se præstare possit, & in quo rei. p. operam suam nauare; ne, dum beneficus quis esse uult, eius administrandi stulta, & imprudens ratio afferat aliquod ciuitati detrimentum. Quam in partem tam multi peccant, ut paucos admodum reperiatis, qui non malint aliena sibi uendicare, quam his, quæ fortasse interdum possunt duci propria, spoliari: estq; præterea ingenui hominis, nolle profiteri, quod nescias: ut hoc sit loco haud contemnendi beneficii in rem. p. prouinciam, quam humeri ferre non ualeant, etiam oblatam recusare. Dein, ut, qui honorem petit à rei. p., aut à principe, ac rege (nam is rei. p. personam gerit) animum ad petitionem afferat erga eos ipsos beneuolum, à quibus is defertur, auiditatemq; præcipuè pecuniæ, si quæ stuosa sit prouincia, frenet, ac moderetur: se ipsum enim tantum respicere, id quod pleriq; faciunt, cum iniusti est hominis, tum uero abiecti, & nihil magnum, amplum uel cogitantis: nec nisi ingratus in referenda gratia esse potest, qui non beniuolentia antè complectatur, à quo speret honore se auctum iri; nec iustitiam ullo pacto colere, qui abuti cogitet beneficio ad quæsum, quod sit ad aliorum utilitatem accepturus. Tercio loco, ubi & ius

res aliquis suas ad onus fuerit dimetitus, & ad industriam amor in benemerentem socium se addiderit, sequitur cum honestate coniuncta petitio, hoc est, ut ijs artibus nitatur honores assequi, quæ uiro bono, proboque dignæ uideantur: non gratia, non pecunia, non opibus amicorum: sed industria, studio, & uirtute accedat ad rem. p., plus ut huc ad iuuandum afferat laboris, quam inde sibi capiat de lucro uoluptatis. Meminerit ea à se queri, quæ communis utilitatis, non priuatæ gloriæ, non quæ sus, conseruandæ rei. p., non expilandæ, ac delendæ causa dantur: nihil huc asferri oportere, nisi expolitum moribus, consilio maturum, elaboratum industria: dimicandum sibi esse integritate animi; ingenij uiribus; uitæ innocentia: neque enim non potest magnopere prodesse, qui his innixus adminiculis honores adit, quibus hos assequutus possit patriam aut cadentem fulcire, aut erigere prostratam, aut florêtem exornare: quarum rerum nulla planè spes est, ubi malis artibus in hanc arcem imperij uiam sibi quis munit. An, si nullum aliud hinc extet beneficium, non est illud maximum, quo uiri eius probitate ciuitas afficitur, qui, cum nouerit ea in re, quæ cuncti mortales putant se cæteris antecellere, cupiditatem temperare, tollit omnem honesta contentione discordiam, quam mala ambitio, & plus æquo honoris appetens animus in plerisque parit: nec patitur ea dimicatione, & pugna ciues inter se confluctari, qua ciuitates multæ, hæcque amplissimæ sunt deletæ, dignitatemque cum libertate amiserunt: Proximum autem huic illud est, ut alteri ne faueat, ne uel auxilium præstet ullum, qui sibi non eandem rationem in hac petitione seruandam esse decreuerit, quam ipse ingressus exemplo edoceat huic esse retinendam: aut potius mo-

lientem aliquid, aditumq; ad imperium, munus'ue fraude pertenz
 tantem tum monendo, tum etiam increpando auocabit: nec sinet
 aut ex ambitione turpi amentis hominis rei. p. ullum infligi uul-
 nus, aut, quem diligere oporteat, turpiter ignominia, ut aliquando
 accidit, ex repulsa concidere: coniungetq; beneficium publicum
 cum priuato; qui una, eademq; opera eius, quem honore indignis-
 simum uiderit, animum dominandi libidine flagrantem, quacumq;
 poterit, ratione comprimet, ac sedabit. Quanto uero illud maius
 est beneficium, in honoris petitione adiuuare, à quo ciuitati maz-
 gni alicuius boni spes explorata esse possit? planè nihil non tum
 agendum est, quo & faueatur amicitiae, aut potius uirtus extol-
 latur; & ea in re, à qua gubernanda cum temeritas omnis, tum
 cupiditas abesse debet, rei. p. consulatur. Age uero quid faciat, qui
 priuata fortuna contentus statuerit nullo tempore rem. p. atting-
 gere; siue magnitudo cogitationum, onerisq; deterreat; siue sa-
 pienter moderandi, eaq; , quæ recta postulat ratio, perficiendi
 desperatio, quæ proficiatur ex stulto rege, aut populo plerumq;
 saniora consilia abijciente; siue otium minus illud quidem proz-
 bandum delectabit, uocet autem aliquando res. p. ipsa hominem,
 uelitq; in aliquo dignitatis gradu collocare? an non tum is in maz-
 ximis præsertim eius periculis è sententia decedat? nec, cui mos in
 primis est gerendus, parendumq; imperanti, aduersetur? præfer-
 tim si, quod illa à ciuè auxilium implorarit, ei hoc se præstare
 posse intellexerit. Nec debet aut cum ipsius periculo damnare
 stultitiæ, quam suo possit adiuuare consilio; aut, quod in nonnullis
 aliquando accidit, ne forte sit beneficiorum inimica futura, ue-
 rerit: à qua nihil hunc, præter fructum pietatis, expectare uoluz

mus. Incusandiꝑ sunt illi, qui patriam quandoq; aut ingratam ac-
 cusauerunt, ubi ne ossa quidem, ut P. Cornelius Scipio, condi-
 uoluerunt; quæ ea conditione gratis acceperant, ut cum fienore, si
 possent, redderent indigentibus; aut sunt delirantem aspernati, quale
 de Platone legimus; quæ sua sapientia pro ipsorum uiribus ad
 sanitatem reuocanda fuit. Quid? si ipsa ultro inuitet neminem;
 malit autem in deferendo munere deprecatorem, ostendatq; in
 hoc haud paruum à se iniri gratiam; imprudens autem, nesciensq;
 periculum aseat, quod ciuis honorem uel negligentis, uel minus
 querentis uirtute, industriaq; propulsari possit, permanendum ne
 huic in sententia malum imminens prospicienti, tantisperq; ex-
 pectandum, dum supplex illa porrigat manus, aut ad susceptio-
 nem muneris ui compellat abnuentem? An potius, multi, si uno
 confici res non possit, adhibendi sunt deprecatores; quærenda suf-
 fragia; ambiendus honor? causa enim honestissima laudabilem
 tum ambitionem facit; commendaturq; culpa, quæ cum pietate
 coniuncta ambientem à grauissimo scelere uindicat impietatis. In
 Catone reprehensa est grauitas illa stoicorum in tota eius uita
 admirabilis, præterquam in petitione consulatus; quo tempore
 fuit ea minimè necessaria: debuit enim cuidam sibi institutæ di-
 gnitati præferre salutem populi romani, honoremq; illum sup-
 plex petere, qui cum tanta coniuncta uirtus multis, magnisq;
 eius malis facile mederi poterat; præsertim cum & certa spes
 adipiscendi posset allicere ad prænsandum, & hanc in uiro rez
 missionem de summa seueritate mos ciuitatis excusare, aut potius
 philosophis etiam ipsis probatam efficere uideretur. Si uero rei
 huiusce ratio ita sit instituta, ut excusationem omnem, & cau-

sam, etiam si honestissima sit, reijciat ambitio, eum, cuius sit spes
 etata, & probata uirtus, rem. p. tantum oportet admonere, rogare,
 obtestari, siqua urgeat necessitas, aut tempus, si honoris pos-
 sulet amplitudo, si maiestas requirat imperij, ut sapientissimo in
 primis rerum moderatore sit opus, salutis, dignitatiq; sue confus-
 lat; nihil temere agat, deligat, quem bonum, integrum, ac prus-
 dentem norit. Studium præterea suum, operam, industriam de se
 semper modeste loquendo polliceri. In quo quidem, ut cæteris ne
 desit exemplum ad immitandum clarissimum, Reginaldi Poli
 Cardinalis Anglici præcellentem, ac propè diuinam uirtutem,
 magnitudinemq; animi & præsens ætas effert in cælum, & pos-
 teritas omnis admirabitur; qui nec fortuna regia, qua, præter
 cætera, is excellit, semper amplissima quæq; spectante impulsus,
 nec eius gloriæ, qua maxima hominum pars intumescit, amore
 protractus mortuo Paulo III. Pont. Max. summum pontifica-
 tum, quo honos nec excelsior, nec augustior ullus esse potest, nec
 ambiuit unquam; quia hic sit ambire nefas, ubi ex omni senatu
 alicuius in pontificem cooptatio tota deo ipsi per nuttenda est; nec,
 multorum cardinalium magno consensu cum deferretur, recusauit,
 cuius deferendi alterius esset facultas; nec creationem pauco-
 rum intercessionem impeditam nisi seruato more, institutoq; ma-
 iorum approbavit, qui nihil æquè gratum, charumq; habeat, atq;
 id, quod piè, sanctèq; latum, scitumq; esse constat; tantò quidem
 Catone melior, & præstantior; quantò stoica uanitate Chris-
 tiana religio; cuius cultor est eximius, cernitur & perfectior,
 & diuinior: ut ex eorum numero, quos uidemus & maximè pios.
 & memorabiles uiros, hunc unum sine controuersia habeamus,

qui & pietate, & consilio, & uitæ sanclitate par illis esse uideatur, qui pro Christiani nominis tuenda, & augenda gloria ingentes labores olim magna cum pietatis laude susceperunt. Nec à tanto uiro licebit nisi optima quæq; expectare, si ad non mediocrem sapientiam summa quandoq; auctoritas accesserit: qui nunc, quum uidelicet uis est eius imbecillior ad promerendum, quæ est ille humanitate uniuersos & amore, & quibus potest, officijs etiam amicè prosequatur. Non minus, inquit Iulius, egregia, ac præclara de Polo, quàm uera, narras; quorum planè teste me uti potes, qui tum unà aderam, nec, nisi perrarò, ab eiusdem latere discedebam. Quo tempore quæ illum commentari, quæ dicere, quæ de pietate literis mandare uidi, nihil tum eorum cogitantem, quæ plerosq; nostri ordinis dies, noctesq; magnopere angebant; animo præterea tam sedato, ac tranquillo, ut in illa perturbatione rerum, dissensioneq; partium hominem nihil tum moueret, nisi, quod minus è re. p. Christiana esse uideretur: ad extremum tam moderatum, & constantem, ut eadem æquitate animi, eadem lenitate, eodem habitu oris abeuntem omnes uiderint, quo penè summus Pontifex omnium fere gentium prosequentibus uotis comitum illud est ingressus. Sed quæ tibi huius rei in mentem uenit? nullum sanè exemplum abs te afferri potuit, quod aut mihi gratius, aut ad rem commodius esse posset. Atq; hominem quidem hoc pacto malo beneficium, quàm quo cæteri, quos ego leges rim, aut audierim, beneficentiæ facultatem largitione tantum, aut opera metientes esse uoluerunt. Neq; unquam, nisi tu docuisses, existimassem, illum, qui, ut multis prosit, statuit sibi lædendum esse neminem, ita uiuendum, ut nihil cogitet, agatq; nisi,

quod rectum, laudabileq; sit, etiam si non det quicquam, aut nulla in re alteri operari ferat, beneficium & esse, & dici posse: multoq; facilius est aditus ad hanc ipsam laudem; quam putaram, aut etiam, quam aliquot ante dies uideris ipse statuisse. Qui, si recte memini, rem ita difficilem esse dixisti; ut, si non omnino auocare, multorum ad eam incitata studia, at certe, si te audiuisent, retardare tua potuerit oratio: solent enim, ut ex te audio, omnes, quibus otium displicet, alacriores multo esse ad ferendum laborem, quem humanae uires non tam difficulter superare possunt: si is Herculis humeris par fuerit, quamplurimi assequendi desperatione franguntur: ita sit, si haec uera sunt, ut, cum multi in cursum se dēt, pauci, quibus suppetunt uires, metam attingant, subsistant reliqui nimis graui labore fatigati. Quare hodie meis auribus admodum grata haec affers: multoq; sum in spem, quae cupio, adipiscendi erectior, cui contentione leuiore currendum est: nisi tu aliquid ad haec. Gratiore, inquam, illis possunt haec acciderē, quibus optare magis, quam habere contigit, quorum inest in multis ad inanem gloriam cupiditas, in paucis ad ueram usus: tibi uerò Iuli propterea magis laetandum est, quod & habes iam, quod dare potes, & summo studio nunc petis, quo non multo post immortalis dei beneficio licebit uti: hoc ubi paraueris, iuuenem optimis instructum artibus, & disciplinis imbutum sequetur mox ex beneficentia cumulata laus: quam scito nunquam te consequi posse, nisi uirtutem cum ista opulentia, & iuuandi facultate coniunxeris. Solae autem diuitiae, atq; opes tantum abest beneficium efficere ut possint, ut etiam periculum sit, ne & tibi ipsi maxime, & ceteris, si uti nescias, detrimenta multa sint laturae: sunt

enim fomenta libidinum ; quas in magna peccandi licentia haud facile compeſcas, niſi rationem ducem acciueris. Ei autem, qui ita ſe inſtruxerit, ut ſeruata ſemper honeſtate diues alteri ; & potens eſſe, quàm ſibi, malit, ex beneficio tantò uberior exiſtit laus, quantò difficilior eſt uirtutis uſus, ubi plus relinquitur ad peccandum loci : ut (in quo informando dudum noſtra laborat oratio) conſenſu gentium beneficus ſit is maximè, qui & habeat, in quo alijs uſui eſſe poſſit ; & ſui minus amans magna animi aſcritate beneficium prudenter locet. Quare & uera illa ſunt, quæ tum de rei huiuſce difficultate diſſerui, & hoc poſtrènum omnibus maximi boni ſpem excitare, & ad ſequendum animos inſſammare poteſt. Nam & uirtus, quam in dando beneficio ſemper ducem ſequi oportet, haud facile acquiritur, huiuſq; nimirum omnis eſt laus : & animis ad promerendum incitatis præmium ab immortalī deo conſtitutum, licet beneficiorum collatio nulla ſecuta ſit, ſatis declarat, ad iuuandum propenſam afferre uoluntatem, eſſe ad cultum beneficentiæ & neceſſarium, & præcipuum. Hoc autem quiuis aſſequitur, qui uirtutem colere didicerit, eam, ex qua habet in primis, ut & pius ſit, & iuſtus : iſq; nolle non poterit, niſi, quod alteri profuturum cognouerit : ut & beneficus poſſit eſſe, qui uult ; & uelle, qui dei ad ſe uocantis ope nixus. in primis ſuo quoq; ſtudio ipſe præclaris actionibus pridem a ſueſcere didicerit. Atq; hoc quidem loco uoluntatem eam poſſimum animi appetitionem accipito, quam tum demiffi cœlitus radij illuſtrauerunt, atq; expurgarunt, tum diuturna rectè agendi exercitatio rationi parere edocuit. Putabam, inquit Iulius, leue admodum negotium iſtuc eſſe propterea, quòd nihil habenti nihil dare alteri,

alteri, facillimum est; & ab unoquoque uelle potissimum exigere uidebaris: in quo, ut uideo, non satis ex te perceperam, quid uelles, aut potius non memineram. Nam, quoniam tu me nunc admones, planè recordor te in hac tota disputatione non ea quidem ratione hominem beneficum instituisse, quæ plerisque philosophis placuit, sed multò potiora, & ueriora spectantem Christi doctoris omnium maximi, atque optimi ad extructionem operis normam adhibuisse, qui beneficium non pretio, sed uoluntate dantis æstimaret; & hanc solam, tanquam beneficium ab eo postulauerit, cui cætera defuerunt: etenim eiusdem Saluatoris oratione maior fuit inopis aniculæ liberalitas, quàm eorum, qui, quæ supererant, tanquam minus necessaria in ærarium sacrum contulerunt. Quoniam, inquit Antonius, Iuli rem optimè tenes, hortor, ut ille luc, unde digressa est, huius orationem reuerti sinas. Pergat modo reliqua, inquit Iulius: libenter, ut feci hætenus, audiam dicentem. Ex his, inquam, patere arbitror quales erga rem. p. priuatos ciues, quo ue pacto ei utiles esse oporteat. Illud autem reliquum est, ut, cum id præstiterint, se inuicem mutuis officijs studiosè complectantur. In quo, ut latius suo dicetur loco, primum necessitati consulendum est, dein personarum dignitati. Atque cum uirtus omnis multa nos cauere præcipit, tum uero beneficentia in primis: sapiens enim, & moderata collocandorum beneficiorum ratio tantum ad rerum conseruationem prodest, quantum stulta, & temeraria officit. Singula autem differere uelle nec præsentis temporis patiuntur angustia: nec necesse est consectari riuulos, cui propositum fuit tantum fontes quosdam aperire, unde ipsi abunde haurire possetis: præterea beneficium ita instituere alios

rum cancellis egressos, ut & bonum quendam, & probum hominem effingentes bonitate, probitateq; omni cum ad aliorum utilitatem uellemus uti. Est autem locus hic multarum questionum ferax; quas, quoniam sunt ab alijs explicatæ, modo præterire libet. Nunc illa tantum breuiter explicabuntur, quàm multis modis quibus alteri prodesse possit; beneficia quæ maiora, quæ uel minus, censeantur; postremo quæ in horum collatione seruari oporteat. Multa igitur beneficiorum sunt genera, latissimeq; patet uis hæc benemerendi de altero: inest enim in unoquoq; supremo genere eorum, quæ rerum natura continentur: quod, cuiusmodi sit, exemplorum quorundam quasi descriptio breuis explicabit. Licet homini opulento, ac diuiti aurum, aut argentum non habenti largiri; idq; quantum ei siue placuerit, siue necessitas egentis ipsa postulabit: aut doctori præstantissimarum rerum scientiam tradere discipulo. Quod beneficium quoniam & pulcherrimum est, & uirtutis opus, eiusmodi esse dicimus, ut ad ponderandum lancem adhibere necesse non sit. Iam si captum à prædonibus diuitem pecunia quis redimat, cui, nisi tum succurratur, in posterum ad recuperandam libertatem nihil domesticæ profuturæ sunt opes, nonne is beneficium confert in hunc maximum? nihil tum, si det, hominem subleuaturus, cum hisce copijs domi affluentem uiderit. Quem si apud suos in honoris petitione iuuat, aut colat, gratiam sanè maiorem ab eodem ineat, quàm si istæc alibi faciat, ubi aut nullus, aut perpauci norunt. Alio autem multis modis alteri prodesse solet; ut cum medici manus uulnus ferro secat, sanitatemq; affert ei: qui ferendo ipse quoq; in beneficij collatione socius esse non recusat. Deberi quidem illis plurimum

nemo non dicet, qui aut hostes patriæ inultos esse nolunt, aut pro illa iniurias, damna uel ultro patiuntur, interdum etiam mortem contemnunt. Fuit ad exemplum aliorum erga rem. p. suam cuius eius singularis pietas, qui filium Catilinæ nefarii hominis in facinore socium retractum ex itinere iussit interfici: at non multo post Ciceronis non minor laus, qui exilio, & ruina suarum rerum Romam iterum seruare maluit, quam dimicando cum Clodio ciue pestifero iis periculis obijcere, à quibus consul uigilantissimus eandem antè liberarat, ad extremum uitam M. Antonij nefando scelere amissurus, senexq; in hac ipsa gloria futurus parum felix. Contra Hannonem pœnorum ducem cum ad Beneuentum. T. Grachus secundo prælio usus esset, Volones, qui segnius pugnauerant, ea pœna multauit, ut iureiurando adigeret, quandiu stipendia facerent, non esse, nisi stantes, cibum, potumq; capturos; ut accubandi facultate sublata quasi beneficio quodam se priuatos esse arbitrarentur. Quanto autem magis mollem, & intemperantem lædas, si lautè in conuiuio accubantem tum excites, ac pellas, cum iam helluari, atq; ingurgitare cœperit? præsertim si serico indutus tenuissimo leuem sub umbra platani excipiente auram in Pausilippo cœnitarit; unde procul in mare prospectus, tanquam epularum condimentum quoddam, Epicuri de summo bono sententiam ualde approbare, ac sequi cogat? Romæ quosdam uillarum situs sic oblectauerunt, ut, quas magnificentissimè exornauerant, in his sæpiissime diuersari uideremus, omnium prorsus officiorum oblitos, & hominis dignitatem turpiter inquinantes: quos quidem homines spoliasses haud mediocri beneficio, si hinc, tanquam è uoluptatum ergasulo, auos

tasses. Atq; gratiam quidem illam, quæ ad aliorum utilitatem for-
 ras ex animo interiore prodit, summa illa decem rerum genera
 obire, ac sese quoquoersus diffundere breuiter ostensum est. Se-
 quitur autem, ut aliquid de beneficiorum inter se collatione dis-
 seramus: hoc enim explicato ratio collocandi beneficij erit aper-
 tior. Errat autem sæpe, qui quale sit, quod dare uult, ignorat: ut
 præter alia detrimenta, quæ hinc permulta possunt existere,
 plerumq; ei obsit, cui se prodesse putat. Multis igitur modis potest
 accidere, ut beneficium aliud alio sit maius: In quo primum illud
 sciendum est, beneficiorum alia natura esse potiora; quibusdam
 alia; altero genere illa continentur, quæ ad cultum animi perti-
 nent, morum præsertim; qui si rectè instituti sint, de beneficio ac-
 cepto haud mediocris gratia auctori est habenda; neminiq; un-
 quam nisi beneficia esse queunt: (quid enim uirtus mali afferat,
 quæ grauiter inimica uitio malum omne, quod ex eo oritur, ex-
 pellendo, quod bonum est, ex se parit?) ex altero habentur, quæ
 omni hominum generi, ætati, quouis tempore, loco, beneficia nemo
 esse dicet: ea sunt diuitiæ, amicitia, opes, honores, imperia, relis-
 quaq; huius generis permulta, quæ prout usus horum fuerit, &
 habenti, & cæteris bona sunt, & mala. Atq; (ut aliud etiam
 magnitudinis beneficiorum inter se discrimen afferatur) am-
 pliora quidem patrimonia relinquunt parentes liberis, si dent ope-
 ram, ut hi discant iustitiam colere, coercere libidines, salutem,
 dignitatemq; publicam tueri, nunquam deferere semper rationis
 præscripta seruantes, quàm si locupletent pecunia, honoribus or-
 nent, & tot agrorum constituent hæredes, ut Crassum facile
 contemnant: quòd illud prius propter se expetendum sit, posterius

hoc propter aliud: alterum semper iuuat; alterum non alios tantum; sed habentem etiam sæpe lædat: alterum per se laudabile sit; alterius tantum usus. Quid æquè homini optandum est, atq; beata illa, & æterna uita? ad quam fuerat is à prima sui origine à suo conditore procreatus; nisi post culpa sua amisisset: ut uel ipsius filij profusione sanguinis tantam iacturam post multa scelera idem immensa pietate resarciret, quem primò sola bonitas ad tantam liberalitatem inuitarat? ergo, qui se duces reliquis ad hanc rem præbent; qui in eo studium, atq; industriam suam exercent, ut hos & iustos, & pios esse uelint, quibus artibus licet illuc reuerti, unde profecti sumus; qui medentur animorum morbis, dici non potest, quanto maius sit horum beneficium, quàm eorum, qui alios instituunt, ac docent, qua ratione sanitatem recuperent salutaria remedia corporibus adhibentes: sunt enim auctores bonis minibus eius boni, quod omnium est maximum. In quo quidem & alias, & nostris etiam temporibus cum multorum extitit insignis pietas, atq; industria; tum uero Ignaty Loiolani hominis Hispani satis honesto loco nati. Is primò quidem (quod magis admire) militiam exercuit; ubi uerò ætatis progressu leuitatem, atq; inconstantiam rerum humanarum uidit, atq; nimis ad has declinanti haud facile patere ad cælum iter, reiectis impedimentis eam demùm uitæ rationem re magis, quam (quod facere pleriq; solent) uerbis, approbavit; qua nulla certè homini est nec animi tranquillitatem quærenti tutior, nec ad ueram laudem aspiranti certior, nec ad omnium parentem deum properanti expeditior: ad rem diuinam animum omnino applicuit. In quo planè & uiri iudicium, & pietatem possis extollere; neq; enim in

angulum ita se coniecit, ut & aliorum conspectum odisse, ac fugere, & quod multis placet, otium quoddam persequi uelle uideretur: sed ad Christi exemplar sese, suosq; effingens societatem quandam saluatoris cognominem ijs legibus instituit, atq; formauit, quæ, qui in eam ascribi uellent, illos iuberent uitam sibi aliorum salute procurare; nec aut deum precando, aut delicta consistentibus aures præbendo, aut artes liberales ferè omnes cuius hominum generi tradendo, aut concionibus ad pietatem instruendo, & cohortando in excolenda domini uinea ignauos, ac desides esse paterentur. Atq; initio quidem pauci admodum extitere, qui institutum sequerentur: uix enim octo, aut decem socios secum is habuit in academia Parisina, ubi primum istuc captum est, quibus uictum in diem ab amicis quæritabat. Non multò autem post istorum numerus adeò est auctus, ut uix credibile sit annorum uiginti spacio in diuersis orbis terrarum partibus tot horum sociorum reperiri conuentus, ipsorumq; studio, atq; opera trans omnem Indiam, regionemq; Synarum in amplissima omnium insula, quam, qui nouissimè primi adierunt, Giaponem Lusitani uocant, esse Christianum dogma propagatum. Qua in re quis non miretur Francisci Xauierij uel charitatem erga eos, quos, cum ne nomen quidem audiuisset, studuit tanto beneficio cumulare? uel acre animi consilium, qui primus rem tantam est aggressus? uel constantiam, qui peruicerit: nimirum uincit omnia pietas uera, cum homini hæc fida comes accesserit. Horum igitur, & quibus exemplum sequi placet, beneficium est erga reliquos homines amplissimum: quòd hinc æterna ijs existat salus. Maiora etiam sunt illa beneficia, quæ secum bona plura ferunt. Ciceroni ab

exilio reuocato, ut beneficium cumulatius effe uideretur, non do-
mus tantum, quam furor improborum solo æquauerat, sed hono-
ris etiam, dignitatisq; insignia, atq; ornamenta restituta. Oma-
nino, qui utile cum honesto coniungit, plus confert, quam si, quod
honestum est, aut utile tantum, conferat: ut, si quis hominem &
prudentem, & probum in honoris petitione iuuat, unde ad per-
tentem honestati adiuncta redundet utilitas, magis hic proficit,
quàm si è munere laus sola comparetur. Id ipsum planè fuerit
auctius, si collatum beneficium uoluptas aliqua exhilarabit. In
creatione nouorum magistratuum, ac regum, aut susceptione mu-
nerum iure magna omnium lætitia dies festi agitantur, ludi ce-
lebrantur, conuiuia lautè apparantur, si omnium consensu probis-
tati, & uirtuti beneficium, & honos deferatur: sin indigni sint,
quibus fauore, atq; opibus rerum gubernacula committuntur, do-
lent animo pleriq; boni præsertim, licet simulatæ lætitiæ ab in-
uitis expressa significatio consequatur. Porro Solonis fuit in
suos ciues ex beneficio legum conditarum laus uberior, quàm
multorum imperatorum, qui uictorias ex hostibus reportarunt:
ille enim & in bello, & in pace ciuitati profuit, in qua iustitiam
quo pacto seruari oporteret, edocuit; ab istis temporis belli tantum
cura est suscepta, qui, milites ut & labores pati, & mortem con-
temnere a fuescerent, elaborauerunt: quarum planè uirtutum al-
tera quouis tempore utilis est, altera aliquando: & quod benefi-
cium magis auget, iustitia si adsit, haudquaquam fortitudo sem-
per est necessaria; contrà, si omnes fortes sint, iustitia omnino est
opus: ut, quò minus altero quopiam ad sui cumulum indigeat, illud
utiq; beneficium maius esse uideatur. Plus quoq; iure illi debetur

interdum, qui aut pro utilitate, aut pro dignitate alterius plus negotij suscipit; amplificatq; officium istud laboris, qui impenditur, licet natura sua tenue sit, & paruum: debet enim semper dantis animus spectari, non munus. Accidit igitur nonnunquam, ut, nisi beneficium ex se laborem omnem vincat, eius beneficentia sit gravior, & maior, qui minus contulit, si ad eam plus operis adhibuerit, quàm, qui tantundem, aut etiam plus interdum, si laboris minus: ut, si quis ad alterum orbem huius rei gratia profectus aliquid huc adueverit, quo amicum, aut regem muneretur, pluris faciendum sit eius id munus ab illo, qui accipit, quàm, si alter eiusdem generis aliquid, domi quod habeat, non habenti largiatur. Secus autem in accipiente contingit: nam quò leuiore detrimento, molestiaq; beneficium accipitur, hoc illud est accipienti maius. Multi nobiles Romani in bello aduersus Pyrrhum Epirotarum regem capti: quos ille omnes nullo pretio redemptos ad suos remisit incolumes. Non tam rege magno, & tum uictore dignum fuit in hostes esse liberalem, & humanum, quàm his, quæ in tali fortuna plerumq; ingens accipi solet, nulla iactura dimitti iucundum: aut si quempiam inclusum carcere periculo capitis liberes, quem neq; grauiter multari, neq; antè supplicio ullo torqueri sinas. Præterea dantis beneficium hoc fit maius, quò id est communius: contrà accipientis, quò magis proprium: alter enim tum laudem multò uberiorem adipiscitur: tum, in quo plerisq; suauis est ostentatio, beatiorem, ac fortunatiorem se esse hinc agnoscat: alter aut uirtuti tribui hoc putat, aut iucundum ducit, eo solum frui, quo reliquos carere uidet. Ciceronis in rem. p. romanam merita fuisse maxima, è quibus nullum extitit illo uel

necessitate ipsa optabilius, uel fama illustrius, uel ad communem uniuerforum utilitatem amplius, quo nefarios conatus Catilinæ fregit. Gratiore igitur ei tantæ uirtutis, atq; industriæ compensatio nulla esse potuit, quàm, quæ statim à Senatu allata est: fuit enim & ad facti magnitudinem singularis, & insignis ad gloriam, ut & pater patriæ appellaretur, & supplicatio quindecim dierum illi decerneretur; qui honos antè datus fuerat nemini. Atq; hoc quidem pro natura beneficiorum, præsertim ubi laus quæritur, uerum esse liquet, ut apud illos, qui accipiunt, pluris hæc sint, si aut soli; aut cum paucis æquè perfruantur. Secus autem plerumq; sit, ut eiusdem boni participes alios esse libenter uelint; quo si hos carere uident, permolestè ferunt. Nam quis est, cui amici salus non æquè chara sit, ac sua? non doleat interemptum, cui socius antè periculi fuerit? nec quicquam aut tam inhumanum, aut ad dissoluendam societatem humani generis tam perniciosum esse potest, quàm in omni uita sibi soli bene esse, cupere, nihil alteri. Vult Orestes, ut est in fabulis, esse Pylades: & magno studio Pylades Orestem fingit, quòd uterq; solum uitæ beneficio potiri acerbum putat. Nec omnino falsum illud est, quod uulgo dici solet, felicitatem æternam ei, qui solus fruatur, uideri iniucundam. Itaq; uir beneficus debet maximè ad promerendum eam rationem adhibere, ut una eademq; opera, & officio, si potest, multis proficiat: hoc enim accipienti beneficia erunt maiora, quòd ad plures, qui amici, aut affines sint, ea redundare uidebuntur. Magnitudo quoq; beneficij ex eius cum firmitate, tum diuturnitate nascitur: ut homines sæpius illud malint, & putent maius, quod firmitus, ac magis proprium sibi fore iudicauerint, quàm, quod

fluxum, caducum, & breue; etiam si natura sua istuc aliquantò leuius, quàm illud alterum esse uideatur.

Ego, inquit Terentianus Pamph., uitam deorum propterea sempiternam esse arbitror,

Quòd uoluptates eorum propriæ sunt. nam mihi immortalitas Par' est, si nulla ægritudo huic gaudio intercesserit.

Sentit ille ad eam, quam cupit, fortunam perpetuitatem uim habere maximam. Nec ab re à Christo ipso ueræ felicitati æternitas semper adiuncta est; licet superuacaneum id esse appareret: quòd, quos in filios dei se adoptare promulgaret, is, ut nomen æternitatis prætermitteret, satis rem ipsam apertè polliceri uidebatur. Sed ueritatis ignaros allocutus eo sermone uti uoluit, qui à quouis facile percipi poterat: uiditq; multò alacriores ad sequendum se fore, si, quod omnes intelligebant, beatam uitam nunquam desituram esse diceret: nunquam enim bono carere, bonum est maximum. Neq; is, qui potest plurimum aut ingenio, aut opibus, non debet emitti, ut beneficiorum, quæ confert, memoria quammaximè diuturna extet. Hæc reliquaq; huius generis diligenter inspicere oportet, atq; beneficia inter se conferre: uidendumq; primò quid, quale, quantum uè sit illud, quod datur: sic enim, quid ad beneficentiam maius sit, facile cognoscemus: dein cui, & quando dandum. Quæ maximè scire opus est, non modo ut à collatione beneficii ea temeritas absit, quæ nocet magnopere, sed etiam, ut hinc quiuis plus prodesse, norit. Beneficium enim tum eius conditio, qui accipit, tum ratio temporis, & loci gratius efficit, & maius: interdum etiam is, qui confert. Duo quidem omnibus accidunt maxima, & optatissima, salus capitis, et assertio.

Prioris uis est maior: nihil enim cuiq; charius uita ipsa, si naturam spectemus, à qua nullum ijs omnibus, quæ cælo continentur, minus tributum est hoc maius: si uirtutem, quæ hominis unius est propria, mors hæc, quæ à sapientissimis philosophis, hoc est, à Christianis naturalis dicitur, probitati posthaberi debet. Posterius non tam necessarium, quam iucundum: uitam enim ut quis gratam ducat, si quicquam aliud, efficit libertas: contra seruitus ingrata, etiam si ea sit & clemens, & iusta, præterea nulla ab impio domino uiolenta mors metui à seruo possit, quæ, ut est apud nos, pœnarum irrogatione prohibetur: idq; tam est alteri proximum, & simile, ut seruitutem nonnulli morte pœiorem ducant. In utroq; igitur maximè elaborandum est: nec quicquam pœtermittendum, quod non agatur sedulo, ut & periclitanti, & in summum capitis discrimen uenienti succurratur, & aut retineatur libertas, aut adempta recuperetur. Laudandosq; ex nostris censeo, si qui reperiantur, qui, quos è Maumethanis captiuos habeant, hos studeant primum ab illa impietate auocando, quæ specie quadam pietatis incautos fallit, & ad cultum ueri dei suasionibus compellendo manumissos facere: dein, ubi hoc ab obstinatis animis, & quales sunt eorum pleriq;, salutaribus monitis parere nolentibus haudquaquam exorauerint, remittant nullo pretio, aut leui admodum redempta libertate ad suos, quos, pari ut cum cæteris conditione essent, omnes natura procreauit: uim enim hoc pacto afferre haud delinquentibus, magis latronum est, quam hominum non humanitatem tantum præ se ferentium, cuius illi uidentur atrocissimi hostes, sed etiam deum ducem sequentium; cuius benignitas non abuentibus pateat uniuersis. Tantumq;

abest, ut quas à Christo accepimus, leges sua leant damni, mali uel quicquam istis hominibus inferre, ut etiam bona omnia ipsis hostibus precari nos cogant. Quòd si beneficium est haud paruum, liberos esse uelle, quos Satanæ tenebricosus carcer inclusos tenet, quantum illud tandem erit, quo his libertas redimitur, quos uera, ut eius uerbis utamur, libertate donatos, liberi perpetuò ut essent, sibi dei filius hucusq; reseruauit. Verum minimè necesse est ea nunc repetere, quæ paucis uerbis supra explicauimus, cum, præter cætera, hoc quoq; redimendorum captiuorum munus in primis rem p. administrantibus assignaremus: satis constat & præclarum esse largienti, & accipienti gratum. Illud præterea negotium, & cura, quæ suscipitur in alicuius ab altero propulsione iniuriæ, solet esse tam grata multis, tam iucunda, ut nulla maior hac planè possit ab his iniri gratia: nec eius, qui potest, debet hacce in re cuiquam deesse patrocinium; quod sit omnino necessarium ad retinendam in ciuitate concordiam. Videreq; haud paucos licet, qui existimationem læsam propè pueriliter non alia ratione, atq; in armorum uindicare student: hinc iurgia quotidie, & contumeliæ graues: hinc illæ tanto apparatu uerbosorum appensæ in triuijs prouocationes: hinc gladiatorie pugnae: nihil enim homini, qui sit ad honestatem natus, æquè execrandum est, atq; dedecus, turpisq; ignominia: quam qui alicuius ope effugerit, is lætari poterit se beneficium haud mediocre ab eo accepisse. Quid? parum ne de altero meretur, qui non modo fama oppugnatum tuetur, sed etiam aut ipse interdum cedens ei honorem desert, aut ad consequendum socium se adiungit? hoc certè beneficium tantò debet illustrius uideri, quantò uirtus, cuius insi-

gne habetur honos; ornamentis omnibus fortunæ sapientum est opinione præclarior. Quamquam illud prius necessitate ipsa opusabilius, posterius hoc uoluptate; & alterum, si negetur, id omnino interimit, quod alterum cumulatius refert: licet enim plerosque turpes, & probrosos homines extollat gratia, aut pecunia prouehat ad honores, nunquam tamen possunt efficere, ut, præter ignominie labem, quam eluere in tota uita difficillimum est, non & quasi fures esse, & alienis uestibus tegi, ornarique uideantur. Itaque nominis cuiusque antè defendenda est existimatio, quia honoris immunem esse tolerabilius sit, quam; quod penitus homine indignum est, aut ignominia, aut flagitio, aut scelere contaminatum turpiter iacere. Hoc ubi quis effecerit, famamque probitatis, qui uerebatur amittere, retinuerit, sequetur alterius muneris expeditior, & cum laude coniuncta susceptio; quem laborem hoc æ lacrius oportebit excipere, quod est laudabilior opera, quæ & uirtutem extollit, & plerumque, si prudenter desigatur, publicæ utilitati confert. Iam uero res familiaris, si ampla sit, cuique facultatis plurimum suppeditat ad cultum beneficentiæ. Porro beneficia illa cum maiora sunt, tum etiam gratiora, quæ necessaria; ut, si cui desunt, quibus uitam, & suam, & liberorum sustentet, huic alimenta sufficere, captos à prædonibus redimere, in filiarum collocatione adiuuare; non deferere, cuius ui, aut casu aliquo periclitentur fortunæ; & alienum suscipere, præsertim, si sit aut necessitate aliqua, aut fortunæ culpa contractum; opitulari in re uel seruanda, uel, si necesse sit hoc facere, etiam augenda; præterea, si quem uiderit propter inopiam studium ad alicuius artis perceptionem conferre non posse, unde post aut ipse sibi uictum

compareret, aut emergat, tollaturq; ad gradum aliquem dignitatis, hunc uel auxilij nihil implorantem, ultro etiam pollicentem benignè allicere ad beneficium, uel petentem amanter, & constanti cura complecti. Necessitatis autem non una est ratio: nam aut ab eo, qui accipit, aut à tempore, aut à loco hæc trahitur. Sunt quidem permulti, quorum misera, inopsq; fortuna multis rebus eget ad tuendam uitam: quidam, ut non desit uictus, amicos nullos habent: alij hos tenues admodum, & nullius ferè nominis, qui ne à se ipsis quidem aliorum iniurias arcere possunt. Qui tuetur imbecillum à uiolentia, nec finit in re familiari à potente innocentem lædi, tantum planè uidetur huic prodesse, quantum, si de arca depromat, quod nihil habenti largiatur: utriq; enim eadem in re succurritur: alterum, quo uis repellitur fortasse impensa minore constat: sola enim opera plerumq; id efficitur: non tamen tæcirco leuius esse dixeris: simul enim & egentis necessitas ope subleuatur, ut sit pietati locus, & iustitiæ patrocinium suscipitur, quo propè uno ciuitatis salus ipsa continetur. Itaq; quò miserior fuerit hominum conditio, aut quò maior auxilij necessitas, hoc plus conferet is, qui beneficium his se præbere uolet. In quo illud maxime cauere oportet, ut in primis ei hominum generi consulatur, quorum res ex ampla, aut liberali fortuna ad extremam inopiam recidit; aut opes ex alto, & excelsa loco, ut aliquando accidit, ad imum præcipitatae corruerunt; præsertim si aut aliqua necessitas, aut casus, aut aliorum improbitas, non ipsorum culpa ulla tantam ruinam tulerit. Quanquam ne culpa quidem omnis apud Christum ueniam excludit: qui patris erga filium indulgentiam laudet adolescentem perbenigne recipientis, cui pudor

obstabat, ne panem sibi hostiatim quæreret, cum libido bona profudisset. Auget hoc beneficium coniuncta necessitati accipientis dignitas; cuius nimirum habenda est ratio: nec, qui dat, expectare debet, ut postulet, qui egeat: non enim patitur dignitas petere; cuius ea est uis, ut aliquando necessitati præponderet. Licetq; uideri nonnullos illustres, & animo pari fortunæ uiros, quos maiori gratia deuincies, si honorem his defendas, quàm si in salute iuues: ex quo fit, ut interdum eius, qui accipit, splendor familiæ, aut uirtutis nomen plus commendet beneficium, quàm ratio necessitatis. Tempus quoq; & locus beneficij necessitatem affert, quas occasiones si è manibus elabi sinas, haud postea beneficus esse possis. Nam, si apud Indos amicum Romæ locupletem reperiās, cui aut longitudo itineris alimenta absumpserit, aut casus aliquis, tempestas uel abstulerit; ipse autem his rebus abundes, quibus egentem seruare queas, non ne inhumanus sis, & impietatem præ te feras, si, quem procul à patria, & conspectu suorum tanta locorum intercapedine distinent, efferas, & incultæ gentes, homini non opitulere? Frustra autem M. F. Camillus patriam è ui barbarica erepturus cum manu suis prestò affuisset, si in apparatu, aut in itinere longiorem traxisset moram: captam enim ab hostibus arcem capitolinam offendisset, in qua romani nominis reliquæ seruabantur: in tempore ipso ducis aduentus à gallis liberauit obsessos. His, ac huiusmodi meritis, quæ modo diximus ab ipsa necessitate exigi, cuius enitendum, ut, quos potest, & æquum est in primis, sibi deuinciat. Atq; huius quidem liberalitatis, quæ cum naturæ maxime consentanea est, non uerò à Christo commendatur, & auribus inculcatur humanis, si quis hisce temporibus qu-

ctorem quærat ad exemplum, habebit is, quem imitetur, Thomam
 Liliū uirum grauem, & singulari fide, integritatēq; animi con-
 spicuum. Is igitur patria Bononiensis, præter multarum rerum
 scientiam, qua præditus est, hac eius erga multos insigni charita-
 te clarus, haudquaquam uanus opulentiae ostentator cæteris sic
 opes impertit suas, ut, cum necessariorum, propinquorumq; aut
 necessitatem subleuarit, aut auxerit splendorem, quo ille studio
 tamen tam moderatè detinetur, ut nec auaritiam possis accusare,
 nec ambitionem damnare, & amicis egentibus certum non desit
 hinc auxilium, & uiri boni, præsertim si quos; præter probitas
 tem, doctrinae fama præclarorum studiorum amore flagranti
 conciliauit, benignè foueantur. Interea tamen ipsi de censu nulla
 sit diminutio: qui etiam honestissimis eum rationibus augeat: ne,
 quam sola honestate impulsus libenter exercet, exhauriatur be-
 nignitas detrimento multorum. Non desunt autem, ut ampliissi-
 ma illa excipiantur, quæ aut danti interdum maioris sunt ponder-
 ris, quàm, quæ ex arca depromuntur, aut planè accipienti gratios-
 ra. Quale illud est exempli causa, quo alteri succurritur, cuius de
 re aliqua agatur apud prætorem causa, aut iudicem, quæ sit na-
 tura implicatio, obscurior uel: aut quum aduersariorum conatus
 reprimuntur, iustusq; franguntur; qui, cum causa inferiores sint,
 aut fraude, aut gratia, aut pecunia superiores esse uolunt. Quo
 in genere opera ea gratissima est, quæ aduersatur gratiæ, quæq;
 fauorem excludit, nec sinit libidinem ullam dominari, ubi de sola
 æquitate, aut iure disceptatio est. Deniq; in hoc toto iudiciali fo-
 ro multum loci relinquitur ad beneficentiam industriæ: quam ue-
 nalem omnino habere & turpissimum est, & ciuitati pernicio-
 sum:

sum: nec officia ferè ulla reperias his esse graviora ; quibus paria de re interdum leuissima uictoria maiorem affert laetitiam uictori, quàm utilitatem: quæ nulla, aut perexigua hinc elicitur: interdum etiam spem lucri damnum, quod subsequi solet, longè exuperat uoluptate de uictoria sola compensatum. Quare his omnibus præceptum sit, qui se ad has forenses causas contulerunt , primò quidem, ut nihil contrà æquitatem contendant, ne uel malitiosa illa iuris interpretatione utantur ad beneficium alterius : nulla enim beneficentia illic esse potest, ubi ex alterius incommodo alterius commodum comparatur ; aut ubi aliquis ad iniustitiam delabitur uirtuti huic maximè contrariam , cuius uis sola est, ut prosit, nunquam uerò obsit. Dein aut quæsum contemnant ; qui , ut non tollat omnino beneficium , illud quasi contaminare uideatur: aut, si præmium quæritur labori, sequantur id leuiore cum iactura clientum ; qui hac præsertim ætate maximum putant beneficium, si aut patronos , aut aduocatos uel suarum rerum dispendio fideles inuenerint . Hoc æquitatis patrocínio multi adèò obstringuntur , ut ferè cuius beneficio ipsum aliquando anteposant. Sunt & alia permulta huius generis, quæ, ut dixi, maiora, quàm ex se sint, aut tempus efficit , aut locus , aut casus aliquis, aut , quod sæpe ex non multa opera sequitur, rei alicuius ingens etiam nonnunquam insperatum lucrum , aut alia his similia: quorum singillatim uniuscuiusq; certa regula nulla tradi potest. Sane, quod alteri beneficium est, si transferas ad alterum, idem huic detrimento erit: aut eidem alias nihil id proderit: quin potius nocebit, quod in præsentia maximè est utile. Ad hæc omnia opus est consilio moderato, & graui. Quid? parum? ne refert quid in dan-

do, laborando uē pro altero spectetur? à quo datur beneficium? itemq; quo pacto istuc fiat? si dei bonitas tantum mouet, præclarè: beneficiumq; omnino est, ut ex his etiam, quæ supra attuli, liquere arbitror, qui uel in minimis rebus hac causa prodest. Si uero aut utilitas, aut gloria, aut uoluptas, aut aliud quippiam quærat, nomen utiq; benefici amittit, qui dat, licet, qui accipit, beneficio perfruatur: ad beneficentiam tamen propius accedit, qui gloriam sequitur. Verum, quid impellat, ne semper exigatur ad amissum: ut enim præstantissimum, ita, qui omnino hoc sequatur, difficillimum est, ut inuenias. Planè optandum est, ut quivis, siue hoc, siue illud moueat, multis studeat prodesse: nullo enim tantum nodo æquè continetur incolumitas rerum, & salus, quam non uiolatur æquitas, atq; hac mutua officiorum collatione; cuius cum auctor primus fuerit necessitas, non est mirandum, si spes sola alicuius lucri, aut aliud quippiam, atq; id, quod querimus, multos ad gratificandum trahat: quia illud alterum magis sit pietatis, & uirtutis, quam pauci assequuntur, hoc naturæ. Sed, quoniam non de eo, quod semper fiat, sed, quod fieri debeat, nos loquimur, dei pietatem solam habebit præ oculis, qui alteri utilis esse uolet. Nam, quem non utilitas propria, aut metus post mortem futuri mali, sed bonorum omnium largitor deus ad promerendum impellit, is non modo iuuat alterum, sed ipse quoq; tantum lucri facit, ut beneficium non dare, sed fœnerari putes: qui maximam Christi liberalitatem in se exiguo quasi fœnore promouere uideatur. Præterea ad diuturnitatem temporis nulla iuuandi alterum firmitior ratio, quàm, quæ sola recte facti conscientia nititur: reliquæ uerò fluxæ, & instabiles sequuntur earum

rerum naturam, à quibus ipse ducuntur: quandiu enim flos ætatis, & formæ integer in uirgine manet, tandiu amor haud leui ias-
 elura rerum iuuenem flagrantem trahit ad fruendum: qui ta-
 men, ubi ille exaruerit, statim unà cum inani liberalitatis ostens-
 tatione totus exhauritur. Amplificat etiam (id quod dicere exor-
 sus eram) beneficia conditio personæ conferentis: permultum
 enim interest à rege, ne, an priuato, domino, an seruo; diuite, an
 ab inopi homine capiantur. Planè solet largientis dignitas mun-
 nus & iucundius efficere, & ornatiùs, idq; propterea, quòd huius
 collatio sæpe cum honore, qui soli uirtuti debetur, coniuncta
 esse uideatur: is autem hoc maior est, quòd dignior, qui dat. Con-
 trà, quia dignitas nulla inest in opulentia solida, ac uera, gravior
 ut plurimum inopis liberalitas, quàm diuitis, & opulenti: nulla
 enim spes est ab inopia, aut potius nihil tanquam debitum ab ea
 reposcitur: at numerorum acervos in arca congestos domi inclusos
 tenere, ut ad usum aliorum nihil inde depromatur, odiosum est,
 quia beneficium tollat auaritia; cæteris patefacere, potest non
 minus humanitatis debitum, quàm liberalitatis ratione, uideri.
 Iam, si amicus, aut, qui nobis est notior, iuuat, quid mirum? mouet
 hunc amicitia lex; mouet consuetudo; mouet fortassis utilitas
 aliqua, quam ab eo, qui sit ab amicitia alienior, aut ab externo
 expectare non licet. At, quum ab inimico feruntur suppetiæ;
 quum ab ignoto beneficium accipitur, tantò iucundius hoc contin-
 git, quantò auxilij minus petendum, unde aut plus mali metuen-
 dum erat, aut nihil sperandum boni. Nec tantum promerentis
 persona respicienda est; sed, quo modo quisq; iis luc agat, uidere
 oportet, id est, quàm libens, quàm maturè, quàm non segniter:

hæc etiam si desunt, ut seruentur reliqua, minus grata uidetur beneficentia accidere. In quo quidem sunt admodum reprehendendi, qui diutius tenent homines beneficij expectatione suspensos: aiunt enim hoc quasi quadam tarditate condiri. Verum longè errant mea quidem sententia; tantumq; abest, ut sera ista, quam ipsi intelligunt, beneficij collocatio probanda sit, ut (nisi ad hanc rem tarditate opus sit) uel maximè fugienda esse uideatur: ceterum & excluditur à uirtute, quæ ubi maturè opus est factò, omnem tollit inertiam, & nihil eo molestius, quàm bono carere egentem, cuius potiundi certa spes pridem sit animo concepta: præsertim si per eum, à quo tribuitur, celeriter assequi illud possis: idq; perinde est, ac si aquam sitienti post demum propines, quem dudum antè poculo inbiantem torqueri ardore patiare. Atq; in hoc multi usque adeo insuaues reperiuntur & duri, ut ab inuitis beneficium, in quo tanquam ære soluendo fidem suam obstrinxerunt, tum demum exprimi arbitrere, quum claudendæ liberalitatis propè facultas omnis est sublata. Nimirum hoc est, ut aiunt, aquam puram, & nitentem potum affectanti obturbare, aut inquinare. Quare cum ad omnem actionem, quæ laudabilis sit, tanquam ad forum quoddam honestissimum properè eundum est, tum uerò ea, quam beneficentia parit, omnem segnitiam reijcit, ac moram: ut matura beneficij collatio duplo maius illud efficere uideatur. Neq; illa nunc intelligo beneficia, ad quæ semper magna celeritate est opus, ut, cuius magno cum periculo agatur de fortunis, de honore, de libertate, de salute capitis, huic illico præsto esse: sunt enim hæc, & huiusmodi nonnulla, quæ nullam omnino cunctationem patiantur; secus locus nullus plerumq; beneficent-

tiæ relinquitur: sed tarditatem, quæ ea, quæ post tamen beneficia sunt, minus grata efficit, aut leuiora, reprehendo. Atq; hæc non maturitas tantum, sed etiam lætitia ob præclarum officium gestientis animi, quam dant & uultus, & oculi, significatio conditiora facit: tum oratio si ad hæc signa adhibeatur comes, uideatur illa ipsa quasi exhilarare, & ornare. Neq; hic sat esse debet, ut, qui dat, quo animo id faciat, tantum ipse norit: refert quidem non parum uel ad exemplum, uel ad amplificationem beneficij, uel ad aucupandam laudem ex beneficentia, ut intelligat etiam is, cui aliquid tribuitur, accipere se ab eo, qui & dedisse lætetur, & ita dedisse, ut appareat suspitione omni aut repetitionis officij, aut quæsiiti facnoris carere.

Verumenimvero multarum, quas res hæc habet, cautionum, illa est maxime necessaria, qua præcipitur, habendam esse rationem personarum, in quas beneficia conferantur. Nec locus quidem homini benefico in tota eius uita reperitur uel ad cognoscendum hoc obscurior, uel difficilior ad tractandum, uel ubi non recte agas, malorum feracior. Nam & hominum mores, ingeniaq; ut inspicere & uelis, & noris, non nisi diuturna familiaritate, consuetudineq; deteguntur: ut illud non ab re dici soleat, in dignoscendo homine modium salis confici oportere: & ubi uix demum omnia introsspexeris, atq; in quo aut iuuando, aut ornando recte, laudabiliterq; curam defigas, probè intellexeris, tam difficile est, ut aliquando, aut etiam sæpe non erres, ut nihil æquè lubricum sit, & specie interdum honestatis ad decipiendum fallax: mouet enim familiaritas, amicitia allicit, affinitas ad se trahit & quid in hoc agendum sit, optimè cognoscentes, & rationi parere

conantes: ut uel inuiti malimus his prodesse, quos nobis alia, atque probitas ipsa, causæ conciliauerunt. Plerumque etiam, quia hæ, quas diximus, causæ uideantur prætere imaginem æquitatis, et natura ueniam aliquam promereri, maxima hominum pars solos ducit et amore, et fauore dignos, quos aliqua sibi necessitudo commendauit. Quare, cuius in hac tota disputatione esset explicatio necessaria, præterea et scitu digna, et cognitu non iniucunda, illud, mihi uisum est, ne prætermitterem; præsertim cum illic labi facillimum esset, ubi admissus error facile apud multos non tam ignaros ueri, quam blandos cupiditatum suarum lenones excusationem haberet. In quos igitur conferenda sunt beneficia: nempe in eos, in quibus iuuandis iustam causam sequitur benemerentis laus; aut (quoniam à nobis, qui Christum colimus, benefactis non leuia, ut laudis alterum fortasse, si philosophos sequimur, aut ludrica petuntur præmia) principis omnium, et moderatoris dei amor. At latet facile multos æquitas ista causarum; fateor hoc quidem: quanquam ueri omnis ignoratio, cuius ipsi auctores sumus, excludit omnem ueniam peccato; uerum sequi, quam nosse, multo est difficilius. Quare, cum nobis uires propriæ non sat suppetant ad currendum, ad eum pergamus, ab eo petamus auxilium, qui et norit iter commostrare, et ad honestissimum contentionis huiusce, ut reliquarum, laborem opem implorantibus allaturum se receperit, nec falsus unquam, nec (quod homini uitium peculiare est) nulla in re mendax; atque, quod nobis in nostra ipsorum causa faciendum Socrates præcipiebat, id in aliorum persequamur; ut in uotis sit, nihil ijs præstare, nisi, quod utile, et bonum deus ipse iudicarit; minus enim lubricos, et in-

certos casus pertimescimus, ubi sapientissimi, optimiq; gubernatoris studio, fideiq; nostros commiserimus cursus. In primis autem sit ea, quæ beneficentiam peperit, charitas dux nobis ad huiusce uirtutis cultum: nam aut errori minus relinquetur loci, cum pio, Sinceroq; amor cesserit peruersus, & qui dicitur cupiditas, inquinatus amor, aut deceptos aliquando (quod omnino uitare difficillimum est) facilius à reprehensione uindicabit ex pietate laus, quæ deum sui auctorem, parentemq; agnoscit, ac refert, tantò quidem ea præstantior, quam philosophi complures uocibus magis in cælum usq; extulerunt, quàm re, uitaq; sequuti, quantò uerior, qui tenebras hominum è mentibus expellens ueritatem ipsi omnem patefecit. Ac, licet, qui hoc amore incenduntur, tum propensiores ad promerendum, tum ad dandum prolixiores efficiantur, ydem, tamen usu euenit, ut soleant esse in collocatione beneficiorum cautiore, illorumq; quibus benefici esse uolunt, aut naturas, moresq; intueri, aut merita ponderare. Hoc ideo fit, quòd is amor rationem minus labefaciat, & conuellit. Itaq; qui ad prudentiam simul studium gratificandi adiunxerit, (quanquam fieri non potest, ut alterum omnino separetur ab altero, quòd ratio, quæ id, quod bonum est, detegit, uideatur hominem ad amandum illud excitare) ei nequaquam uerendum erit, amore nimio ne peccet, aut labatur, ut temere afficiat beneficio, quem satius sit negligentem præterire: cauebit enim, ac diligenter omnia circumspiciet, ne cum alicui, tum uerò ei officiat, quem studeat suis opibus à se subleuari, aut tolli. Atq; hoc quidem, præter cætera, statuatur, ut ij deligantur, qui norint ita frui beneficio accepto, ut nullius illi sit ipsis causa detrimenti. Hoc autem quiuis assequetur, si, quod præ-

cipiunt hi, qui de officijs scribunt, non fortunam sibi decreuerit, sed mores cuiusq; esse spectandos. Quod ab illis quidem sapienter, atq; in eam sententiam mihi dictum fuisse uidetur, ut non tam fortunam parui penderemus, quàm; quid in accipientium delectu sequi oporteret, doceremur: nemo enim beneficio abutitur, quem uirtus nihil agere, nisi, quod rectum sit, & iustum, edoceat: & uulgi semper fortunæ blandientis accusatur error, de quo sic Horatius,

At uulgus infidum, & meretrix retro

Periura cedit: diffugiunt cadis

Cum fece siccatis amici

Ferre iugum pariter dolosi.

Quo nec deformius quicquam; nec homine indignius: scelus enim non unum ab eo, qui sic peccat, committitur, inhumanitatis alterum; alterum quasi proditiōis. Auxilio deesse egenti, cum ferre id possis, sanè impium est, & inhumanum: deferere in aduersis, quem sequutus sis in secundis, prodere est, & amicitiam, qua nihil melius est, turpiter, fœdèq; abnegare. Et miramur postea non magis, quàm delemus, quod liberalitas, atq; istæ gratificandæ opera sæpe accipienti ingrata accadat, aut etiam suo non parum noceat auctori. Icarco mala hæc eueniunt, quoniam nec, quæ damus, nec quibus, nosse laboramus: negligimus, aut etiam sceleratè deprimimus, quos studijs amplecti, & tollere æquum erat: qui iure negligendi ob ignauiam, aut ob scelera procul ablegandi, horum patrocinia suscipimus, his liberales, beneficij sumus: ita quotidie res eunt in deterius, dum, quæ res exactam administrandi rationem postulat, ad eam nullum consilium adhibemus, nullam curam,

ram, nullam moderationem; sed temeritate ferimur; languescimus socordia, libidine concitati fines egredimur à ratione præscriptos: ut non mirandum sit, si maximum beneficium summa quandoq; iniuria consequatur. Mores igitur antè inspicendi sunt; animi latebræ detegendæ; aperiendi recessus, nè in ea, quæ diximus, incommoda, malaq; incidamus: & ubi insit erimus assensu, reiecta omni cupiditate, quæ uirtuti inimica retrahit nos ab honesto, toto studio, & animo in beneficentiam incubamus, fructus eos demum relaturi, qui optimo cuiq; & uirtutum omnium reginam colenti debentur. Ac legem quidem hanc, qua præcipitur in collocatione beneficiorum mores esse spectandos, iccirco arbitramur esse à sapientibus latam, ut non tam recta, & laudanda sequeremur, quàm, ad quos procliuiiores sumus, uitaremus errores: fieri uero non potest, ut illic quis peccet, ubi nulla relinquitur occasio delinquendi: ut ad exercendam beneficentiam necesse sit horum sententia deligi, quorum conditionem morum sequatur promerentis laus, si laudabiles hi sint; aut reprehensio, si culpabiles, & inhonesti. Vtrumq; autem ex uitio, & uirtute oriri solet: quæ quia aut adipiscendi, aut refellendi auctores ex parte ipsi sumus, propterea aut laudamur, si uirtutem capeamus; aut uituperamur, si ad contrariam partem delabimur: neq; hæc perinde fit, atq; in his, quæ sunt corporis, quorum deformitas, nisi sit delinquentis culpa contracta, ei dedecoris nihil affingit, cui sit potius accusanda natura: ut hoc ipso nomine morum uirtutes, & uitia accipiantur, quorum alij gratiam promereantur omnium, locumq; ad beneficium quoduis sibi relinquunt, alios odia maneant, & pœnæ. Quamobrem pueritia omnis beneficiorum ex-

pers esse debet, cui fortitudo, temperantia, iustitia, horumque consimiles mores prorsus desunt, qui non nisi spatio annorum, exercitationeque comparantur: ut enim ad ætatis huius errata facile conuiuent leges, quia malitia sola plectatur, quæ nequaquam ignorantia nullam excusationem admittente falli potuerit, ita indigna fortasse potest haberi, quæ, siquid ab ipsa extet boni, minus præmio afficienda uideatur: quippe quæ imprudens fortasse, nulloque consilio illud agat, quod in uiro propter uirtutem ipsam sit laudandum: ita relinquitur, si uirtutem solam spectemus, ut molli, ac teneræ ætati fores beneficentia præcludat. Aut igitur de hoc melius à nobis statuendum est (quanquam rectè illi ad redarguendum tantum, tollendumue errorem uulgi:) aut sua quoque pueris est uirtus, quam quasi rudem, & inchoatam cernere est, si cum ea conferatur, quam in uiro diuturna exercitatio, & acre studium expoliuit, & perfecit, uirtutem tamen eius ætatis propriam, quæ, cum suis uiribus niti sat nequeat, prorsus alterius eget adminiculo, qui labantem fulciat, ac sustentet. Hæc, siue indoles sit quædam, quæ spem indicet futuræ probitatis, aut alicuius magnæ, consumatæque uirtutis; siue quouis alio nomine eam appellari libeat, cuius impulsu laudatissimorum incendatur morum, & desiderio, studioque pulcherrimarum artium detineatur, atque, id quod præcipuum est in pueris, mulieribusque; &, si quicquam aliud laudandum, (hoc enim potissimum ab ijs tanquam debitum reposcitur) parentibus, senibusque; ut illæ uiris, sic hi asuescant libenter obtemperare, istuc inquam, quod è pueritia quiuis exigit, & officijs eget maximè, &, quò plus indiget, hæc ætas auxilio hoc maiore subleuanda. Verum in eorum beneficio

rum, quæ pueris dentur, delectu magno studio, & consilio est opus. Plerique putant maximum beneficium illud fore in liberos, si amplissimas his opes cumulent, ac relinquunt: illud autem negligunt, quod, si desit, tantum abest, ut alterum sit beneficium, ut, ueluti furenti gladius ad cædem, sic iis, cum paulò adoleuerint, tanquam arma ad suum ipsorum interitum, ruinamque diuitiæ parentur, & opes. Quamobrem, ut lautiores accipiant fortunas, et multorum bonorum constituantur hæredes, neque id prætermittatur, quod utique beneficium est, si post uti nouerint, illud omnino à parentibus in liberos conferendum est, quod unum cum est illustre, tum diuturnum, ac firmum reliquas res aut secundas ornat, aut fulcit aduersas: laborandumque, ut boni esse uelint, casti, moderati, & iusti, ut discant unum deum ita colere, ut & ipse coli uoluit, & Christo addicti homines docuerunt: Nec, præter ad uitium necessaria, pueris quicquam suppeditare ullus debet, nisi perceptionis horum animi bonorum causa; quos & stimulis torpentes excitare, & alacres studiis omnibus ad præstantissima quæque prouehere oportet. Aut, si hæc minus placeant, nec pueris uirtutes prodesse uelitis, quia hæ nullæ sint, spectetur potius, quàm quicquam aliud, cuiusque necessitas: ut, cum huic consultum fuerit, sequatur post ratio probitatis: hoc enim & naturæ magis conuenit, cui prima, ac præcipua sunt, quæ necessaria; & Christiana pietas ab unoquoque requirit: quæ non minus pridem uolutatum cæno peccatorum, demum resipiscentem reuerti ad meliora cupit, quàm lætatur hominem nunquam deliquisse: nec minus operam dat, ut ex confessione delicti ueniam postulet, qui se scelere obstrinxerit, quàm ut ne se eo contamineat, ac polluat. Quod si

beneficium haud leue est, sicui bene, recteq; consulentis opera uirtu-
 tiorum sordes eluantur, cur nihil agat, qui rudem adhuc ætatem
 informet? idemq; excolat quasi incultum, & squallentem agrum?
 præsertim qui multo labore optimarum frugum sit ferax, nullo
 spinarum. Hic uerò labor, hoc studium, hæc cura tam est neces-
 saria, quàm, quæ maximè: si, qui nunc reguntur, & parent, post
 uenientibus annis rerum omnium & ipsi regimen, atq; imperium
 in cæteros sint habituri. Quare, ut præsentem puerorum uirtu-
 tem nullam, quæ tamen, ut diximus, aliqua est, contemnat benefi-
 ficentia, futuram certè amplectetur: nec tanquam benigna parens
 omnino deseret, qui propria uirtute carentes paulò scuerius sa-
 pientum detrectant iugum: quæ etiam, qua latè prædita est, uim
 suam proferens coget hominem de omnibus, qui egeant, beneme-
 reri, iubebitq; nec animum solum cuiusq; erga se, nec communita-
 tem, nec societatem uitæ, nec ad suas utilitates officia antè collata
 spectare, illorum præscripta egredientem, qui has, quas dixi, be-
 neficiorum causas esse uoluerunt. Atq; , ut id, de quo loquimur,
 quàm breuissimè fieri possit, definiatur, iustam causam conferendi
 beneficij affert probitas: iustiore necessitas: hæc enim restrictis
 or, illa latior: ornari altera magis postulat, altera iuuari: iustissi-
 mam necessitas adiuncta probitati. Ergo, inquit
 Antonius, beneficium se improbis præstare licebit, quod necessitas
 tem iuuandi secum plerumq; fert improbitas magis, quàm, quæ
 huic contraria est, uirtus. Rectè, inquit Iulius, Antoni id huic obij-
 cis, quem, nisi tu prior occupasses, omnino uolebam interpellare:
 mihi enim rei huiusce modo in mentem uenerat, cuius aures non
 minus, quàm tuas, assiduus, molestisq; deprecatoribus patere nec-

cesse est. Quamobrem hoc totum de his nuandis, qui delinquant,
 quale sit, scire percipio; ut cognoscam, quibus aut ignosci possit,
 aut aliquando succurri. Atque tum istuc, tum illa, ei ne, qui nos
 oderit, præterea, qui aut habuerit, aut, si referre potuit, accepti
 beneficii gratiam nullam rettulerit, beneficium ullum nos dare
 uelit: postremo, quo facilius omnia recordari possim, eius, in quo
 informando dudum hunc elaborare cernimus, breuem quandam
 tanquam depictam in tabula formam quaero, quam uno quasi in-
 tuitu oculorum percurram. Reliqua, inquit Antonius, subtecet
 Iacobus, ubi hoc primum enodauerit. Quidni, inquam, Antoni,
 & Iuli liceat malis hominum misereri, & quibus potest, etiam
 mederi, quem tangat humanitas, moueat misericordia, & susce-
 pti muneris dignitas impellat, ac decus? At improbi sunt, bonis in-
 festi, flagitiosi, alieni appetentes: at homines tamen: quos quidem
 modis omnibus eniti debemus ab insania reuocare: id si ab his im-
 petrari non possit, ne sit cuiuspiam uinculum amicitiae, aut societatis
 ullum cum hominibus, qui è conspectu omnium procul ablegandi
 sunt; nedum beneficio ullo dignos putes, & qui aut patronum in-
 ueniant, aut deprecatorem mereantur. Est autem in quibusdam
 insignis adeò improbitas, atque cum scelere coniuncta audacia, ut
 satius sit homines è medio tolli, quam uiuere: huiusmodi sunt, quos-
 rum malitia est perditissima contra aut immortalem deum, cuius
 atrocissime impugnant Ecclesiam, aut commune otium, aut pa-
 triam, in qua prodenda, foedissimeque dilaceranda nihil omnino
 pensi habent: de his hostibus humani generis nihil nunc loqui-
 mur, quibus aqua, & igni interdici iura omnia uoluerunt. Quo-
 rum autem improbitas non est aut tam nefanda, tamque omnibus

pestifera, aut non usque adeo perdita, & quasi conclamata, ut tanquam maculam uesti inhaerentem, eluere, atque detergere ratio nulla possit, hos non adeò excludit à se beneficentia, ut nihil his omnino consulat. In quibusdam enim, si philosophis credimus, tam altè radices egit improbitas, ut, qui tentat euellere, nihilo plus agat, quàm si operam det, ut hæc induat habitum naturæ repugnantis: contra aliorum aut adhibita cura, aut alia ratione uidentur sanabiles esse animorum morbi, ægritudinesque, quæ uitia appellantur. Neque hæc à Peripateticis dissident: quorum princeps Aristoteles censet fieri posse, ut prodigi ad meliorem frugem aliquando redigantur: cuius naturam uitij non uideo eam esse, ut sola corrigi, aut mutari possit; est & in alijs huiusmodi quiddam. Atque, ut nisi gradatim eodem auctore itur ad eam uirtutem, quæ cumulatiissima sit, ita non continuò sequitur summum uitium, ubi fuerit probitas ablegata; atque, ut, qui in partes uirtutis concesserint, dicuntur esse uirtute præditi, licet supremam metam non attigerint, sic improbi etiam & sunt, & uocantur, qui ad alteram partem se reflectendo suprema uitiorum contemnentes in eorum quasi medio constiterunt. Vtrumque ex animis hominum extirpare admodum difficile est, nec nisi diuina ope fieri istuc potest: sed id, quod summum in unoquoque dicimus, omnium est difficillimum. Quorundam legimus ex nostris tantam momento temporis commutationem morum olim esse factam, ut, qui prius uel latrocinia multis annis atrocissimè exercuissent, posteritati omni reliquerint insigne, ac præclarum exemplum pietatis. Verum id opus est unius dei persæpe arguentis philosophos mendacij, & ut idem ait, ea facillima ostendentis, ad quæ nulla humana

uis unquam possit aspirare. Quare erit in hos, præsertim si fuerint sicarii, famosiq; latrones, multò seuerior uir beneficus; nec desperatæ saluti mederi uolet; curabitq; si poterit, non tantum, ut ipse, sed alius etiam uix ullo beneficio eorum quempiam afficiat: quibus exultantibus scelere, & audacia, atq; in his excellere gloriam putantibus maximam qui opitulari quærit, ut sit turpiter, & nefariè hodie à multis, maximo se maleficio astringit; &, ut dicitur, ad suam, aliorumq; perniciem hydram alit. Reliquos autem, quibus nondum ad uiuum per sedit scabies, non ita oderit, ut nullo pacto saluos uelit: quibus ad salutem recuperandam, quæ uidebuntur, salutaria adhibebit remedia; studebitq; efficere, ut, quo se inquinariint, resipiscant à peccato. Quod si impetrarit, nihil erit hoc auctius; quo & eorum, qui acceperint, continetur salus; &, qui dederit, ab eo uel Christo sponsore ex parte dei erga se beneuolentia haud mediocre fit lucrum. Sin autem minus hoc poterit assequi, nec obstinatum animum, obdurantemq; mollire, cauendum, ne, in quo aliquis errat maximè, beneficio uim eius augeas ad peccandum. In quo tamen cum eius, quod præscribit uirtus, tum pietatis habenda est ratio: nec alterum debet ullus spoliare beneficio maiore, quàm sit illud, quod ferre in alterum cogitat, cum non uult iuuare delinquentem; præsertim si peccati natura paulò mitior ex collatione potioris officij ueniam facile impetrabit. Vt cum meretriculæ contagioso morbo grauiter ægrotanti succurritur, quam tamen, ubi conualuerit, ad priuslinam uitæ rationem reuersuram scias, unde post alicui ex eius consuetudine eiusdem morbi periculum immineat: multò enim maius est natura sua beneficium, quod præsens in uitæ periculo mulieri tri-

buitur, quàm, quo alteri minus tum cogit necessitas consulere, quem haudquaquam pro certo periclitaturum scias: præterea eisdem salutem procurare, quod pietas exigit, satius est, quàm auxilium tum negando uelle à turpitudine. uitæ auocare; citiusq; dei præceptum hac ratione exequaris, quàm si tum, quum minimè opus est, resipiscntem uelis. Hæc si serues, æquum omnino est incum minimè beneficium esse, cui te beneficio alendo peccatum obfuturum intellexeris. Quare, cum fieri non possit, ut tota simul improbitas in eodem reperiatur, cui unum, alterum uel uitium beneficentiæ partem aliquam claudit, iccirco tota huic auferri non debet: in hoc nefas est ei obsequi; at alud negare non licebit; illud uitium quoddam aufert; hoc alia carenti culpa tribuit uirtus: quæ eidem dando, atq; adimendo non uno modo prodesse potest. Dein fortasse, quo genere uitij quisq; polluatur, considerandum: non enim paria sunt peccata, ut stoici uoluerunt; nec horum eadem pænæ: si nec uirtutes pares; nec, quæ ex his ducuntur, merita præmiorum similem rationem repossunt. Vitiorum autem alia eiusmodi sunt, ut, qui ea imbiberint, nulla prorsus uenia, aut beneficio digni esse uideantur, nefarij, impij, dijs, hominibusq; inuisit aly non omnino adit ad beneficentiam interclusus, in quæ non tam secura iure fieri debeat animaduersio: alia fortasse tam leuiua, ut nulla pænâ acerbior his luenda sit, aut subeunda, quàm ut sermone paulo seueriore castigentur, nedum auxilium denegetur imploranti. Quid si etiam nonnulla uidere liceat, quæ Peripatetici tuentur esse uitia, & reprehendunt, & uerius mirandum in modum laudari à nostris, & contrà, quàm illi faciant, uirtutes potius esse defendi? Hominem floccifaciunt, & quale Thaidis conui-

tium in Socratem legimus, tanquam lapidem è societate aliorum
 eijciunt, ἀραιοῦσιν appellantes, qui palatum, ut sic dicam, prorsus
 hebetavit, qui stimulantis Veneris um omnino repressit, ac
 perdomuit, quiq; titillantium uoluptatum illecebras didicit adeò
 contemnere, ut de potentibus superatis hostilibus triumphum agat.
 At hunc nos non tam laudibus in cælum ferimus, quàm admiras-
 mur, atq; illis cælestibus, æternisq; mentibus quamssimillimum du-
 cimus, quarum uitam imitetur felicissimam, qui sit mole hac cor-
 poris & graui, & molesta depressus: nec uitio id ulli datur, sed
 uirtuti, quæ tantò est præclarior, quantò difficilius liberum habere
 in uoluptates imperium, penitusq; sibi subijcere, quàm tempe-
 rare. Neq; in ista ἀραιοῦσιν credo ad naturam confugient: quæ
 quò magis è natura esse statuetur, hòc erit eadem, quod ipsi in uiz-
 tio nolunt, minus improbanda. Huic autem persimile est, quod de
 appetendis honoribus decernunt: accusant, pro ignauo habent, &
 nihilifaciunt hominem, qui fugiat honores, quibus se dignum co-
 gnorit, aut potius, qui se indignum iudicarit, qui merenti fortasse
 debentur: contrà, quò minus sibi quisq; arrogat, hòc maior laus
 tribuitur huic à nobis, quibus nihil sit animi humilitate antiquius,
 religionis, christianæq; pietatis firmo, solidoq; fundamento.
 Hæc, huiusmodiq; nonnulla, quibus magna sunt utiq; præmia tri-
 buenda, etiam si minus laudanda statuamus ex Peripateticorum
 sententia, tamen eiusmodi esse dicimus, ut, si reliqua absint, nullo
 propè officij genere indigna esse uideantur. Id uerò minus in alijs
 uidemus. Timidum enim, ut in multis iuues, certè nunquam tribus-
 rum militum constitues, aut imperatorem, cui castra tuenda com-
 mittas, qui cum hoste confligat, qui excitet milites ad bellum, ipse,

si necessitas uocet, & anthesignanus, & contemptor mortis. At,
 si fuerit is Demosthenes, enitere hunc ad rostra, concionesq; de-
 ducere; uoles ciuum, amicorumq; causas suscipere, rem. p. cape-
 sere; quamuis, ut ille, scutum abiecerit; aciem deseruerit; hostium
 conspectum trepidans effugerit. Audens uerò, tametsi pleraq; az-
 git temere, dignior est tamen, cui præbeas gestanda arma, cui
 exercitum ductandum tradas, quem militiæ addicas: hostem enim
 sepe aduersarij pugnantis. perterret audacia; metus uel nolentem
 ad pugnam trahit. Idem, si ad rem. p. accedere uoles, multa con-
 fundet, perturbabit; maiora fortasse, quàm bonum ciuem, aut ho-
 minem probum deceat, audebit. Intemperanti iure multa dene-
 gantur: si pecuniæ plus, quàm, quæ necessitatem subleuat, largia-
 re, aut nebulonem adiges ad popinam; aut adulterum, ganeo-
 nem uel efficies habitantem, pernoctantemq; in lupanaribus: si ho-
 norem aliquem deferas, uide, ne cum ad alienas uxores ob aucto-
 ritatem muneris iure quodam liberiores aditum sibi putet. esse
 patefactum, tum uerò à labore, quem exigit. negocij alicuius su-
 scepio, reuocet turpis amor. uoluptatis. In reliquis, ueluti si uide-
 as ab aduersario capite, et fortunis oppugnari, hominẽ contra in-
 iuriam iuuare ne pigeat, si, cuius improbitas delinquentem plus,
 quàm cæteros, lædit, aut ferro, aut fame necatum uelle inhumani
 est hominis, &, in quæ peccata seuire aliquando oporteat, pa-
 rum cognoscentis, Porro, si non desit, quod sit ad tuendam uitam
 necessarium, prodigo nihil dandum, qui multò, quàm des, plura
 profundat: prouincia, unde spes aliqua lucri se se possit ostentare,
 ei nequaquam est deleganda: quoniam, ut habeat, quæ falsam
 liberalitatem incolumem tueantur, uitium cum uitio coniungit,

estq; non prodigus tantum, sed etiam sæpe fit iniustus; dum, quod suum est, alteri adimit aut ui, aut imagine æquitatis ius quoddam imperij interdum, minus illud quidem laudandum, quum scilicet eo abutitur ad libidinem, prætendentis. Tutius hic ornatu muliere, unde sola paratur gloria; qua si incendatur, & uilia odit maiora; & quod peculiare ipse habet, minus reprehensibile uidetur id facere: qui profusione fortunarum imprudens potius utatur ad rem præclaram, quam prudens abutatur. Si in prodigum nemo, nisi, qui uult esse prodigus, liberalem excepta necessitatis causa, se præbet, qui, ut se miserum perdat, cæteris tamen est utilis sæpe, quid auaro fiat? cui aut plura, aut, quæ satis sunt, habenti qui dat quicquam, non una duplicis peccati poena huic est laudanda: nam & liberalitatem claudit alijs, in quos iure illa exercenda esse uideatur, hisq; propè, quod suum est, aufert; & ei beneficio ipso se obesse non uidet; cui tantum abest, ut habenti sit impellat, aut sedet cuiusquam munifica manus, & pecuniæ cumulus additus priori, ut etiam augeat: nec ferè aliud est, auaro, qui multa possideat, largiri, atq; uelle hominem fame extruciatum interire. Auaritiæ uero quoniam non est unum genus, utiq; uidere oportebit, utram in partem peccet, qui se hac sorde inquinauerit, dandi ne, an accipiendi: utriusq; autem conuersa est ratio: est enim modicus, qui dat, qui accipit, nimius: ambobus sanè liberalitas, quæ rem augeat, claudenda: accipientem, cuius est deterior conditio, ne in honoris petitione iuues; quem post non pigebit, si adeptus sit, omnino quæstui habere rem. p., aut, si libido creuerit, omni scelere, atq; impietate dilacerare. Atq; horum quidem, quæ modo percurrimus; itemq; quorundam aliorum cam dicimus

esse rationem, ut, licet culpanda sint, non omnium prorsus beneficiorum expertia esse debeant: multa enim licet concedamus. Planèq; statuendum est, eatenus ab ipsorum unoquoq; beneficentiam tolli, quatenus à beneficio alitur, foueturq; peccatum: idq; eam ob causam uirtus cauet, nemini uti obsit, quæ omnibus uult prodesse. Reliqua qui uitat, non deserit: aut potius, quæ necessarium tanquam demortui uitij locum occupat, alteram uirtutem comest, & amica extollit; nec huic aufert, quo digna est officio, si qua culpa labes uel cuiquam inhaeserit. Omnium uero iniustitia uitium est maximum, prorsusq; detestandum, neq; odio quantumuis graui, ac magno indignum. Ac, tametsi Christiana religio, cuius tenemur legibus, bene ut sit cuius homini, iubet nos cupere, nec exigit, nisi, quæ sint humani ingenij, mansuetiq; animi officia, tam enim eodem, qui eam condidit, auctore, cum rapiente semper hominem in deteriore partem libidine, sanioraq; consilia peruertere Satana mala multa accidere sit necesse, satius esse illos offendisse iudico, atq; etiam, ut est pontificijs legibus sancitum, pœnis afficere, qui maximis sceleribus crassari maluerunt, uirtutiq; aut mediocribus peccatis ingentia uitia prætulērunt, præsertim si ad poenitentiam nihil spei sit relictum, quàm hos aut nihil, aut parum insequendo tam insignem improbitatē sceleratē, atq; impietate alere, aut iuuando ad aliorum perniciem fouere, ac tueri. Nec tantum odium malorum debet beneficium hominem à promerendo detererere, quàm trahere ad insequendum bonorum salus, quàm curæ habere & bono cuius conuenit, & deo gratum. Huiusmodi autem sunt, qui iniusti, impij q; dicuntur: est autem impietas iniustitia maxima, qua non tribuendo, quod tanquam debitum exigunt à

quouis homine bonorum omnium auctor deus, parentes, & patria, dicuntur omnia iura uiolari. Quare homines, quorum animis genus hoc sceleris penitus infederit, ita sunt execrandi, ut non multum peccet (modo suus, quum res, & tempus postulat, feruetur pietati locus) qui nullo beneficio hos frui patiatur. Tantum ad id impellat aut improbitatis odium, aut salutis aliorum causa: una enim iniustitia statum omnem rerum humanarum euertit, & proculcat: nec in huius regno societas ulla hominum inter se potest esse, nec fides inueniri.

Verum illud nosse est opus, & communione aliorum non continuo eijciendum, & prorsus nefarium, iniustumq; haberi, qui alteri aliquid aut ui ademerit, aut dolo surripuerit, aut hominem interfecerit: hæc enim turpitudini minus coniuncta uidentur, aut ueniam aliquam promereri, si causam habeant necessariam, aut minus uitiosam: ut iniustus non sit, quem ad hæc aut necessitas aliqua, aut ira, quam moderari non quouis potest, præsertim si iusta fuerit, sed, qui consulto sit malus, & eorum è numero, quos uitjs gaudere, & constanter urgere propositum Horatius asseuerat. Huic autem, quem nondum iniustum esse dicimus, licet iustitiam aliqua in re uiolarit, & ad exemplum tanquam iniusto pœna irrogetur, non est omnino patrociniū denegandum; cum & ipsius iudicis in hunc ipsum animaduersio plerumq; sit mitior, quia iustior possit effici aut asperius monendo, aut castigando paulo seuerius, qui, ut poeta idem ait, summa natans nondum se in scelerum uoraginem ingurgitauit. At alterum, non est, quod defendas, nisi malis ipse aut iniustus uideri, aut probis inimicus: illico enim bonos offendit, qui parcat malis; quos si incolumes esse uis,

illos utiq; perdas necesse est. Quamobrem iure
 cuius Ciceronem redargui posse iudicabit, qui dixerit impium
 aliquando esse defendendum, idq; cum de officijs scriberet: quo in
 loco is, qui philosophus, non orator esse uellet, cautior uidelicet esse
 se debuit, præsertim in ea ciuitate, quæ plus æquo gratiam extol-
 lebat, legi seueritatem adimebat: sic enim ait. Nec tamen, ut hoc
 fugiendum est, ita habendum religioni nocentem aliquando, &
 nefarium, impiumq; defendere: uult hoc multitudo, patitur cons-
 uetudo, fert etiam humanitas. Quidni multitudo uelit? quasi im-
 peritam, cæcam, & insipientem non noris: in quam illud sapien-
 ter dictum est. *Bellua multorum es caput:* dixisses uelle hoc. Solonem, aut alium quempiam ex his septem,
 quos sapientiæ nomine Græcia celebravit, ut fides aliqua adhibea-
 retur auctori: nunc non tam leuitas huius fidem eleuat, quàm, ne-
 qua in re, quæ sit grauis, semper delirantem sequamur, deter-
 ret, in quam fertur natura procliuior, libido. At consuetudo pa-
 titur: At peruersa, at detestanda, quæ iustitiæ aduersatur, legem
 optimam tollit, publicam salutem oppugnat. Fert etiam, inquit,
 humanitas. Fera, & abhominanda humanitas, quæ impietatem
 tuendo alit. At hoc fieri aliquando libet. Cur non satius sit odisse
 se semper, qui nunquam uult esse bonus: aut certè quando, quam ue-
 ob causam, (si tamen aliquando accidit, ut impium liceat defen-
 dere) aduocatus huic, aut patronus sit adhibendus, tibi dicendum
 erat. Non enim amicitia, quæ nulla cuiquam bono cum homine
 nefario esse debet, non cuiusquam preces, aut lacrimæ, non tur-
 pis spes lucri, non ambitio, non ingenij, industria uel ostentatio;

non deniq; affinitas ipsa; aut necessitudo ulla; quæ omnia tum uos
 disertissimos impellebant; honestè uidentur quempiam ad defen-
 sionem impietatis incitare, ac mouere. Quod scribere, inquit, præ-
 fertim cum de philosophia scriberem, non auderem, nisi idem plac-
 eret grauissimo stoicorum Panætio. Vtrum præuaricatorem
 Panætium dicam, qui, cum sit stoicus, uelit defendi, quod maxi-
 mum solumq; malum putet: quod morte peius ducat? an Cicero-
 nem suimet oblitum accusem, qui liberum se esse ubiq; tantopere
 gloriatur, nemini sese addicentem, atq; mancipantem, ea tantum
 sequentem, quæ rationi magis consentanea esse uideantur? Aut
 certè non in peccatum notior Panætius, sed in auctorem peccati,
 qui non semper nefarius est, etiam si aliquando deliquerit. At
 parum erat M. Tulli (pace tua id dixerim) hoc te tam incautè
 tulisse, nisi etiam fecisses incautius. Lulisti ergo huius stulti, im-
 prudentisq; consilij pœnas uel tua ipsius morte, uel eius interitu
 ciuitatis, quam te in primis, cæterisq; lenius, quàm par esset, im-
 prebitati indulgentibus scelerum impunitas afflixit, atq; pro-
 strauit. Vixisses credo diutius, nisi nimia ista facilitas, lenisq;
 in quem minimè decebat, natura perdidisset: nec tibi quondam
 parenti, liberatoriq; patriæ uitam is, quem bis capitis periculo li-
 beraueras, ademisset, si tyrannus fori hominem nocentissimum,
 sceleratissimumq; nunquam magno cum tuo malo defendisses.
 Ego uerò, ut proferam, hacce de re quid sentiam, defendere im-
 pium, execrandisq; facinoribus crassari gestientem, qualia sunt
 furta, rapinæ, incendia, hominum cædes, latrocinia, proditiones,
 non uldeo alicui unquam licere, nisi si quando acciderit, ut sit pri-
 uati hominis salus cum publica salute coniuncta; detrimentiq;

plus rei. p. mors huius, quam uita, allatura esse uideatur. Ut cum de illius periculo capitis agitur, qui & in ciuitate princeps, & fortunis, opibusq; affinium, atq; amicorum potens multos in idem discrimen aut honoris, aut honorum, aut etiam, ut aliquando potest accidere, salutis trahat, tum, si quis defensor em causæ huic se præbeat, aut sit paulò mitior, cui si acerbus fiat, seditionem concitet, & malum ingens urbi conslet, is uideatur nullam ex hac contentione reprehensionem incurrere: qui impio scelus tum rei. p. causa condonet. Quanquam in rectè instituta ciuitate perraro id contingit; ac, ne eueniat, & seuera animaduersione in reos, & extinctione gratiæ prudentibus gubernatoribus multò antè prouidendum. Secus non modo non defendendus uidetur, sed oppugnandus etiam, & à communione ciuitatis aut exilio, aut morte depellendus. Reliquis autem, quorum leuiora sunt peccata, potest citra impietatis famam succurri, aut aliquod officium præstari, modo ne ex opera, officio'ue sequatur alterius iactura grauis.

Atqui dicet aliquis fortasse, etiam si iusta sit defensio, in hominem, quicum inimicitias, aut similitatem gerat quispiam, qui iniuria forte haud mediocri affecerit, ut non inuehatur, sit'ue aliquanto lenior, certè nolet is tueri; nec causam agget, si periculum capitis inimicus adeat, si pro fortunis, si pro fama sit ei dimicandum. minus autem dolebit, (sunt enim multi, qui cupiāt alios potius suas ipsorum ulcisci iniurias; multò plures, qui hoc à se ipsis petunt) cum inimicum uiderit se tacente, & quiescente concidere, ac ire pessum: idemq; existimabit, qui nihil cogitet, nec quid præscribat uirtus, quid religio præcipiat, nec item quid toti ciuitati sit utile, nulla humanitatis lege teneri ad

collationem in eum beneficij, à quo iniuriam, aut damni aliquid acceperit. Non deerunt, qui uel exemplis quotidianæ uitæ, quæ utinam ne tam multa essent, uel philosophis quibusdam auctoris bus hanc ipsorum opinionem foueant, & alant, ueritatem non magis inani quadam ostentatione ingenij obscurantibus, quàm illos, qui docentium auctoritatem sequuntur, inquinantibus turpis exemplo uitæ. Si enim, inquiunt, ei debetur gratia, qui beneficium » dat, cur pœnam non luat, qui fert iniuriam? si amorem meretur, » qui alicui bene esse cupit, cur non odium, qui malè? deniq; cur non » deceat par pari referre? At natura nihil exigit ab homine, nisi, » quod honestum est, & laudandum: potest ne laudari, qui alterum lædat, ad quem iuuandum sit natus? At prior laceffuit. Quasi non agat is turpiter; qui ei obesse cogitet, qui nunquam damnum dederit, turpius uerò propè, qui turpem mali auctorem malit iniuriari, quàm aut ipse uideri bonus, aut alterum, ut inquit diuus Paulus, exemplo laudabili patientiæ, constantiæ ue, ac probitatis auocando à peccato ad amorem iustitiæ, pietatisq; trahere, atq; inflammare. Potest ne laudabile odium uideri, quod sit mali alicuius, damni ue interdum maximi causa non uni tantum, aut paucis, sed, si hoc inter se principes flagrarint, quale nunc uidemus, uniuerso terrarum orbi? Natura, cuius unica est in conseruatione rerum cura, hoc abhorret; humanitas rejcit; ratio damnat. At qui, dicet aliquis, legis animaduersio in iniuriam admonet non esse turpe hanc ipsam uindicare; quæ fortasse ueram huiusce causam minus intuenti uideri possit unicuiq; in eo ferre auxiliu, ad quod propriæ non suppetant uires. Cur enim non liceat homini priuato, si possit, ei malo, quod illatum sit ab altero,

ea ratione mederi, qua huic ipsi à communi gentium consuetudine
 ex se impotenti quaeri medicina solet? iccirco non decet, quia
 turpe sit, ac propterea à lege iusta poenae irrogatione multatum;
 quæ & eum, qui passus sit, minus, quid sit æquum, propter odium
 considerantem, ac uidentem dempta ulciscendi facultate malo
 exemplo iniustum esse non sinit, & qui tulerit, castigando uide-
 tur arguere improbandi, ac turpis facti. Secus non uidebitur esse
 iusta lex, quæ, quod honestum sit, auctorem plectendo, tollat. Sed,
 si auctoritas alicuius eruditi, ac sapientis uiri quæ ratur ad ueritatem
 aut declarandam, aut confirmandam, nullus afferri poterit
 Aristotele uel perspicacior uel multarum, uariarumq; rerum
 peritior. Is igitur in his libris, qui sunt de arte dicendi, scriptum
 reliquit, satius esse iniuriam pati, quàm facere: digna uox homine
 & docto, & graui; qui, quod turpe est, & uituperandum in in-
 ferenda iniuria, facientis tantum esse statueret, patientem ab
 omni nota infamiæ liberaret: ut uidelicet à ui alterum deterre-
 ret, in qua inesset turpitudine; alterum non tam ut molliret ea uac-
 cantem, quæ iustius ad iram posset impellere, quàm ut à libidine
 ulciscendi metu maioris mali, quod unum est turpitudine, inflam-
 matum reuocaret. At uindictæ sublatio nullam liberalitatem, aut
 beneficentiam infert; hoc est, sat actum abs te putes, si, quod utiq;
 faciendum est, iniuriam non persequaris; nedum ad beneficium in
 eum, à quo illum acceperis, teneri te arbitrere. Respondetur,
 nunquam honesto illud auferri, quod est honestius, ac laudabilius,
 sed utriusq; tantam affinitatem, coniunctionemq; uideri, ut alte-
 rum ab altero diuelli non possit; quod si seiungas, iam non honestum
 erit, quod laudem maiorem aufert: iniuriæ enim, quæ bene-

ficio spoliat, remissio potius culpanda est, quàm laudanda: nec satis ignouisse is uidetur, cui ea sit ad promerendum impedimento. Aut, si alicuius tamen permittatur uindicta, ut hi uidentur facere, qui lxxsam existimationem ui armorum honestè quosdam tueri posse censent, certè propterea uidetur esse concedenda, quòd grauius malum leuiore propulsatur. Itaq; iniuriæ perpeccio coniuncta cum honestate (ut interdum aliqua detur, quam honestè pati priuatus quiuis non possit) beneficentiam Aristoteli non tollit: secus pugnabit cum honesto; quòd fieri nullo pacto potest: necessarioq; illud sequitur, eum, qui aliqua in re alterum offenderit, non mòdo non habendum esse pro inimico, sed amandum etiam, & beniuolentia adèd completendum, ut non secus, ac si damni nihil attulisset, iuuat. Vult hoc ipsa uirtus, quæ tum præclarior uideri solet, quum, quòd factu admodum difficile est, iniuriam beneficio compensat. Sed quid hominem sequimur, qui deum habemus auctorem? Quid lucem quærimus in tenebris, quorum ex oculis nubes pridem omnes, noctemq; profundam fugauit maximi, clarissimiq; aduentus solis? nefas eius auctoritati nolle acquiescere, à quo planè quicquid ueri cæteri protulerunt, tanquam à sapientiæ, ueritatisq; fonte abunde omnes haurire potuerunt. Vtrumq; Christus est complexus, uoluitq; & inimicos diligere, & hos ipsos à nobis iuari, ne dum aut ardere in hos odio, aut ulcisci, atq; de inferendo malo quicquam cogitare. Nec semel hoc præcepit: sed, ut, quam præcellens res esset, ostenderet, hoc uno bonitate, perfectioneq; charitatis docuit nos fieri posse deo quam simillimos: qui bonis, malisq; pariter solem impertiat cum, quem ille, ut reliqua, procreauit. Nec Cai Iulij Cæsaris clemen-

tia, qua multi non modo sunt ab eo conseruati, sed etiam beneficijs aucti, tot, tantisq; laudibus esset à M. Tullio Cicerone celebrata, nisi hostibus ita parcere, ut prateritarum iniuriarum recollectio nulla ijs occludat beneficentiam, gloriosum, et uiro forti dignum duceretur. Nemo unquam, inquit ille, Cæsar te placauit inimicus, qui ullas residisse in te simultatis reliquias senserit. Quamobrem iur beneficis nulli insensus erit, nisi idem sit omnium hostis: nec odium, aut alacrius iniuria ab instituto amouebit, modo ne in his, quæ diximus sequi hunc debet, discedatur ab honesto. Eandem quoq; promerendi rationem, ut hoc non omittatur, de quo aliquis fortasse ambigat, erga homines ingratos seruare oportebit, fruunturq; hi secundo beneficio, licet gratia nulla relata sit priori. Quorum omnino duo sunt genera: alterum est eorum, quos non modo compensandi facultas oblata nihil ad id mouet, ad quod honestas ipsa trahit, aut beneficiorum oblitos, aut commoda tantum sua persequentes, sed ne cupere quidem occasionem ullam referendi uideas; quo quidem uno gratus esse potest, cui deest facultas: ex altero sunt, qui tantum abest, ut de referenda gratia quicquam cogitent, ut benemerentem de ipsis etiam oderint, interdum uel beneficium sequatur iniuria. Vterq; est iniustus, quia minus soluendo, quod debet, uideatur, quod suum est, alteri auferre: lege enim natura, iurēq; humanitatis eadem his debemus omnes, quibus aliqua amoris officia nobis præstita nos antè deuinxerunt. Multo autem alter est iniustior, ac deterior, à quo non unum scelus committitur: etenim non modo alieno fruitur, quod utiq; persoluens est, præsertim si & reposcat, qui dedit, & possit reddere,

qui accepit: sed etiam (quod peccatum est maximum) ei, qui iure potest beneficium repetere, damnum infert. Atque, cum multis modis iustitia uioletur, (quidam enim uim apertam denunciant, alij dolo circumueniunt incautos, fidem alij fallunt) pessimè fortassis omnium agit, qui hac ratione ad iniustitiam delabitur. Nam, præterquam quod fidem uidetur is fallere, dum deceptum se uidet, qui beneficium et rectè se collocasse putauerat, et spe fortasse exigendi, quum, ut est uicissitudo omnium rerum, necessitas preloberet, dederat, arguit se esse pessimum, atque iniquissimum, quem exemplum, ex quo propria ducitur utilitas, non ualet nec ad bonitatem allicere, nec trahere ad amorem æquitas: cui quidem exemplo si se inimicum præbeat, ne hominem quidem hunc esse dices. Deinde tollit amicitiam; commertia multa aufert; coniunctionem, et uoluntatum, et studiorum dissipat, qui gratiam hoc pacto extinguit: est enim mutua officiorum collatio firmissimus humanæ societatis nodus; quem in tanta hominum se plus æquo respicientium coluione dissolui necesse est, nisi conciliationem gratiæ beneficio quærenti pari et uoluntate, et, si facultas concedit, officio etiam respondeatur. Has ob causas, ingrati qui sunt, (præsertim quum aliquis damnum accipit, à quo boni potius aliquid sperandum erat) iure odia incurrunt multorum, non eorum tantum; quorum spem improba fallendi ratione eluserunt, sed hominum etiam, ad quorum aures turpis facti sola fama peruenit. In quo, præter scelus, inest interdum aut sordes auaritiæ, quæ referendi studium aut retardet, aut planè auferat; aut quidam fastus animi gratiam nonnunquam contumeliosè negligentis. Scilicet paucos inuenias, quorum delictis

minus, quàm horum, uenia impetranda esse uideatur; quum tamen huiusmodi esse constat, ut non falsò ipsis nota hæc iniuri possit. Etenim multos uidere est hoc crimine condemnatos, qui tamen nec ingrati sunt dicendi, nec huius ignominie macula deturpandi. Hoc ideo fit, quoniam non satis potest ueram rerum rationem iudicium animi in plerisque deprauatum intueri, ac nosse. Permulti existimant gratiam quamlibet ad conferentis arbitrium compensationem sequi oportere. Quid ergo, si quis olim in capitis iudicio nocentem defenderit, fortè autem accidat, ut huius opera, qui beneficium accepit maximum, hostem is ulcisci uelit, num hominem occidat, metu ne habeatur ingratus? at, qui beneficium repetit, si hoc neget alter, queretur fortasse hominem ingratum à se esse conseruatum: qui uerò melius, quid honesta exigat compensandi beneficii ratio, cognorit, laudabit, qui in re turpi nequaquam uereatur famam ingrati hominis, & nomen. Honores alteri à quibusdam deferuntur: dantur imperia: ex ærario multa tribuuntur; Cur? ut habeant qui sue ipsorum faueat libidini; qui iniustum forte imperium tueatur, aut etiam augeat; qui in re minus honesta iuuat: hoc si non faciat, uulgò habeatur ingratus; immo uero, si faciat, & turpis, & eius, quod probum hominem deceat, ignarus. Addixit quis operam suam diuiti, ac potenti; in hoc industriam suam multos annos exercuit; eius commodis sedulo, ac fideliter inseruiuit; tandem (sic diu uoluisti) longò labori aliquid affertur præmij: solutionem mercedis statim sequitur laborum finis. Vtrum iure (ita enim audio fieri à multis hodie) hic uocetur ingratus, cui nihil gratis sit datum, an ille auarus, & durus, qui ex præteritæ operæ præmio persoluto

non exigat, aut futuram? Qui igitur erunt ingrati? illi scilicet, qui reposcenti, præsertim si is egeat, quum poterunt, nolent laudabiliter referre, quæ aut nulla mercede redempta, aut ab homine nullum turpiter beneficium fœnerante ipsi antè acciperunt. Quæ cum ita se habeant, nunquam ab honesto diuellet, eum, qui se beneficorum numero ascribi uolet, nisi quod turpe est. Porro semper laudabile est benemereri de altero, modo ne beneficium cuiquam obfit: quare & ingratis non est beneficium denegandum, utcumq; & ipsi postulabunt, & seruata honestate facere id licebit. Nec quemquam fungentem hoc præstanti munere debebit aut retardare, aut ab instituto cursu dimouere alterius improbitas, quæ nulli noceat, nisi exemplo fortasse: est enim ea uitij huius natura, ut, nisi secum damnum afferat, solum non sit alia ratione causa detrimenti, atq; ea, quam attulimus. Nam tametsi uidetur esse iniustus, qui, quam debet, tantum gratiam referre negligit, minus tamen peccat, quia alieno tanquam proprio eius, qui lubens dedit, bona gratia frui uideatur. At peccatum alit, qui gratificatur ingrato: non alit ille quidem, ut intemperantiam, qui intemperanti plura, quàm sit necesse, largitur: est enim huius, & aliorum dispar ratio: nam, nisi secum alterum uitium coniunctum habeat, quatenus est ingratus, de sua ipsius fama multum detrahit: gratificantis auget: at intemperans, ut in eodem persistamus exemplo, & suum, & alterius interdum lædit nomen: cuius promerendo delictum foueatur. Secus autem hîc accidit: fieri enim aliquando potest, ut, qui prius ingratum se præbuit, postremò quasi uictus assiduus alterius officijs reuocet se se ab errore, atq; sludeat, quæ antè neglexerit, ea

ipse compensare. Non ita est in cæteris, quibus quò plura conferas, hoc maiora sufficias ad augendum alimenta: aut si ingratus is esse persistat (modo ne sit homo de se benemerentem lædendo nefarius) nocet, ut paulò antè dixi, exemplo tantum: aufert enim sæpe futura in alios beneficia eorum improbitas, qui præteritorum in se immemores fuerunt. Quanquam ab eo, qui est à nobis hoc sermone institutus, minimè uerendum est, ne sui oblitus uelit dedecorare personam, quam gerit: qui ei citius proderit semper, quem officia nulla antè collata hominem gratum efficere potuerunt. Nec ueterem sequetur sententiam,

Perdenda sunt multa, ut semel ponas bene:

perdere quidem multa uolet, non tamen ut semel bene ponat: quem immortalis Dei sola bonitas ad promerendum compellet.

Itaq; alterius culpa delinquentis nunquam is esse nolet, qui esse debet: nec se ea laude spoliari sinet, qua planè nulla est uberior. Quid enim homine benefico fructu optabilius, fama illustrius, pietate deo immortalis similius? obesse uult nemini, omnibus prodesse, bonus quidem ipse, sed ita, ut alijs, quàm sibi, bonus esse malit: sui profusus: alieni nihil appetens: contemptor in dando gloriæ: uirtutis unius, ac pietatis amator: obliuiscens à se collati beneficii: accepti memor. In quo maior fortasse est huius laus ea, quæ ex animi magnitudine ducitur, quàm eius, quem proprio magis nomine magnanimum uocitans Aristoteles uoluit conuersa ratione collati esse memorem, accepti obliuisci: is enim gloriæ omnino contemnit, aut non tam ab ea rapitur, cuius ille fortasse nimis est appetens, dum sibi amplissima quæq; arrogans hanc ipsam nò minus, quàm, quod pulchrum est, persequi uidetur.

Ac benefici quidem hominis, ut & res, & uox ipsa indicat, proprium est maximè largiri alteri, ac dare, de se minus sollicitum esse, & anxium, aliorum uerò commoda respectantem minus ab his accipere: ab hoc tamen ipso non penitus debet abhorere; nec ita habere religioni, ut, licet id profiteatur, quod diuersum est, atq; excellens, pudeat, si egerit, aut ultrò oblata recusare, aut ab eo, qui possit dare, & uelit, cuiuscumq; generis beneficia postulare. Cauendumq; potius, ne in eo ipse peccet, quod reprehendat in altero: amat enim, aut etiam sibi dari optat, (adeò gratificandi est amore flagrans) qui petant, qui uel indigeant adminiculo, qui currenti calcaria adhibeant. In quo si torpentes uiderit, dolet, accusatq; negligentia: sæpe etiam illud in hos dicitur, non ueretur accipere, qui libenter dat: neq; enim ita inuidet alienæ laudi, ut hac alios omnino carere uelit; omnes cupit esse beneficos, ita tamen, ut quicum hac gloria conferri possit, habeat usquam neminem. Igitur accipiet quidem, sed ita, ut ipse dabit, hoc est, nihil exiget ab altero, nisi quod æquum est, & bono dignum uiro; noletq;, ut nomen suum retineat, aut in petendo cupidus uideri, aut in accipiendo multus: nimirum utrumq; cauebit, si necessitas sola impellet inuitum, ac nolentem; qui tamen omnia ante expertus fuerit, si posset non egere: estq; aliqua accipientis laus, si sit accipere cum honestate coniunctum. Verum in hoc differt is ab eo, qui huiusmodi non sit; quòd hunc oportet semper de referenda maiore mensura gratia cogitare: secus non erit beneficus: illum autem nihil necesse; qui, si referat, gratus tantum uideri possit. Atq; is quidem, qui non est beneficus, eos

rum est, quæ dat, beneficiorum memor; quæ uel cum favore nonnunquam cogitat repetere: at hic noster propè delet è memoria quæ ipse dedit: neq; fas est istæc animo repetere, nisi aut se ipsum ad maiora excitandi, aut cum præteritis recensitum coniunctionis causa. Nunquam beneficium ulli commemorat: ne commemorando aut repetere, quod minus ipsi conuenit; qui dedit, ne post acciperet; aut, quod auari est sua tantum commoda collatione ista beneficij metientis, illud se fœnerantum esse se, non utiq; dedisse uideatur. Vereturq; , ne illud in se audiat, quod Terentianus Sossia in herum, qui seruum libertate donauerat, scitè protulit, incautum fortasse, minusq; , quid uirtus hæc uellet, cogitantem: qui sic loquendo beneficium prudentiori exprobrare uideretur:

Sed hoc mihi molestum est, nam istæc commemoratio

Quasi exprobratio est immemoris benefici.

Atqui ne immemori quidem exprobrare licet: hoc enim qui facit, indicat se beneficij penitere, qui accuset eius immemorem. At uir beneficus, tantum abest, ut doleat unquam, siquid officij alicui præstiterit, (nisi mali aliquid, quod ipse nō sat prospicere poterat, sit ex hoc ipso subsequutum) ut stimulatæ lætitia, qua ex collato afficitur, ueteri, si possit, semper addat nouum, idq; , quia nihil spectet, nisi, quod sit in conferendo honestum. Quod iustius reprehendendus Simo, qui, quod liberum hominem scire deceat, ignoret; Sossia ignoscendum, qui, quod seruus esset, philosophos nunquam adiit, à quibus perdiscere id poterat. Quod si aliquando commemorandum sit beneficium, hoc ita faciendum est, ut alterius causa uideatur hoc facere. In quo

planè habet, quem imitari possit, deum: qui peruicaci populo beneficia sæpe commemorauit, quæ multa, & ampla in eum contulerat: non ut repeteret, quorum ille nihil indiget; neq; bona attulisse pœniteret, à quo nihil omnino mali potest existere; sed ut commemoratione beneficiorum resisterent à peccatis, auctorem agnoscetes, à quo malitia eorum omnis iure sua bonitate superari, profligariq; debuit. Nullius opes quantumuis amplas, & ingentes cupit, & miratur; quia alterum potius sit iniusti, & auari; stulti alterum, & uera bona nescientis; præterea ab eius natura alienum: qui si adipiscatur, aut paret, sibi minus, quàm cæteris futurus sit diues; nec, si habeat, honestis etiam rationibus nimis studeat augere. Nam, cum præcipua in dando semper aliquid alteri sit huius cura, haud facillè animum ad rem amplificandam applicat, qui, quod iam habet, non adeò magnificat: nec facillè potest id crescere, de quo semper aliquid, aut sæpe, quàm addantur, plura demuntur: si non habeat, plus optat, quàm quærit, idq; aliorum magis, quàm sua ipsius causa. Neq; mirandum est, si multis longè inferiorem opibus uideamus. Cur enim mediocres esse, aut tenues fortunas eius dolemus, quem cupimus esse liberalem? Beneficus qui est, omnium amatur maximè: quidni? si bonus est? si probus? si, quæ maxima est ad conciliandum amorem illecebra, omnibus perfugium sit, ac tanquam fluctibus iactatis portus? Diuitias huic Crassi, & uicos, multorumq; prata cuncti optant; bona cuncta præcantur: iustius quidem, quàm Crasso, reliquisq; diuitibus; qui uel ad eas,

quibus effluerent, parandas uoluptates his ipsis abusi, uel ad iniusta plerumque imperia iter hinc sibi munientes aut nullo bono, aut, ad quos tantum libido protraxit, paucis admodum profuerunt: indigni penitus ob turpissimos ipsorum mores, qui, quæ iure tantæ uirtuti debentur, abundarent. Vos cant ad honores, & imperia; regnum, & diadema uni deferunt: rectius fortasse, & sapientius, quàm, qui tum se stoicum professus regem constituit,

Quisquis ingentes oculo irretorto

Speculat aceruos.

Non enim dignus est imperio, qui diuitias tantum contemnit, reicitque; quod fecit Socrates; nec locuples, qui hac ratione sibi diues esse studet: regisque munus, quale id esset, interdum minus hi cognouerunt, qui fastu quodam se inferiora cuncta ducentem, beatus ut esset solus, in solio locauerunt; sed, qui se minus amans, sibi parum degens illud unum uult, curat, nititurque; ut mortales omnes sint quàm beatissimi; hunc regem, & rerum dominum constituas oportet, hunc ditissimum, hunc opulentissimum esse cupias. Quæ quidem non usque adeo negliget, ut, sicut illi, odisse uideatur: (etenim honorem quantumuis paruū, si detur, lubens accipiet; idque, ut habeat, quo prodesse possit; nisi fortasse, muneribus olim perfunctus sit amplissimis) sed cupiditatem temperans nec oculos horum perstringi fulgore patietur, nec rationem ita peruertere, ut non libenter meminerit, non in possessione diuitiarum, sed in usu opulentiam esse positam; qui tum sit laudatissimus, si non ipse magis, quam cæteri perfruantur.

Quamobrem iure hominem hunc debemus colere, & admirari; quem tot, tantisq; laudibus cumulatū cernimus, ut reliquis omnibus longè antecellat, qui alia ratione, atq; industria immortalitatem non illam quidem solidam, ac ueram, qualem hic adipiscitur, cupidè sibi quæsuerunt; præterea totis uiribus imitari, enitiq; tales ut ipsi efficiamur, quales esse uult natura ipsa, humanitatisq; ratio; incendit gloria; iubet imperator deus. Nec alia ratione, quæ potior sit, & parenti omnium gratior, unicuiq; patefit ad cælum uia, atq; cultu beneficentiæ; quæ mortales cum illustres, clarosq; facit, tum uerò & hominibus, & deo ipsi charos; à quo quidem præstantibus horum meritis præclariora, amplioraq; præmia tribuuntur. Nunc, inquit Antonius, Iuli habes, quæ cum Iacobus studio istī tuo honestissimo, & amplissimæ auctoritati à se deberi arbitraretur, ita excoluit, ut non ipse tantum, qui ad omnia magna, & præclara es natus, sed quiuis etiam, si modo præceptis obtemperare uelit, fieri is possit, qui cum in tota disputatione, tum uerò in extrema eius parte quasi ad uiuam effigiem nobis est expressus. Nisi aut fortasse malis unguēs sedulò nimis eum imitari; qui tamen, ut uideo, citius totum corpus coloribus animauerit, quàm rudi delinearit penicillo; aut sol ipse præcipitans ei sinem non statuatur, imponatq; labori, quo plura discendi amore prouectus pridem fatigatum minus leuari sinis. Planè, inquit Iulius, cumulatū est istuc beneficium: nec, cum plura, eaq; maxima habeam, debeo admodum, quæ desunt, pauciora, leuioraq; curare, facile hæc ipsa assequuturus, ubi paulò ad cogitandum se animus applicuerit. Quare libenter ei

permulto, nunc ut quiescat: meminerit tamen in hisce honestissimis contentionibus hoc ipso in loco, aut, ubi fors tulerit, sibi posthac non semel esse laborandum: qui, si non paruerit, tanquam reus ad prætoris tribunal ire cogetur.









